

SC. SUP. 23. PL. 5.








R. P. Fr. VINCENTII
CONTENSON,
 ORDINIS
 PRÆDICATORUM
 Sacræ Theologiæ Professoris;
 THEOLOGIA MENTIS
 ET CORDIS:
 SEV

Speculatio universæ sacræ Doctrinæ, pietate temperata; è Patribus, Doctore potissimum Angelico derivata.

TOMUS V.

In quo necessitas gratiæ infirmitatem humanam adjuvantis stabilitur, & varii circa Gratiam errores proponuntur.

Lucere vanum : ardere parum : lucere & ardere perfectum. Bern. serm. de Nativ. Ioan. Bapt.



*ex libris
 van
 pastoris in*



*premi franc
 bresnois
 Revue l'gher*

LUGDUNI,
 Sumptibus LAURENTII ARNAUD, PETRI
 BORDE, JOANNIS, & PETRI ARNAUD.

M. DC. LXXXI.
 Cum Approbationibus & Privilegio Regiæ.

RECEIVED
CONSTITUTION


OF THE
FEDERAL GOVERNMENT
THE DEPT. OF THE INTERIOR
AT WASHINGTON

TO THE
COMMISSIONER OF THE LAND OFFICE

FOR THE
PURPOSE OF
RECORDING
THE
DEED OF
CONVEYANCE

THIS DEED OF CONVEYANCE
WAS RECORDED
ON THE
10th DAY OF
JANUARY
1880
AT WASHINGTON


IN WITNESS WHEREOF
I HAVE HEREUNTO
SET MY HAND AND
SEAL
AT WASHINGTON
THIS 10th DAY OF JANUARY
1880



INDEX

DISSERTATIONUM,

Capitum, Speculationum, &
Reflexionum, quæ in quinto
Tomo Theologiæ Mentis &
Cordis continentur.



LIBER VIII.

De Deo Primo Motore, & de gratia
ipsius.

Præloquium. pag. 1

Ordo & æconomia hujus Tractatus. p. 4

DISSERTATIO I.

*De generali primi Motoris influxu, & creatu-
ra intellectualis ab eodem in omni statu de-
pendentia.* p. 6

CAPUT I. **D**E variis humanæ naturæ sta-
tibus. 3

SPECUL. I. Septem naturæ humanæ sta-
tus proponuntur & explicantur. 10

De statu justitiæ originalis; & utrum compate-
at. 2

Index Dissertationum,

retur peccata venialia.	12
<i>De aliis quatuor statibus.</i>	17
REFLEXIO.	10
SPECUL. II. Status naturæ puræ est quidem de potentia Dei absoluta & extraordinaria possibilis, non tamen conveniens, subinde- que nec possibilis de potentia ordinaria.	23
Angelicæ D. Thomæ sententiæ probationes.	28
Status naturæ puræ non est conveniens, nec de potentia ordinaria possibilis.	36
Alia naturæ puræ inconvenientia.	47
REFLEXIO.	53
SPECUL. III. Homo in statu naturæ lapsæ longè est debilior ad bonum morale operan- dum, longèque pronior ad malum perpetrân- dum, quam fuisset in statu naturæ puræ.	54
Solvuntur objectiones.	62
REFLEXIO.	66
CAPUT II. Hominis à Deo Primo Motore in omni statu dependentia suadetur.	69
SPECUL. I. Motio Dei ad benè agendum ho- mini in omni statu necessaria est ratione de- pendentiæ & subordinationis causæ secundæ ad primam: unde si concursus Dei sit prævius prædeterminativus, talis etiam erat in statu innocentiæ.	70
Probatur secunda pars.	74
REFLEXIO.	89
SPECUL. II. Confirmatâ ex Discipulis S. Au- gustini eadem veritate, explicatur perdifficilis ex libro de correptione & gratia depromptus locus.	91
Objicitur perdifficilis Augustini locus.	96
Augetur vis argumenti, repræsentatâ accuratâ Augustiniani libri synopsi.	100

Capitulum, & Speculationum.

Vera Augustini explicatio.	118
REFLEXIO.	118
SPECUL. III. Sanctitas divinæ motionis defenditur, eamque in concursu ad opera peccati illibatam permanere monstratur.	122
Premittuntur quæ apud Catholicos omnes sunt in confesso.	124
Explicatur tandem & dissolvitur difficultatis nodus.	138
REFLEXIO.	139

DISSERTATIO II.

De Deo infirmitatem nostram cum ad dignoscendum verum, tum ad operandum bonum per gratiam adjuvante: & quid ac quotuplex sit gratia illa. p. 142.

CAPUT I. **D**ivinæ gratiæ infirmitatem humanam adjuvantis necessitas stabilitur. 143.

SPECUL. I. Ad cognoscendas naturales veritates non quidem gratiâ supernaturali, sed tamen auxilio Dei moventis & illustrantis indigemus. 144.

Solutio objectionum. 154.

REFLEXIO. 157.

SPECUL. II. Nullum prorsus etiam moralis ordinis bonum velle, vel efficere absque speciali Dei adjuvantis gratia in statu naturæ lapsæ homo potest: quæ quidem gratia, licet eidem communiter præsupponat, non tamen necessario, & multò minùs gratiam habitua- lem, vel charitatem. 160.

Index Dissertationum,

Fides ad bona opera communiter, non tamen
indispensabiliter & essentialiter est necessaria.

174

Solvuntur objectiones. 187

Aliæ objectiones è ratione petitiæ dissolvuntur.

Examinatur præceptum omnia in Deum re-
ferendi. 200

REFLEXIO. 221

**SPECUL. III. Ex præjactis fundamentis necessi-
tas gratiæ in speciali, & singulatim quibus-
dam confectariis derivatur.** 223

**Confectarium I. Nulla sine gratia Dei superari
tentatio potest.** 224

**Confectarium II. Nequit homo in statu naturæ
lapsæ Deum super omnia efficaciter sine gra-
tia diligere.** 232

**Confectarium III. Præcepta legis naturalis
sine speciali Dei auxiliantis gratia servare
homo in statu naturæ lapsæ non potest.** 248

**Confectarium IV. Ad vitanda quævis peccata
venialia requiritur præter gratiam speciale
privilegium soli Deiparæ Virgini eximium.**
256

**Confectarium V. Perseverantia est speciale gra-
tiæ donum, imò & gratiarum omnium coro-
nis.** 265

**Confectarium VI. Gratiæ adjutorium ad ope-
ra supernaturalia omninò desideratur.** 271

**Confectarium VII. Objectionum quæ contra
hactenus statuta proponi solent, confuta-
tio.** 284

REFLEXIO. 299

**CAPUT II. Quid sit Christi gratiæ adjutorium,
exponitur.** 302

SPECUL. I. Multiplex gratiæ divisio exponitur.

Capitulum & Speculationum.

& nonnullæ controversiæ dirimuntur.	303
Quæres primò, utrum Deus omnibus auxilia sufficientia conferat.	318
Quæres secundò, utrum justis denegentur inter- dum auxilia sufficientia?	325
Quæres ultimò, undenam gratia Christi suam efficaciam sortiatur; num ab omnipotentia Dei, num ab eventu, num à consensu per scientiam mediam præviso?	329
REFLEXIO.	331

DISSERTATIO III.

Historica.

*Varii circa gratiam errores recensentur, Pela-
gianorum potissimè, & Semipelagianorum
historia texitur.* pag. 337

ANtiquiores circa gratiam errores. ibid.
Hæresis Pelagiana, ejusque varii status.
340.

Quæres primò, utrum in illo statu Pelagius
concursum simultaneum negaverit? 348.

Quæres secundò, utrum Pelagiani gratiam ha-
bitualem inficiati sint, & de illa fuerit præ-
cipua Augustini cum Pelagianis controver-
sia? 349.

Quæres tertio, utrum in illo statu Pelagiani
gratiam operis, quæ facit benè velle, & be-
nè agere, tandem admiserint? 357

Damnatio Pelagii. 363

REFLEXIO. 368

Prosequutio ejusdem dissertationis de hæresi Se-
mipela

Index Dissertationum.

mipelagiana, ejusque sectatoribus.	370
Monachi Adrumetini.	378
Vitalis.	379
Massilienses.	ibid.
Ioannis Cassiani, Fausti Rhegiensis, & Gennadii errores.	383
Quæres primò, utrum Semipelagiani, dum vel- lent initium salutis esse à nobis, omnem ex- cluderent gratiæ internæ necessitatem.	387
REFLEXIO.	397
Appendix unica, ad dissertationem præceden- tem de Prædestinarianis.	401
§. j. Nulli fuerunt quinto seculo Prædestinaria- ni hæretici, sed eo nomine S. Augustini dis- cipuli à Semipelagianis calumniosè traducti sunt.	402
§. ij. Objectorum confutatione sententia nostra magis firmatur, magisque exploditur Præde- stinarianæ hæreseos commentum.	412
§. iij. Prædestinariana hæresis nequaquam fuit in Gallia per Gottschalcum renovata.	430
REFLEXIO.	437

DISSERTATIO IV.

*De gratia habituali animam sanctificante,
& iustum reddente : & de merito iusto-
rum.*

444

CAPUT I. **G**ratia sanctificantis & justifican-
tis essentia, proprietates & le-
pôres.

445

SPECUL. I. Gratia sanctificans est qualitas divi-
nitus infusa, substantiam animæ immediatè
affi-

Capitulum & Speculationum.

afficiens, & formaliter exprimens Naturam Divinam, ut natura est, non verò ut est actus purus, & ens per essentiam.	446
Gratia divinitus infunditur.	453
Gratia est formalis Naturæ Divinæ participa- tio, & quomodo?	456
REFLEXIO.	470
SPECUL. II. Corollaria derivantur, quibus na- tura gratiæ sanctificantis magis clarescit.	471
Corollarium I. Perfectio gratiæ.	472
Corollarium II. Gratia sanctificans per se ita peccatum expellit, ut repugnet utrumque in eodem subjecto sociari.	475
Corollarium III. Una justificationis forma gra- tia sanctificans est, nec alia esse in illo statui potest.	482
Corollarium IV. Præclarus ad gratiam disposi- tionum apparatus exigitur, quæ quidem dis- positiones etiam ultimæ, non à gratia habi- tuali, sed ab auxilio actuali proficiuntur.	492
De dispositionibus sigillatim.	497
Pii voluntatis motus justificationi prævii nul- latenus à gratia habituali, sed ab uno Dei mo- ventis auxilio proficiuntur.	500
REFLEXIO.	515
SPECUL. III. Gratia sanctificantis lepôres à Patribus delineati repræsentantur.	517
REFLEXIO.	526
CAPUT II. De merito Sanctorum.	527
SPECUL. I. Septem ad Christiani operis meri- tum condiciones desiderantur, & sigillatim explicantur.	530
Prima & secunda conditio: Libertas operantis & operis rectitudo,	ibid.
	Tertia

Index Dissertationum,

Tertia conditio : Status viatoris.	§ 32
Quarta conditio : Bonum opus in obsequium munerantis cedat necesse est.	§ 34
Quinta conditio : Operantis sanctitas.	§ 36
REFLEXIO.	§ 39
SPECUL. II. Prosequutio ejusdem materiei : expenduntur duæ momentosæ ad meritum conditiones , promissio Dei , & influxus charitatis.	§ 42
Sexta conditio : Pactum & promissio Dei ordinantis opus bonum ad præmium.	ibid.
Septima conditio : Influxus , sin actualis , certè virtualis , charitatis.	§ 52
REFLEXIO.	§ 60
SPECUL. III. Justi de condigno vitam æternam promerentur : hinc ea quæ sub meritum cadunt , vel cadere possunt , ordine derivantur , & recensentur.	§ 62
Quinque brevissima consecutaria derivantur.	§ 74
REFLEXIO.	§ 79

DISSERTATIO V.

Defensio Innocentii X. Constitutionis adversus quinque propositiones lata. Vbi easdem propositiones à Sanctis Augustino, & Aquinate dudum fuisse prædamnatas demonstratur. § 83

§. i. **P**rima propositio ab Innocentio Summo Antistite damnata , ab Augustino & Aquinate prædamnata fuit. § 86

§. ij. Gratia interiori posse resisti , ante Innocentium X. docuerant Sancti Augustinus & Thomas. § 91

§. iij.

Capitulum & Speculationum.

§. iij. Ad merendum & demerendum in statu naturæ lapſæ, non ſolam à coactione, ſed etiam à neceſſitate libertatem Sancti Auguſtinus & Thomas deſiderarunt.	594
Probatur ex Sanctis Auguſtino & Aquinate Pontificia cenſura.	602
Dubia incidentia.	606
§. iv. Non potuerunt Semipelagiani eſſe hæretici, quòd vellent gratiam ad ſingulos actus neceſſariam eſſe talem, cui poſſet humana voluntas reſiſtere, vel obtemperare.	611
§. v. Chriſtum pro omnibus omninò hominibus, & non pro ſalute duntaxat prædeſtinatorum mortuum eſſe, veridicè poſt Sanctos Auguſtinum & Thomam Summus Pontifex pronuntiavit.	614
REFLEXIO.	624

DISSERTATIO VI.

Cæterarum coronis.

Commendatio Sanctorum Auguſtini, & Thomæ Aquinatis Doctoris Angelici. 628

P*rimum Elogium.* Sancti Auguſtinus & Thomas antiquitatis, univerſitatis, & conſenſionis amantiſſimi. 632

Secundum elogium. Sancti Auguſtinus & Thomas ab Apoſtolica Sede comprobati. 539

Corollarium momentòſum adverſus nonnullos Auguſtini & Aquinatis obtreſtatores. 648

Tertium elogium. Auguſtinus & Aquinas à ſacris Conciliis approbati. 659

Quartum elogium. Sancti Auguſtinus & Aquinas 659

Index Dissertationum, Capitulorum, &c.

nas à sanctis & doctis approbati.	666
<i>Quintum elogium.</i> In Augustino & Aquinate	
lex Catholici Doctoris dotes eminent, amor	
Ecclesiæ, zelus fidei, orationis frequentia,	
humilitatis studium, sanctitas morum, dog-	
matum castimonia ab omni corruptela &	
laxitate aliena.	682
In Ecclesiam amor & fidei zelus.	ibid.
Orationis frequentia, & humilitatis studium in	
utroque Doctore splendentia.	689
Sanctitas morum Augustini, & Aquinatis.	694
Doctrinæ & dogmatum castimonia ab omni	
corruptela & laxitate aliena, est gemini Do-	
ctoris tellera.	699
REFLEXIO per modum orationis.	716



LIBER VIII.

De Deo primo Motore, & de
gratia ipsius.

PRÆLOQUIUM.



PATIGATOS superiori tomæ ex
attento vitiorum intuitu & horrore
oculos tuos, Lector patientissime,
nedum reficiet, sed & demulcebit
amœnissima divinæ gratiæ contemplatio. Quid
enim eâ materie gratius, vel acceptius esse po-
test, quâ Deo grati, acceptique efficimur, & ut
ait Augustinus epist. 105. *Quid debet esse iucun-
dus, vel infirmis gratiâ, quâ sanantur; vel pi-
gris gratiâ, quâ excitantur; vel nolentibus gra-
tiâ, quâ juvantur?* Quare commendabilior est
hæc materies, quàm ut aliqua laudis accessio-
ne egeat, quæ innato splendore per se lucet, per
se placet, per se omnium lepōrum vœnustate in-
duitur, denique quæ gratia est, ipsa nimirum
animæ pulchritudo. Unde quod veteri prover-
bio passim jactatur, vino vendibili suspensâ he-
derâ nihil opus esse, id si ad gratiam peculiari
ratione transferamus nullus, opinor, jure iu-

probabit. Cùm enim res per se præclaræ fucata pigmenta non quærant, profectò alienum, mutuarumque colorem non desiderat gratia, cujus nativus decor ultrò incurrit in oculos, & omnium animos singulari dignitatis suæ ingenitæ dignitate perstringit.

Verùm sicut non sine spinis rosa vernat, sic difficultatum innumeris stimulis, & aculeis valata & obsepta est elegantia gratiæ; quia nimirum magis amari avert, quàm disputatione tractari: ideoque dum simplicium animis lucem, cordibus suavitatem infundit, curiosos majestatis suæ, mysteriorumque suorum scrutatores gloriâ opprimit. Quamobrem ad hanc penetrandam arcanorum gratiæ altitudinem, ad hanc abyssum dimetiendam, ad ejus inscrutabilia perscrutanda, non me expectatio tua (Lector) impingat. Agnosco modulum meum, sentire etiam mihi videor modulum tuum: altius est hoc secretum incrementis meis, & fortius verbis meis. Libenter cum Augustino *lib. 21. contra Faustum* scripserim: *Occultum est, altum est, inaccessibile secretum ab humana cogitatione seclusum est, quemadmodum Deus & justificet pium, & damnet impium. Quantò convenientius, quantò accommodatius est modulo nostro expavescere illic, ubi Paulus expavit, & exclamare: O altitudo divitiarum sapientiæ & scientiæ Dei! Quantò melius est admirari, quod investigare non sufficit?*

Quare non nisi verecundè hanc materiam aggreddior, timens cum Gregorio 3. *part. Pastor. cap. 5.* ne animum ultra vires trahens meum, dum plus quàm valet, tenditur, mentis chorda rumpatur. Quid igitur faciam, qui quod implere

plere non posse me sentio, Theologorum de gratia differentium cōsuetudini negare non audeo. Super onerariam navem rudis vector imponor (phrasi utor Hieronymi *epist.* 49.) & qui necdum scalmum, id est minorem cymbam, in lacu rexi, maris credor fragoribus: nunc mihi evāescentibus terris, cælum undique, & undique pontus: nunc unda tenet bris inhorrescit, & cæca nocte nimborum spumei fluctus canescunt. At longè periculosior judiciorum divinæ gratiæ abyssus multa, & asperioribus anfractibus cingitur. Verùm quia in Dei rebus non possibilitas inspicere debet, sed animus, nec cum verba possunt deficere, qui credit in Verbo, quia etiam charitas omnia potest, Spiritu sancto cursum promovente, & divinæ ipsius gratiæ omnipotentissima potestate, sine qua nihil prorsus boni facere, & quā confortante, omnia possumus, & opitulan- te; necnon eorum Doctorum luce, quos nobis in gratiæ doctrina duces, ac normas Pontifices, Ecclesia tota præstituerunt, Augustinum intelli- go, & Aquinatem, divinæ gratiæ arcana resignare tentabimus, ut postquam superiori tomo exaggeravimus peccati morbum, in præsentī laudemus & Medicum, adhibeamus & medici- nam. Vidisti, Lector, altera præcedentis tomi parte infirmitatem tuam, utinam in hoc volumi- ne accipias sanitatem; accipies autem, si velis; dabit autem gratia, ut benè velis. Piè Augusti- nus in Psal. 101. *Sanabit te, opus est ut sanari velis: sanat omninò ille quemlibet languidum, sed non sanat invitum. Quid autem in te bea- tius, quàm ut tanquam in manu tua vitam, sic habeas in voluntate sanitatem tuam. Nec enim gratia bonam voluntatem, voluntatisque*

libertatem tollit, sed dat, ut præclare dixit August. epist. 107. *Si verè volumus defendere liberum arbitrium, non oppugnemus unde sit liberum. Nam qui oppugnat gratiam, quâ nostrum ad declinandum à malo, & faciendum bonum liberatur arbitrium, ipse arbitrium suum adhuc vult esse captivum.*


Ordo, & œconomia hujus tractatus.

Angelicus Doctor existentiam, necessitatem, essentiam, divisiones, & effectus gratiæ quæstione 109. & sequentibus expositurus, triplici principio perpetuò volvitur, unde omnia doctrinæ suæ consecutaria derivat. Primum est, indispensable creaturæ cujusvis ad agendum à Deo primo motore dependentia; unde infert, continenti divinæ virtutis influxu hominem indigere, quo causa secunda primæ in agendo subordinetur. Secundum principium est naturæ humanæ primi peccati granditate vulneratæ infirmitas; unde colligit, indigere opitulatione & gratia medicinali hominem infirmum, quâ & infirmitas curetur, & debilitas roboretur, & languida agendi tarditas excitetur. Tertium principium est, operum supernaturalium dignitas, & difficultas. Cum enim homo ad finem supernaturalem conditus sit & erectus, ei operationes supernaturales elicere incumbit, ut finem inter & media justa proportio servetur: non potest autem sine supernaturali gratia supernaturaliter agere natura, sicut nec ad cælum avis sine pennis convolare.

Ex hoc triplici Angelico principio inferiùs statuendo commodam totius hujusce materiei
par

Præloquium.

partitionem elicimus. Vnde & primùm agemus de Deo primo motore, & creaturæ intellectualis ab eodem in omni statu dependentia: deinde de Deo adjuvante infirmitatem nostram tum ad verum dignoscendum, tum ad bonum prosequendum, à maloque declinandum, atque in incepta justitia perseverandum differemus. Tertiò de Deo sanctificante, & per gratiam habitualement supernaturalem justificante sermonem habebimus. Et quia gratia illa justificans est principium omnis meriti nostri, de Deo meritorum auctore, & merita nostra remunerante quarto loco disputabimus. Ut autem omnibus palam fiat, Angelicam & Augustinianam, quam toto decursu exponemus, doctrinam à quinque celebribus propositionibus damnatis tantum distare quantum distat ortus ab occidente, appendicem non inutilem subnectemus, qua & consensionem doctrinæ nostræ cum constitutione Innocentii X. demonstrabimus, propositionum damnatarum falsitatem omni genere argumentorum evincemus, & Pontificæ censuræ æquitatem propugnabimus. Dissertationem porro præambulam in commendationem Sanctorum Augustini, & Thomæ in finem hujus libri rejicimus.



DISSERTATIO I.

*De generali primi motoris influxu,
& creatura intellectualis ab
eodem in omni statu dependen-
tia.*

NON abs re tractationem de præ-
motionibus divinis præmittimus
in limine tractatus de gratia. Et si
enim stricto nomine gratiæ ali-
quid supernaturale intelligendum
veniat, tamen sub eo nomine generale primi
motoris auxilium non semel S. Doctor compre-
hendit. Probaturus enim necessitatē gratiæ *tota*
q. 109. & nominatim art. 9. ostensurus homi-
nem, etiam justum, indigere gratia ad rectē agen-
dum, id ostendit *primò quidem* (verba sunt
eius) *ratione generali*, propter hoc quod sicut
suprà dictum est, nulla res creata potest in
quemcunque actum prodire, nisi virtute motio-
nis divina. Quod & priùs docuerat in 2. dist. 8.
q. 1. art. 1. ad 1. his verbis: *Nihil boni potest homo*
facere sine gratia Dei, secundùm quod intelli-
gitur gratia ipse Deus gratis dans, eo quòd ipse
est principium omnis boni, non tantùm in homi-
nibus, sed etiam in aliis creaturis. Et licet
motio illa juxta exigentiam naturæ conferatur,
quadantenus tamen gratia dici potest, sicut &
donum

donum creationis : quod ut ait Augustinus epist. 95. *Quadam non improbanda ratione dicitur gratia Dei, quia non precedentium aliquorum operum meritis, sed gratuita Dei bonitate donata est.*

Quorum omnium ulterior ratio est, quia ut benè observat Joannes à S. Thoma, nomen gratiæ vel à nomine *gratus*, vel ab adverbio *gratis*, derivari potest. A nomine *gratus* gratia dicitur acceptabilitas alicujus, unde illud : *Si inveni gratiam in conspectu Regis*, Esther 5. id est, si tibi accepta sum. Et hoc modo sæpe accipitur gratia pro pulchritudine, & venustate, qua aliquis gratosus redditur, & amabilis, juxta illud : *Diffusa est gratia in labiis tuis*. Ab illa etiam radice proficiscitur nomen gratiæ sanctificantis, quia eâ perfusi, Deo grati & accepti sumus. Ab adverbio *gratis*, originatur nomen gratiæ, prout significat quodcumque donum, seu beneficium liberaliter collatum. Inde etiam derivatur gratitudo, seu gratiarum actio, quæ est confessio beneficii ab alio dati. Et quia Deus non solum in ordine supernaturali, sed etiam in ordine naturali beneficus est, ideo ad dona naturalia, præsertim verò ad motionem Dei nomen gratiæ extenditur, quia per motionem illam homo regitur, & dirigitur in finem : quæ directio cum multa specialia beneficia, & singulares non rarò divinæ providentiæ effectus importet, gratiæ nomine insignitur. Vt sit, quia sicut gratia supponit naturam, ita adjutorium divinæ gratiæ motionis generalis, & concursus generalis modum imitatur, convenienter illius in omni statu necessitatem supponimus, & prælibamus. Max mē, quia sub illo etiam titulo de gratia

Christi multa dicemus, quæ (si quid aliud) ad Theologicum pertinet institutum, & nomen gratiæ sibi præcipuo jure vindicat. Sed prius operæpretium est varios naturæ humanæ status considerare, quàm ut cujuslibet indigentiam, & motionis divinæ in unoquoque necessitatem demonstremus.

C A P U T I.

De variis natura humana statibus.

STatus, ut colligitur ex doctrina S. Thomæ 2.2. q. 188. est dispositio homini conveniens cum immobilitate & firmitate. Sic in actionibus humanis dicitur negotium habere aliquem statum, quando aliquam sortitur consistentiæ firmitatem. Vnde ait Paulus 1. Cor. 15. *Stabiles estote, & immobiles.* Et Greg. Magnus hom. 21. Super Ezechiel. *Lapis quadratus, & quasi ex omni latere statum habet, qui casum in aliqua permutatione non habet.* Pulchrè etiam, & solidè observat D. Thomas laudatus, quod apud sapientes, nec divitiæ, nec dignitates, nec aliud quidpiam simile, quod inconstantis fortunæ vicissitudini obnoxium est, statum ullum obtinere potest, defectu firmitatis ad statum necessariæ: unde aiebat Seneca, *Non est tuum fortuna quod fecit tuum.*

Porro ad hanc status immobilitatem requi-
situs

ritur obligatio, quia cùm homo ratione liberi arbitrii in utramque partem pensilis, flexibilis ad modum sit, ideoque de illo dicat Job : *Homo natus de muliere nunquam in eodem statu permanet*; ut in modo vivendi, agendique quandam assequatur immobilitatem, perpetua debet in aliquo statu lege firmari. Sic status sæcularis ex lege naturali honestâ potitur libertate : status Religionis ex voto solenni immobilitatem sibi vindicat : status clericalis immobilitate donatur ex sacrorum Ordinum characterem indelebilem imprimentium natura, ex Dei que lege divinis ministeriis Clericos addicente. Idem observare est in omnibus aliis statibus, matrimonii, viduitatis, virginitatis, quibus quædam leges perpetuitatem saltem moralem accersent. Ex quibus etiam apparet discrimen, quod inter officium, gradum, & statum intercedit : officium enim est deputatio ad aliquid operandum ; gradus est alicujus præminencia dignitatis ; status verò est conditio de se immobilis. Cum quibus stat, tria hæc in eodem non infrequenter inveniri : nam Episcopus, & officio Judicis, Prædicatoris, ac Pastoris fungitur, & Ecclesiæ principatur, & in supremo perfectionis acquisitæ statu positus est. Hoc fundamento præsupposito, primò exponemus varios humanæ naturæ status, deinde speciales circa ipsos difficultates expediemus.

SPECULATIO I.

Septem naturæ humanæ status proponuntur, & explicantur.

Primus est status naturæ puræ, qui dicitur purus, non solum quia careret impuritate peccati, sed quia excluderet omnia dona gratuita, quibus homo illo in statu nudus esset. Uno verbo, natura pura est conditio naturæ humanæ sine peccato, & sine gratia. Porro in illo statu miseriis illis omnibus subiaceret homo, quas in hac ærumnosa vita experimur. Et quanvis qui illius status possibilitatem admittunt, frequenter censeant, hominem in illo statu experturum concupiscentiæ rebellionem, seu carnis, & Spiritus repugnantiam; probabilius tamen cum Magistro Herrera oppositum sustinemus, quia ut priore hujus libri parte operose satis monstravimus, & ex Angelico Doctore evicimus, *concupiscentia, quæ transcendit limites rationis, inest homini contra naturam.* In statu autem naturæ puræ nihil homini contra naturam inesset, cum in illo crearetur homo cum illis dotibus, quæ essent naturæ consentaneæ. Sed ne actum agamus, vide tomi superioris part. 2. differt. 3. circa quartum peccati effectum.

Secundus est status naturæ integræ, in quo homo præter naturales dotes tali esset vigore præditus, ut illis, quibus subjacemus ærumnis, ex natura humana ultio cōsequentibus, minimè subderetur; unde nec morbis, nec morti, nec aliis
miseriis

miseriis esset obnoxius. Hoc enim exigeret donum integritatis, ut homo nulli alterationi, nulli etiam corporali corruptioni subditus esset. In illo etiam statu, & scientiis naturalibus, & virtutum moralium per accidens infusarum suppellectile homo esset institutus, alioquin integram naturæ perfectionem non haberet. Scio Caietanum, Serram, Gonetum, & plures recentiores velle, statum istum superaddere duntaxat statui naturæ puræ consonantiam appetitus superioris cum inferiore, unde perfecta in interiori homine pax resultaret, & concordia. Verum quia, ut diximus, etiam in statu naturæ puræ appetitus inferior perfectè superiori subjiceretur, ejusque rebellio non posset inesse homini, nisi à peccato, quia ut docet D. Thomas est contra naturam, subindeque nequit esset ab auctore naturæ, & quia, ut alias citatus Augustinus dicebat, tantæ dignitatis est homo, ut vitium hominis natura sit pecudis: idcirco præfata differentia non subsistit.

Nec obest nobis Bulla Pii V. & Gregorii XIII. ut objicit Gonet, quia licet in ea hæc Baii propositio damnetur: *Falsa est Doctorum sententia, primum hominem potuisse à Deo creari, & institui sine justitia naturali*: nihil tamen inde contra nos: tum quia per justitiam naturalem non intellexerunt Pontifices subjectionem appetitus ad rationem, sed vel virtutes per accidens infusas, sine quibus potuit utique homo creari; vel dona justitiæ originalis, quæ vocatur justitia naturalis, quia eam Deus in exordio cum natura protoparenti largitus est, condens naturam, & largiens gratiam. Adde (quod hac vice pro omnibus observari à te diligentissimè velim)

decla-

declarasse Pium V. plures ex Baianis propositionibus esse veras & catholicas, & ab Augustino toridem verbis quandoque decerptas; eas tamen omnes suam Sanctitatem reprobasse, vel ob censuræ atrocitatem, vel ob authoris supercilium, vel ob pravam earum interpretationem. Ut enim videre est in propositione mox relata, Michaël Baius quasi esset orbis magister, & dux verbi, omnes Doctores tanquam falsidicos ex tripode pronuntiat, sibi que soli veritatem existimiam asserit: *Falsa est*, inquit, *Doctorum sententia*, quasi dicat, mihi soli veritas patuit, quia non sum sicut cæteri hominum. Hoc supercilium damnat Ecclesiæ Hierarcha. Quod si contendas, te per donum integritatis naturam integram constituens intelligere solum carentiam interni conflictus carnis adversus spiritum, facies quæstionem de nomine, & naturam integram appellabis, quod ego ad naturam puram pertinere contendo.

De statu justitiæ originalis, & utrum compateretur peccata venialia.

Tertius est status justitiæ originalis, de quo diffusè *tom. 2. & lib. 4.* disseruimus, ubi ostendimus, justitiam originalem dono naturalis integritatis adjicere gratiam sanctificantem, intensissimam illam quidem, ratione cujus non solum ratio Deo perfectè subiciebatur, sed voluntas rationi, voluntati appetitus sensitivus, & corpus ipsum consentiebant: ex plenitudine enim, & ubertate gratiæ animam Deo subjicientis redundabat in vires inferiores effusio spiri

spiritus ; unde & mira in illis docilitas in omnem pro arbitrio rationis pattem flexibilis sequebatur. Hanc gratiam comitabatur innumera-
 bilium prærogativarum apparatus , de quibus eodem loci *differt. 5. c. 2. specul. 2.* satis superque diximus. Ex quibus patet , statum naturæ integræ , & statum justitiæ originalis distingui per modum includentis & inclusi, quia iste præter integritatem naturalem , gratiam , aliaque dona supernaturalia importabat. Nec rationi status repugnat brevis illius fortunatæ conditionis , quia per se, & ex natura sua stabilis erat, & permanens.

Cætera quæ ad illum statum fortunatissimum spectant, loco citato discussimus : unum tamen est , quod ibi omisimus , nec amplius differre debemus ; utrum nimirum homo in statu justitiæ originalis posset peccare venialiter , incurrendo in culpam, quæ esset levis, vel ex genere suo, sive ex propria materia & objecto , ut verbum otiosum ; vel ex parvitate materiæ, ut furtum exiguum ; vel ex subreptione, sive imperfecta deliberatione. Affirmat absolutè Scotus, & alii antiqui Theologi consentiunt ; distinguit Duvallius de peccatis plenè deliberatis, & de imperfectè deliberatis, illa contingere potuisse existimans , secus ista. Thomistæ verò cum suo præceptore omnia omninò cujusvis rationis peccata ab illo beatissimo statu eliminant. Quia si teste Augustino *lib. 14. de civit. c. 10.* in statu innocentiae nulla poterat esse miseria , nulla tristitia , nulla poena , à fortiori beatus ille status peccatum veniale excludebat , quod utique est magna miseria , tristitiam iuvchens , & reatum poenæ inducens. Præsertim quia ex frequen-

xatis

tatis peccatorum venialium actibus non potuisset non generari habitus pravus benè, facilè, & suaviter operandi difficultatem ingerens, & promptum in Deum motum retardans: quod utique felicitati illius status è diametro repugnasset. Illi ergo sententiæ subscribendum est.

Ratio verò fundamentalis est: Quandiu homo erat in statu innocentiae, immobili in bono firmitate vigeat; justitia namque originalis ex propria, & characteristica proprietate, sicut vires inferiores voluntati, & voluntatem rationi subiciebat, ita rationem Deo auctori supernaturali plenè subdebat. Ergo nulla tunc erat rima, per quam veniale posset intrare peccatum. Probatur consequentia: Peccata venialia ex subreptione oriuntur ex motibus indeliberatis voluntatem prævenientibus; illius tamen negligentiam, vel tepiditatem supponentibus: peccata verò venialia deliberata ex voluntate non perfectè rationi subiecta, vel ex ratione Deo non plenè subdita proficiscuntur: Ergo nbi erat plena subiectio inferiorum ad superiora, perfecta partium hominis harmonia, & consonantia, nullum prorsus poterat obvenire peccatum veniale. Talis autem erat status innocentiae, ut supponimus ex dictis secundo libro, nec infirmari possunt qui terminos penetrant, & status illius essentiam non ignorant: Ergo status ille peccati venialis prorsus incapax erat.

Illustratur hæc veritas præclarâ S. Thomæ doctrinâ, quam habet *opusc. 2 cap. 186*. Homo, inquit, in sui conditione taliter institutus fuit à Deo, ut corpus omninò esset animæ subiectum; rursus

rursumque inter partes animæ , inferiores vires rationi absque repugnantia subjicerentur , ipsa verò ratio Deo esset subiecta. Porro ex hoc, quod corpus erat animæ subiectum, nulla in homine passio poterat accidere , quæ eximio animæ in corpus dominio repugnaret , unde nec mors , nec infirmitas ulla in homine locum habebat. Ex subiectione verò inferiorum virium ad rationem imperturbata serenæ mentis tranquillitas in homine sentiebatur, quia ratio nullis internarum passionum motibus interrupta , felicissimâ pace potitur. Ex hoc autem , quod voluntas hominis Deo suo erat plenè consona & subiecta, omnia in Deum, tanquam ultimum finem referebat ; in qua jugi relatione primarius iustitiæ originalis effectus positus est, unde alii veluti è fonte manabant : ratio enim Deo subdita cætera sibi subiciebat , inferioresque facultates in officio continebat , & Deo serviens regnabat. Ergo quandiu duravit illa concatenata subiectio , illa concordia , illa ordinis tranquillitas , nullum potuit veniale contingere peccatum : tamdiu autem duravit hæc consonantia , quandiu fuit status iustitiæ originalis in huiusmodi harmonia situs. Ergo in statu iustitiæ originalis nullum poterat peccatum veniale committi.

Quæ ratio benè penetrata non solum convincit contra Scotum, hominem in statu illo fuisse incapacem peccati venialis , sed etiam demonstrat contra Suarem, Vasquem, aliosque, huiusmodi impeccabilitatem habuisse hominem non solum ex speciali Dei protegentis providentia, sed etiam ex vi , & efficacia iustitiæ originalis, atque ex intrinseca illius status conditione. Et-

enim

enim sicut intrinseca illius status perfectio omnem peccati venialis culpam ab appetitu arcebat, ita & à ratione, quæ tunc non minùs Deo obsequebatur, quàm rationi appetitus obtemperaret, cùm inferioris ad superiorem appetitum, & rationem obedientia ex subjectione rationis ad Deum veluti rivus è fonte proflueret. Ergo ex propriis, & intraneis justitiæ originalis dotibus non poterat Adamus, stante justitiâ illâ, peccare venialiter; quia aliàs essentialem justitiæ originalis ordinem destruxisset, & non destruxisset; destruxisset, subordinationem ad Deum incurvando; nòn destruxisset, in statu justitiæ originalis perseverando. Fateor tamen, potuisse tunc hominem peccata venialia absolutè admittere amissione, & jacturâ justitiæ originalis per peccatum mortale; unde nec erat in hoc etiam genere simpliciter impeccabilis, sicut sunt Beati. In summa, poterat homo justitiâ originalem perdere, sed ea stante nullam poterat inordinationem voluntariè admittere. Unde non poterat minus malum, nisi majori præelecto eligere; sicut non poterat eligere pœnam, nisi priùs culpam elegisset. Quare non est cur mirerentur adversarii, & suspicientes inquirant, quomodo poterat homo mentiri cum juramento, & non sine juramento? Quænam esset illa major difficultas in proferendo verbo otioso, quàm in blasphemia? Hæc enim, & alia similia occupata manent, & ex inconsideratione illius status dubia illa oriuntur, qui cùm nullam inordinationem pateretur, non poterat homo tunc ullam inordinationem velle, nisi priùs voluerit status illius exinanitionem: nec poterat ratio circa media perverti, stante recto in finem ordine,

dine, quia tunc voluntas ad media non nisi prout stabant sub ordine finis, ferri poterat.

De aliis quatuor statibus.

Quartus status est naturæ lapsæ, seu peccati, in quod protoparens incidit, & totam propaginem maculavit. De peccato Adami dissertatione 5. libri 4. satis egimus, necnon de peccato originali suprâ in hoc tomo, dissertatione 2. toto capite secundo. Illud porrò notandum, quod licet peccatum sit contra naturam, & peccatum originale per Baptismum, & actuale per pœnitentiam deleantur; attamen rectè dicitur, dari statum naturæ lapsæ: tum quia post restitutionem in Baptismo gratiam, semper manet infectio, & corruptio peccati, seu fomes peccati, qui & à peccato est, & ad peccatum inclinat. Tum quia per peccatum de se homo fit servus peccati, & diaboli; peccati quidem, quo frequentaro ligatur quadantenus homo, non ferro alieno, ut ait Augustinus, sed ferrea voluntate; unde inducitur dura peccandi necessitas, quia peccatum, quod per pœnitentiam non deletur, suo pondere in aliud trahit. Diaboli etiam servus efficitur peccator, quia à quo quis victus est, ejus & servus est; unde diabolus dicitur princeps mundi hujus, quia sub ejus tyrannico jugo captivi peccatores manent.

Quintus est status naturæ sub lege Mosis, quâ homo offusus per peccatum tenebris, in ignorantia sepultus, ipsas etiam naturales veritates ignorans, à Deo eruditus est, qui summa dignatione sui notitiam impertiens, non solùm stultas de divinitate opinationes revulsit, sed etiam homines

mines variis circa mores erroribus distractos, & concupiscentiæ tenebris occæcatos lege datâ ad veritatis viam revocavit. Ut autem hujus legis necessitas omnibus innotesceret, fivit justus Deus, cujus judicia abyssus multa, homines per bis mille, & amplius annos variis aberrationibus, & incredibilibus deliramentis suæ cæcitaris apertum experimentum capere. Unde D.Thomas *lect.7. in c.3. epist. ad Galat.* ait: *Deus reliquit homines absque doctrina legis tempore legis natura; in quo dum in errores inciderunt, convicta est eorum superbia de defectu scientia.* Status hic usque ad Christum Dominum perduravit.

Sextus est status gratiæ, seu legis novæ à Christo cordibus impressæ, non in litera, sed in spiritu consistente. Nam ut August. *lib.de Spir. & lit. c.25.* ait: *Apparet distantia veteris, & novi Testamenti, quod lex ibi in tabulis, hic in cordibus scribitur; ut quod ibi forinsecus terret, hic deletet intrinsecus; ibique fiat pravicator per occidentem literam, hic dilector per vivificantem spiritum.* Unde nihil proderat, sed magis oberat notitia legis, voluntate, & concupiscentiâ per gratiam non sanata, quia nisi adfit divinæ gratiæ opitulatio, in vetitura niti solemus. Unde eodem *lib.cap.4.* ait Augustinus: *Lex, quanvis bona, auget prohibendo desiderium malum, sicut aquæ impetus, si in eam partem non cesset influere, vehementior fit obice opposito, cujus molem cum evicerit, majori cum ullo precipitatus, violentius per prona provelvitur.* Nescio quo enim modo hoc ipsum, quod concupiscitur, sit jucundius, dum vetatur.

Idcirco vocatur hic status, *conditio libertatis,*
non

non quòd liceat facere quodcumque libuerit, sed quia gratia præceptorum nos facit dilectiores, ut quod foris per legem terrebat, intus per amorem delectet: maximè quia gratia excludit peccati nefandam servitutem; nam ut ait Aug. *Ad iustè faciendum liber non erit, nisi à peccato liberatus, iustitia cæperit esse servus.* Appellatur etiam *status natura reparata*; tum quia per eam *clementissimus, & prudentissimus artifex*, quod *quassatum fuerat, non confregit, sed utilius omninò refecit*, ut prosequitur Bern. in *serm. super c. 12. Apocal.* Tum quia per legem incepit quidem reparatio naturæ notitiâ veritatis, sed non fuit integra restauratio, ob peccatum perversæ voluntatis. Unde August. in *Psalm. 83. Data est lex, ut agrum de morbo convinceret, qui sibi sanus videbatur; ut peccata demonstrarentur, non ut auferrentur. Lex minabatur (addit *isa. 3. in Ioan.*) non opitulabatur; jubebat, non sanabat, languorem ostendebat, non auferbat, sed preparabat medico venturo cum gratia, & veritate. Non ad domandam superbiam (subjungit *serm. 18. in Ioan.*) sed ad denudandam datâ est lex: non ad liberandos agrotos, sed ad convincendos superbos.*

Hic porrò observandum, statum gratiæ subdividi in statum Christianæ vitæ, & Christianæ perfectionis: in priori tenetur homo Decalogi præcepta, & Evangelii leges fideliter servare; in posteriori nedum præcepta, sed etiam consilia homo custodit. Status autem perfectionis subsecatur in statum Episcopalem, qui est conditio perfectionis acquisitæ; & in statum Regularem, qui est conditio perfectionis acquirendæ; qui status in varios Religiosos Ordines distribui

tribuitur. De quibus omnibus hîc operosè disputare, nec locus iste exigat, nec per otium vacat.

Septimus status est futuræ vitæ, qui & in duplicem secatur; unus est status gloriæ, alter status pœnæ: de priori non pauca diximus, tum libro primo, dum de visione beata; tum libro 5. dum de Deo ultimo fine; tum plura dicemus libro ultimo, ubi quæ ad futuram vitam, sive beatam, sive miseram spectant, complectemur.


Circa omnes præfatos status variæ occurrunt difficultates, partim insinuatæ, & expeditæ; partim alibi discussæ, vel discutiendæ: duplex tamen sicut celebrior, ita opportunior diligenter tractanda est. Prima, an sit possibilis status naturæ puræ; altera, an sint minores vires in natura lapsa ad benè moraliter operandum, quàm fuissent in statu naturæ puræ, si in illo conditus homo fuisset. Utramque sequentibus speculationibus resolvemus.

REFLEXIO.

Tot, ut vidimus, habuit homo status, imò nullum habuit humana natura statum in tot conditiones mutata, cum status immobilitatem exigat, & firmitatem; unde & de homine verè dictum est: *Quasi flos egreditur, & conteritur, & fugit velut umbra, & nunquam in eodem statu permanet.* Unde tanta hominis mutatio, levitas tanta, instabilitas continua, ita ut is sit genuinus hominis status nullum habere statû, firmitatem nullam, constantiam nullam? Ne mirere; peccato verum & incommutabile bonum

num dereliquit, bonis caducis & fugitivè labentibus homo adhæsit : quid ergo mirum, si mutabilibus amore devinctus, nunquam mentem fixam obtineat, sed omni locorum, omni temporum varietate in diversa jactetur, & quâ datâ portâ ruat ? Quid mirum, si contra bifformes fortunæ eventus, uniformi mentis constantia non militet præmunitus ? Quid mirum, si bonum opus suscipere, agere, implere nunc scit, nunc nescit ; nunc delectatur, nunc tædet ; modò vult, modò non vult ; modò proponit sibi bonum quod velit, deinde in eo, quod proposuit, non perseverat, sed transilit ; nec tantum mutatur, sed redit, & in ea resilit, & revolvitur, quæ damnavit ? Benè Seneca : *Non potest idem placere, nisi rectum.* Sed meliùs Augustinus : *Tantò magis delectat opus bonum, quanto magis diligitur Deus summum, atque immutabile bonum, in quo, & à quo, & per quem bona sunt omnia : à quo averti, cadere ; in quem converti, resurgere ; in quo manere, consistere est.*

Ergo mentis stabilem firmitatem non peregrinatione longa acquires, non locorum varietatibus comparabis, non cimes auro, in deliciis non invenies, vastum licèt trajeceris mare, nec itinera proderunt, nec juvabit novitas terrarum, si te sequantur quocumque perveneris vitia ; quin mutatione locorum, & de alio in alium transitu, frequentique migratione, non solum animum non continebis, sed magis, magisque jactabis, divides, dissipabis. In Deo solo pacem, firmitatemque reperies : Deum autem ubique invenies. Frustra ergo huc, & illuc vadis gyrovagus, cum benè vivere omni loco positum sit, & Deus cor-



dis nostri centrum maneat, nō nobiscum modò, sed & intra nos ; superior per potentiam , inferior per sustentationem ; exterior per magnitudinem , interior per subtilitatem ; sursum regens, deorsum continens, extra circundans, intus penetrans.

Ut veram , & quantum in hac vita possibile est, beatam stabilitatem tibi asciscas, cordis, animi, corporisque solitudinem ama , nec unquam poteris animum continere tuum , nisi primum corporis fugam listas. Pulchrè & piè de more Bernardus ad fratres de Monte Dei : *Cum quo Deus est , nunquam minus solus est , quàm cum solus ; tunc enim liberè fruatur gaudio suo. Tunc ipse suus est sibi ad fruendum Deo in se , & se in Deo. Tunc in luce veritatis, in serenitatis mundi cordis ultro patet sibi pura conscientia , & liberè se infundit affecta de Deo memoria ; & vel illuminatur intellectus, & bono suo fruatur affectus, vel seipsum deflet humana fragilitatis defectus. Propter hoc secundum formam propositi vestri habitantes in cœlis potius quàm in cellis , excluso à vobis toto seculo , totos vos inclusistis cum Deo. Cella siquidem , & cœli habitatio cognata sunt ; quia sicut cœlum & cella adinvicem videntur habere aliquam cognationem nominis, sic & pietatis : à celando enim cœlum, & cella nomen habere videntur ; & quod celatur in cœlis, hoc & in cellis ; quod geritur in cœlis, hoc & in cellis. Quidnam est hoc ? Vacare Deo , frui Deo, in quo inchoata felicitas, firma stabilitas, proindeque vera status ratio posita est.*

SPECULATIO II.

Status naturæ puræ est quidem de potentia Dei absoluta & extraordinaria possibilis ; non tamen conveniens , subindeque nec possibilis de potentia ordinaria.

HAc speculatione mediam viam , & ut crediderimus, tutiorem tenemus inter Authorum statum naturæ puræ omnimodis repugnantem existimantium dexteram , quam omni cum rigore sequitur Jansenius ; & eorum adversariorum sinistram , qui statum illum de potentia etiam ordinaria possibilem esse statuunt. Hac media via incessit D. Thomas , statum illum & esse absolutè possibilem, & non esse reapse convenientem, subindeque nec de potentia ordinaria, seu ut ipse loquitur , ordinata possibilem affirmans. In primis possibilitatem absolutam illius status apertè declarat in 2. dist. 31. q. 1. art. 2. ad 3. dicens : *Poterat Deus à principio , quando hominem condidit , etiam alium hominem ex limo terra formare , quem in conditione sua natura relinqueret, ut scilicet et mortalis, & passibilis esset, & pugnam concupiscentiæ ad rationem sentiens , in quo nihil humana natura derogaretur , quia hoc ex principiis natura consequitur. Non tamen iste defectus in eo rationem culpa, aut pœna habuisset, quia non per voluntatem iste defectus causatus esset. Quo in loco loquutum fuisse S. Do-*
ctorem

ctorem de potentia absoluta, & supremo Dei dominio, patet ex eodem Angelico Præceptore 4. cont. Gent. cap. 52. ubi doctrinam aliàs in sententiis à se juniore traditam sic senior, & in doctrina consummatiores sui interpretes exponit, & nostram secundam speculationis partem clarissimè docet.

Placet integrum D. Thomæ locum, tamen si longiusculum, in medium proferre: *Cum Deus* inquit, *humanorum actuum sic curam gerat, ut bonis operibus premium, & malis pœnam retribuat, ut in superioribus est ostensum, ex ipsa pœna possumus certificari de culpa. Patitur autem communiter humanum genus diversas pœnas, & corporales, & spirituales. Inter corporales potissima est mors, ad quam omnes alie tendunt, & ordinantur, scilicet fames, sitis, & alia huiusmodi. Inter spirituales autem est potissima debilitas rationalis, ex qua contingit, quod homo difficulter pervenit ad veri cognitionem, & de facili labitur in errorem, & appetitus bestiales omnino superare non potest, sed multoties obnubilatur ab eis.*

Possent tamen aliquis dicere, huiusmodi defectus, tam corporales, quàm spirituales, non esse pœnales, sed naturales defectus ex necessitate materia consequentes. Necesse est enim corpus humanum, cum sit ex contrariis compositum, corruptibile esse, & sensibilem appetitum in ea, quæ sunt secundum sensum delectabilia, moveri, quæ interdum sunt contraria rationi: & intellectum possibilem, cum sit in potentia ad omnia intelligibilia, nullum eorum habens in actu, sed ex sensibus naturæ ea acquirere, difficulter ad scientiam veritatis attingere, & de facili præcipue phantasmata à vero deviare.

Sed

Sed tamen si quis recte consideret, satis probabiliter poterit aestimare, divinam providentiam suppositam, qua singulis perfectionibus propria perfectibilia coaptavit, quod Deus superiorem naturam inferiori ad hoc conjunxit, ut ei dominaretur; & si quod hujus dominii impedimentum ex defectu natura contingeret, ejus speciali, & supernaturali beneficij tolleretur, ut scilicet cum anima rationalis sit altioris natura, quam corpus, tali conditione credatur corpori esse conjuncta, quod in corpore aliquid esse non possit contrarium anima, per quam corpus vivit. Et similiter si ratio in homine appetitui sensuali conjungitur, & aliis sensitivis potentiis, quod ratio a sensitivis potentiis non impediatur, sed magis eis dominetur.::: Sic igitur hujusmodi defectus, quanvis naturales homini videantur, absolute considerando humanam naturam ex parte ejus, quod est in ea inferius; tamen considerando divinam providentiam, & dignitatem superioris partis humana natura, satis probabiliter probari potest, hujusmodi defectus esse pœnales, & sic colligi potest humanum genus peccato aliquo originaliter esse infectum.

Vides Angelicum Doctorem utrumque docere, & statum illum esse possibilem, si ut ait loco citato Sentent. Deus hominem sua natura relinqueret, eumque inclinationi materię secundum se spectatę permetteret: quod ad dominium suum demonstrandum, aliasque rationes partim notas, partim latentes, posse Deum absolute facere docet. Verum quia Deus hominem non relinquit, ideo de potentia ordinaria, id est, divinam providentiam suppositam, qua singulis per-

fectionibus propria perfectibilia coaptat, talis status possibilis non est. Hanc S. Doctoris mentem optimè assequutus est noster Thomas Leonardy Professor Lovaniensis lib. 1. de prima hominis institutione, cap. 1. pag. 2. his verbis: Notandum, quod quamvis creare hominem in puris naturalibus subsit divina potentia, nullique alteri ejus attributo repugnet, minus tamen deceat suaverè Dei providentiam, quâ secundùm legem ordinariam creaturas administrat, & quâ singulis perfectionibus propria perfectibilia preparat.::: Quod si attentè perpèdatur, clarè apparebit, quod Deus ex se nunquam crearet hominem in statu purè naturali, in quo scilicet morti, & fami, & siti, aliisque miseriis, ac morbo concupiscentiæ esset obnoxius. Et pagina 10. Itaque quia minùs consonum est divina sapientia, & bonitati creare hominem cum istiusmodi defectibus, ideo rationabiliter concludi potest, quod Deus ex se nunquam hominem iis subditum crearet, quodque consequenter non ita creetur, nisi ob peccatum.

Hæc paulò fusiùs proferre operæpretium duxi, ut omnibus palam esset, quàm inimeritò quidam recentiores, quos sequitur P. Gonet, nostram sententiam eo titulo, quòd Janseniana sit, reprobent. Nam præterquam quod aliquam sententiam eo titulo, quòd Jansenio probata fuerit, abominari, signum est animi præjudiciis pleni, & occupati, cùm exceptis quinque propositionibus ab Ecclesiâ damnatis multa ab illo scripta esse non solùm probabilia, sed etiam laudibus digna nemo cordatus negaverit: sed præter hoc, inquam, si Jansenium, ut par erat, in fonte legissem, advertere utique potuissent, Authorem illum

lum omnimodam status illius possibilitatem inficiari, & velle implicare contradictionem, hominem posse in illo sine peccato condi: vidissent Iansenium *lib. 1. de statu natura pura, cap. 5. conari omnem possibilitatem status pura natura funditus evertere. Quia aliàs, ut cap. 16. & 17. ait, casus hominis ita Creatori esset imputandus, ut non foret culpa cadentis creatura, sed instituentis Dei. Vnde Deo, non creatura imputari deberet perversitas ejus, & quidquid scelerum ex illa creata voluntatis institutione nasceretur; quæ quidem essent materialiter scelera creatura, vera tamen scelera Dei. Et lib. 2. cap. 14. expressè affirmat, nullo modo à Deo creante puram naturam conferri posse creatura, statumque illum esse Deo injuriosum, & impossibile. Et lib. 3. cap. 13. 15. & 21. ait: Deo per statum pura natura adscribitur crudelitas improbata in Manichæis. Crudelitatem, vel etiam injustitiam spirat, innocentem animam nulli peccato obnoxiam immeritò ad tantas misérias, quantas commentitius natura pura status implicat, condemnare. Denique sic concludit: Deus quantumvis absoluta potestatis, vitaque & moris dominus sit, creatura rationali innocenti nullam omninò pœnam, quantumvis exiguam, sine injustitia inferre potest. Exscribendus esset totus Iansenius, sed hæc pauca ex ipso retuli, ut constet illum omnimodam status illius impossibilitatem asseruisse, sicut impossibile est, Deum esse injustum, & crudelem.*

Angelica D. Thoma sententia probationes.

Sed jam ad probationem nostræ positionis veniamus, & ut clarè procedamus, prior pars primum probanda est, posterior deinde stabilienda. Probatur igitur, statum naturæ puræ esse absolute possibilem, primò authoritate Augustini, unde sententiam nostrā quoad utramque partem evidentissimè deprompsimus. Et quidem statum illum esse de potentia Dei possibilem, & potuisse illum à Deo sine injustitia condi, expressè tradit S. Pater in *Psal. 70.* his verbis : *Multum movet Dei amor, & timor : timor Dei, quia justus est ; amor, quia misericors est. Quis enim ei diceret, Quid fecisti ? si damnaret justum. Quia ergo misericordia ejus, ut justificet injustum.* Ubi apertè docet Augustinus, Deum absque injustitiæ labe posse justum damnare, id est ob occultas inscrutabilium judiciorum suorum causas gratia cum privare, & gloria tanquam beneficiis absolute indebitis. Sed quia aliqui recentiores arbitrantur in illum Augustini textum corruptionem aliquam irrepsisse, existimantes legendum esse : *Quis enim ei diceret, Quid fecisti ? si damnaret injustum ?* Quam responsionem eò sinceriores, & solidiores putant, quò nec aliam sibi deesse aiunt ad illum locum elevandum, dicendo Deum non posse accusari, etiamsi justos damnaret, non quidem quandiu justus sunt, sed permitiendo eos à justitia exidere subtractione gratiæ actualis ad perseverandum necessariæ. Ut hæc responsio, ejusdemque responsionis confirmatio

matio contententur, proferenda sunt Augustini loca, quæ nulli corruptioni, nulli interpretationi aditum ullum præbent.

Quid autem expressius, planius, vel apertius afferri potest eo testimonio, quod habetur *lib. 3. de libero arb. cap. 22.* per hæc verba: *Ignorantia & difficultas, si naturalis est, inde incipit anima proficere, & ad cognitionem, & requiem, donec in ea perficiatur vita beata, promoveri. :: Si ignorantia veri, & difficultas recti naturalis est homini, unde incipiat in sapientia, quietisque beatitudinem surgere, nullus hanc ex initio naturali rectè arguit. Sed si proficere noluerit, aut à profectu retrorsum relabi voluerit, jure, meritoque poenas luet. Creator verò ejus ubique laudatur. Non enim propterea malam creavit, quia nondum tanta est, quanta ut proficiendo esse posset, accepit. Quod ibi pluribus rationibus, & exemplis confirmat. Nec potest dici, sanctissimum Doctorem hanc sententiam in juventute protulisse, sed eam in senectute correxisse. Non potest, inquam, dici; quia eandem doctrinam inculcat *lib. 1. retract. cap. 9.* his verbis: *Ad miseriam justæ damnationis pertinet ignorantia & difficultas, quam patitur omnis homo ab exordio nativitatis suæ, nec ab isto malo, nisi Dei gratiâ quisquam liberatur. Quam miseriam Pelagiani nolunt ex justâ damnatione descendere, negantes originale peccatum; quanvis ignorantia, & difficultas, etiamsi essent hominis primordia naturalia, nec sic culpæ nulus Deus, sed laudandus esset, sicut in eodem tertio libro disputavimus. Quæ verba adeo perspicua sunt, ut ponderatione non egeant. Quod verò ait Iansenius, possibilitatem naturæ puræ crudelitatem Manichæorum sapere, ma-**

nifestè repugnat Augustino, nedum juveni, sed seni, & mortì proximo; nam libro de bono persever. cap. 9. sic formaliter loquitur: *Etiam si verum esset, quod dicunt Pelagiani, ignorantiam, & difficultatem, sine quibus nullus homo nascitur, primordia, non supplicia esse naturæ; vincerentur tamen Manichæi, qui volunt duas, boni scilicet, & mali esse naturas.* Quibus etiam verbis occupatur, & præcluditur aliud effugium Iansenii aientis, ignorantiam, & difficultatem dupliciter dici naturalem: primò quatenus naturæ secundum se spectatæ conveniunt: secundò quatenus à nativitate in nos transfusæ sunt ex carne Adam peccato vitiatâ, absque ullo tamen peccati reatu; hocque secundo sensu velle Augustinum ignorantiam, & difficultatem posse dici primordia naturalia. Sed hæc responsio ex relatis Augustini verbis sponte sua, nullo impellente corrui: siquidem certum est, Pelagianos ignorantiam, & difficultatem primo, & non secundo modo naturales esse, fuisse arbitratos, id est nullum omninò supposuisse peccatum, sed peccato omni præsuppositas fuisse.

Dices: Ex illis locis nihil pro naturæ puræ statu admittendo posse colligi, cum in eodem loco Augustinus ad salvandam Dei justitiam concedat adultis ignorantiam & miseriam patientibus auxilia necessaria tum ad ea mala superandâ, tum ad virtutem exercendam, tum ad beatitudinem animæ & corporis per illud virtutis exercitium compensationis titulo assequendam, ut patet à capite 19. ad 22. At nihil horum in statu naturæ puræ, qualem possibilem comminiscimur, reperiretur; siquidem in illo nec auxilium gratiæ, nec ordo ad beatitudinem super-

natura

naturalcm invenirentur. Ergo perperam ex celebri illo libri tertiî de libero arbitrio testimonio possibilitatem status naturæ puræ conjicimus.

Confirmatur, & augetur difficultas. D. Augustinus ut salvet justitiam Dei in parvulis sine rationis usu morientibus, concedit aliquam retributionem ex parte Dei, ut miseriæ, quas in hac ærumnosa vita passi sunt, compensentur; sic enim ait cap. 231 *Quis ergo novit, quid ipsis parvulis in secreto judiciorum suorum bona compensationis reserve: Deus, qui quanquam nihil rectè fecerint, tamen nec peccantes aliquid ista perpeffi sunt.* At licèt idem Augustinus, quanvis quod dixerat de adultis in præfato libro de libero arbitrio, confirmet in operibus contra Pelagianos editis; attamen quod de parvulis sine baptismo morientibus dixerat, retractat *epist. 2. ad Hieronymum*, his verbis: *Taniorum malorum, quæ fiunt in parvulis, causa iusta dicatur. Nempe cum maiores ista patiuntur, solemus dicere, aut sicut in Iob merita examinari, aut sicut in Herode peccata puniri. Sed hoc in maioribus. De parvulis autem quid respondeamus, ediffere, si pœnis tantis nulla in eis sunt punienda peccata: nam uique nulla est in illis atari-bus examinanda justitia.::: Ego quidem non de ingeniis, sed saltem de pœnis parvulorum, quas in hac vita patiuntur, dixi aliquid in libris illis de libero arbitrio, quod quale sit, & cur mihi in ista, quam habemus in manibus, questione (quomodo nimirum salvanda sit contra Pelagianos justitia Dei) non sufficiat, intimabo.* Ibidemque subjungit, defensionem illam in libro de libero arbitrio traditam, nec validam

esse, nec firmam; quia licet hoc merito dici possit de his, qui pro Christi nomine, vel religione passi sunt, vel sacramento Christi imbuti sunt, ut possit eis pro illis malis, quæ hîc in diversis afflictionibus pertulerunt, compensatio ista præstari; id pariter de parvulis responderi non potest, qui post gravissimos cruciatus sine sacramento Christianæ societatis expirant. *Nam,* inquit, *qua circa eos compensatio cogitanda est, quibus insuper et damnatio præparata est?* Quod alibi sæpe repetit Augustinus, præsertim *liv. 6. cont. Julian. cap. 21.* sic: *Vos negantes originale peccatum, profecto ut cogimini dicere Deum vel invalidam, vel injustum, sub cuius potestate imago ejus in parvulis sine ullo proprii, vel originalis peccati merito tantis affligitur malis; non enim per hæc exercetur virtus, quod rectè de bonis hominibus majoribus dicitur, in quibus rationis est usus.* Sed in statu naturæ puræ, qualem fabricamur possibilem, parvuli iis subjacerent miseriis, quibus etiamnum obnoxii sunt: ergo in illis ex Augustino non salvaretur justitia Dei, ac proinde quod S. Doctor libro tertio de libero arbitrio dixerat, favere nobis non potest.

Respondco, invictè ex illis locis probari possibilitatem absolutam status naturæ puræ, in quo etiam posset homo cum auxilio illi statui connaturali, & miseras patiendæ virtutem exercere, & hujusmodi exercitio ad qualemcunque & imperfectam beatitudinem pervenire. Quare non solum cum injustitia, sed etiam justissimis causis posset supremus Dominus illud exercitium homini etiam ante peccatum imponere. Unde Augustinus *cap. 20.* sic ait: *Si ergo altera*
(anima).

(anima) talis esse cœpit, non solum ante peccatum, sed ante omnem vitam suam, qualis alia post vitam culpabilem facta est, non parvum bonum habet, unde conditori suo gratias agat; quia ipse ortus ejus, & inchoatio quovis perfecto corpore est melior. Non enim mediocria bona sunt, non solum quod anima est, sed etiam quod facultatem habet, ut adjuvante Creatore seipsam excolat, & pio studio possit omnes acquirere, & capere virtutes, per quas & à difficultate cruciante, & ab ignorantia cecante librentur. Quod si ita est, non erit nascentibus animis ignorantia, & difficultas supplicium peccati, sed proficiendi admonitio, & perfectionis exordium. Hæc autem omnia, ut patet, in statu naturæ puræ contingere possent: ergo absolute status ille ex Augustino possibilis est absque ulla ex parte Dei injustitia.

Ad confirmationem dico, nullatenus S. Doctorem eam doctrinam retractasse, cum eam potius in libro retractationum, loco à nobis laudato inculcet, & contra Pelagianos valere affirmet. Ad epistolam 28. respondeo, etiam in ea absolutam status naturæ possibilitatem clarè significare Augustinum; nam quærentibus, quare Deus creet in parvulis animas, quos novit citò morituros? Responder, vel hac morte præmaturâ peccata parentum convinci, aut flagellari; vel certè hoc ad contentum, & decorem universi Deum referre: quæ ratio in statu naturæ puræ locum haberet, si Deus absolute illum condere voluisset. Verba Augustini sunt hæc: *Non enim frustra per Prophetam, qui hac divinitus inspirata didicerat, dictum est de Deo, Qui profert nume osè saculum* (habetur Isaia 40. in editione Septuaginta.) *Vnde musica, id est*

scientia, sensusque bene modulandi ad admonitionem magna rei, etiam mortalibus rationales habentibus animas Dei largitate concessa est. Unde si homo faciendi caminis artifex novit quas quibus moras vocibus tribuat, ut illud quod canitur, decedentibus ac succedentibus sonis pulcherrimè currat ac transeat; quanto magis Deus, cujus sapientia, per quam fecit omnia, longè omnibus artibus preferenda est, nulla in naturis nascentibus, & occidentibus temporum spatia, qua tanquam syllaba ac verba ad particulas hujus sæculi pertinent, in hoc labentium rerum tanquam mirabili cantico vel brevius, vel productius, quàm modulatio præcognita & præfinita deo scit, præterire permittit. Hoc cum etiam de arboris folio dixerim, & de nostrorum numero capillorum, quanto magis de hominis ortu, & occasu, cujus temporalis vita brevius, productiusque non tenditur, quàm Deus dispositor temporum novit universitati moderaminis consonare.

Vides quomodo possit Deus mortem, vel propter peccatum, vel propter alias sui regiminis universalissimi causas, de potentia saltem absoluta inferre. Porro meritò illud, quod libro de Libero arbitrio dixerat, ex parte revocat, nimirum parvulos ob miseras in hac vita latas aliquà ratione post mortem compensatum iri: hoc inquam, solum retractat, & variis rationum moliminibus ibi refellit; quia nimirum non solum non munerari, sed etiam damnari parvulorum sine baptismo decedentium animas, & Sancta Scriptura, & sancta est testis Ecclesia. Unde in illa epistola petit solum à Hieronymo originem animarum, & quomodo si animæ singulis corporibus novæ creentur, justè damnari possint,

possunt, supposito nimirum ordinario Dei cursu, qui nullam pœnam infligit, nec de potentia ordinaria infligere æternam potest sine prævio peccati merito. Per quod patet responsio ad auctoritatem ex libro sexto contra Julianum petitam, quia ibi solitum ordinariæ Dei providentiæ per scripturas nobis notæ cursum considerat, ut in probatione secundæ partis magis constabit.

Ratio fundamentalis hujus partis sumitur ex communissima gratiæ notione, quæ in sua essentiali ratione aliquid gratuitum gratis à Deo, liberaliterque concessum significat. Sanè si Pelagii dogma ideo toti Ecclesiæ horridi, & indignationi fuit, quia gratiam voluit secundum merita nostra dari, & eo ipso gratiam evacuavit, & exinanivit usque ad fundamentum in ea, quod eam liberi arbitrii bono usui debitam esse pronuntiavit, quantò magis gratiam omnem convellit, qui eam ira naturæ debitam esse pronuntiat, ut non possit eam Deus sine injustitia denegare? Itane non licebit Deo, quod voluerit facere? Itane poterit figulus luti aliud vas in honorem, aliud in contumeliam facere; Deus de potentia absoluta non poterit? Absit, absurdum est, iniquum est, Deo, & gratiæ essentiæ contrarium. At Deus injustus non est, dum denegat quod non debet: ergo etiamsi de potentia absoluta hominem sine gratia conderet, injustitiæ labem minimè contraheret. Ergo in quocumque statu creatura cum serva sit, *natura tantum, & voluntate Patris ad supernaturalia elevatur*, ut lib. 1. in Ioan. loquitur Cyrill. Alexand. Ergo absolutè potuit Deus talem creare hominem, qualis nunc nascitur (peccato tantum excepto)

id est destitutam justitiâ originali, & gratiâ sanctificante; subindeque naturæ humanæ exaltatio in consortium divinæ naturæ indebita fuit primo homini, nec naturalis dicenda est, sed supernaturalis, ut contra Michaëlem Baium S. Hieronymus V. (à paucis diebus albo Sanctorum inscriptus) Gregorius XIII. & Urbanus VIII pronuntiarunt. Ergo homo fit gratiâ filius, non naturâ; non nativitate, sed assumptione, & adoptione, ut Patres omnes, & Theologi clamant. Ergo *gratia Dei magna ibi erat, ubi terrenum, & animal. corpus bestialem libidinem non habebat, & posse non mori prestabatur Adamo de ligno vite, non de constitutione natura, mortalisque homo erat conditione corporis animalis, immortalis autem beneficio conditoris*, ut totidem verbis lib. 4. cont. Iul. cap. 17. & lib. 2. de Genes. ad lit. cap. 15. affirmat Augustinus. Quis autem credat, Deum ita in conferendis suis beneficiis alligari, ut liber non sit, & ea non possit supremus Dominus denegare?

*Status natura pura non est conveniens,
nec de potentia ordinaria possibilis.*

Hanc secundam nostræ speculationis partem probant varix Augustini & Doctoris Angelici rationes, quæ quia præclaræ sunt, ad variasque Theologiæ materias illustrandas idoneæ, aliqua eas accuratatione expendemus.

Prima ratio sic formatur: Non est conveniens, ut homo illo in statu producat, in quo suam perfectam beatitudinem, quam naturaliter appetit, obtinere non posset, aliàs frustra
beati

beatitudinis appetitum hominibus Deus inferuisset, si illam acquirere nunquam possent: non est autem conveniens, vel consueto providentiae & potentiae Dei ordinariae cursui consentaneum, ut naturalis appetitus sit perpetuò inanis, & in perpetuo violentiae statu constitutus. Atqui in statu naturæ puræ homo beatitudinem suam perfectam, quam naturaliter concupiscit, assequi non posset; talis namque beatitudo in clara Dei visione sita est, ut *libro 1. dissert. 5. c. 1. specul. 2.* duplici ratione D. Thomæ demonstravimus; ad quam utique visionem status naturæ puræ pervenire nequaquam posset, cum status ille omnem gratiam, & à fortiori visionem beatam, quæ est gratia consummata, excludat: ergo status naturæ puræ non est conveniens, nec possibilis de potentia Dei ordinata. Major est per se nota, cum potentia Dei ordinata omnia ad suos fines proportionatis mediis veluti manuducat. Minor verò probatur à D. Thoma: tum quia solus Deus clarè visus est optimum hominis bonum, cujus & homo capax est, & quod amittere inuitus non potest: tum quia insitum est homini Dei videndi desiderium, quod frustraneum esse non potest, quia illud nobis indidit sapientissimus conditor, & iustissimus ordinator, ut ait August. *lib. 19. de civit. cap. 13.*

Hanc duplicem rationem Angelici Doctoris ex Augustino depromptam illustravimus, & ab instantiis modernorum nonnullorum etià Thomistarum, nimis hac in parte molinizantium vindicavimus. Sed quia tam fecunda materies exhaustiri nunquam valet, pauca tum ad doctrinæ ibi à nobis traditæ defensionem, tum ad totius

tius hujus difficultatis lucem non parum conferentia adjiciam. Sciendum ergo, beatitudinem, seu bonum, quod naturaliter omnes appetunt, & propter quod omnia appetunt, in illo duntaxat bono esse sitam, ex cujus assequutione fit homo beatus; cùm illam non appetat, n si ut beatus sit: bonum autem, ex cujus assequutione, & fruitione homo beatus efficitur, non est nisi Deus clarè, & intuitivè videndus, *quia tam magnum bonum est creatura rationalis*, inquit D. Augustinus *lib. de nat. boni, cap. 7. ut nullum sit bonum, quo beata sit, nisi Deus*. Ergo solus Deus clarè visus est unum, & verum hominis bonum, ad quod tamen in statu naturæ puræ nunquam perveniret.

Sciendum rursus, appetitum naturalem, utpote à Deo insitum, ordinatum esse; nam quæ à Deo sunt, ordinata sunt, & omnia in numero, pondere, & mensura fecit Deus, attingens à fine ad finem fortiter, & disponens omnia suaviter. Ergo etiam appetitus beatitudinis, quem S. Thomas post Augustinum nullies naturalem appellat, ordinatus etiam est: atqui esset inordinatus, si ad Deum, ut in se est, possidendum non inclinaret; vel si bonum in communi, vel aliquid aliud appeteret extra Deum; tunc enim contingit perversitas dilectionis, cùm homo aut diligit quod non est diligendum, aut non diligit quod est diligendum, aut ampliùs diligit quod minùs est diligendum, aut æquè diligit quod vel minùs, vel ampliùs diligendum est, aut minùs, vel ampliùs, quod æquè diligendū est, ut profequitur Aug. *lib. 1. de doctr. Christ. c. 27*. Ut ergo appetitus naturalis beatitudinis sit ordinatus, ad Deum, ut in se est, inclinet necesse est; neque

neque enim ad aliquid aliud Deus referendus est, quoniam quod ad aliud refertur, inferius eo est, ad quod refertur, ut ratiocinatur idem Augustinus *lib. 83. qq. quæst. 50.* Ergo in statu naturæ puræ appetitus Deum semper quæreret, & nunquam inveniret, subindeque in perpetuo statu violento permaneret.

Sciendum tertio, omnem inquieti animi affectionem, & mœrorem proficisci ex amore alicujus boni, quo privatur; quia ut frequenter inculcat Augustinus, non esset in carendo difficultas, nisi esset rei, quâ caremus, habendæ cupiditas. *Quidquid enim amamus, & non habemus,* inquit in Psal. 37. *necesse est ut doleamus.* Atqui creatura intellectualis quousque Deo bono suo clarè viso perfruatur, inquieta est, & misera, ut experientiâ & intimo naturæ sensu nullis peccatis non immerso ignoratò comperturn est. Vnde præclaræ illæ, & tritæ Augustini voces *lib. 1. confess. cap. 1. & lib. 6. cap. 16.* sic: *Pecisti nos Domine ad te, & inquietum est cor nostrum, donec requiescat in te. Va anima audaci, qua speravit, si à te recessisset, se aliquid melius habituram. Versa, & reversa in tergum, & in latera, & ventrem; dura sunt omnia, & tu solus requies. Cum anima Deo delectatur,* addit epist. 109. cap. 10. *ibi veram, certam, æternam invenit requiem, quam in aliis quarebat, nec inveniebat.* Ergo status naturæ puræ foret status perpetuæ inquietudinis, & miseriæ, qui utique status conveniens non est, nec de potentia Dei ordinaria, nisi præsuppositâ culpâ, possibilis.

Hanc doctrinam *1. part. quæst. 12.* à se traditam luculenter confirmat Præceptor Angelicus *lib. 3. cont.*

cont. Gent. cap. 6. sex egregiis rationibus, ut omnibus constaret, hanc esse suam mentem, non obiter, vel per transennam, sed fusè, & ex professo traditam, & inculcatam. Prima ejus ratio sic procedit: Omne quod est imperfectum in aliqua specie, desiderat consequi perfectionem illius speciei; qui enim habet opinionem de re aliqua, quæ imperfecta illius rei est notitia, ex hoc ipso incitatur ad desiderandam illius rei scientiam: at cognitio, quam de Deo habent creaturæ intellectuales non cognoscentes substantiam ejus, imperfecta est: ergo in ea non quiescit desiderium creaturæ intellectualis, *sed incitatur magis ad divinam substantiam videndam.* Secundam rationem petit ex eo, quod ex cognitione effectuum incitatur desiderium ad cognoscendam causam; nec desiderium eorum quiescit, nisi cognitis effectuum substantiis, *ipsius etiam Dei substantiam videant.* Tertia ratio est confirmatio præcedentis, quia nimirum videntes naturaliter quia est aliquid, scire desiderant quid est ipsum; quod est intelligere ejus substantiam: *Non igitur quietatur naturale desiderium in cognitione Dei, quâ scitur de ipso solum quia est.* Quartam rationem deducit ex vastitate, & universitate intellectus nostri, cujus desiderium nihil finitum quietare potest: *Quod exinde ostenditur, quod intellectus quilibet finito dato, aliquid ultra molitur apprehendere; non igitur intellectus substantia separata quiescit per hoc, quod cognoscit substantias creatas quâcunque eminentes, sed adhuc naturali desiderio tendit ad intelligendam substantiam, quæ est altitudinis infinita.* Quinta ratio est, quia intellectus, sicut appetit scientiam, ita desiderat
pellere

pellere nescientiam : ergo cùm cognoscat Deum esse supra omne , quod à se per species cognoscitur, cognoscit etiam substantiam Dei esse sibi ignotam. *Tendit igitur naturale ipsorum desiderium ad intelligendam divinam substantiam.* Ultimam rationem desumit ex eo, quod quantò aliquid est fini propinquius , eo majori desiderio tendit ad finem : unde videmus , quod motus naturalis corporum in fine intenditur : intellectus autem substantiarum separatarum propinquiores sunt divinæ cognitioni, quàm noster intellectus : intensius igitur desiderant Dei cognitionem , quàm nos : *Nos autem quantumcunque sciamus Deum, non quiescimus desiderio, sed adhuc desideramus Deum per essentiam cognoscere : multò igitur magis substantia separata hæc naturaliter desiderant.* Et cap. 51. sic concludit : *Cùm impossibile sit naturale desiderium esse inane, necesse est dicere, quod possibile est substantiam Dei videri per intellectum , & à substantiis intellectualibus separatis , & animabus nostris.* In statu autem naturæ puræ tale desiderium esset inane, utpote nunquam explebile. Ergo status ille non est de potentia Dei ordinata possibilis.

Mirum est quot subterfugiis tam aperta Angelici nostri Doctoris sententia , tot rationum longè præstantissimarum momentis stabilita eludatur. Alii volunt hoc statutum à D. Thoma animi nostri desiderium , revelationem effectuum gratiæ , & gloriæ supponere. Sed hæc responsio repugnat textui , cùm S. Doctor affirmet, substantias separatas ad Dei substantiā videndam incitari cognitione , quam habent de Deo per suas essentias , & per illos effectus, ex quibus

quibus homines Philosophari cœperunt. Maxime quia S.Doctor probat Gentilibus, desiderium illud omnibus omninò inesse hominibus; manifestum est autem, non omni intellectui innotescere effectus gratiæ, & gloriæ. Alii volunt S.Doctorem velle intellectum naturaliter appetere videre Deum, ut est prima causa, non prout est summum bonum. Sed hæc etiam distinctio repugnat literæ S. Thomæ, qui ideo vult creaturam appetere videre substantiam primæ causæ, ut in ea inveniat summum bonum; maxime quia intuitiva cognitio primæ causæ est beatitudo formalis, id est possessio, & assequutio summi boni, ut *lib.6.* demonstravimus. Ergo appetere videre substantiam primæ causæ, & appetere videre summum bonum, idem est.

Alii communius respondent, S. Doctorem velle, hominem appetere beatitudinem, & Dei visionem appetitu elicitò, non quidem absoluto, & efficaci, sed inefficaci, & conditionato; si nimirum possibile esset creaturam Deum intuitivè videre. Sed hæc solutio nihilo magis textui, & intento sancti Præceptoris congruit. Etenim S.Thomas toto illo cap. 50. probat possibilitatem visionis ex illo appetitu; ex appetitu autem elicitò inefficaci, & conditionato non concluditur possibilitas rei appetitæ, cum hujusmodi appetitus sæpius in impossibilia feratur. Ergo illa responsio omnes S.Doctoris probationes enervat, & ad nihilum redigit.

Dices: D.Thomas pluribus aliis in locis docet, hominem quidem beatitudinem secundum rationem communem beatitudinis appetere, non tamen secundum rationem specialem, quantum ad id, in quo beatitudo consistit, quia
sic

sic non omnes cognoscunt beatitudinem, quia nesciunt cui rei communis ratio beatitudinis conveniat. Ita docet 1. 2. q. 5. art. 8. Idem repetit. in 4. dist. 49. q. 3. his verbis: *Quavis ex naturali inclinatione voluntas habeat, ut in beatitudinem feratur secundum communem rationem, tamen quod feratur in beatitudinem talem vel talem, hoc non est ex inclinatione natura, sed per directionem rationis, quæ adinvenit in hoc, vel in illo summum bonum hominis constare.* Et apertius q. 22. de verit. sic habet: *Homini inditus est appetitus ultimi finis sui in communi, ut scilicet appetat naturaliter se esse completum in bonitate: sed in quo ista completio consistat, utrum in virtutibus, vel scientiis, vel delectabilibus, vel huiusmodi aliis, non est ei determinatum à natura.* Quando ergo ex propria ratione adjunctus divinæ gratiæ appetit aliquod speciale bonum, ut suam beatitudinem, in quo verè sua beatitudo consistit, tunc meretur, non ex hoc, quod appetit beatitudinem, quam naturaliter appetit; sed ex hoc, quod appetit hoc speciale, quod non naturaliter appetit ut visionem Dei, in quo tantum secundum rei veritatem sua beatitudo consistit. Ergo in Deum in particulari non fertur naturaliter hominis appetitus, sed in solam beatitudinem in communi.

Respondeo hæc omnia facilè conciliari; cum enim post S. Doctorem dicimus, hominem naturaliter appetere videre substantiam Dei, supponimus hominem vel per demonstrationem, vel alio quovis modo Dei notitiam assequutum fuisse; nihil enim juxta commune & certum axioma est volitum, quin præcognitum: supposita autem vera Dei cognitione, quam habent,

bent, vel habere possunt omnes homines, & quæ in substantiis separatis, de quibus specialiter disputat Angelicus Doctor locis à nobis memoratis, excellentior est, voluntas in illum videndum naturaliter, id est connaturaliter fertur; quia cum summum bonum in quocumque tandem repertum necessario appetat, supposita cognitione summum bonum in solo Deo reperiri persuadente, naturaliter voluntas Deum videre appetit, ut in eo illud inveniatur, quod tantopere concupiscit.

His ad pleniorum lucem addi potest, quod cum summi, & cumlati boni notione nihil aliud reverà præter ipsum Deum possit intelligi; hoc ipso quod voluntas fertur in summum bonum, convincitur etiam in actu exercito appetere possidere Deum, tametsi in actu signato & explicitè de Deo non cogitet intellectus. Quorum radix est, quia licet ratio summi boni, & beatitudinis, quam naturaliter appetimus, non distinguantur realiter à Deo, distinguitur tamen secundum rationis considerationem, ratione cujus distinctionis, & in Deum naturaliter fertur voluntas, prout Deus est commune bonum; & à Deo recedit voluntas, dum extra illum bonum & ultimum finem quærit; imò & sibi contradicit, mentiturque iniquitas sibi, quia Deum extra Deum, sub diversa tamen rationis apprehensione quærit. Hanc peccatricis voluntatis contradictionem, & totam istam materiam, non tam Angelicè, quàm divinè explicat S. Thomas tum 1.2. q. 5. art. 8. tum 1. p. q. 60. art. 5. Nam priori loco probaturus omnem hominem beatitudinem appetere, sibi secundo loco obijciens hoc argumentum, quod visionem Dei, in qua vera beati

beatitudo sita est, non solum omnes non appetunt, sed impossibilem esse aliqui opinantur, sic respondet: *Ad secundum dicendum*, quod cum voluntas sequatur apprehensionem intellectus, seu rationis, sicut contingit quod aliquid est idem secundum rem, quod tamen est diversum secundum rationis considerationem; ita contingit quod aliquid est idem secundum rem, & tamen uno modo appetitur, alio modo non appetitur. Beatitudo ergo potest considerari sub ratione finalis boni & perfecti, qua est communis ratio beatitudinis: & sic naturaliter, & ex necessitate voluntas in illud tendit, ut dictum est. Potest etiam considerari secundum alias speciales considerationes, vel ex parte ipsius operationis, vel ex parte potentie operative, vel ex parte objecti; & sic non ex necessitate voluntas tendit in ipsam. Posteriori vero loco in responsione ad 4. & 5. ait: Quod Deus secundum quod est universale bonum, à quo dependet omne bonum naturale, diligitur naturali dilectione ab unoquoque. Et cum in Deo sit unum & idem ejus substantia, & bonum commune, omnes qui vident ipsam Dei essentiam, eodem motu dilectionis moventur in ipsam Dei essentiam, prout est ab aliis distincta, & secundum quod est quoddam bonum commune. Et quia in quantum est bonum commune naturaliter amatur ab omnibus, quicumque videt eam per essentiam, impossibile est, quin diligat ipsum. Sed illi, qui non vident essentiam ejus, cognoscunt illum per aliquos particulares effectus; qui interdum voluntati eorum contrariantur; & sic dicuntur hoc modo odio habere Deum, cum in quantum est bonum commune omnium, unumquodque naturaliter plus diligat Deum, quam seipsum.

Vides

Vides igitur, Deum, ejusque visionem, & possessionem sub ratione communi beatitudinis ab omnibus naturaliter appeti, etiam ab odio habentibus Deum, & ab ipsis quoque Deum ignorantibus, & negantibus; quia amare bonum perfectum & beatitudinem, est amare id quod revera Deus est, licet in Deo non apprehendatur. Verè ergo dixit D. Thomas, homines non appetere naturaliter specialem rationem beatitudinis, sed communem, quia eam ratio à Deo distinguit. Sic etiam nos aliàs diximus, Angelicam voluntatem necessariò quidem, & actu amare beatitudinem, & à natura etiam inclinari ad Deum amandum, malitià tamen beatitudinem à Deo præscindere. subindeque amorè Dei, ut Deus est, esse in Angelis liberum quoad exercitium, & non manere in dæmonibus, qui universale bonum amantes, falsò illum extra Deum quærunt, quia ut docet D. Thomas 1.2. q.18. art.1. ad 2. *illa qua pertinent ad motum, vel qua sequuntur motum, non semper insunt; sed solum quando sunt in certa dispositione, & nullum adest impedimentum.* Et idem dicendum est de impiis, & Atheis, quod eleganter expressit Boëtius lib.3. consol. prosa 2. *Hominum animus, etsi caligante memoria, tamen summum bonum repetit, sed velut ebrius domum quo tramite revertatur ignorat.* In quantum appetunt summum bonum mali, non errant, imò Deum ipsum tacitè amant, juxta illud Augustini lib.1. solil. cap.1. *Deus, quem amat omne quod amare potest, sive sciens, sive nesciens.* Sed in quantum nefandà præcisione summum bonum in Deo non ponunt, errant, & Deum odio habent. Vnde mira est in peccatoribus pugna, nam summum

munum bonum, qui solus Deus est, volunt, & omnino nolle non possunt, nescio quæ, sed bona constrictione naturæ, ut ait Augustinus; & tamen summum bonum, dum à Deo recedunt, dum viles creaturas diligunt, sicut diligendus est Deus, id est *amore fervente, & per mansorio*, ut loquitur Augustinus, quo nimirum in creatura permanent, sicut esset in solo Deo permanendum. Unde & beatitudinem volunt, & beatitudinem nolunt, quia beatam vitam appetunt, & eam ubi invenitur, non quærunt: unde nihil mirum si non adipiscuntur quod volunt, id est beatam vitam; id enim, cui comes est, & sine quo eam nemo dignus est, nemoque assequitur, rectè scilicet vivere, non ibidem volunt. Unde etiam errant impii, & non errant; in quantum appetunt beatam vitam, non errant; in quantum verò eam non tenent vitæ viam, quæ ad beatitudinem ducit, profectò errant. *Error enim est, cum sequimur aliquid, quod non ad id ducit, quod volumus pervenire*, inquit Augustinus *de liber. arb. c. 9.*

Alia naturæ puræ inconvenientia.

Secunda ratio ad probandum, statum naturæ puræ non esse convenientem, talis est: In statu naturæ puræ homo miseriis, pœnis, & ærumnis, atque etiam morti subjaceret, imò & secundum omnes ferè recentiores, excepto Estio, & Herrera, pugnam concupiscentiæ cum ratione sentiret: at hic status non est convenientis, nec de potentia Dei ordinata possibilis; quia ut suprà, dum de effectibus peccati, fusè ostendimus, enumeratæ miseriæ sunt unius peccati effectus, & sub justo Deo secundum solitum agendi mo-

dum, & suavem providentiæ ordinariæ cursum operante, nemo innocens miser esse potest, præfertim miseriam perpetuam, & quæ non ordinatur ad obtinendum finem supernaturalem, qui in statu naturæ puræ nullus esset. Ergo status ille non est conveniens, nec de potentia Dei ordinata possibilis. Plura ad locupletandam illam rationem addi possent, nisi ea loco citato de effectibus peccatorum fusè occupassemus.

Dices: Si hæc ratio aliquid probaret, concluderet etiam, creaturam intellectualem non posse de potentia ordinaria creari sine visione intuitiva, & possessione ipsius Dei, cum creatura intellectualis miser sit, si Deo, ad quem naturaliter ordinatur, non fruatur. Et tamen Angeli in via absque Dei visione creati sunt: Ergo ratio illa nihil evincit.

Respondео, quod si creatura intellectualis eo in statu produceretur, in quo nunquam posset frui Deo, miser perfectò esset, & æternum miserabilis; ac proinde ille status de potentia Dei ordinata repugnat. Cæterum quod per aliquod instans, vel tempus creatura intellectualis Deo non fruatur, ut ad illum obtinendum possit meritis pervenire, non solum non repugnat, sed maximè conveniens est. Et ratio inconcussa hujus veritatis est, quia licet Deus, ut in se est visus, sit finis noster naturalis, non est tamen ejus consequutio, & adeptio naturalis, sed eminentia illius petit ut ipsum non nisi auxilio gratiæ, & meritis supernaturalibus assequamur. Vide M. Soto in 4. dist. 49. art. 1. concl. 1. ubi postquam probavit homini inesse naturalem appetitum ad illam veram beatitudinem, quæ in Dei visione consistit, quia nemo est mortalium
cujus

cujuscumque religionis, aut sectæ, qui interrogatus, an cupiat Deum videre, non respondeat, se id percipere; ait tamen, quod consequutio illius finis non est nobis naturalis, quia aliud est habere inclinationem, aliud habere vim videndi Deum. Nos autem concedimus, verba sunt ejus, naturam nostram adeò esse sublimem, ut ad illum finem naturaliter inclinetur, quem non nisi per auxilium Dei (& similiter per merita ex auxilio provenientia) assequi possumus. Illum autem in statu naturæ puræ nunquam homo assequeretur.

Tertia ratio ostendens, statum naturæ puræ non esse convenientem, sic procedit. Non est de potentia ordinata possibilis ille status, in quo non esset possibilis post mortem resurrectio mortuorum, ut peregregiis rationibus demonstrat S. Doctor lib. 4. contra Gent. cap. 79. tunc quia animæ hominum sunt immortales, remanentque post corpora à corporibus absolutæ: manifestum est verò, quod anima corpori naturaliter unitur, cum sit secundum suam essentiam corporis forma: Est igitur contra naturam anima absque corpore esse; nihil autem, quod est contra naturam, potest esse perpetuum: non igitur perpetuò erit anima absque corpore. Tum quia naturale hominis desiderium ad felicitatem tendit: sed hanc non potest consequi anima, nisi iteratò corpori jungatur, quia felicitas ultima est felicitis perfectio; cuiuscumque igitur deest aliquid ad perfectionem, nondum habet felicitatem perfectam, quia nondum ejus desiderium totaliter quietatur; omne enim imperfectum perfectionem consequi naturaliter cupit: anima autem à corpore separata est aliquo modo imperfecta, sicut omnis

pars extra suum totum existens : non igitur homo potest ultimam felicitatem consequi, nisi anima iteratò corpori coniungatur. Tum demùm, quia juxta potentia Dei ordinatæ, ejusque providentiæ leges, peccantibus pœna, benè agentibus præmiùm debetur, non solùm secundùm animam, sed etiam secundùm corpus ; cùm homines non solùm animâ, sed etiam corpore benè, vel malè agant : Igitur est ponere iteratam anima ad corpus conjunctionem, ut homo in corpore, & anima premiari, & puniri possit. Unde quod aliqui, quos sequitur Gonetus, dicunt statum separationis esse connaturalem animæ, sicut statum unionis, S. Thomæ verbis, & rationibus apertissimè repugnat.

Atqui in statu naturæ puræ non esset possibilis resurrectio mortuorum, utpote cùm sic supernaturalis, excedens omnes vires naturæ, in qua à privatione ad habitum non datur regressus : status autem naturæ puræ omnia supernaturalia excludit. Tum quia si tunc contingeret resurrectio, vel esset reditus ad statum naturæ puræ, vel transitus ad naturam integram. Si primum, non tam esset resurrectio, quàm novæ mortis inchoatio, & misera imitatio phœnicis è suo tumulo resurgentis, iterum perituri. Si secundum : ergo ille status haberet saltem in termino aliquid supernaturale, subindeque destrueretur status naturæ puræ, seu nudæ, quod intendimus. Ergo status naturæ puræ non est de potentia Dei ordinata possibilis.

Quarta ratio : Ille status non est conveniens, nec de potentia Dei possibilis, in quo homo beatitudinem assequi non posset, cùm ad eam obrinendam totus naturæ impetus tendat, ut
innũme

innumeris rationibus confirmat S. Thomas. Atqui in statu naturæ puræ non posset homo esse beatus; tum quia beatitudo miseriam, deceptio- nem, difficultatem, peccatumque excludit, quæ omnia naturæ puræ status compateretur. Tum quia in illo statu iis miseriis esset homo obno- xius, sub quibus nos gemimus. At Angelicus Doctor fortissimis rationibus à nobis libro de Deo ultimo fine ponderatis demonstrat, nullatenus in hac vita posse felicitatem obtineri. Ergo status ille non solum non est de potentia Dei ordinata possibilis, sed illi potentiae planè repu- gnans.

Denique, omiſſis aliis rationibus, ultimam piis hominibus non ingratiorem futuram ratio- nem sic formo. Ille status non est conveniens, nec de potentia Dei ordinaria possibilis, in quo Deum non posset homo diligere super omnia; vita enim sine amore Dei, & mors est infernus; miseria quippe miseriarum est non amare Deum: unde, ut aliàs, si benè memini, ex Ansel- mo diximus, satius esset in inferno cum amore Dei commorari, quàm in paradiso sine amore Dei. Miserrius namque esset ille status, in quo non possemus Deum verâ religione colere. At Deus, teste Augustino epist. 120. *Non colitur, nisi amando.* Tum quia Deum amandum esse, *clamat intus innata, & non ignota rationi justi- tia, cui nos totos esse, & cui totum debere non ignoramus*, ut ait D. Bernardus lib. de dilig. Deo. Unde status, in quo homo non potest diligere Deum, rectæ naturæ juxta providentiam Dei ordinariam constitutæ planè repugnat. Atqui in statu naturæ puræ, qualem adversarii possi- bilem de potentia ordinata cominiscuntur,

homo nec Deum efficaciter super omnia diligere, nec diu peccata mortalia vitare, nec præcepta legis implere, nec graves tentationes superare sine gratiæ supernaturalis adiutorio statui illi indebito, imò & status illius destructivo posset; quia secundum quod impugnamus adversarios, eadem forent in statu naturæ puræ vires, quæ sunt in statu naturæ lapsæ, in quo utique sine gratia supernaturali præfata officia implere nequaquam possumus. Ergo status naturæ puræ nec est conveniens, nec de potentia Dei ordinata possibilis. Unde patet, quod si Anselmo data fuisset optio, potius infernum sine culpa, quam statum naturæ puræ culpæ obnoxium elegisset.

Quidquid contra hanc secundam partem obijciunt recentiores, & post ipsos Antijansenius, Gonet, & alii, probat solum priorem partem speculationis, nimirum statum naturæ puræ esse de potentia Dei absoluta possibilem, sicut eadem potentiâ potest Deus corpus grave sursum, leve deorsum retinere; sicut auxilium sufficiens potest de potentia absoluta denegare, & gratiam Sanctis gratis datam absolutè subtrahere; quia supremus Dominus & omnia potest, & multis rationibus justissimis, tametsi nobis latentibus, potest; quæ tamen juxta potentiam ordinatam nobis in Scripturis, & Patribus significatam non potest. Porro, quod homines in statu quovis sint naturæ, & adoptione tantum filii, ad hæreditatem ex dignatione vocati; quod dona supernaturalia recipantur solum in potentia obedientiali creaturæ; quod gratia gratis detur, & nullum supponat debitum, & alia similia, probant solum statum naturæ puræ non involvere contradictionem, non verò posse à Deo produci

prodnci potentiâ juxta solitas justitiæ, bonitatis & sapientiæ leges ordinatâ.

R E F L E X I O.

Ideo potissimum naturæ puræ statum de potentia ordinaria repugnantem diximus, quia in illo Deum diligere, Deo adhærere creatura rationalis, imago Dei, ad Deum facta, æternitatis candidata minimè posset. Ergo ad illam nuditatem dejicitur, multumque deprimitur, qui perpetuis cogitationis, & affectus motibus in Deum non fertur, illique non inhiat, cui adhærere bonum, cui servire regale, cui uniri beatum est. Sed quàm deploranda sit eorum cæcitas, qui ut beati sint, à Deo, qui solus bonus est, & bonum nostrum, recedunt, nemo non videt. *Fornicatur anima cum avertitur abs te,* inquit Augustinus lib. 2. confess. cap. 6. Deum alloquens, *& quarit extra te ea, quæ liquida, & pura non invenit, nisi cum redit ad te.* Væ nobis miseris, qui temporalium rerum amore detineamur, qui tanquam prima extrema sectamur, diligentes vanitatem, quærentes mendacium, persequentes umbras, & insanias falsas, qui denique beatam vitam quærimus, sed ibi non est ubi quærimus, nec ad illam per ea quæ quærimus, pervenimus, juxta illud Augustini serm. 141. de tempore: *Bonam rem quaris, sed terra ista non est regio ejus, quam quaris. Quid quaris? Beatam vitam, sed non est hic.* Igitur in hoc statu, quandiu peregrinamur à Domino, & Deum ex parte cognoscimus, toto illum amore diligamus, qui sine aliquo amore nec esse, nec vivere possumus, quia ut lib. de subst. dilectio-

nis, Augustinus, vel alius quispiam ait: *Vita cordis amor est*, & idcirco omnino impossibile est, ut sine amore sit cor, quod vivere cupit. Unde & Fulgentius lib. 1. ad Monim. *Voluntas creatura*, inquit, *sine qualicumque amore non potest esse*, nec sic potest diligere, ut amorem suum non velit ad aliquid religare.

Sed in Deum feramur propter Deum, ut amor noster sit purus, & castus, non perversus, atque distortus. Vnde August. lib. 6. *musica*, cap. 11. ait: *Non inhareamus inferioribus quàm nos sumus*, nosque ipsos inter illa, qua infra nos sunt; & illa, qua supra nos sunt, ita Deo & Domino nostro opitulante ordinemus, ut inferioribus non offendamur, solis autem superioribus delectemur. Tanto enim nobis melius est, addit epist. 52. quanto magis in illum imus, quo nihil melius est: imus autem non ambulando, sed amando. Ad eum ergo, qui ubique præsens est, & ubique totus, non pedibus ire licet, sed moribus.

SPECULATIO III.

Homo in statu naturæ lapsæ longè est debilior ad bonum morale operandum, longèque pronior ad malum perpetrandum, quàm fuisset in statu naturæ puræ.

Quamvis juxta sententiam superiori speculatione stabilitam status naturæ puræ non sit de potentia ordinaria possibilis; quia tamen
non

non est absolutè impossibilis, ideo in præsentì comparamus vires illius status cum viribus hominis lapsi, ut magis deinde divinæ gratiæ necessitas his præjactis fundamentis demonstretur. Porro nostram sententiam asserentem, minores esse vires hominis lapsi, & peccato originali sordidati, non solum docent Alvares, & Lemos in manuscriptis de gratia; sed ita veram esse pronuntiant, ut naturæ per peccatum in naturalibus vulneratæ infirmitas fundamentum unum, & basis una sit, cui tota Augustini de gratia medicinali doctrina superstructa sit, quæ proinde convulso illo fundamento, concidat necesse est.

Hanc autem nostram sententiam graphicè nobis repræsentat Veritas in illa parabola hominis descendentis à Jerusalem in Jerico, qui ut habetur *Lucæ 10.* incidens in latrones, non solum spoliatus fuit, sed & plagis impositis vulneratus, semivivusque relictus. Per quem hominem intelligunt Patres Adamum è paradiso per culpam descendentem, & in demones (qui merito latrones dicuntur, cum animas Deo mille titulis debitas furentur, & suo dominio iniquissimè subjiciant) incidentem: quo funestissimo lapsu & gratuitis spoliatum, & in naturalibus sauciatum, collisum, confRACTum, & graviter vulneratum affirmant Patres; ideoque & homo lapsus semivivus dicitur, quia libertas, tamen non sit per peccatum extincta, adeo tamen est debilitata, ut ad bene operandum parùm, vel nihil valeat; nisi adjuvetur ab omnipotenti bono. Hinc est, quod universa Sanctorum vox naturæ humanæ ad bene operandum difficultatem, & infirmitatem deplorat, à Deoque sanari illam orat, quia propriâ experientiâ convicta sentit

sentit omne caput esse languidum, omne cor mœrens, à planta pedis usque ad verricem non esse sanitatem, sed vulnus, sed livorem, sed plagam tumentem. Unde clamat cum Propheta Psal. 40. *Sana animam meam, quia peccavi tibi.* Id autem non orarent Sancti, nisi se vulneratos esse sentirent. *Quid sanatur, si nihil est vulneratum, nihil sauciatur, nihil debilitatum, atque vitiatum?* inquit Augustinus in illum Psalmum, cui affine est illud Salvatoris Matth. 9. *Non est opus valentibus medico, sed malè habentibus; non enim veni vocare justos, sed peccatores.* Hinc Chrysost. hom. 30. ad Popul. Antioch. comparat peccatorem infirmo, qui non tantum molestos febris æstus perpetitur, sed etiam sanarus debiliior permanet, & imbecillior. Hinc Concilium Arausicanum II. can. 1. sic pronuntiat: *Si quis per offensam pravaricationis Adæ non totum, id est secundum corpus, & animam, in deterius dicit hominem commutatum, sed anima libertate illæsa durante, corpus tantummodò corruptioni credit obnoxium, Pelagii errore deceptus.* *Reversatur Scriptura dicenti Ezech. 18. Anima quæ peccaverit, ipsa morietur.* Et Rom. 6. *Nescitis quoniam cui exhibetis vos servos ad obediendum, servi estis ejus, cui obeditis.* Et 2. Pet. 2. *A quo quis superatur, ejus & servus efficitur.* Hinc denique Tridentinū sess. 5. de peccato originali, affirmat & definit, primum hominem transgressionem mandati Dei nedum sanctitatem, & justitiam amisisse, incurrisseque per offensam hujusmodi iram, & indignationem Dei; sed etiam totum Adæ per illam pravaricationis offensam secundum corpus & animam in deterius commutatum fuisse.

Ratio

Ratio verò hujus doctrinæ multiplex afferri potest. Et primò, suppositâ nostrâ sententiâ, dum de effectibus peccatorum stabilitâ, quâ monstravimus, in statu naturæ puræ non futuram concupiscentiæ cum ratione pugnam, seu rebellionem, res decisa manet. Cùm enim constet, hac internâ hominis pugnâ vires voluntatis non parùm imminui, tum quia omne agens agendo repatitur, pugnando fatigatur; tum quia ob intimam facultatum sympathiam, & colligationem, voluntatem secum rapit concupiscibilis libido; voluntatem verò tædio afficit irascibilis difficultas: ergo si in statu naturæ puræ nulla esset partis inferioris cum superiore inordinata lucta, quia ut ex D. Thoma aliàs vidimus, talis rebellio est contra naturam, manifestum est, minores esse hujus status, in quo illud viget quotidianum certamen, vires ad benè moraliter operandum, quàm fuissent in statu naturæ puræ. Atqui illam concupiscentiæ pugnam, seu legem carnis legi mentis repugnantem, & captivantem nos sub lege peccati, non experiretur homo in statu naturæ puræ, ut alibi demonstratum supponimus. Ergo in misero naturæ lapsæ statu minores sunt ad benè moraliter, & honestè operandum vires, quàm fuissent in statu naturæ puræ.

Secunda ratio ab hoc principio independens, & in adversariorum sententia convincens, est hujusmodi: Homo in statu naturæ lapsæ est averfus à Deo ultimo fine, non solùm supernaturali, sed etiam naturali; cùm enim Adamus peccato suo nedum legem supernaturalem, sed etiam naturalem violaverit, consequenter totam suam progeniem à Deo auctore naturali aver-

tit; quam quidem aversionem non haberet homo in statu naturæ puræ, cum in eo nullum esset peccatum. Atqui ille, qui ab ultimo fine est averſus, minores habet ad benè moraliter operandum vires, quàm ille, qui non est averſus, quia efficacia, & vires voluntatis ad tendendum in media ſumuntur ex amore, & converſione ad finem, qui ſe habet in agibilibus ſicut primum principium in ſpeculabilibus: patet verò, eum qui caret fixo principiorum aſſenſu, & multò magis qui circa principia errando à veritate averſus eſt, minùs eſſe habilem, minoresque habere vires ad conſuſiones ex principiis derivandas. Ergo ſimiliter homo lapſus, qui ab ultimo totius humanæ vitæ fine Deo averſus eſt, minores habet ad bene operandum vires, quàm habuiſſet in ſtatu naturæ puræ, in quo nulla fuiſſet ab ultimo fine averſio.

Nec ſatisfacit reſponſio adverſariorum alienum, hominem in ſtatu naturæ lapſæ non eſſe averſum à Deo averſione poſitivâ, ſed privativâ illius converſionis, non quæ eſſet in ſtatu naturæ puræ, ſed quæ eſſet in ſtatu juſtitie originalis. Non, inquam, ſatisfacit: quia averſio à Deo, quæ eſt in ſtatu naturæ lapſæ, etſi ſit primariò privatio converſionis ad Deum ut authorem ſupernaturalem, à juſtitia originali cauſatæ; eſt tamen ſecundariò, & indirecè privatio converſionis ad Deum ut authorem naturalem, quem offendimus etiam dum præcepta ſupernaturalia violamus; inde omnia omninò peccata ſunt contra naturam rationalem: quæ quidem privatio non eſſet in ſtatu naturæ puræ, in quo cum nullum eſſet peccatum, nulla eſſet à Deo averſio, nulla ordinis ad ultimum finem privatio: ergo cum

vires

vires morales voluntatis defumantur à fine, minores sunt vires status naturæ lapsæ, in quo homo à fine naturali averfus est, & ordine ad illum privatus.

Confirmatur efficacius: Et si homo in statu naturæ puræ non esset positivè conversus ad Deum, tamen nullum haberet intrinsecum impedimentum, ratione cujus conversio ad Deum ut authorem naturalem esset sibi ex vi sui status impossibilis, sed potius posset vel cum concursu generali, vel speciali auxilio statui illi attemperato in Deum urgente præcepto se convertere, & in illum ut finem naturalem se, suæque omnia referre; quo utique finis præintenti amore non parum roboratur virtus voluntatis ad media honesta eligenda, quia intentio finis in mediocrum electionem sponte sua diffunditur, & vigor electionis ex efficacia intentionis totus derivatur; nec qui vult ardentè, & efficaciter finem, media remisè, & tepidè quærit, sed ad ea potius necessitatur. Atqui in statu naturæ lapsæ homo habet intrinsecum impedimentum, quod propriis viribus auferre non potest, & quo durante non potest ad Deum ut authorem naturalem se convertere; nam habet peccatum originale, quod non est denominatio merè extrinseca, sed intrinseca macula, quæ non potest nisi per gratiam sanctificantem omnes naturæ vires possibiles excedentem abstergi; quâ durante maculâ non potest homo se ad Deum convertere, nec ex amore Dei ultimi finis se ad opera virtutis elicienda accingere. Ergo in statu naturæ lapsæ sunt minores vires ad benè moraliter operandum, quàm fuissent in statu naturæ puræ. Hanc rationem tangit D. Thomas in 2. dist. 30.

q. 1. art. 1. ad 3. dicens : Homo per peccatum factus est minus habilis , & magis distans à finis consequutione , & propter hoc etiam homogratuitis spoliatus , dicitur in naturalibus vulneratus.

Argumenta Suaris & Gonetii oppositum sentientium , quibus hanc responsionem impugnant , probant solùm inclinationem naturalem hominis ad bonum honestum , non imminutam esse physicè , & quoad entitatem per peccatum , quod ultrò fatemur , cùm substantia animæ , ejusque facultates incorruptibiles sint ; sed non probant , inclinationem illam non esse moraliter imminutam , appositione scilicet ingentis impedimenti , quod tota natura lapsa propriis viribus auferre nequit , quòdve in natura pura non fuisset.

Tertia ratio nostræ assertionis sic formatur : In statu naturæ lapsæ actus amoris Dei , etiam ut aauthoris naturalis , superat omnes naturæ vires , ut concors Theologorum sententia fert , & infra demonstravimus . Atqui in statu naturæ puræ potuisset homo cum solo concursu generali Deum saltem ut naturæ authorem super omnia diligere ; tum quia ad Deum diligendum teneretur homo in statu naturæ puræ , nec ad impossibile teneretur ; nec possibilitas illa à gratia obveniret , cùm ille status omnem gratiam excludat , & nemo jure naturali ad aliquid obligetur , quod naturaliter implere non possit , nisi perfectio naturalis corrupta sit , vel infirmata ; natura autem pura sana esset . Tum quia ideo secundum D. Thomam *quæst. 109. 1. 2. artic. 3.* homo in statu naturæ lapsæ indiget gratiâ ad diligendum Deum , quia in hoc statu est per peccatum

catur inclinatus ad bonum privatum, qui est ultimus finis peccatoris. At in statu naturæ puræ nulla esset culpa detorquens creaturam rationalem ad bonum privatum: ergo in statu naturæ puræ posset homo Deum tanquam ultimum finem suum diligere, & in illum omnia sua referre; nec ad hoc ullam sentiret repugnantiam, sed innatam propensionem, quæ cum non esset frustra, posset in actum cum concursu Dei generali prorumpere, cum actus primus in actum secundum sponte feratur, imò & vim patiatur, dum ne prorumpat, impeditur. Ergo longè minores sunt in statu naturæ lapsæ vires ad benè moraliter operandum (directio enim Dei est principium totius vitæ moralis, & honestæ) quàm fuissent in statu naturæ puræ.

Ultima ratio talis est: Status naturæ lapsæ non est sine frequenti lapsu in peccata actualia; quia vel remittitur peccatum originale per gratiam, & tunc desinit status naturæ lapsæ, & est status naturæ reparatæ; vel non remittitur, & tunc necessario supponitur peccatum actuale mortale, cum homo usu rationis præditus teneatur se convertere in Deum; & si convertatur, justificatur, à peccatoque mundatur; si non convertatur, hoc ipso in peccatum mortale incurrit. Ergo per se status naturæ lapsæ infert peccatum actuale. Atqui per peccata actualia imminui vires liberi arbitrii ad benè moraliter operandum, fatentur ipsi adversarii, & probat S. Thomas q. 85. art. 1. quia per actus malos fit quadam inclinatio ad similes actus. Et quia inclinatio ad bonum virtutis, addit art. 3. in unoquoque diminuitur per peccatum actuale, etiam ista sunt quatuor vulnera ex aliis peccatis consequentia,

quentia, in quantum scilicet per peccatum & ratio hebetatur præcipuè in agendis, & voluntas induratur ad bonum, & major difficultas benè agendi accrescit, & concupiscentia magis exardescit. Ergo statum naturæ puræ per se concomitantur minores vires. Nec dicas, minores illas vires procedere à peccatis actualibus; nam cum status ille peccata actualia per se inferat in sui permanentia, quæ est de ratione status, permanentiam enim in natura lapsa innumera comitantur peccata actualia; consequens est, illi statui, ut status est, per se annexas esse minores vires: quod de statu naturæ puræ dici nequit, cum in illo posset homo benè operari, nec esset à Deo averfus, nec in bonum proprium ultimò conversus. Uno verbo, non haberet impedimentum, & jugum grave peccati originalis, quod filiis Adam impositum est.

Solvuntur objectiones.

Objicies primò. S. Thomas *q. 85. art. 1. & 3.* ponit discrimen inter peccatum originale, & actuale, quod per originale privatur homo justitiâ originali, per actuale verò diminuitur inclinatio ad bonum rationis. Ergo in statu naturæ lapsæ non sunt minores vires ad benè moraliter operandum, quàm fuissent in statu naturæ puræ.

Respondeo in primis, falsum esse S. Doctorem discrimen illud ita statuere, sicut asserit arguens; quanvis enim D. Thomas doceat, ibi peccato originali auferri justitiâ originalem, & peccato actuali diminui inclinationem ad bonum rationis, non ita tamen illa peccata comparat, ut affir-

met

met unum effectum causari ab uno peccato cum exclusione alterius effectus; nam & peccatum actuale Adami non solum diminuit inclinationem ad bonum, sed etiam privavit iustitia originali; & similiter originale non solum privat iustitia, & integritate originali, sed etiam inclinationem ad bonum minuit hoc ipso, quod frænum, & habenas concupiscentiæ laxavit. Quamobrem S. Doctor primum utriusque peccati effectum considerat; & verum est, quod originale, quia originale, privat iustitia primigenia; actuale verò, quia actuale, per generationem pravi habitus, quem causat, minuere inclinationem rationis: quanvis utrumque peccatum, ut peccatum est, & aversio à Deo, & iustitiam originalem auferat, etiam actuale, si illam invenit; & inclinationem ad bonum minuatur hoc ipso, quod ab ultimo fine avertit, unde sumuntur vires ad bene moraliter operandum.

His adde primò, S. Doctorem velle, peccato actuali minui vires positivè, & physicè, in generatione nimirum novi habitus; quia, inquit, *per actus humanos fit quadam inclinatio ad similes actus*; quod per peccatum originale, secundum communio rem sententiam non fit: cum quo stat, peccato originali imminui vires moraliter, appositione nimirum gravis impedimenti moralis, aversionis nimirum ab ultimo fine, ex cuius intentione rota electionis efficacia promanat. Unde in nostra sententia stat discrimen illud inter peccatū originale, & actuale à D. Thoma insinuatam. Adde secundò, quod cum status naturæ lapsæ, & peccato originali inquinatæ, non sit status, id est, diu non duret, nisi innumeris peccatis actualibus sordescat; hoc ipso, quod ad-

versarii cum D. Thoma fatentur, hominem in statu peccati actualis minorem propensionem, majoremque habere difficultatem ad bonum honestum; consequenter fateantur necesse est, statum naturæ lapsæ minoribus instrui ad benè agendum viribus, quàm instructus fuisset status naturæ puræ.

Objicies secundò: Ex removente prohibens non sequitur major aut minor effectus naturalis, quàm ex natura ipsa sequatur; sicut lapis remoto prohibente non velociùs movetur, quàm si fuisset à propria duntaxat gravitate permotus. Atqui peccatum originale se habet solum ut removens prohibens in ordine ad motus inordinatos voluntatis, vel appetitus, quatenus abstulit justitiam originalem, quæ erat veluti frænum, & retinaculum potentiarum inordinatos motus compescens. Ergo ex peccato originali nulla consequutâ est ad benè moraliter operandum debilitas.

Respondeo in primis, argumentum istud in nostra sententia cum Estio, & Herrera contentente, hominem in statu naturæ puræ nullam persensurum appetitus rebellionem, omni prorsus carere vi, ut patet. Cæterùm abstrahendo ab illa sententia, dicendum est, peccatum originale non solum removere justitiam originalem, sed etiam apponere impedimentum morale, quod non esset in statu naturæ puræ; quia per illud avertimur à Deo, etiam ut authore naturali: quod esse grande impedimentum fatetur ipse Gonetus *disp. 1. de necessitate gratiæ, art. 4. §. 5.* ubi expressè ait, quod licèt in peccato originali non sit positiva conversio ad creaturam, benè tamen ei inest privativa aversio à Deo, etiam ut
authore

authore naturæ: quæ averſio non poteſt non eſſe maximum dilectionis Dei ut authoris naturæ impedimentum: quæ doctrina, quomodo cohæret cum his, quæ de viribus naturæ lapsæ docet, ipſe viderit.

Objicies tertio: Homo per peccatum originale non fuit factus deterioris conditionis quantum ad corpus, quàm fuiſſet in ſtatu naturæ puræ; corpus enim peccato originali non magis corruptibile, magisque infirmum evaſit, ſed ſolâ fuit immortalitate, & impaſſibilitate privatum. Ergo nec etiam deterioris eſt conditionis homo quantum ad animam, ejuſque facultates, quæ proinde non minùs ſunt ad benè moraliter agendum expeditæ; juſtitia namque originalis idem proportionem ſervatâ animæ conferebat, quod corpori præſtabat; unde ex ejus ablatione eadem, & non majora animæ incommoda acciderunt, quibus & corpus ſubjectum fuit.

Reſpondeo permitrendo antecedens, quod vel negatur, vel in dubium vocatur ab iis, qui volunt in pœnam peccati Adami, & corpus humanum, & univerſam creaturam corporalem majoribus ſubeſſe ærumnis, quàm in ſtatu naturæ puræ ſubiacuiſſet, ut tot, quas experimur, pœnis Deo læſo fiat ſatis. Sicut enim reus non ſolùm de gradu deſcendit, de bonorumque poſſeſſione depellitur, ſed etiam flagellatur, pœniſque corporalibus maceratur; ita æquum fuit, ut humanum corpus, munduſque totus Creatoris offenſam pœnarum tolerantiam elueret, divinumque juſ læſum reſarciret, atque etiam ut inde primi peccati ſtrages, & generalis in omnibus graſſata corruptio appareret: nam ut ait

Prosper lib. cont. Collat. cap. 2. Patet culpa, ubi non latet pœna; & societas peccati convincitur de communione supplicii.

Sed permissio antecedente, negamus consequentiam; tum quia subiectum peccati originalis est anima, non corpus; unde non mirum, animam in deterius peccato originali immutari, tametsi deterior non evadat corporis conditio. Tum etiam, quia deterior animæ, ejusque facultatum, qualem admittimus, conditio non est aliquid physicum, sed morale duntaxat impedimentum ab aversione à fine ultimo proficiscens; cujus impedimenti corpus capax non est, cum ad ipsum non pertineat respicere finem; nec ejus motus dicuntur morales, nisi denominatione extrinseca ab internis animi moribus desumpta. Certè sicut per justificationem anima perficitur, tametsi corpus in melius non mutetur; ita per peccatum originale anima in pejorem statum adducitur, quanvis corpus in deteriorem conditionem non prolabatur.

REFLEXIO.

Naturæ lapsæ vulnera, & circumstantes nos ærumnas nullus, nisi insensibilis, vel insensatus, non sentit. Quid ergo nobis, & dirè multatis, multis vulneribus sauciis, semivivisque relictis opus est facto? Vires nostræ quàm sint debiles experti, cœlestis Medici opem jugiter imploremus; & naturæ nostræ debilitatem ingenuè fassî, nullam aliam recipiendæ salutis viam esse credamus: ad Deum de profundis clamemus, abyssum misericordiæ invocet miseræ abyssus, secundo nos permittamus Adamo, qui primi lethalia

thalia vulnera curet , innocentiam reparet , pristinam restituat sanitatem.

Hic unus sit miseriarum , quibus undique premimur , fructus salutaris , infirmitatis confessio , & divinæ opitulationis jugis , humilisque precatio , ut benè expendit Augustinus in illud Psalmi 76. *In die tribulationis meæ Deum exquisivi, & non sum deceptus.* Ille enim feliciter tribulatione exercetur , qui tribulatione instigante Deum quærit , quem in prosperitate neglexerat ; imitaturque Prodigum jam sapientem , qui deputatus porcis , sentiens quàm miserum sit , amarum quàm sit quietis paternæ beatitudinem perdidisse , in se reversus , qui à se antè recesserat , cùm recessit à patre ; à seque migrarat , & ab homine totus transierat in bestiam , paternæ pietatis immemor , gratiæ genitoris oblitus , famis ærumnâ revocatur , quem saturitas expulerat ; & calamitas illi patrem dedit sapere , cui copia abstulerat sentire genitorem ; unde & dicit : *Surgam, & ibo ad patrem.* Infirmitas ergo gradus fuit , quo ad alta pertendere , conscendere ad virtutes , ad ipsum cœpit pietatis authorem totus aliger pervolare.

Qui sic infirmitatibus utitur , talis profectò in tribulationibus cum Apostolo gloriari potest , quia virtus in infirmitate perficitur. Sed lubet audire Augustinum loco mox laudato sic scribentem : *In die tribulationis meæ Deum exquisivi. Quis es , qui hoc facis ? In die tribulationis tuæ vide quid exquiras. Si carcer facit tribulationem , exire de carcere exquiris : si fames facit tribulationem , saturitatem exquiris : si febris facit tribulationem , sanitatem exquiris : si*
damna

damna faciunt tribulationem, lucrum exqui is : si peregrinatio facit tribulationem, civitatem tua carnis exquiris. Et quid cuncta commemorem, aut quomodo cuncta commemorem? Vis esse transfiliens? In die tribulationis tua Deum exequire, non per Deum aliud sed ex tribulatione Deum, ut ad hoc Deus removeat tribulationem, ut securus inhereas Deo.

Igitur agnosce infirmitatem tuam, si veram cupis invenire salutem; & quia humiliatio tua in medio tui est, assuesce habitare in te, si vis ascendere supra te; ab exterioribus ad interiora redi, ut ab interioribus ad superiora conscendas, & ad ipsum clama, ne cesses, qui sanat omnes infirmitates tuas; sed clama humiliter, clama verecundè. Humiliter quidem, quia ut docet Gregorius lib. 2. Moral. cap. 29. *Ille veram Deo orationem exhibet, qui semetipsum, quia pulvis sit, humiliter videt, qui sibi nihil virtutis tribuit, qui bona, que agit, esse de miseria conditoris agnoscit.* Verecundè verò, quia ut movet Ambrosius lib. 1. de officiis, cap. 18. *In ipsa quoque oratione nostra multum verecundia placet, multum conciliat gratia apud Deum nostrum. Nonne hac prætulit Publicanum, & commendavit eum, qui nec oculos audebat ad cælum levare?*

C A P U T II.

*Hominis à Deo primo Motore in
omni statu dependentia sua-
detur.*

SI miser tantum esset homo , foret utique miserabilis, compassionem magis movens, quàm indignationem. Hoc verò quis ferre possit , hominem miserum in sua paupertate superbire , & miseriam confiteri suam detrectare ? Non ab omni sanitatis spe continuò dejectus est, qui infirmus est ; sed tunc morbus est penitus deploratus , vel cum ignoratur infirmitas, vel etiam si cognoscatur, amatur ; quia & quod ignorat medicina, non curat ; & illud à se averti non deprecatur infirmus , quod diligit, vel delectat. Ut igitur & mala nostra cognoscamus , & cognitis divinâ opitulante gratiâ medeamur , explicandum est quanta sit hominis à Deo in omni statu dependentia, quantave ejus motionis necessitas, quam triplici titulo exigi demonstrabimus, & ratione subordinationis causæ secundæ ad primam, & ratione speciali infirmitatis naturæ lapsæ, & ratione difficultatis operum supernaturalium, quæ à nobis agenda sunt. Primum quidem in hoc capite : secundum, & tertium exponemus dissertatione sequenti.

SPECULATIO I.

Motio Dei ad benè agendum homini in omni statu necessaria est ratione dependentiæ, & subordinationis causæ secundæ ad primam: unde si concursus Dei sit prævius, & prædeterminativus, talis etiam erat in statu innocentie.

Non intendimus in hac speculatione, nec in hujus tractatus serie materiam de Auxiliis post tot iteratas Summorum Pontificum prohibitiones vel leviter quidem attingere. Quare de motione agimus universim, sive illa ab intrinseco, & prout ab omnipotentia Dei descendit, efficax sit; sive ab extrinseco, à consensu nimirum liberæ voluntatis gratiam determinantis, per scientiam mediam præviso efficaciam sortiatur. Unde in secunda hujus speculationis parte non determinamus absolutè, dari non solum concursum simultaneum, sed etiam prævium; sed conditionatè duntaxat procedimus, asserimusque, quod si subordinatio, & dependentia creaturæ, & causæ secundæ à prima exigat talem concursum, non minùs ex illo capite necessaria præmotio, & prædeterminatio in statu naturæ innocentis, quàm in statu natu-

ra lapsæ, quanvis in isto, titulo infirmitatis specialiter exigatur. Hoc præmissio

Probatur prima pars hujus speculationis, affirmans hominem in omni statu ad bene agendum indigere motione, & gratia primi motoris. In primis hanc veritatem expressè tradit Augustinus *lib. de corrept. & grat. cap. 27. sic: Ut in eo bono permaneret (Adamus) egebat adjutorio gratia, sine quo id omnino non posset.* Et in *Enchiridio ad Laur. cap. 107. sic apertè loquitur Doctor sanctissimus: Factus est homo rectus, ut & manere in ea rectitudine posset non sine adjutorio divino, & suo fieri perversus arbitrio. Et si peccatum (ut dixerat cap. 106.) in solo libero arbitrio erat constitutum, non tamen iustitia retinenda sufficiebat liberum arbitrium, nisi præparatione immutabilis boni divinum adjutorium praberetur.* Quod & epistola 106. inculcat idem Pater his verbis: *Natura humana, etiam si in illa integritate, in qua condita est, permaneret, nullo modo seipsam, Creatore suo non adjuvante, servaret; cum sine gratia Dei, ut ibidem dicitur, salutem non posset custodire, quam accepit.* Hinc est, quod eadem epistola docet idem S. Doctor, hominem cum totis liberi arbitrii viribus creatum veraciter dicere cum Propheta: *Fortitudinem meam ad te custodiam.* Quia ille, qui putavit se posse sine illius adjutorio custodire quod dedit, profectus in longinquam regionem, & vivens prodigè, cuncta consumpsit: unde eo solùm servante, & adjuvante non perdimus, quod eodem largiente suscepimus.

Rationes hujus Catholicæ, veritatis stabilendæ ergò innumerae proferri possunt; solidiores.

diores perstringam. Prima est, quia in omni statu pendet homo à Deo, non solum ut sit, sed etiam ut benè agat; cum sicut esse creaturæ est expressio entis à se, ita actio creaturæ sit participatio divinæ actualitatis, & virtutis, & actionis: omne autem ens participatum, ab ente per essentiam dependere, & ea ratione dependere, sub qua participat, solus ille inficias ibit, qui terminos non intellexerit, vel communissimas Philosophiæ notiones ignoraverit. Ergo à Deo prima causa, primoque motore pendet omnis causæ secundæ motus, cum ea solum ratione Deus primus motor dici possit, & debeat. Hanc rationem tradit Augustinus in Psam. 58. *Totum quidquid sum, de misericordia tua est. Fecisti ut essem, & non tu fecisti ut bonus essem? Dedisti mihi ut sim, & potuit alius mihi dare, ut bonus sim? Si tu mihi dedisti ut sim, & alius mihi dedit ut bonus sim, melior est ille qui mihi dedit ut bonus sim, quam ille qui mihi dedit ut sim. Porro quia nemo te potentior, nemo te in misericordia largior, à quo accepi ut essem, ab illo accepi ut bonus essem: Deus meus misericordia mea.* Quam rationem in bonis etiam Angelis habere locum fusè demonstrat idem August. libro 12. de Civit. cap. 9.

Secunda ratio multas alias virtualiter complectens, est huiusmodi: Nisi creatura in quovis statu à primi motoris gratuito impulsu pendeat, præcipua corruant divinitatis attributa necessum est. In primis scientiæ Dei certitudo non consistet; si enim futura libertatis opera à Deo nō-vente non pendeant, quomodo illa poterit certò cognoscere, quorum eventus non à se, sed à bilancis, & non determinatæ voluntatis nutu proficiscuntur? Providentia etiam Dei pariter conce

concidet ; nam in sui dispositione falli poterit, si aliquid efficiatur , quod non à se fortiter , & juxta suaviter disponente procedat. Omnipotentia etiam Dei infirma evadet , & impotens ; periclitabiturque , ut loquitur Augustinus in *Enchir. cap. 39.* ipsum confessionis nostræ initium, quo nos in Deum patrem omnipotentem credere confitemur, si aliqua vult facere Deus, & non fecit ; & quod indignius est, ideo non fecit, quoniam ne fieret quod volebat , omnipotens voluntas hominis impedivit. Ratio etiam primæ causæ , primique principii facile corruet, atque subinde ultimi finis pretiosissimum monile penitus destruetur , cum ad primum agens pertineat omnium secundorum agentium motus efficere , ad ultimum finem omnia in se referre, & juxta suæ propositum voluntatis ordinare. Denique ipsa nominis subordinatio id exigat. Etenim cum duæ causæ concurrunt, nisi fortitudo, & casu coagant, vel unam ab alia moveri , & determinari necesse est, vel utramque ab aliqua tertia. Atqui Deum , & hominem ad agendum ab alia tertia causa moveri , nullus etiam per somnium hætenus deliravit : ergo vel Deus à causa secunda movebitur , sicque ordine horrendum in modum præpostero evadet causa secunda primus motor , quod impium est cogitare ; vel à Deo causa secunda movebitur, utambo deinde effectum eundem coëfficiant.

Has rationes implicitè tangit D. Thomas libro 3. cont. Gent. cap. 89. ubi impugnat sententiam eorum qui ponebant , Deum causare in nobis virtutem ut velimus, non autem facere ut velimus. *Quibus* , inquit, *resistitur evidenter auctoritatibus sacra scriptura. Dicitur enim*

Isaia 26. Omnia opera nostra operatus es in nobis Domine : unde non solum virtutem volendi à Deo habemus, sed etiam operationem. Præterea hoc ipsum, quod Salomon dicit, Quicumque voluerit, vertet illud, ostendit divinam causalitatem non solum ad potentiam voluntatis extendi, sed etiam ad actum ipsius. Quod & ibidem aliis rationibus confirmat. Plura etiam ad eam doctrinam firmandam argumenta statim proferemus.

Probatur secunda pars.

Secunda pars, quæ asserit, quod si concursus Dei sit in hoc statu prævius, & non tantum simultaneous, talis etiam admittendus est necessarius pro statu innocentiae, est contra Cornelium Jansenium Ipreensem Episcopum, contendentem hanc esse capitalem differentiam inter gratiam & motionem status innocentiae, & gratiam medicinalem naturæ lapsæ necessariam, quod prior ita moveret liberum arbitrium, ut ejus determinationem expectaret, ab ejusque usu efficaciam totam suam sortiretur : posterior verò ita moveat voluntatem, ut consensum infallibiliter inferat. Unde infert, gratiam efficacem ad omnes humanæ naturæ status dilatatam totum medicinalis Christi gratiæ fundamentum subvertere, dum gratiæ necessitas non ex vulnere voluntatis, sed naturali ejus indifferentia, & omnium causarum subordinatione suspenditur. Præcipuum ejus fundamentum doctrinæ ab Augustino in libro de correptione & gratia stabilitæ haud parvo veri colore innititur.

Non intendo, ut dixi, & iterum moneo, quæ-
stionem

tionem de efficacia auxiliorum discutere : id solum impræsentiarum contendo , quod supposito quod detur motio Dei prædeterminans in hoc statu,perperâ illius necessitatem ad omnem statum non dilatabimus,cum potissima autoritatû,rationumque moimenta ab Augustino , & D.Thoma deprompta , vel nihil prorsus præbent , vel ejus pro omni statu necessitatem astruant.Quare non rem ipsam determinare aucto, sed consonantiam doctrinæ Thomisticæ demonstrare in præsentis satago ; id est, an sit necessaria motio prædeterminans , Pontificias constitutiones reveritus, non definitio ; sed inquiri utrum ex suppositione vera , aut falsa , quod rationes astuentes physicam præmotionem efficaces sint (& eas in principiis Jansenii efficaces esse patebit) eadem etiam convincant pro statu innocentie.

Probatur expendendo rationes Augustini. Ideo Augustinus probat Pelagianis gratiam esse efficacem (undecumque tandem efficacia proveniat) quia ut ait *lib. 4. ad Bonif. cap. 9.* oramus pro repugnantibus & oppugnâtibz, & petimus ut fiant ex nolentibus volentes, & ex repugnantibus consentientes ; ac proinde sequitur consensum esse divinæ gratiæ donum, quia alioquin *inaniter, & perfunctoriè potius, quàm veraciter Deo fundimus preces, si ad ejus non pertinet gratiam convertere ad fidem suam ipsi fidei contrarias hominum voluntates. Prorsus non oramus, sed orare nos fingimus, si hos ipsos, non illum credimus facere quod oramus, si petimus quod credimus in nostra potestate. Certè nihil est apud Augustinum frequentius, nihil inculcatius, quàm quod ficta, & irrisoria petitio est, cum id à Deo petitur, quod ipsum dare non creditur : sicut irriso-*

ria pariter est gratiarum actio, si ob hoc gratiæ aguntur Deo, quod non donavit ipse, nec fecit. Atqui Adamus tenebatur invocare Deum non solum ut posset, sed etiam ut bene vellet: tum quia id certum esse cōmunissimus pietatis sensus inspirat: tum quia per se absurdum, ne quid gravius dicam, est asserere, nullam fuisse in statu innocentiae orationis necessitatem: nulla autem esset in illo statu orandi necessitas in principiis Iansenii; neque enim Adamus debebat pro gratia sufficienti orare, quam habebat; *quid enim stultius* (ut argumentatur Augustinus *lib. de nat. & grat. cap. 18.*) *quàm orare quod habes in tua potestate?* Non debebat etiam gratiam efficacem à Deo rogare, à quo non proficiscebatur efficacia, ab usu liberæ voluntatis duntaxat oriutura. Tum quia Deus poterat Adamo gratiam impartiri, ne caderet: *Quis enim audeat dicere, aut credere, ut neque Angelus, neque homo caderet, in Dei potestate non fuisse?* ait August. *lib. 14. de Civit. cap. 17.* Ergo illam poterat invocare gratiam; imò ideo peccavit, quia non oravit, nec ad Deum pro illa obtinenda gratia confugit, ut docet D. Thomas 1. p. q. 94. art. 4. ad 5. Ergo ex Augustini principiis de efficacia divinæ motionis in utroque naturæ innocentis, & lapsæ statu peræquè judicandum est.

Secundò: Ideo Augustinus probat necessitatem gratiæ christianæ, quia bona voluntas est donum Dei, quod Deus non solum potens est præscire, sed etiam facere, ubi voluerit, quando voluerit, & quoties voluerit, ut patet ex libro *de predest. Sanct. cap. 10. lib. de grat. & libero arb. cap. 21. epistola 107. ad Vitalem*, & aliis passim locis. Atqui non solum potestas, sed etiam bo-

na Adami voluntas erat donum Dei, ut liquet ex omnibus illis testimoniis, quæ in priori hujus speculationis parte in medium produximus, quibus adde illud ex lib. 14. de Civit. cap. 11. *Bona voluntas est opus Dei; cum ea quippe ab eo factus est homo.* Et rationem assignat ab infirmitate naturæ lapsæ prorsus independentem libro 12. cap. 9. cum de Sanctis Angelis viatoribus sic scribit: *Si non potuerunt seipsos facere meliores quàm eos ille fecerat, profectò & bonam voluntatem, quâ meliores essent, nisi operante adjutorio Creatoris, habere non possent.* Ergo juxta Augustini doctrinam non minor est necessitas gratiæ Dei præmotionis in statu naturæ integræ, quàm sit in statu naturæ lapsæ; licet in isto pluribus sit titularis necessaria auxilii divini opitulatio.

Tertiò probat Augustinus gratiæ, quam propugnabat, necessitatē, quia inscrutabilis est hæc quæstio, nec per liberum arbitrium solui potest, quare unum trahat, & alium gratia non trahat, cum tamen ad Filium nemo possit venire, nisi Pater traxerit illum. Si quis me interroget, inquit lib. de Spirit. & lit. cap. 33. *cur illi ita suadeatur, ut persuadeatur; illi autem non? duo solum occurrunt, quæ respondere mihi placeat: O altitudo divitiarum! Et, Nunquid iniquitas apud Deum? Cui hæc responsio non placet, querat Augustino doctiores, sed caveat ne inveniat presumptores.* Cui succinens Prosper in responsione ad objectionem 14. Vincentianam, ait: *Cur Deus illum retineat, illum non retineat, nec possibile est comprehendere, nec licitum investigare; cum scire sufficiat, & ab illo esse quod statuitur, & ab illo non esse quod revocatur.* Atqui similiter idem Au-

gustinus explicaturus, quare bonis Angelis stantibus, mali, & post ipsos Protoparentes ceciderint, ad inscrutabilem divinorum judiciorum abyssum, tanquam tutissimum asylum confugit *lib. 11. de Genes. ad lit. cap. 10.* dicens: *Sed posset etiam ipsorum (cadentium Angelorum) voluntatem in bonum convertere, quoniam omnipotens est. Posset planè. Cur ergo non fecit? Quia noluit. Cur noluerit? Penes ipsum est.* Quod si aliquam interdum hujus lapsus rationem affert, ea est, ut in hominis casu appareret, quid posset liberum arbitrium sine adjutorio Dei: quod quidem liberum arbitrium, ut ait libro de corrept. & grat. *cap. 11. ad malum sufficit, ad bonum autem parum est, nisi adjuvetur ab omnipotenti dono.* Vnde tract. de cant. novo, *cap. 8.* inquit: *Quid valeat liberum arbitrium non adjutum, in ipso Adam demonstratum est: ad malum sufficit sibi: ad bonum non nisi adjuvetur à Deo.* Ergo in sententia Augustini eadem gratiâ indiget homo ad bene agendum in omni statu.

Quartò necessitatem à se defensæ gratiæ astruit Augustinus, quia totum Deotribuendum, & in nullo gloriandum est, nec potest se quispiam ab alio discernere. Ita enim ratiocinatur *lib. de Prædest. Sanct. cap. 3.* *Non sic pius, atque humilis Doctor ille sapiebat, Cyprianum beatissimum loquor, qui dixit, in nullo gloriandum, quando nostrum nihil sit. Quod ut ostenderet, adhibuit Apostolum testem dicentem: Quid habes quod non accepisti? Si autem accepisti, quid gloriaris quasi non acceperis? Quod repetit libro de dono persever. cap. 6. & 13. his piissimis verbis: Nos volumus, sed in nobis Deus operatur & velle. Nos operamur, sed Deus in nobis operatur & opera*

operari pro bona voluntate. Hoc nobis expedit & credere, & dicere: hoc est pium, hoc est verū, ut sit humilis, & submissa confessio, & detur totum Deo. Tutiores vivimus, si totū demus Deo: non autem nos illi ex parte, & nobis ex parte committamus. Atqui illa ratio æquè urget pro statu innocentiae Angelorum & Adami; nam discretionem bonorū Angelorū à malis Deo attribuit Augustinus *lib. 11. de civit. c. 19.* Et rationem affert *lib. 12. cap. 9. & in Psal. 70. ubi: Absit, inquit, ut meliores à seipsis, quàm à Deo facti sint. Tibi debent quod vivunt, tibi debent quod justè vivunt.* Cui consonat illud Bernardi *lib. de grat. & lib. arb. ibi: Dictu ipso nefas videtur, Deo quod minus, nobis quod excellentius sit, attribuere.* Nec ad salvandam discretionem bonorum Angelorum à malis à Deo esse, quidpiam producit Iansenius, quod non possit à defensoribus scientiæ mediæ ad hanc infirmendam Augustini rationem afferri. Ergo iuxta Augustini doctrinam non minus est gratiæ Dei præmotio in statu integritatis, quàm in statu corruptionis necessaria. Et in omni statu verum est dicere: Non est volentis, neque currentis, sed misereris Dei, ut totum Deo detur, qui hominis voluntatem bonam & præparat adjuvandam, & adjuvat præparatam, ut in *Enchirid. cap. 32.* fusè prosequitur Augustinus.

Quintò sic argumentor: Illa doctrina non est Augustino consentanea, quæ innumera, eaque præcipua Augustinianæ doctrinæ principia evertit, & ab imis fundamentis subruit, nisi velimus Augustinum perpetuæ doctrinarum inconsequentiae insimulare. Atqui præfata Iansenii doctrina Augustini principia innumera non solum

fusque deque miscet, & confundit, sed etiam prorsus convellit. Etenim ut toto primo Theologiae tomo demonstravimus, Deus creaturas possibles in essentia sua tanquam in causa, futura absoluta in decreto absoluto, conditionata in conditionato cognoscit; ita ut asserente Augustino, Deus non cognoscat futura, nisi prædestinando; ita ut juxta eundem Patrem scientia visionis sit causa rerum, nec ideo Deus cognoscat futura, quia futura sunt, sed ideo futura sint, quia Deus novit, quia nimirum Deus non potest videre nisi opera sua. Hinc scientiam mediam, seu conditionatorum futurorum notitiam antecedentem decretum, sibi à Prospero & Hilario propositam repudiavit, & ut ait D. Thomas alibi citatus, reprobavit, eamque à se olim in libro de quæstionibus Paganorum tantisper insinuatam rejecit, dicens ea à se ibi obiter dicta absque præjudicio latentis Dei consilii, & propositi, quod tunc examinandum non erat, intelligi oportere; quia, inquit, prædestinatione Deus cuncta præscivit, & futura fecit ea prædestinando. Unde hanc regulam tradit, quod quando apud Dei tractatores de vocatione justorum & bonis operibus sermo habetur, præscire idem est, ac prædestinare. Ex quibus S. Pater infert, providentiam Dei esse certam, non solum certitudine præscientiæ, sed etiam causalitatis; & prædestinationem, seu propositum miserendi, bona merita prævisa non supponere, sed inferre. Atqui illa principia vel nihil probant, vel convincunt in omni statu necessariam Dei præmoventis prædeterminationem; vel si non probant de omni statu, nihil pro statu naturæ lapsæ concludunt, Ergo doctrina

ctrina Jansenii non est Augustino consentanea. Minor est manifesta, si termini penetrrentur: major verò est tomo primo omni genere argumentorum, clarissimis potissimè Augustini testimoniis persuasa.

His argumentis, & aliis pluribus, quæ fusè, & juxta exuditè Estius & Gonetus prosequuntur, unum addam singulare, quod in illis, nec in alio, quem sciam, Authore invenies: Si motio prædeterminans, & gratia per se efficax requiratur solùm, ut vult Jansenius, propter naturæ lapsæ corruptionem, & infirmitatem, sequitur quod ubi non est illa infirmitas, illaque corruptio ex peccato originali derivata, nulla ibi est hujusmodi gratiæ per se efficacis necessitas; sequitur etiam, quod si aliquis non haberet infirmitatem ad benè moraliter operandum, nec concupiscentiam effrænem, nec peccatum originale, quod illi daretur tantùm gratia sufficiens, auxilium sine quo, & adjutorium possibilitatis; sequitur præterea, quod illius bona opera per scientiam mediam antevertentem propositum Deus præsciret; sequitur insuper, alio modo esse philosophandum de ipsius prædestinatione, quæ non causaret bona opera, sed ea explorata per præscientiam supponeret, atque adeò totam suam ex prævisis meritis efficaciam sortiretur. Hæ omnes illationes sunt manifestæ, si enim ratio unica, & totalis, unde efficaciæ gratiæ necessitas depromatur, sit infirmitas naturæ, profectò ubi non erit talis infirmitas, talis difficultas, talis concupiscentiæ corruptio, talis denique peccati originalis infectio, ibi etiam nulla erit gratiæ per se efficacis necessitas sanandæ infirmitati deserviens.

Atqui in Christo nullum fuit peccatum originale, nullus peccati fomes, nulla benè operandi interna difficultas; & secundùm piissimam sententiam, Beatissima Virgo ab illa culpa primigenia fuit immunis; saltem secundùm omnes, fomes peccati & in utero matris ligatus fuit, & in conceptione Verbi Divini penitus extinctus, ut cum S. Thoma in nostra Mariologia dissert. ultima tomi de Incarnatione demonstrabimus. Ergo neque Christo, neque sanctissimæ Deiparæ necessaria fuit gratia per se efficax. Ergo bona opera Christi, & Deiparæ Deus per scientiam mediam exploravit, & futuram oblatae gratiæ determinationem non in omnipotentissima Dei potestate, neque in decreto, sed in bono liberè eorum arbitrii usu præscivit: ergo in illis non fuit auxilium quo, seu actionis: ergo Christum, & Matrem ejus ad gloriam, imò illum ad unionem hypostaticam, istam ad immensam Maternitatis dignitatem ex prævisis meritis elegit, & prædestinavit: & consequenter in Christo non fuit gratia Christi, quam Augustinus tot annorum curriculo propugnavit. Hæ consequutiones positæ Jansenij principiis ita sunt evidentes, ut sponte sua sine discursus circuitu fluant. Cùm juxta Adversarium pro statu sanitatis distincta sit gratia, distinctum decretum, distincta præscientia, distincta prædestinatio, ut omnis in his controversiis non penitus ignarus compertum habet. Atqui consequentia illa non solum à veritate aliena sunt, ut lib. o de Deo Homine, *dissert. 3. cap. 1. specul. 2.* demonstramus; sed etiam Augustino capitaliter adversantur, qui non semel probaturus Semi-pelagianis gratiam conferre bona opera, non sequi

sequi ; esse bonæ voluntatis non pedissequam, sed causam ; prædestinationem ad gratiam, & gloriam esse gratuitam, id probat exemplo Christi, *cujus nativitate bona opera sequuta sunt, non bona opera meruerunt*, ut ait *lib. de correp. & grat. cap. 11.* Quam rationem validè urget *libro de prædest. Sanct. c. 17.* ibi : *Est præclarissimum, inquit, lumen prædestinationis, & gratia ipse Salvator Christus Iesus.* Quæ ratio nihil concluderet, si alia sit gratiæ ratio, alia prædestinationis forma nobis, & pro Christo servata.

Verùm enim verò, quid opus est argumentorum serie, ut Augustini mentem ex ejus principiis colligamus ; postquam seipsum S. Doctor significantissimis verbis interpretatus est ? In primis necessitatem divinæ præmotionis pro omni statu, pro omnibusque causis, tam necessariis, quàm liberis disertè expressit *lib. 3. de Trinit. cap. 4.* sic : *Voluntas Dei, inquit, est prima, & summa causa omnium corporalium specierum, atque motionum.* Ut autem non respondeas S. Doctorem loqui tantùm de causis corporalibus, non autem de motionibus spiritualibus, audi quid dicat *lib. 83. qq. quæst. 21.* absque limitatione pronuntians : *Omnium quæ sunt, author est Deus, quia in quantum sunt, bona sunt.* Imò specialiter agens de libero voluntatis motu, sic apertissimè loquitur *lib. de grat. & lib. arbit. cap. 20.* *Scriptura divina, si diligenter inspicatur, ostendit, non solum bonas hominum voluntates, quas ipse facit ex malis, & à se factas bonas, in actus bonos, & in æternam dirigit vitam ; verùm etiam illas, quæ conservant sæculi creaturam, ita esse in Dei potestate, ut eas quò voluerit, quando*
volue

*voluerit, faciat inclinare. Et cap. 21. sic profec-
sequitur: Agit omnipotens in cordibus hominum
etiam motum voluntatis eorum, ut per eos agat
quidquid agere voluerit, qui omnino injustè ali-
quid velle non novit. Quod libro de corrept. &
grat. confirmat exemplo electionis Sathis, quam
profectam fuisse ait ab omnipotentissima Dei hu-
manorum cordium quò voluerit inclinandum
potest ite. Confirmat etiam exemplo eorum, qui
David in Regem elegerunt; quos, inquit, ad-
duxit Deus, ut Regem constituerent. Et quomo-
do adduxit? Nunquid corporalibus ullis vinculis
alligavit? Intus egit, corda tenuit, corda movit,
eosque voluntatibus eorum, quas ipse in illis op-
eratus est, traxit. Quorum omnium rationem non
ex eorum cordis corruptione, sed ex supremo
Dei dominio deduxit, dicens: Cum voluerit
Deus Reges in terra constituere, magis habet in po-
testate voluntates hominum, quàm ipsi suas. Quæ
omnia ad generalis præmotionis necessitatem
stabiliendam adeò clara sunt, ut nihil illis
clarius afferri possit, nisi istud fortè brevissi-
mum, & juxta nervosissimum dictum ex lib. 5. de
Genes. ad lit. desumptum: Movet itaque Deus
occultâ potentiâ universam creaturam. Et
istud alterum ex lib. 1. retract. cap. 9. ibi: Quia
omnia bona, & magna, & media, & minima
ex Deo sunt, sequitur ut ex Deo sit etiam bonus
usus libera voluntatis.*

Quæ omnia, tametsi universalissima, & ad
omnem statum dilatata testimonia, nullâ possunt
tergiversatione eludi, & ad statum naturæ lapsæ
coarctari, attamen ut omnis præcludatur effu-
gii locus, ostendo Augustinum ad statum inte-
gritatis Sanctorum Angelorum & Protoparen-
tum

tum descendisse, in eisque necessariam fuisse aliam gratiam ab ea, quâ instructi erant, distinctam. Id autem apertè statuit Doctor sanctissimus *lib. 12. de Civit. c. 9.* his verbis: *Vnde sine bona voluntate, hoc est Dei amore, nunquam Sanctos Angelos fuisse credendum est. Isti autem qui cum boni creati essent, tamen mali sunt, malâ propriâ voluntate aut minorem acceperunt amoris divini gratiam, quàm illi qui in eadem perstiterunt; aut si utrique boni aequaliter creati sunt, istis malâ voluntate cadentibus, illi amplius adjuti ad eam beatitudinis plenitudinem, unde nunquam se casuros certissimi fierent, pervenerunt.* Ergo manifestè admittit Augustinus majus auxilium, & amplius adjutorium in bonis Angelis, qui perstiterunt, quàm in illis, qui in culpam prolapsi sunt: quod amplius adjutorium non potest esse nisi gratia efficax, cum sufficientem omnes abundè recepissent.

Huic testimonio tres responsiones adhibent adversarii. Prima est, quia licèt Angeli perseverantes acceperint gratiam efficacem, tamen illa non erat eis necessaria; sicut licèt Apostoli fuerint in gratia confirmati, hæc tamen confirmatio non erat necessaria, ut peccata mortalia vitarent, ad quod gratia per se efficax sufficiebat. Secunda responsio est, quod majus illud adjutorium explicari facile potest de gratia sufficienti uberiori, & ampliori, cum etiam D. Th. fateatur, majorem gratiam habituales perfectioribus Angelis juxta perfectiorem naturæ suæ gradum fuisse concessam. Tertia responsio vult, per illud majus adjutorium intelligi scientiam certâ de suæ beatitudinis perpetuitate, quam boni Angeli in præmium suæ perseverantiæ receperunt.

Sed

Sed limpidissimus Augustini locus has omnes effutias discutit. Prima quidem responsio difficultati succumbit, dum Angelorum perseverantiam gratiæ per se efficaci tribuit; ad illius enim stabiliendam necessitatem hoc nobis sufficit, ut sine ea non perseverarent quicumque perseverant, & absque ea nullus perseveret, tametsi facultatem habeat perseverandi. Nec obest exemplum confirmationis in gratia, quia confirmatio illa sine gratia per se efficaci non est, cum importet copiosam gratiæ habitualis plenitudinem cum speciali jure habendi auxilium per se efficax, quotiescumque peccati mortalis culpa vitanda est.

Secunda verò responsio seipsam interimit; si enim juxta ibi allegatam D. Thomæ doctrinam major habitualis gratia perfectioribus Angelis juxta naturalis perfectionis proportionem in creatione data sit, major etiam data fuit actualis dilectio bonæ voluntatis, in qua Angeli constituti sunt, cum gratiæ justificantis intensio voluntatis conatui in adultis respondeat: in qua habitualis gratia, & dilectione gratiam status innocentie constituit Jansenius, alique ejus doctrinæ sectatores. Ergo perfectiores Angeli perfectius auxilium sufficiens habuerunt; siquidem majori gratia, majorique dilectione in primo creationis instanti præditi sunt; & tamen Angelorum perfectissimi, ipse etiam cælestis Hierarchiæ Princeps Lucifer in peccatum ceciderunt. Ergo illi lapsi sunt, qui majori auxilio sufficienti instructi sunt, ac proinde maius illud auxilium, quod in his, qui ad beatitudinem pervenerunt, admittit Augustinus, de majori auxilio sufficienti explicari nequaquam potest.

Tertia

Tertia denique responsio manifestam Augustini textui vim facit; cum enim præmium perseverentiæ sit ipsa beatitudinis plenitudo, & certissima beatitudinis securitas, ad quam per solam perseverantiam pervenimus; planè relinquitur, majus illud auxilium, quo Angeli Sancti amplius adjuti ad beatitudinem pervenerunt, non esse ipsam beatitudinem, vel beatitudinis securitatem in beatitudine acceptam, sed donum perseverantiæ, quo ad beatitudinem pervenerunt; non enim per illam certam felicitatis æternæ scientiam, per quam intellectualis creatura de sua felicitate æternâ certa, & segura est, ab beatitudinem pervenitur, sed tunc solum securitas illa habetur, cum ad beatitudinem perventum est. Certè licet (ut occupetur tacita instantia) in doctrina Augustini ipsa beatitudo possit dici adjutorium quo quis beatus efficitur: *Beatitudo*, inquit lib. de corrept. & grat. cap. 12. *quam non habet homo, cum data fuerit, continuo fit beatus; adjutorium est enim non solum sine quo non fit, verum etiam quo fit propter quod datur*: attamen certa beatitudinis scientia, & securitas nequit dici adjutorium, quo ad beatitudinem pervenitur, cum non nisi post adeptam beatitudinem habeatur, sitque non medium ad beatitudinem, sed corollarium beatitudinis jam possessæ.

Hanc esse Augustini mentem non solum ex plano de Civitate loco hætenus expenso eruo, sed etiam ex libro de correptione & gratia, in quo potissimum nobis adversari videtur; sic enim cap. 10. habet Doctor Sanctissimus: *Diabolus verò & Angeli ejus, etsi beatierant antequam caderent* (beatitudine scilicet naturali)



*Et se in miseriam casuros esse nesciebant ; erat tamen adhuc quod eorum adderetur beatitudini, si per liberum arbitrium in veritate stetitissent, donec istam summa beatitudinis plenitudinem, tanquam præmium ipsius permanſionis acciperent ; id est, ut magnâ per Spiritum Sanctum datâ abundantiam charitatis Dei, cadere ulterius non possent (in statu viæ) Et hoc de se certissimè nossent (nimirum in statu termini, & beatitudinis consummatæ.) Quibus in verbis S.Doctor tradit in primis, beatitudinis plenitudinem esse præmium permanſionis, seu perseverantiæ : ergo per solam perseverantiam ad beatitudinem pervenimus. Ergo si Sancti Angeli ampliùs adjuti ad beatitudinem pervenerunt, illud adjutorium debet intelligi de auxilio ad perseverandum necessario, & ipsam perseverantiam donante. Deinde docet Augustinus, illud quo Sancti Angeli ad beatitudinem pervenerunt, quodque diabolo & angelis ejus defuit, fuisse magnam per Spiritum Sanctum datam abundantiam charitatis, quâ cadere ulterius non possent : illa autem abundantia charitatis, quæ dat ulterius non cadere, vel est gratia efficax, vel effectus illius, nisi de nomine contendere velimus. Ergo perseverantia SS. Angelorum fuit effectus gratiæ per se efficacis. Quod & de primo homine docet in *Enchirid.cap.106.* his verbis : *Homo in paradiso ad se occidendum relinquendo justitiam idoneus erat per voluntatem ; ut autem ab eo teneretur vita justitia, parum erat velle, nisi ille qui eum fecerat, adjuvaret.* Plura ad eandem veritatem confirmandam Augustini testimonia reflexione sequenti referemus.*

REFLEXIO.

In omni statu necessaria est gratia : ergo fuit semper , est, & erit necessaria oratio , quâ cum Deo loquentes universa cordis nostri desideria in conspectu ejus effundamus. Per gratiam & stant qui non cadunt, & qui elisi sunt, eriguntur: ergo sine intermissione orandum est , ne deserat nos qui fecit nos, confisque viribus nostris inveniamus misérias nostras, funestâque experientia probemus , sine ipso nihil posse nos facere, quem tenemur jugiter invocare. Certè si primus homo virtutibus omnibus instructus , & gratiarum cœlestium muneribus opimus *sic erat institutus*, ut si de adjutorio Dei fideret, bonus homo malum Angelum vinceret, ut ait August. lib. 14. de civit. cap. 27. addens , quod & ipsum fidere de adjutorio Dei non quidem posset sine adjutorio Dei : si cœli , id est Angeli ipsi , Domino indigent, & ut ait idem Pater in Psalmum 32. *Verbo Domini cœli*, id est Angeli, *solidati sunt*, non à se sibi solidamentum fuerunt , nec ipsi cœli firmitatem propriam sibi prastiterunt. *Verbo Domini cœli firmati sunt*, & spiritus ejus omnis virtus eorum. Non habuerunt aliquid ex se, & tanquam supplementum à Domino perceperunt ; Spiritu enim oris ejus non pars , sed omnis virtus eorum. Si in ipsis integris creaturis intellectualibus ad singulos pietatis actus necessarium erat adjutorium, quia ut conc. 2. in Psal. 70. ait idem Doctor Sanctissimus : *In altis Angeli sunt*, & tibi debent quod sunt ; tibi debent, quod vivunt ; tibi debent, quod justè vivunt ; tibi debent, quod beatè vivunt. Potentiam & justiciam tuam usque

*U*niquequò? *U*sque in altissima, qua fecisti magnalia, ne putes hominem solum pertinere ad gratiam Dei. Quid erat Angelus antequam fieret? Quid est Angelus, si deserat qui creavit? Si, inquam, hæc ita sint, opus est planè, ut illius adjutorium indefinenter imploremus, ad illumque nos convertamus, à quo creati sumus. Homo enim, ut loco ultimùm citato ait August. *recedendo frigidescit, accedendo fervescit; recedendo tenebrescit, accedendo clarescit: à quo enim habet ut sit, apud illum habet ut ei benè sit.* Ergo quisquis vult esse similis Deo, ad illum stet, similitudinemque suam sicut scriptum est, ad illum custodiat, non ab illo recedat. Ei coharendo signetur quasi ex annulo cera; illi affixus habeat imaginem ejus; faciens quod dictum est, *Mihi autem adharere Deo bonum est, verè custodit similitudinem, & imaginem, ad quam factus est.* Porro autem, si perversè voluerit imitari Deum, ut quomodo Deus non habet à quo formetur, non habet à quo regatur; sic ipse velit suâ potestate uti, ut quomodo Deus, nullo formante, nullo regente vivat, quid restat nisi ut recedens ab ejus calore tepescat, recedens à veritate vane-scat, recedens ab eo quod summè, atque incomparabiliter est, in deterius mutatus deficiat.

Totam hanc doctrinam, atque ex ea derivatam orationis necessitatem tradit apertè Gelasius Papa *epist. 5. ad omnes Episcopos per Picenum*, contra Pelagianam hæresim, his verbis: *Ecce sine divino suffragio, quod in illa beatitudine positus (Adamus) nunquam legitur expetisse, non solum homini naturale bonum prodesse non potuit, non solum non effecit beatum; sed cum hoc solo confidit, atque ad ejus non revertitur largitorem, & beatitudinem potius amisit, & malorum omnium*

Hominis à Deo dependentia. 91
omnium sumpsit exordium. Quod & gravissimis verbis in dictis adversus Pelagianam hæresim, quæ habentur tom.2. Concil. inculcat idem Pontifex: Si in ipsis primis hominibus, dum sua nimirum felicitate confidunt, & tantam Dei gratiam in vicium recipientes, non orando (quod utique nusquam fecisse referuntur) nec de perceptis gratias referendo, nec ut eadem intemperate durarent, suppliciter implorando, incolumes constare nequiverunt; quanto magis post prævaricationis ruina, in quam malâ sui confidentiâ Creatorem nullatenus inquirendo lethaliter inciderunt, absque divino munere, suis viribus vel agrestare non possunt, sine quo nec integri persistere valuerunt. Quantâ ergo orationis instantiâ in hac valle plorationis, ut dona Dei in nobis intemperate durent, petere debemus, memores illius Augustini veridicæ sententiæ, quam habet in Psalm.93. Noli putare, quia potes à te refici; à te deficere potes, tu te ipsum reficere non potes: ille reficit qui te fecit.

SPECULATIO II.

Confirmatâ ex Discipulis S. Augustini eadem veritate, explicatur perdifficilis ex libro de correctione & gratia depromptus locus.

AD confirmandam statutam hætenus doctrinam, & Augustini mentem perspicendam

dam, argumentum conficio meo quidem iudicio verisimillimum, hoc modo: Non est credibile, discipulos Augustini, alióſve posteriores Patres acerrimos Augustinianæ doctrinæ defensores, & propugnatores intrepidos, totius Augustini doctrinæ basim & fundamentum concutere voluisse, quale putat Jansenius esse discrimen à se statutum inter gratiam medicinalem, & gratiam integritatis, in hoc consistens, quod hæc subijciebatur usui libertatis, nec dabat agere, sed posse duntaxat; ista libertatem subijciat, faciatque indeclinabiliter operari. Atqui præstantissimi Augustini discipuli, aliiſque Patres posteriores Augustini admiratores, discrimen illud nequaquam agnoverunt, sed aperte repudiarunt: ergo discrimen illud non est ad mentem Augustini. Major videtur perspicua, quia discipuli illi, & Patres sunt Fulgentius, Patres Concilii Arausicani secundi, Gregorius Magnus, Bernardus, & Doctor Angelicus, qui Augustini de gratia doctrinam religiosissimè sectati sunt. Nam vel illi sacri Doctores, & Patres Augustini mentem non intellexerunt, vel intellectam deseruerunt. Primum dici nequit absque injuria tot Ecclesiæ luminum non ferenda; secundum verò est à veritate alienissimum, cum eorum nonnulli Augustini defensionem susceperint, ut Fulgentius, & Patres Arausicani, qui etiam definitiones suas ex libris Augustini conſlarunt; alii pressis ab Augustino vestigiis indivulsè adhæserint, ut Gregorius, Bernardus, & præcipuè S. Thomas, de quo ipse Jansenius sic fatur lib. procœmiali, cap. 22. *Quidquid vera Theologia in Scholastica S. Thoma continetur, nique ad ipsorum articulorum fundamenta ex Augustino*

Augustino ita mutuatum est, ut quemadmodum novum Testamentum nihil aliud est, nisi vetus revelatum, & Augustini doctrina de gratia Dei nihil præter fidei principia in suas deducta conclusiones: ita S. Thoma Summa, ubi Theologiam tradit, pro magna parte nihil sit aliud, nisi Augustinus contractus, certa que proportionem naturalibus principiis alligatus.

Minor ergo propositio probanda superest, proferendo eorum Patrum clarissima testimonia. Sic autem habet Fulgentius lib. 2. ad Transmundum Regem, cap. 2. sub finem, loquens de Angelis: Cum verò quædam pars ejus (universitatis nimirum Angelicæ) de cælestis beatitudinis culmine in imam, perpetuamque cernitur devoluta miseriam, profectò cognoscitur uniformi cunctes opprimi potuisse ruina consortio, nisi quæ vellet, à casu pravitatis virtus illa defenderet, quæ sola naturaliter mutari, depravari non potest. Ipsa igitur (ut pergit cap. sequenti) etiam homini reparando fuit necessaria; quia non alia stantem Angelum à ruina potuit custodire, nisi ipsa, quæ lapsum hominem post ruinam potuit reparare. Una est in utroque gratia operata; in hoc, ut surgeret in illo, ne caderet: in illo, ne vulneraretur; in isto, ut sanaretur: ab hoc infirmitatem repulit, illum infirmari non sinit; illius esca, istius medicina. Quæ verba sunt adco plana, ut ponderatione non egeant.

Idem doceat Patres Concilii Arausici can. 19. his verbis quæ ex Augustino epist. 106. desumpserunt: Natura humana, etiamsi in illa integritate, in qua est condita, permaneret, nullo modo ipsam Creatore suo non adjuvante servaret: unde cum sine gratia Dei salutem non posset custodire,

dire, quam accepit, quomodo sine gratia Dei poterit reparare, quod perdidit? Ubi aperte traditur hominē rectum ea victricis gratiæ efficacitate eguisse, ne laberetur, quæ lapsō necessaria est, ut reparetur. Quod exponi nequit vel de gratia habituali, quam habebat homo integer, quamve non habet lapsus; tum quia comparatio esset omninō disparata, ut consideranti patet; tum quia nova gratia habitualis non erat homini integro ad perseverandum necessaria; tum quia de illa non erat inter Catholicos Arausicanos Patres, & Semipelagianos controversia. Quæ etiam rationes probant, non posse exponi locum illum de gratia merè sufficiente.

Subscribit Gregorius Magnus *homil. 14. in Ezech. sic: Unigenitus Patris, inquit, qui sursum est firmitas Angelorum, ipse deorsum factus redemptio hominum; illis fortitudo, ne cadant; nobis adiutorium, ut surgamus.* Quod & repetit *lib. 25. Moral. cap. 8.*

Astipulatur Bernardus *serm. 22. in Cant.* his verbis: *Qui erexit hominem lapsum, dedit stanti Angelo ne laberetur; sic illum de captivitate eruens, sic istum de captivitate defendens: & hac ratione aquè utrique communis redemptio, solvens illum, & servans istum.* Vide etiam ipsum initio *libri de dilig. Deo, & serm. 5. in festivit. omn. Sanct.*

Denique Angelici Doctoris in hac quæstione sententia apertior est, quàm ut de ea dubitare liceat. Cùm enim S. Præceptor ubique, & constanter necessitatem divinæ præmotionis non solum ob vulneratæ naturæ nostræ debilitatem, sed etiam ob indispensabilem cuiusvis causæ secundæ à prima in agendo dependentiam, & subordi

ordinationem exigat, planè relinquitur, hominem in statu naturæ integræ per se efficaci ad singulos actus motione eguisse. *Manifestum est*, inquit 1.2.q.109.art.1. quod sicut motus omnes corporales reducuntur in motum cælestis corporis, sicut in primum movens corporale: ita omnes motus, tam corporales, quàm spirituales, reducuntur in primum movens simpliciter, quod est Deus. Et ideo quantumcunque natura aliqua corporalis, vel spiritualis perfecta penatur, non potest in suum actum procedere, nisi moveatur à Deo. Quod omnibus ejusdem quæstionis articulis repetit, sed specialiter art.9. his verbis: *In statu natura corrupta homo etiam in gratia existens indiget prædicta motione, propter duo. Primò quidem ratione generali, propter quod nulla res creata potest in quemcunque actum prodire, nisi virtute motionis divina: secundò ratione speciali, propter conditionem status humana natura; qua quidem licet per gratiam sanetur quantum ad mentem, remanet tamen in ea corruptio, & infectio quantum ad carnem.* Ergo eadem motionis efficaciâ, qua indigemus ratione corruptionis, eguisset etiam homo integer ratione subordinationis. Idem convincunt tum ea quæ habet S.Doctor 1.p. q.105. tum omnia illa infinita testimonia, quibus Thomistæ ex eo physicam præmotionem ostendunt; tum principia illa apud D.Thomam frequentissima, & ubivis obvia de scientia Dei causa rerum, de efficacia voluntatis, & providentiæ Dei, de primi Motoris dotibus, & alia sexcenta, quæ à naturæ corruptione sunt independentia.

*Objicitur perdifficilis Augustini
locus.*

Plura opponunt recentiores D. Augustini discipuli communis Magistri testimonia ; sed pal-
mare illud existimant, & decretorium , quod è
libro de correptione & gratia depromunt , quia
ex illo genuinam Augustini mentem discernen-
dam censent , ubi S. Doctor totam hanc mate-
riam non obiter, ut alibi, sed ex professo, & fusè
explicavit à capite 10. ad 13. *Ipsa adjutoria,*
inquit cap. 12. *distinguenda sunt : aliud est ad-*
jutorium , sine quo aliquid non fit ; & aliud est
adjutorium , quo aliquid fit. Nam sine alimentis
non possumus vivere, nec tamen cum assuerint ali-
menta, eis fit , ut vivat qui mori voluerit. Ergo
adjutorium alimentorum est sine quo non fit , non
quo fit, ut vivamus. At verò beatitudo , quam
non habet homo , cum data fuerit , continuò fit
beatus : adjutorium est enim , non solùm sine quo
non fit , verùm etiam quo fit propter quod datur.
Qua propter hoc adjutorium, & quo fit est, & sine
quo non fit ; quia & si data fuerit homini beati-
tudo , continuò fit beatus ; & si data nunquam
fuerit , nunquam erit. Alimenta verò non conse-
quenter faciunt ut homo vivat , sed tamen sine
illis non potest vivere. Primo itaque homini , qui
in eo bono, quo factus fuerat rectus, acceperat posse
non peccare , posse non mori , posse ipsum bonum
non deserere , datum est adjutorium perseveran-
tia , non quo fieret ut perseveraret , sed sine quo
per liberum arbitrium perseverare non posset. Nunc
verò Sanctis in regnum Dei per gratiam Dei
præde

predestinatis non tantum tale adiutorium perseverantia datur, sed tale, ut eis perseverantia ipsa donetur; non solum ut sine isto dono perseverantes esse non possint; verum etiam ut per hoc donum non nisi perseverantes sint.

Hæc Augustinus, quibus non obscure discrimen gratiæ integritatis à gratia statui naturæ lapsæ necessaria in hoc constituit, quod auxilium primæ gratiæ sit adiutorium, sine quo non possumus perseverare, sed perseverantiam non dat; auxilium verò lapsis necessarium sit adiutorium quo ipsa perseverantia donatur. Quod utriusque gratiæ discrimen explicarat idem S. Doctor c. 11. præcedenti, his verbis: *Istam gratiam non habuit homo primus, quā nūquā vellet esse malus; sed sanè habuit, in qua si permanere vellet, nunquam malus esset, & sine qua etiam cum libero arbitrio bonus esse non posset, sed eā tamen per liberum arbitrium deserere posset. Nec ipsū ergo Deus esse voluit sine sua gratia, quam reliquit in ejus libero arbitrio; quoniam liberum arbitrium ad malum sufficit, ad bonum nihil est, nisi adjuvetur ab omnipotentī bono: quod adiutorium si homo per liberum nō deseruisset arbitrium, semper esset bonus, sed deseruit, & desertus est. Tale quippe erat adiutorium, quod desereret cū vellet, & in quo permaneret, si vellet, non quo fieret ut vellet. Hac prima est gratia, qua data est primo Adā; sed hac potentior est in secundo Adam. Prima est enim, qua fit ut habeat homo justitiam, si velit; secunda ergo plus potest, qua etiam fit, ut velit, & tantum velit, tantoque ardore diligat, ut carnis voluptatem contraria concupiscentem voluntate spiritus vincat. :: Tunc*

ergo dederat homini Deus bonam voluntatem, in illa quippe eum fecerat, qui fecerat eum rectum. Dederat & adiutorium, sine quo in ea non poss. t permanere, si vellet; ut autem vellet, in ejus libero reliquit arbitrio. Poss. et ergo in eo permanere si vellet, quia non deerat adiutorium, per quod poss. et, & sine quo non poss. et perseveranter bonum tenere, quod vellet. Sed quia noluit permanere, profectò ejus culpa est, cujus meritum fuisset, si permanere voluisset, sicut fecerunt Angeli sancti, qui cadentibus aliis per liberum arbitrium, per idem liberum arbitrium steterunt ipsi, & hujus mansionis debitam mercedem recipere meruerunt, tantam scilicet beatitudinis plenitudinem, quâ il'is certissimum sit semper se in illa esse mansuros. Si autem hoc adiutorium vel Angelo, vel homini quam primùm facti sunt, defuisset, quoniam non talis natura facta erat, ut sine divino adiutorio poss. et manere si vellet, non utique suâ culpâ cecidissent. Adiutorium quippe defuisset, sine quo manere non poss. et. Nunc autem quibus deest tale adiutorium, jam pœna peccati est.

Exscribenda essent tria illa integra capita præfati libri, in quibus Augustinus discrimen illud, quod inter utriusque status gratiam intercedit, prosequitur, in eoque ponit, ut in statu innocentie actualis perseverantia non erat opus gratie, sicut nunc, sed tantùm posse perseverare, quia in statu innocentie arbitrium ita liberum erat, ut velle bonè poss. et, & malè. Nunc autem per peccatum perditò bono merito, in his qui liberantur, factum est donum gratie, qua merces meriti (scilicet liberi arbitrii sani) futura erat, ut ait ibidem S. Pater.

Nec ad illa elevanda testimonia satisfacit responsio

ponſio quorundam recentiorum, cui ita confidit
 Noſter Gonetus, ut nullam ſe in illis locis inve-
 nire difficultatem dicat, quæ non poſſit ex atten-
 ta capitum illorum lectione diſſolvi; quia nimi-
 rum, inquiunt, non loquitur Auguſtinus de
 quacumque gratia ſtatus innocentia, ſed de ea
 tantum, quæ Angelis, & Protoparentibus lapſis
 conceſſa fuerat, quæ utique fuit non auxilium
 quo perfeveratur, ſeu efficax, ſed auxilium ſine
 quo non poſſumus perfeverare, ſeu ſufficiens.
 Non, inquam, ſatisfacit; quia non ſolum Augu-
 ſtinus comparat gratiam & auxilium datum
 lapſis angelis & hominibus cum gratia adjuto-
 rio dato Sanctis huius ſtatus, ſed etiam gratiam
 datam bonis Angelis, quâ ſolâ perfeveraverunt;
 eamque à gratia Sanctorum huius ſtatus diſtin-
 guit, quòd illa dabat poſſe, non verò actu perfe-
 verare, quod erat arbitrio libertatis ſeiſſam de-
 terminaturæ relictum; iſta verò det non ſolum
 poſſe, ſed etiam agere. Imò in illud diſcrimen
 explicandum, tanquam in unicum capitum illo-
 rum ſcopum collimat Auguſtinus; nam *Ange-
 lis malis per liberum arbitrium cadentibus, per
 idẽ liberum arbitrium boni ſteterunt, quod tunc
 ita liberum erat, ut benè velle poſſet, & malè, ut
 ex Auguſtino mox dicebamus.* Unde *cap. 10.*
 hæc verba habet S. Doctor, quæ reſponſionem
 adductam penitus jugulant: *Quapropter ſalu-
 berrimè conſitemur, quod rectiſſimè credimus,
 Deum, Dominumque rerum omnium, qui creavit
 omnia bona valde, & mala ex bonis exoritura eſſe
 præſciuit, & ſciuit magis ad ſuam omnipotentissi-
 mam bonitatem pertinere, etiam de malis bona fa-
 cere, quàm mala eſſe non ſinere; ſic ordinariſſe An-
 gelorum, & hominum vitam, ut in ea prius oſten-*

deret quid posset liberum arbitrium, deinde quid posset sua gratia beneficium, justitiæque iudicium. Denique Angeli quidam, quorum Princeps est qui dicitur Diabolus, per liberum arbitrium à Domino Deo refuga facti sunt: refugientes tamen ejus bonitatem, quâ beati fuerunt, non potuerunt ejus effugere iudicium, per quod miserrimi effecti sunt. Cateri autem (in his verbis totus hujus testimonii nervus situs est) per ipsum liberum arbitrium in veritate steterunt, eamque de suo casu nunquam futuro certissimam scire meruerunt. Quod & inculcat Doctor Sanctus lib. de dono pers. cap. 7. his verbis: Qui non infertur in tentationem, non discedit à Deo. Non est hoc omnino in viribus liberi arbitrii, quales nunc sunt; fuerat in homine antequam caderet. Quam tamen libertas voluntatis in illius primæ conditionis præstantia quantum valuerit, apparuit in Angelis, qui diabolo cum suis cadente, in veritate steterunt & ad securitatem perpetuam non cadendi, in qua nunc eos esse certissimi sumus, pervenire meruerunt. Post casum autem hominis non nisi ad gratiam suam Deus voluit pertinere, ut homo accedat ad eum; neque nisi ad gratiam suâ voluit pertinere, ut homo non recedat ab eo.

Augetur vis argumenti, representatâ accuratâ Augustiniani libri synopsi.

Gratulor sanè eorum felicitati, qui nullam hisce in testimoniis difficultatem experiuntur, nec minorem eâ illorum bonam fortunam esse reor, qui nec frigus hyeme, nec ardores solis inter ipsos urentis caniculæ dies perferunt.

Cum

Cùm enim ibi apertè profiteatur Augustinus, Deum sic ordinasse Angelorum, hominumque vitam, ut in ea ostenderet, quid posset liberum arbitrium, deinde quid posset sua gratia beneficium; manifestum est eò loci indagare Augustinum characteristicam adjutorii gratiæ utrinque status differentiam, ut hac inquisitione & vires liberi arbitrii sani, & omnipotentissimam gratiæ medicinalis vim declararet; ipsaque verba clariùs id loquuntur, quàm si essent solariibus radiis delineata; & aliquid eis addere, decerpisse est.

Ad cujus majorem claritatem, & absolutam convictionem operæpretium duxi scopum totius libri de correptione & gratia, & duodecim priorum capitum synopsis oculis Lectorum obicere, ut hujus difficultatis vis, & Augustini mens in splendore suo toto pateat.

Cùm Monasterium Valentini nonnullâ fuisset dissensione turbatum occasione divinæ gratiæ ad bona opera necessariæ, asserente nonnulli, neminem corripiendum, si Dei præcepta non facit, sed pro illo, ut faciat, tantummodò esse orandum, gravem hunc errorem confutaturus Augustinus supponit *cap. i.* catholicam de gratia Dei doctrinam, quâ credimus Dei adjutorio adjuvari nos, ut declinemus à malo, & faciamus bonum, *quod nullus potest sine Spiritu gratia; qua si desit, ad hoc lex adest, ut reos faciat, & occidat.* Imò addit, tantam esse gratiæ necessitatem, ut neque ad gratiam ipsam confugere possimus, nisi cùm à Domino gressus hominis diriguntur. *Ac per hoc & desiderare auxilium gratiæ, initium gratiæ est.* Addit insuper, hanc gratiam non excludere liberum arbitrium, quod

ad bonum & malum faciendum confitendū est nos habere, *sed in malo faciendo liber est quisque iustitia, servusque peccati; in bono autem liber esse nullus potest, nisi fuerit liberatus ab eo, qui dixit: Si vos filius liberaverit, tunc verè liberi eritis.*

Capite secundo ejusdem gratiæ ad singulos actus necessitatem prosequitur S.Doctor, aitque talem esse, *sine qua nullū pro-sus si ve cogitādo, si ve volendo, & amando, si ve agendo faciunt bonum; non solum ut monstrante ipsa quid faciendum sit, sciant; verum etiam, ut præsente ipsa faciant cum dilectione quod sciunt.* Deinde generali responsione occupat Adversariorū objectionem, & querelam, asserens quod si illi queruli, & rixosi, qui non corripī, sed pro se tantum orari volunt, essent veri filii Dei, intelligerent se spiritu Dei agi, ut quod agendum est, agant, & cum egerint, gratias agant: quando autem non agunt, si ve omninò non faciendo, si ve non ex charitate faciendo, orent ut quod nondū habent, accipiant, dilectionem nimirum, & delectationem iustitiæ, eamque suavitatem, quā largitur Dominus, ut terra nostra det fructum suū: quia sicut nihil habent, quod non acceperint; ita nihil habebunt, quod non accepturi sint.

Capite tertio proponit Adversariorum querelam, dicentium: Præcipiant tantum nobis quid facere debeamus, qui nobis præsumunt, & ut faciamus orent pro nobis, non autem nos corripiant, & arguant si non fecerimus. Cui respondet Augustinus, omnia illa esse facienda, quia Apostoli & præcipiebant quæ fierent, & corripiebant si non fierent, & orabant ut fierent. Quod probat exemplo Pauli, qui 1. Cor. 16. præ-

cipie

ci piebat, ut haberetur charitas : 1. Cor. 6. corripiebat, quia non habebatur charitas : 1. Theff. 3. orabat, ut abundaret charitas. Unde concludit : *O homo , in praeceptione cognosce quid debeas habere ; in correptione cognosce , tuo te vitio non habere ; in oratione cognosce , unde accipias quod vis habere.*

Capite quarto incipit urgere argumentum Adversariorum hoc modo : Quomodo meo vitio non habetur, quod non accepi ab illo, à quo nisi detur, non est omninò alius, unde tale, ac tantum munus habeatur ? Rectè ergo corripere, si gratiam meâ culpâ non haberein ; hoc est, si eam possem mihi dare, vel sumere ipse, nec facerem ; vel si dante illo, accipere noluissem. Cùm ergo & ipsa voluntas à Domino præparetur, cur me corripis, quia vides me ejus præcepta facere nolle, & non potiùs ipsum rogas, ut in me operetur & velle ?

Capite quinto huic objectioni respondet, utilem nihilominus esse correptionem, quâ demonstrantur vitia, causaturque utilis dolor, quo medicum quæramus, ut cùm deformes nos videmus, reformatorem desideremus, eique supplicemus, ne in illa remaneamus fœditate. Dolor quippe ille, quo sibi displicet, quando sentit correptionis aculeum, excitat eum in majorem orationis affectum ; ut Deo miserante incremento charitatis adjutus desinat agere pudenda & delenda, & agat laudanda atque gratanda. Hæc est correptionis utilitas, quæ nunc major, nunc minor pro peccatorum diversitate salubriter adhibetur ; & tunc est salubris, quando supremus medicus respicit. Tunc correptione proficit homo, cùm miseretur, atque adjuvat, qui facit quos vo-

luerit etiam sine correptione proficere. Sed quare isti sic, illi aliter diversis, & innumerabilibus modis vocentur, ut refoventur, absit ut dicamus iudicium luti esse debere, non figuli.

Capite sexto urget iterum instantiam Adversariorum in hoc consistentem, injustè accusari, reprehendi, corripique illos, qui non faciunt quod præceptum est, quia obedientiæ munus non acceperunt, nec illud sibi dare potuerunt. Cui respondet Augustinus, huiusmodi obloquentes vel nondum esse iustificatos, vel esse iustificatos; si non regenerati, neque iustificati sunt, carent illi quidem gratiâ, sed in pœnam peccati priimi hominis, quem fecit Deus rectum ab initio; ac per hoc prima pravitas, quâ Deo non obeditur, ab homine est, quia ex rectitudine, in qua eum Deus primitus fecit, suâ malâ voluntate decidens pravus effectus est. Nec obest, quod illa pravitas communis sit omnibus, quia ut subdit: Imò corripitur in singulis, quod est commune. Non enim propterea cuiusquam non est, quòd ab ea nullus immunis est.:: Corripitur ergo origo damnabilis ut ex dolore correptionis voluntas regenerationis oriatur, si tamen qui corripitur, filius est promissionis. Quod si aliquando iustificati sunt, & in malam vitam perversa voluntate relapsi, certè non possunt dicere, Gratiâ non accepimus, qui acceptam gratiâ malo suo amiserunt arbitrio.

Contra eam doctrinam proponit eodem capite Augustinus replicam Adversariorum sic insistentium: Verum quidem est, nos accepisse gratiâ, quâ iustificati sumus, antequam relaberemur in culpam; sed quòd relapsi sumus, argui justè non possumus, quia etsi acceperimus fidem
per

per dilectionem operantem & justificantem, perseverantiam tamen non accepimus. *An quisquam dicere audebit, istam perseverantiam non esse donum Dei, & hoc tam magnum bonum ita esse nostrum, ut quisquis id habuerit, non possit esse Apostolus dicere: Quid enim habes, quod non accepisti, quoniam hoc sic habet, ut non accipiat? Cui objectioni ut respondeat, præmittit in eodem capite Augustinus, fatendum esse perseverantiam in bono magnum esse Dei munus; nam pro ea rogavit Dominus, dum Luc. 22. pro Petro rogavit, ut non deficeret fides ejus, quæ profectò si homini ab homine esset, petenda à Deo non esset. Unde & Paulus perseverantiam à Deo donandam Philippensibus c. 1. promittit: *Confidens hoc ipsum, quoniam qui cœpit in vobis opus bonum, perficiet usque in diem Christi Iesu.* Quod ibidem aliis Scripturarum testimoniis, necnon egregio Cypriani loco confirmat.*

Capite septimo respondet prædictæ instantiæ, asseritque, etiam non perseverantes justè corripiendos esse, quia ex bona in malam vitam suam voluntate mutati sunt. Quod ex eo confirmat, quia si à damnatione, quæ facta est per Adam, non se liberabunt, qui poterunt dicere, non se audivisse Evangelium, quanto minùs se liberabunt, qui dicturi sunt, Perseverantiam non accepimus. *Ac per hoc, & qui Evangelium non audierunt, & qui eo audito, in melius commutati perseverantiam non acceperunt; & qui Evangelio audito venire ad Christum, hoc est in eum credere noluerunt (quoniam ipse dixit: Nemo venit ad me, nisi ei datum fuerit à Patre meo;) & qui per ætatem parvulam nec credere potuerunt, sed ab originali noxa solo possunt lavacrum*

regenerationis absolvi, quo tamen non accepto mortui perierunt, non sunt ab illa conspersione discreti, quam constat esse damnatam, euntibus omnibus ex uno in condemnationem. Quod totum illustrat fusa expositione illius Apostolici dicti: Quis te discernit, &c. Deinde verò id ipsum confirmat doctrinâ gratuitæ Sanctorum electionis.

Capite octavo hanc de gratuita electione doctrinam applicat perseverantiæ, & respondet instantiæ præfatæ recurrendo ad judicia Dei. *Si à me queratur, inquit, cur eis Deus perseverantiam non dederit, quibus eam, quâ Christianè viverent, dilectione dedit, me ignorare respondeo. Non enim arroganter, sed agnoscens modulum meum, audio dicentem Apostolum: O homo, tu quis es, qui respondeas Deo? Id confirmat multis obstupèdorum Dei judiciorum exemplis, quæ ad naturalia, & ad supernaturalia dilatat, & sic concludit: Cur igitur hoc tam magnum beneficium aliis dat, aliis non dat Deus, apud quæ non est iniquitas, nec acceptio personarum; & in cujus potestate est, quandiu quisque in hac vita maneat, qua tentatio dicta est super terram? Sicut ergo coguntur fateri (Adversarii contra quos disputat, & quorum instantiæ occurrit) donum Dei esse, ut finiat homo vitam istam, antequam ex bono mutetur in malum; cur autem aliis donetur, aliis non donetur, ignorant: ita donum Dei esse in bono perseverantiam secundum Scripturas fateantur nobiscum; & cur aliis detur, aliis non detur, sine murmure adversus Deum dignentur ignorare nobiscum.*

Capite nono prosequitur eandem materiam, ostenditque illos duntaxat esse veros Dei filios,

& discipulos, qui usque ad finem perseverant, talesque esse qui secundum propositum vocati sunt. Ex quo sic infert: *Appellamus ergo eos & electos Christi discipulos, & Dei filios, quia sic appellandi sunt, quos regeneratos pie vivere cernimus: sed tunc verè sunt quod appellantur, si manserint in eo, propter quod sic appellantur.* Si autem perseverantiam non habent, id est in eo quod cœperunt esse, non manent, non verè appellantur quod appellantur, & non sunt; apud eum enim hoc non sunt, cui notum est quod futuri sunt, id est, ex bonis mali. Propter hoc Apostolus cum dixisset, *Scimus quoniam diligentibus Deum omnia cooperantur in bonum, sciens nonnullos diligere Deum, & in eo bono usque in finem nō permanere,* mox addidit: *His qui secundum propositum vocati sunt.* Quod ibidem fusè prosequitur, variis testimoniis, & exemplis demonstrans gratuitæ electionis infallibilem certitudinem; additque tantum abesse, inde sequi abstinendum esse à correptione, quod potius inde fit, eam esse cum charitate adhibendam, quia si prædestinatus est qui corripitur, fini prædestinationis deserviet utilitas correptionis. Nemo ergo dicat, non esse corripiendum qui exorbitat de via iusta, sed ei reditum, & perseverantiam à Domino tantum esse poscendam. Nemo prudens, & fidelis hoc dicat. Si enim secundum propositum vocatus est iste, proculdubio illi etiam, quod corripitur, Deus cooperatur in bonum. Verum autem sic sit vocatus, quoniam qui corripit, nescit, faciat ipse cum charitate, quod scit esse faciendum: scit enim talem corripiendum, facturo Deo misericordiam, aut iudicium. Misericordiam quidem, si à massa perditionis ille, qui corripitur, gratia largitate

disce.

discretus est, & non est inter vasa ira, qua perfecta sunt in perditionem, sed inter vasa misericordia, qua praparatavit Deus in gloriam. Iudicium verò, si in illis est damnatus, in his non est predestinatus.

His novem capitibus vim objectionis, variaque ejus instantias contrivit Augustinus, utique diverso ab eo, quo assertores scientiæ mediæ utuntur modo, sicut advertere potuit Lector eruditus. Sed ut ad rē veniamus, summa Augustinianæ doctrinæ hæc est, ideo corripiendos esse malos quia sua voluntate peccant; ideo verò arguendos, quòd malè velint, tamen si perseverantiæ donum non accipiant, quia justo Dei iudicio carent eo dono, quia nimirum iusti, etsi occultis de causis, prædestinati non sunt, nec à massa corruptionis discreti. Hac in responsione sistit Augustinus, quia in ea quiescere debet Christianus. Sed quia humana subtilitas inde disputandi ansam arripit, ubi christiana docilitas & humilitas credit, adorat, conticescit; hinc statim ultra se offert objectio, quia nimirum, etsi illa doctrina locum habeat in statu corruptionis, in quo degimus; tamen locum habere nequit in statu innocentiae, quia etsi perseverantiæ donum non accipiant præsciti, quia non sunt à massa corruptionis discreti, quare Adamus, & Angeli, qui ceciderunt, dono perseverantiæ caruerunt, quod propter nullum præcedens peccatum potuit denegari, nec ob aliquam præcedentem massam, unde discreti non sint, reprobari?

Hanc difficillimam replicam sibi proponit Doctor Sanctissimus, & juxta oculatissimus capite 10. *Hinc exoritur alia quaestio* (id est ex his, quæ

quæ hætenus totis novem capitibus à me tradita sunt, (sponte nascitur) non sanè contemnenda, sed in adiutorio Domini, in cuius manu sunt nos & sermones nostri, aggredienda, atque solvenda. Quaritur enim à nobis, quantum attinet ad hoc donum Dei, quod est perseverare usque in finem, quid de ipso primo homine sentiamus, qui certè sine ullo vitio factus est rectus. Et paucis interiectis: Sed illud magis querendum, operosiusque tractandum est, quomodo respondeamus eis, qui dicunt: Si in illa rectitudine, in qua sine vitio factus est, habuit perseverantiam, proculdubio perseveravit in ea: & si perseveravit, utique non peccavit, nec illam suam rectitudinem, Deumque deseruit. Eum autè peccasse, & desertorem boni fuisse, Veritas clamat. Non ergo habuit in illo bono perseverantiā; & si non habuit, nō utique accepit. Quomodo enim & accepisset perseverantiam, & non perseverasset? Porro si propterea nō habuit, quia non accepit, quid ipse non perseverando peccavit, qui perseverantiā non accepit? Neque enim dici potest, ideo non accepisse, quia non est discretus à massa perditionis gratia largitate. Nōdū quippe erat in genere humano perditionis massa antequā peccasset, ex quo tracta est origo vitiosa.

Ecce argumentum in tota sua vi, & ad extremum usque difficultatis paulatim perductum. Quid autem ad illud respondet Augustinus? Certè nihil aliud, quàm gratiæ discrimen illud allatum superius, nimirum culpandum fuisse Adamum, quia cum auxilio sibi dato poterat perseverare, & per liberum arbitrium stare, adiutorio illo si benè usus fuisset. Quia verò, inquit, per liberum arbitriū Deum deseruit, iustū

juvicium Dei expertus est, ut cum tota sua stirpe, qua in illo adhuc posita tota cum illo peccaverat, damnaretur.

Capite undecimo prosequitur eandem disparitatem. *Quid ergo, inquit, Adam non habuit Dei gratiam? Imò verò habuit magnam, sed disparē. In quo verò sit dispar, fusè explicat, & addit: Istam gratiam non habuit homo primus, qua nunquam vellet esse malus; sed sanè habuit, in qua si permanere vellet, nunquam malus esset; & sine qua etiam cum libero arbitrio bonus esse non posset, sed eam tamen per liberum arbitrium deferere posset. Nec ipsum ergo Deus esse voluit sine sua gratia, quam reliquit in ejus libero arbitrio. Tale quippe erat adjutorium quod defereret cum vellet, & in quo permaneret si vellet, non quo fieret ut vellet. Et in hoc ait gratiam illam Adami differre à gratia Christi in hoc statu necessaria, quia hæc tantò major est, ut parum sit homini per illam reparare perditam libertatem, parum sit denique non posse sine illa, vel apprehendere bonum, vel permanere in bono, si velit, nisi etiam efficiatur ut velit. Idem prosequitur usque ad finem capitis, & toto sequenti capite 12. ubi discrimen adjutorii quo, & sine quo ex professo interpretatur; præcipua verba inter obijciendum retulimus, nec ea iterum rescribere opus est.*

Ex his ergo distinctè, dearticulatèque propositis evincitur, mentem Augustini, ut videtur, non attigisse, qui volunt S. Patrem non comparasse omnem gratiam adjutricem status innocentie cum gratia Salvatoris, sed solum adjutorium datum illi ad perseverandum; quod utique fuit tantum *sine quo*, sive sufficiens; non *quo*, sive efficax.

sive efficax. Sed oppositū demonstrat genuinus, germanus, & naturalis duodecim priorum capitum contextus. Nam cū *cap. 10. 11. & 12.* extendat Augustinus objectionem de injustia correctionis, si perseverantia sit donum Dei; extendat, inquam, ad statum innocentiae, illamque non aliter solvat, quā afferendo rationem disparitatis gratiae ad utrumque statum necessariae, in hoc positae, quod licet nos egeamus adjutorio, quo infirmitas voluntatis humanae indeclinabiliter, & insuperabiliter agatur; tamen eo Adamus non egebat, quia licet non posset perseverare sine gratia, illa tamen gratia libero sanæ voluntatis libertatis arbitrio permittebatur: cū, inquam, Augustinus illam objectionem non aliter solvat, manifestum est, censuisse ipsum omnem gratiam status innocentiae fuisse duntaxat sufficientem, aliàs inanis esset disparitas, quam inter utrumque statum ponit, & instantia de correctione non solum æquē, sed magis in statu innocentiae urgeret, in quo nulla præcedit corrupta massa, propter quam possit gratia efficax denegari: & tamen Augustinus. per allatam à se disparitatem objectionem evernisse se credit, cū illam solam afferat, quā illam solvat; & ita afferat, ut in ea victoriæ suæ gloriam, & intricatissimæ quæstionis lucem constituat.

Vera Augustini explicatio.

Non possum aliquid adversum veritatem, sed pro veritate, quā vinci gloriosum est, quā dum vincimur, victores sumus; quia si nos vincit veritas, sumus nos victores erroris. Itaque non possum

possum inficiari Augustinum tribus præfatis capitulis comparare gratiam utriusque status, & afferre discrimina adjutoriorum ad illos status per se necessariorum. Verùm quomodo cum hac doctrina, cum illo discrimine clarissimè per tria integra capita ab Augustino explicato, nostra de necessitate præmotionis in omni statu sententia salva consistat, explicare quidem hoc opus, hic labor est; sed cum adjutorio Dei, in cujus manu sunt nos, & sermones nostri, & Augustini ipsius luce difficultas aggredienda est, atque solvenda.

Dicendum ergo, Augustinum comparare gratiam per se ad utrumque statum, sanum, vel corruptum necessariam ex propriis, ut ita dicam, meritis utriusque status, & attenta conditione hominis sani, & infirmi. Et in hoc sensu verum est, quod licet homo lapsus, & infirmus ob perpetuam rebellis concupiscentiæ pugnam indigeat invictissimo adjutorio, ne inter tot, & tantas tentationes infirmitate sua voluntas ipsa succumbat: attamen in statu innocentie sano, & integro, tali adjutorio per se non indigebat, sed ex vi illius status gratiam duntaxat sufficientem sibi necessariam exigebat, quâ stante cum solo concursu generali (qui utrum esset præviis, vel tantum simultaneus, non disputat ibi Augustinus, sed alibi examinandum relinquit, vel à se traditum supponit, vel ut philosophicum, & ad satisfaciendum propositæ difficultati inutile prætermittit) poterat perseverare, si veller, eadem facilitate, quâ poterat ambulare; quia sicut facultatem progressivam sanam, & incolumem in creatione à Deo acceperat, ita & voluntatem Deo adhærentem, robustam, virtutibus omni-

bus,

bis, & viibus ad operandum in ordine supernaturali instructissimam sortitus erat.

Ad cujus majorem elucidationem considerandum est, Augustinum in omnibus suis de gratia Christi libris disputare contra Pelagianos, vel Pelagianorum reliquias, qui hæretici infirmatam esse per peccatum originale naturam humanam pernegabant, ideoque gratiam necessariam esse inficiabantur, Augustinus contra oppositum fundamentum perpetuò urget, nempe naturam, & libertatem ad benè agendum, peccato sauciata, & penè ad nihilum redactam; cui fundamento oppositam Pelagianismo conclusionem de necessitate gratiæ continenter superstruit. Unde in omnibus suis libris necessitatem, efficaciam, vim, victoriam, & triumphos gratiæ ex infirmitate naturæ colligit: & quanvis interdum alia principia gratiæ efficacis, nimirum divinæ scientiæ & voluntatis causalitatem, & omnipotentissimam potestatem, supremum Dei in omnes causas, etiam liberas, dominium, scientiæ mediæ sibi propositæ impossibilitatem, aliaque hujusmodi doctrinæ suæ capita insinuet; attamen totum suæ causæ præsidium, totam divinæ gratiæ victricis necessitatem firmissimam in infirmitate naturæ à Pelagiânis negata, & à Missiliensibus tandem confessa ponit. Quid ergo mirum, si gratiam efficacem neget statui sano necessariam, cum ejus efficaciam in vi medicinali collocet, quæ utique benè valentibus non est necessaria?

Hanc Augustini interpretationem ex illis capitibus, in quibus tota difficultatis summa posita est, eruere licet; sic enim habet *cap. 11.* ubi gratiam hujus status, qualis sit, exponit. *Ille*

in bonis erat (loquitur de Adamo) qua bonitate
 sui conditoris acceperat. Neque enim illa bona,
 & ille suis meritis comparaverat, in quibus nul-
 lum prorsus patiebatur malum. Sancti verò in
 hac vita, ad quos pertinet liberationis hac gra-
 tia, in malis sunt, ex quibus clamant ad Deum :
 Libera nos à malo. Ille in illis bonis Christi morte
 non eguit ; istos à reatu & hereditario, & proprio,
 illius Agni sanguis absolvit. Ille non opus habe-
 bat eo adjutorio, quod implorant isti cùm dicunt :
 Video aliam legem in membris meis repugnantem
 legi mentis meae, & captivantem me in lege pec-
 cati, qua est in membris meis. Infelix ego homo, quis
 me liberabit de corpore mortis hujus ? Gratia Dei
 per Iesum Christum Dominum nostrum. Quoniam
 in eis caro concupiscit adversus spiritum, & spí-
 ritus adversus carnem: atque in tali certamine labo-
 rantes, ac periclitantes, dari sibi pugnandi, vin-
 cendique virtutem per Christi gratiam poscunt.
 Ille verò nullâ tali re ipsa à seipso adversus seip-
 sum tentatus, atque turbatus, in illo beatitudinis
 loco suâ secum pace fruebatur. Proinde etsi non
 interim latiore nunc, veruntamen potentiore gra-
 tia indigent isti.

Idem prosequitur capite duodecimo his ver-
 bis : Major quippe libertas est necessaria adversus
 tot, & tantas tentationes, qua in paradiso non fue-
 runt, dono perseverantia munita atque firmata,
 ut cum omnibus amoribus, terroribus, erroribus
 suis vincatur hic mundus. Hoc Sanctorum marty-
 ria docuerunt. Denique ille Adam, & terrente
 nullo, & insuper contra Dei terrentis imperium
 libero usus arbitrio, non stetit in tanta felici-
 tate, in tanta non peccandi facilitate. Isti
 autem non dico terrente mundo, sed saviente, ne
 starent,

starent, steterunt in fide, cùm videret ille bona presentia, quæ fuerat relicūrus; isti futura, quæ accepturi fuerant, non viderent. Vnde hoc, nisi donante illo, à quo misericordiam consequuti sunt, ut fideles essent; à quo acceperunt spiritum, non timoris, quo persequentibus cederent; sed virtutis, & charitatis, & continentia, quo cuncta minantia, cuncta invitantia, cuncta cruciantia superarent? Illi ergo sine peccato ullo data est, tum qua conditus est, voluntas libera, & eam fecit servire peccato: horum verò cùm fuisset voluntas serva peccati, liberata est per illum, qui dixit: Si vos Filius liberaverit, tunc verè liberi eritis. Et accipiunt tantam per istam gratiam libertatem, ut quanvis quamdiu hîc vivunt, pugnent contra concupiscentias peccatorum, eisque nonnulla subrepant, propter quæ dicant quotidie: Dimitte nobis debita nostra; non tamen ultrà se viviant peccato, quod est ad mortem.

Denique caput sic concludit: Tantùm Spiritus sancto accenditur voluntas eorum, ut idèd possint, quia sic volunt; ideo sic velint, quia Deus operatur ut velint. Nam si in tanta infirmitate vite hujus, in qua tamen infirmitate propter elationem reprimendam perfici virtutem oportebat, ipsis relinqueretur voluntas sua, ut in adjutorio Dei, sine quo perseverare non possent, manerent, si vellent, nec Deus in eis operaretur, ut vellent, inter tot, & tantas tentationes infirmitate sua voluntas ipsa succumberet: & ideo perseverare non possent, quia deficientes infirmitate, nec vellent, aut non ita vellent infirmitate voluntatis, ut possent. Subventum est igitur infirmitati voluntatis humanae, ut divinâ gratiâ indeclinabiliter, & insuperabiliter ageretur; & ideo quanvis infirma,
non

non tamen deficeret, neque ad veritate aliqua vinceretur. Ita factum est, ut voluntas hominis invalida, & imbecilla in bono adhuc parvo perseveraret per virtutem Dei, cum & voluntas primi hominis fortis, & sana in bono ampliore non perseveraverit, habens virtutem liberi arbitrii, quanvis non defuturo adjutorio Dei, sine quo non posset perseverare, si vellet; non tamen tali, quo in illo Deus operaretur ut vellet. Fortissimo quippe permisit, atque dimisit facere quod vellet; infirmis servavit, ut ipso donante, quod bonum est, vellent, & hoc deferere invictissime nollent.

Vides eatenus Augustinum velle nos egere gratiâ invictissimâ, indeclinabili, victrici, & perfecte efficaci, quia voluntas nostra peccato infirmata, & vi concupiscentiæ corruptæ illecta absque hujusmodi fortissimo adjutorio deficeret: verè ergo infert, hominem non eguisse hujusmodi adjutorio sanante infirmitatem, compellente tarditatem & languorem, molliente difficultatem, vincente mundi amores, terrores, errores, ac superante cuncta minantia, cuncta invitantia, cuncta cruciantia; non eguisse, inquam, titulo infirmitatis, corruptionis, & debilitatis: an verò alio, nimirum subordinationis titulo eguerit, ibi non disputat, nec ad Adversariorum sedandam querelam necessarium erat, quia absolute verum erat, hominem in statu innocentiae non indiguisse auxilio, quo actu perseveraret, sicut eo eget voluntas hominis infirmi; ita ut si per possibile, vel impossibile non esset auxilium illud quo necessarium ratione subordinationis, illud integritas primi hominis minimè desideraret, & tamen eo egeret homo infirmus, tamen si ratione
subor

subordinationis causæ secundæ ad primam non exigeretur.

Idque possumus aliquo exemplo ex doctrina Augustini petito illustrare, ex quo apparebit Augustinum ea interdum tradere, quæ alia alibi disputanda supponunt; sed iis esse contentum, quæ ad præsentem difficultatem solvendam sufficiunt. Sic in opusculo contra Porphyrium de sex quæstionibus Paganorum edito, quod habetur *epist.* 49. Ethnicis importunè quærentibus, cur Christus post tam longa tempora venerit, hoc eis brevitatis gratiâ respondit, tunc voluisse hominibus apparere Christum, & apud eos prædicari doctrinam suam, quando sciebat, & ubi sciebat esse qui in eum fuerant credituri. Et tamen idem S. Doctor *lib. de prædest. Sanct.* cap. 9. ait se id dixisse absque præjudicio latentis consilii Dei, quia nimirum quod ibi dixerat, *convincenda Paganorum infidelitati sufficere videbatur.* Proinde quod dixit, addit, tunc voluisse hominibus apparere Christum, & apud eos prædicari doctrinam suam, quando sciebat, & ubi sciebat esse, qui in eum fuerant credituri; posset etiam sic dici, tunc voluisse hominibus apparere Christum, & apud eos prædicari doctrinam suam, quando sciebat, & ubi sciebat esse qui electi fuerant in ipso ante mundi constitutionem. Sed quia si ita diceretur, lectorem faceret intentum ad ea requirenda, quæ nunc ex admonitione Pelagiani erroris necesse est copiosius, & laboriosius disputari, visum mihi est, quod tunc satis erat, breviter esse dicendum; excepta, ut dixi, altitudine sapientia, & scientia Dei, & sine præjudicio aliarum causarum, de quibus non tunc, sed aliàs opportunè disputandum putavi.

Simi

Similiter ergo in proposito dicimus , intendisse duntaxat Augustinum triplici illo capite memorato ea tradere , quæ convincendæ Pelagianorum , & Monachorum Aduersariorum instantiæ sufficere videbantur ; nec Lectorem voluit facere intentum ad ea requirenda , quæ nunc occasione generalis causarum secundarum subordinationis , & à prima dependentiæ necesse est copiosius , & laboriosius disputari.

R E F L E X I O.

Humilientur miseri , si non potuerunt stare felices. Si boni Angeli , ut Augustinus *lib. 12. de Civit. cap. 9.* ait , *non petuerunt seipsos facere meliores, quàm eos ille fecerat , quo nemo melius quidquam facit , profectò & bonam voluntatem, quâ meliores essent , nisi operante adiutori. Cæteris, habere non possent.* Quid à se, vel in se sperare potest pulvis, & cinis , homo vanitati similis, universa vanitas, & nudus, & miser, & miserabilis ? Si disiectus est dives superbus , quia sibi fidit, se discernere voluit, aliquid habere voluit quod non acceperit , & habendo gloriari , non tolerabitur pauper elatus , qui non vult ponere Deum adiutorem suum , vultque gratiam pedisequam esse naturæ, non dominam.

Usqueadeò verum est , indignuisse Angelum novo ad perseverandum , distinguere ab eo, quod in creatione acceperat , adiutorio, ut graves Thologi in hoc ejus peccatum constituent, quod ad gloriam sine speciali gratiæ auxilio se perventurum crediderit Lucifer Pelagianorum pater. Cujus subtilissimæ sapientiæ nefandum

dum virus in homine primo exitisse non obscure indicat August. lib. 11. de Genes. ad lit. cap. 5. his verbis : *Nec arbitrandum est , quod esset hominem dejecturus iste tentator , nisi praeesset in anima hominis quadam elatio comprimenda , ut per humiliationem peccati , quàm de se falsò praeassumeret , disceret . Verissimè quippe dictum est : Ante ruinam exaltatur cor , & ante gloriam humiliatur . Et hujus fortè hominis vox est in Psalmo : Ego dixi , in abundantia mea non movebor in aeternum . Deinde jam expertus quid mali habeant superba praeassumptio propria potestatis , & quid boni adiutorium gratia Dei : Domine , inquit , in voluntate tua praestitisti deceri meo virtutem , avertisti faciem tuam à me , & factus sum conturbatus .*

Vide igitur quàm sit periculosum sibi bonæ voluntatis adscribere laudem . Et certè si piaculum est formatam Deo auctori denegare voluntatem , perinde iniquum est eidem eam non tribuere reformatam . Nam si nobis libera quidem voluntas ex Deo est , qua adhuc potest esse bona , vel mala ; bona verò voluntas ex nobis est , melius est id , quod à nobis , quàm quod ab illo est . Quod si absurdissimè dicitur , oportet fateantur (Pelagiani) etiam bonam voluntatem nos divinitus adipisci , ut lib. de pecc. mer. & remiss. cap. 18. discurret Augustinus .

Totum itaque Deo reddamus , qui totum à Deo accepimus : non reddendo perdimus ; reddendo , non solùm non perdimus , sed augemus . Quàm præclare Augustinus epist. 34. *Benignus exactor est Deus , non egenus ; & qui non crescit ex redditis , sed in se crescere facit redditeres . Huic ergo , quod non redditur , perditur ; quod autem red-*
ditur

reditur, reddenti additur: imò verò in eo, quod redditur, ipse reddens servatur. Deo namque seipsum debet homo, eique reddendus est, ut beatus sit, à quo accepit ut sit.

Si homo etiam in statu innocentie constitutus nihil omnino sine Dei gratia potuisset, nec ejus liberum arbitrium divinæ gratiæ adjutorio destitutum quidquam, nisi ad peccandum, valuisset; imò non solum benè vivere non potuisset, sed nequidem de adjutorio Dei potuisset confidere, nisi prævenienti adjutorio roboratus, ut tam frequenter docet Augustinus: næ tu, mi Lector, certè & ego valde cæci sumus, nobis si aliquid asseramus, divinum si adjutorium continuis precibus, & lamentis non imploremus? Hanc utilissimam humilitatis doctrinam totius Christianæ pietatis basim docet nos idem Doctor gratiæ *serm. 9. de verb. Apostel. & hom. 4.* Quæ testimonia, propter doctrinæ, & pietatis, quam spirant, cohærentiam simul ante oculos tuos expando: *Qui fecit nos & homines, & salvos; nam si ille nos fecit hominēs, nos autem ipsi nos fecimus salves, aliquid illo melius fecimus: melius est enim salvus homo, quàm quilibet homo. Si ergo Deus te facit hominem, & tu te fecisti bonum hominē, quod tu fecisti, melius est. Noli te extollere super Deum, subde te, Deum adora: p se fecit nos, & non ipsi nos. Vade nunc, & ventila divitias tuas: jacta te, & dic, Divēs sū. Quàm divēs! Si volō, justus sū; si volēs, non justus sū: in potestate habeo justū esse, & justū non esse. Non audis in Psalmo: Qui confidūt in virtute sua? Ergo Deus tibi carnē, Deus tibi sensum, Deus tibi animam, Deus tibi mentem, Deus tibi intelligentiam dedit: tu das tibi ipsi justitiam? Quid est caro, qui sunt sensus*

sensus, quid est intelligentia sine iustitia? Nonne omnia ista, si iustitiâ careant, ad pœnam valebunt? Ergo tam dives es, ut cùm Deus tibi dederit inferiora, des tibi potiora? Malè dives! exinaniende dives! Si tamen habes, quod te dixisti habere, quid habes quod non accepisti?

SPECULATIO III.

Sanctitas divinæ motionis defenditur, eamque in concursu ad opera peccati, illibatam permanere monstratur.

HÆc est præcipua, quam nostræ de generali Dei præmotione ad omnes status dilatata sententiæ creare solent, invidia & fortior obiectio, quomodo nimirum absque præiudicio divinæ sanctitatis possit Deus ad omnes omninò actus, quorum plures malos esse, & per se turpes certissimum est, causam secundam applicare, indifferentem determinare, suspensam propellere? Quomodo stante hac sententiâ, non dicetur Deus prima peccati causa, cuius nedum est cooperator, sed præoperator, & prædeterminator? Quomodo non peræquè malitiæ ac bonitatis author dicendus erit, ad utrumque actum, bonum & malum non minori, nec minùs robusta motione, inclinans? Quomodo tandem iustè punire possit æquissimus iudex ea patrans opera, ad quæ insuperabili, indeclinabili, & ineluctabili motione adacti sunt? Et tamen hæc omnia con-

sequentia Catholicus refugit sensus, refugit communissima pietatis notio, & comuniissima de Dei bonitate æstimatio. Ergo reprobandum est antecedens, unde tam nefaria consecraria derivantur, ne divinæ sanctitatis fama deteratur.

Nec soli scientiæ mediæ assertores hac de causa prædeterminationi maledicunt, & omnibus diris devovendam illam arbitrantur; sed inde etiam Jansenius, ejusque sectatores validissima, uti rentur, argumenta depromunt, quibus distinctionem auxilii status integritatis, & corruptionis confirmant, astruantque gratiam per se efficacem, seu auxilium *quò*, & operis, non nisi propter naturæ sauciatae debilitatem, & concupiscentiæ effrænis castigandam, vincendamque libidinem desiderari. Etenim si gratia per se efficax ad perseverandi voluntatem in statu naturæ integræ necessaria fuisset, Adamo & Angelis defuisset aliquod auxilium necessarium, nempe gratia per se efficax, qua utique caruerunt. Atqui auxilium aliquod necessarium, ex cujus defectu legis divinæ prævaricatio, & æterna damnatio sequantur, creaturæ intellectuali, priusquam rea foret, deesse non potuit, quia juxta veridicam Augustini doctrinam, à Deo summe bono, lumineque justo desereri creatura non potest, priusquam id per peccatum increatur; quia ut *libro 3. de liber. arbitr. cap. 16.* præclare ait: *Ex eo quod non accepit, nullus reus est; ex eo verò, quod non facit quod debet justè, reus est: debet autem, si accepit & voluntatem liberam, & sufficientissimam facultatem.*

Nec satisfacit, inquiunt, communis solutio Thomistarum aientium, tum hominibus innocentibus,

centibus, tum Angelis lapsis non defuisse quandiu erant in via sufficientissimam ad perseverandum facultatem, tametsi gratia per se efficaci caruerint, quia hæc non ad posse perseverare, sed ad actu perseverare desideratur. Non satisfacit, inquiunt: tum quia omnia ad agendum auxilia sufficientissima solus ille habere dicendus est, cui nihil eorum deest, quæ ad agendum omninò necessaria sunt; hæc enim auxilii ad agendum sufficientissimi cōmunissima notio est, & idea omnibus insita. Nam ut lepidè ait author epistolarum provincialium, id demùm sufficit, à quo nihil abest necessarium. Hæc germana vis istius vocis. Gratia quæ aliam requirit, non sufficit. Verbum enim *sufficiens*, ita omnes interpretantur, & eodem omnes sensu accipiunt. Mulieres omnes, hoc est totius orbis dimidia pars; aulici, ac militares viri, magistratus, ac tota turba forensis; mercatores, opifices, plebei, ad extremum universi homines id demùm sufficiens appellant, in quo insunt omnia necessaria ad agendum.

Tum quia (& augetur vis difficultatis) non solum Adamus, & Angeli lapsi caruerunt gratiâ per se efficaci ad benè agendum, & perseverandum necessaria; sed insuper cùm malè agendo peccaverunt, ad actum malum per efficacissimam Dei operationem applicati sunt: quæ certè tam dura, tamque austerâ sententia iis non videtur consentanea, quæ de statu innocentie passim affirmat Augustinus docens *lib. 1. retract. cap. 15.* primum hominem habuisse *ab opere malo abstinendi summam potestatem.* Preceptum Dei, addit *lib. 14. de civit. cap. 12. tanto maiore iniustitiæ violatum est, quanto faciliore posset observantia*

custodiri. Porro quæ summa potestas, quæ tanta fuit in Adamo à peccato abstinendi facilitas, si gratia per se efficax illi ad perseverandi voluntatem fuit necessaria, & illi defuit ante omnem culpam, & si insuper ad ipsum positivum peccati actum voluntas ejus efficaciter à Deo applicata & prædeterminata esse supponitur? Quomodo, vel qua ratione peccatum cavere potuit, à quo nullo profus pacto pendebat vel gratiam ad illud cavendum indispensabiliter necessariam obtinere, vel ad actum positivum malum efficaciter à Deo non applicari?

Præmittuntur quæ apud Catholicos omnes sunt in confesso.

Sed antequam has pro virili parte difficultates, quæ ut infra patebit, omnium sunt sententiarum crux communis, expediamus, operæpretium est catholica prius fundamenta jacere, quàm ut accuratam, & nobis probabiliorē explicandi hujus nodi methodum proferamus.

Supponendum ergo primò, certum esse de fide, Deum non esse authorem, & causam peccati, ut contra Lutheri, Calvinique blasphemias sacra Tridentina Synodus sess. 6. can. 6. his verbis pronuntiavit: *Si quis dixerit, mala opera ita ut bona Deum operari, non permitiendo solum, sed etiam propriè, & per se, adeò ut sit proprium ejus opus non minùs proditio Iudæ, quàm vocatio Pauli, anathema sit.* Hanc etiam Novatorum impietatem non solum execrantur Patres, sed etiam validissimis argumentis conterunt. *Illius rei Deus non est author,* ait S. Fulgentius lib. 1. ad Monimum, cap. 19. *cujus est ultor.* Patet autem, Deum

Deum esse criminatū ultorem, & severissimam de peccatis vindictam sumere. Similem rationem urget Augustinus in Psal. 91. *Non potest fieri, inquit, ut puniat Deus quod fecit.* Et libro 83. qq. q. 3. Nullo, inquit, *sapiente authore aliquis deterior sit.* Sed Deus quovis homine sapientior est, & per peccatum deterior evadit peccans: ergo Deo authore non sit peccatum. Et certè ut agnovit ipse Plato *lib. 2. de Republ.* Deus secum pugnaret, si malum efficeret, qui est summum bonum, & sibi contradiceret, si ea fieri vellet, quæ suis legibus vetavit.

Hujus etiam impietatis horror adedò castissimas Patrum Ecclesiæ mentes perculit, ut non dubitarent asserere, ejusdem impietatis esse Deum negare, & Deum authorem scelerum confiteri. *Stultus, & verè à sensu alienus est,* inquit Basiliius hom. Quod Deus non sit author malorum, *qui dixerit, Non est Deus. Similis item huic est, ne quicquam in stultitia differt, qui Deum malorum causam esse dicit: si enim malorum est causa, non bonus est; si non bonus, nec Deus.* Ad stipulatur August. in Ps. 32. *Non est Deus, nisi cui displicet iniquitas. Cùm dicis in corde tuo, Favet iniquitatibus meis Deus, nihil aliud dicis, quàm non est Deus.* Et ipse Seneca *epist. 123.* id ipsum vidit, quod occæcati peccatorum nebulis Lutherus, & Calvinus non viderunt. *Quid interest,* inquit, *utrum Deos neges, an infames?* Hinc Tertull. in *Scorpiaco, capite 7.* hanc impietatem appellat *spurcum blasphemiam afflatum de hæretico ore facientem.*

Loca Scripturæ proferre supervacaneum est, cum oculos Dei ita mundos asserat sacræ Pagine *Abach 1.* ut respicere ad iniquitatem non pos-

sint : *Mundi sunt oculi tui, ne videas in lum, & respicere ad iniquitatem non poteris.* In omnibus etiam penè utriusque Testamenti versibus divina sanctitas, horror scelerum, indignatio in sceleratos, perpetua conversionis, & fugiendorum peccatorum etiam minorum admonitio inculcantur. Unde patet quàm sit abominabilis doctrina Calvinii *lib.1. instit. c.23. n.3.* dicentis : *Deum esse authorem criminis, se centies confiteri.* Et *lib.2. c.4. n.2.* affirmat Deum non solum generali motione, unde creature omnes ut sustinentur, ita efficaciam quidvis agendi ducunt, sed speciali motione ad scelera permoveere, quæ, inquit, *in unoquoque facinore apparet.*

Et quanvis, ut loquitur Augustinus, valeat ad seipsam persuadendam ipsa evidentia, valeat ad Christianos à tam flagitioso pronuntiato avertendos ipsa tam horrendi dogmatis ultrò se ingerens sceditas, quam si depositis præjudiciis intueri dignarentur Calvinistæ nostri, non despero fore, ut ipsos quoque suæ doctrinæ, & sui Calvinii pudeat; attamen præter adductas, è Patribusque depromptas rationes, non desunt aliæ solidissimæ, quibus flagitiosa doctrina profligetur, etiamsi communissimus pietatis sensus intimis illam execrationibus non prosequeretur. Etenim ut discurret D. Thomas 1.2. q.79. art.1. omne peccatum est recessus ab ordine qui est in Deum sicut in finem; Deus autem non potest aliquid avertere à se, qui potius, ut ait Dionysius, omnia inclinât, & convertit ad seipsum. Quod si peccatum in se Deus referre nequeat, profectò peccatum est extra adæquatum divinæ omnipotentiae objectum, cum non magis, nec ulterius sese possit primi principii protendere causalitas,

litas, quàm finis universalitas, & amplitudo; quia omne agens agit propter finem: ergo planè repugnat, Deum esse causam, & authorem peccati. Multò verò magis repugnat Deum ut authorem specialem concurrere ad peccatum positivè tentando, vel iniquitatem inspirando, vel dæmonibus præcipièdo ut homines ad peccata inducant; quia concussus ille moralis ipsam iniquitatem quærit, nec potest à peccati sordibus ulla ratione, ulla prævisione, ulla intentione abstergi. Et sanè qua justitiæ specie posset Deus delicta plectere, vel corrigere, si divina voluntate, suasu, consilio, præceptoque peccata patra-
rentur?

Nec obest quod dixit Deus 2. Reg. 12. *Ego suscito super te malum de domo tua.* Et cap. 16. *Dominus præcabit Semei, ut malediceret David.* Nam hæc, & similia intelligi possunt, & debent vel de malo pœnæ, non culpæ; vel de permissu, non de affectione; vel tandem quia in uno, & eodem opere perversi hominis sæpe invenitur non solum actio nefanda scelerati, sed passio, & patientia boni, quæ ex parte sufferentis bona est, proindeque à Deo bonorum omnium largitore; & ideo opus illud Deo asseritur, non quia perversum est, sed prout in patiente sanctum est. Sic passio Christi & à Deo, & à sacrilegis Judæis sub diversa ratione processit, juxta illud Act. 2. *Hunc definito concilio, & præscientiâ Dei traditum per manus iniquorum affigentes interemisistis.* Et cap. 4. *Convenerunt Herodes & Pontius Pilatus cum gentibus & populus Israël facere quæ manus tua, & consilium tuum decreverunt fieri.*

Quare nec Deus propriè excæcat, nec decipit, nec corda hominum in odium convertit, ut in

superficie literæ multa Scripturarum testimonia significare videntur, quorum germanus sensus est, quod quia amoto Dei lumine, non nisi caligo in mente; recedente divinæ suavitatis spiritu, non nisi durities in corde consequitur; & cessante Dei dirigentis manu, in obliquitatem vita nostra torquetur: ideo excæcare, & indurare Deus dicitur, non infundendo malitiam, sed non infundendo misericordiam; sicut qui lucem auferret, qui columnam, quâ fertur ædificium, subrueret, ille oculos obtenebrare, & iste ædificium deturbare, soloque exæquare diceretur. Secundò eatenus prædictæ excæcationis, obdurationisque pœnæ Deo attribuuntur, quatenus ad exequenda inscrutabilia iudiciorum suorum consilia, sathanæ menti tenebras offundere, appetitum corrumpere, cor indurare permittit, & sic facere quadantenus dicitur, quorum faciendorum licentiam impartitur. Denique occæcare, indurareque Deus dicitur, quia lumen, gratiamque offert, ex cuius repulsa magis cæcatur animus, magisque duratur. Quod elegantissimè *q. 10. ad Hedigium*, hac imagine declarat Hieronymus: Sicut unus est solis calor, qui pro inæquali subjectorum dispositione alia liquefacit, alia indurat, alia soluit, alia stringit, & ceram liquat, & lutum siccatur, cum una sit natura virtusque caloris: ita Deus uno, eodemque lumine malè affectum excæcare dicitur, benè institutum illuminare, eodemque beneficio indurare illum, hunc mollire. Videlicet miraculis eisdem editis tenerescere Israël, obdurescere Pharaonæ cepit; eadem doctrinæ luce Apostoli viderunt, Pharisæi cæci facti sunt: quoniam divina lux per se quidem ad illuminandum funditur, sed per occasionem

rationem tamen in eo cæcitatem efficit, qui lippos habet oculos; in eo duritiem, qui pravo affectus est corde. Nam palato non sano pœna est panis, qui sano est suavis; & oculis ægris odiosa lux, quæ puris est amabilis.

Illud etiam impræsentiarum observandum est, non esse mirum, si Calvinus & hæreticorum hujus temporis omnium antesignanus Lutherus in assertionibus, *assert.* 36. in tam execrandam blasphemiam proruperint; cum enim bonorum operum necessitatem de medio sustulerint, sceleribus impunitatem, effusissimasque habenas permiserint, non mirandum est, si Deum criminum authorem pronuntiarint, qui voluerunt habere excusationes ad excusandum in peccatis. Detestata est olim Ecclesia Simonem Magum, qui jubebat legis minas non pertimescere, ut referunt Theodoret. *lib. 1. de hæret. fab. c. 1.* & Irenæus *lib. 1. cap. 20. & 30.* Detestata est quoque Aëtium Principem Anomæorum, qui Anomæi, quasi exleges vocati sunt, quia contendebat, Deum non curare quid quisque agat, dummodo fidem custodiat, ut refert Epiphanius *hæresi 76.* & August. *lib. de hæres. cap. 54.* Sed veteribus hæreticis impietatis palmam præripit post hominum memoriam impudentissimus Lutherus, qui non solum præfatam hæresim ex orco suscitavit, sed etiam scribere non erubuit, non solum non obesse mala opera, sed obesse etiam bona, sola scelera prodesse. Sic serm. de piscatura Petri: *Quanto sceleratior es, inquit, tanto citius Deus gratiam infundit.* Et sermone in illud. Sic Deus dilexit mundum: Ego tibi dico, inquit, quia angusta est via, oportet te fieri tenuem si vis per eam transire. Verum quomodo te-

nuem fieri velit Christus discipulum suum, sic explicat Doctor admodum mysticus, his quæ subjungit verbis: *Catarum qui operibus onerati sunt, sicut conchilibus videmus onustos S. Jacobi peregrinos, ii non poterunt penetrare.* O stuporem non tam hominis, quàm belluæ! Non tam belluæ brutalitatem, quàm dæmonis ex adipe prodeuntem iniquitatem! Sed quis non lugeat tam infernalem Prophetam toti habere sectatores, & gregales? Nonne de illo justitiùs, quàm de Epicuro illud Lactantii lib. 3. cap. 17. usurpare licet: *Archipirata quisquam vel latronum ducior, si suos ad grassandum cohortaretur, quo alio sermone uti posset, quàm ut eadem diceret, qua dixit Lutherus?* Sed mirum id nemini videri debet, si vitæ desertoris, & apostatæ adeò nefanda respondeat doctrina; nam juxta proverbium: *Habent similem labra lacheram, & dignum est patellâ operculum.*

Supponendum est secundò, rationes omnes, quibus probari solet, Deum cum omnibus causis ad agendum concurrere, vel etiam eas ad agendum prædeterminare, si quid probent, concludere etiam, Deum totam actus peccati, quæ ens & actus est, entitatem efficere. Rationes enim generales divini concursus petuntur ex subordinatione causæ secundæ à prima, ex dependentia entis per participationem ab ente per essentialiam, quæ æquè, ut patet, militant pro entitate actus peccati. Rationes autem prædeterminationis in summa sunt hæc. Tum etiam, quia illam exigit ratio primæ causæ, quæ est in Deo; si autem concursus divinus determinetur à causa secunda, Deus non erit prima causa illius determinationis actualis, nec proinde omnis entis.

Tum

Tum quia sine præmotione non potest tolli intrinseca causæ secundæ indifferentia , saltem quoad individuum ; nisi enim aliquid intrinsecum determinans ad actionem adveniat , causa semper in indifferentia permanebit. Tum quia inintelligibilis omnino est duarum causarum, duorumque concursuum indifferentium conjunctio sine aliquo prævio recepto in causa secunda ; nam conjunctio ad agendum præcedit naturâ actionem , cum causæ jungantur ut agant ; Ergo per aliquid reale conjunguntur , quod sit prius naturâ actione , & hoc nomine præmotionis intelligimus. Quæ omnia, aliaque eam admittendam esse convincunt, nisi pedissequam naturæ , non dominam motionem Dei constringamus , asseramusque servire creaturæ Creatorem, Deum homini. Patet autem, has rationes peræquè de materiali peccati convincere, cum respectu illius Deus sit prima causa , respectu illius causa secunda sit indifferens, saltem quoad individuum, & denique ad illud efficiendum debeant Deus , voluntasque humana conjungi.

Explicatur tandem , & dissolvitur difficultatis nodus.

His suppositis operæpretium est difficultatem istam operosè , & si fieri potest, solidè , & simul dilucidè explanare. Illud tamen credendum non est, difficultatem istam esse Thomistis singularem ; communis enim, etiam est assertoribus scientiæ mediæ nodus iste. Tum quia per concursum simultaneum quidquid in scelere

entita

entitas est, efficit Deus. Tum quia Deus prudens, & volens concursus suum præbet, unde non potest dici ad peccata invitus trahi. Tum quia non minùs divinam bonitatem dedecere videtur, cum cernit causam secundam in malum tendere, lapsum ejus sequi, & veluti in societatem coire flagitii. Tum quia Deus per scientiam mediam videt infinitas posibles circumstantias, in quibus peccator bene operaturus esset, si in eis positus fuisset; & hoc non obstante in illis collocavit eum Deus temporis, loci, personarumque conditionibus, in quibus eum certissimè lapsurum præseivit: nonne igitur Deus censetur causa peccati, quod utique poterat impedire? Quà specie veritatis dicent adversarii, Deum præter intentionem ad peccatum concurrere, qui advertenter in illis posuit peccatum circumstantiis, in quibus futurum lapsum prævidit; in illis non posuit, in quibus cum omni sanctimonia vixisset? Certè judex, qui puellam duceret in lupanar, in quo eam à lenonibus constuprandam sciret, eamque deinde capite plecteret, vix apud cordatos præter intentionem egisse crederetur; nec qui aliquem in turrem dirigeret, unde præcipitem agendum sciret; vel in sylvam manduceret, in qua spoliandum, jugulandumque prænosceret, non solùm permissiva, sed etiam tam tristem eventuum positiva causa jure, meritoque haberetur. Ergo velint nolint, ad inscrutabilia Dei judicia confugiant assertores. scientiæ mediæ necessum est. Tum demùm, quia in eorum sententia, non solùm Deus erit causa physica actus peccati, sed etiam causa moralis ejusdem: sicut enim circumstantiæ moraliter ad peccatum movent, ita qui sciens & prudens

dens aliquem in illo circumstantiarum ordine ponit, in quo prævidet sequutura peccata, profectò peccatorum causa censetur, utpote qui petram scandali apponit & offensionis. Nec dicere valent, ita se gerere Deum, ut jura libertatis integra servet; nam cum Deus in alia circumstantiarum serie peccatorem collocare potuisset, ubi piè, justèque vixisset; non minùs Deus jura libertatis servasset, si eum inibi constituisset.

Quamvis autem hæc ita sint, fateor vim præsentis difficultatis in sententia Thomistarum per prædeterminationem magis apparere, quia per præmotionem Deus non solùm est causa actus, sed etiam est causa quod voluntas actum illum velit, efficiatque. Maximè quia præmotio physica est fortior, & vehementior quàm moralis, cum ista affectu sæpe sæpiùs careat, illa nunquam: unde si causa moralis influat in peccatum, illud de physica à fortiori dicendùm videtur.

Ut autem his communibus difficultatibus fiat satis, sciendum est, nostram de constitutivo formalis peccati sententiam suprà *tom. 3. lib. 6. dissert. 2.* stabilitam, non parùm ad præsentem difficultatem molliendam opitulari. Cum enim juxta ibi dicta, peccatum formaliter in privatione debitæ rectitudinis positum sit, facilè intelligitur Deum, tametsi causa sit entitatis, non esse tamen authorem peccati; quia privatio, & deformitas non entitatem solam consequitur, sed ab illa, prout est à causa secunda regulis morum subjecta, derivatur: è qua sanè difficultate vix, ac ne vix quidem se expediunt positivæ malitiæ assertores; inintelligibile quippe est, causam entitatis non esse causam iniquitatis, si malitiæ

litæ iniquitas sit de formali aliquid positivum.

Verùm quia sententia aliquo positivo peccatum constituens valde communis est, ibidemque suam ei probabilitatem effertimus; ideo aliquid ampliùs investigandum est, quod universaliùs, & simul plenius satisfaciatur, præsertim quia in quocumque peccatum situm esse dicatur, semper remanet hæc spina non parum pungens, quomodo excusari non possit peccator, quem Deus ad entitatem actus, cui annexa malitia est, infallibiliter permoveret, etiam antequam peccaverit, ut in primo Adami peccato contingit, cujus motionem ad primum inobedientiæ actum applicantem nulla culpa præcessit?

Quare ut profundius, & simul suavius rem totam exponamus, aliquid aliud tradendum est, quo Deo non possit culpa vel mediata, vel immediate ascribi; quove omni voluntatis excusationi aditus præcludatur. Id autem, ni fallor, expedite, & solide conficiemus, si consideremus, quod sicut Deus in ratione efficiendi est prima causa ab alia quavis independens, & à qua omnes aliæ pendent; ita voluntas in ratione efficiendi est causa prima, sub qua ratione non dependet à Deo, sed potius concursum Dei obliquat, & detorquet; facitque, ut ait Scriptura, servire Deum iniquitatibus suis. Itaque & Deus tanquam prima causa efficiens prædeterminat tanquam universalis motor voluntatem ad rationem boni, quod in omnibus actibus voluntas quærit; & dum Deus ad illam bonitatem quærendam permoveret, motionem illam inflectit prima causa deficiens, seu voluntas, ad malum perquirendum, seu ad bonum contra regulam ratio-

nis

nis amandum. Cùm enim voluntas sit inclinatio hominis, necesse est ut in bonum sibi conveniens semper tendat, & beatitatem, vel beatitudinis radium aliquem in actibus etiam nefandissimis quærat, tametsi non inveniat. Quare verò concursus Dei sic intorqueat, & incurvet, non est alia causa, nisi quia voluntas sibi permissa ita vult, & in genere deficiendi ipsa est primum principium ab alio independens.

Ad cujus evidentiam recolendum est, quod aliàs libro sextodiffert. 2. cap. 2. pag. 496. diximus, privationem rectitudinis, in qua formalem peccati rationem sitam esse ostendimus, se habere ad actum humanum non solum consequenter, quatenus resultare intelligitur ex actu tendente in objectum dissonum; sed etiam concomitanter, & consequenter: concomitanter quidem, quia actus non solum elicitur ut privetur, sed etiam elicitur ut debito fine privatus: antecedenter verò, quia ille idem actus, qui tendit ad objectum commutabile, prius à bono incommutabili & rectitudine rationis recessit. Vnde sicut corruptio in genere causæ materialis, & dispositivæ præcedit generationem; & recessus à termino à quo accessum ad terminum ad quem in aliquo priori antecedit; ita voluntas prius recedit à Deo, quàm amplexetur objectum abominabile; prius bono incommutabili terga vertit, quàm bonum commutabile respiciat, facitque peccator duo mala; derelinquit nimirum fontem aquæ vivæ, & fodit sibi cisternas dissipatas. Nemo quærat, inquit Augustinus ibi laudatus, causam effici. ntiam humana pravitatis; non enim est efficiens, sed deficiens, quia nec illa affectio est, sed defectio. Quia ergo voluntas
dum

dum peccat, & efficit, & deficit; quatenus efficit, applicatur à Deo; quatenus deficit, applicat concursus Dei. Non secus ac anima dum tibiam curvam permoveret, motione sua tibiam applicat; tibia tamen motionem animæ incurvat, & ut ita dicam, applicat ad claudicationem.

Præ oculis ergo semper habendum est, in opere malo efficiendo duo prima principia concurrere, & Deum, & voluntatem, in suo genere, & in sua linea independentia: entitatis primum principium Deus est, obliquitatis, & deformitatis primum principium voluntas, quæ nullo alio indiget, ut principium actuale operationis constituatur, quàm seipsa. In illo ergo priori, antequam pariat iniquitatem, constituitur primum principium actuale operationis deficientis per voluntarium à lege recessum, seu non subjectionem ad superiorem: ab illo ergo principio sic accincto, sic parato, quid aliud profiliet quàm culpa? Quid ergo mirum, si Deum ad concurrendum ad materiale peccati pertrahit, quia primum principium efficiens primi deficientis libertatem tamen possit gratiâ suâ victrici flectere, illam tamen sæpè finit juxta suæ defectibilis libertatis jura operari.

Ex his opinor difficultates omnes absque negotio solutum iri; nam nec Deo tribuitur auctori culpa, cujus primum principium voluntas est; nec in præmotionem divinam refundetur operatio, si actionem primi principii efficientis in genere causæ materialis præcedere defectionem primi principii deficientis intelligamus. Frustra etiam ad excusandas excusationes in peccatis divinæ motionis insuperabilem potestatem

statem voluntas allegabit, tum quia divina motio per se ad bonum tantum movet, nec actum malum, nisi detorta operatur: tum quia prius naturâ voluntas vult à Deo recedere, quam actum physicum, cui annexa turpitudine est, operetur: unde prius se movet ad formale, quam à Deo moveatur ad materiale; & movendo se per recessum, Deum pertrahit, & veluti cogit, ut ipsam moveat ad accessum. Ex quibus in forma omnibus difficultatibus facile, ni me mea fallat opinio, lector ingeniosus occurreret. Cætera apud Philosophos, quibus istam agitare questionem his temporibus solenne est, inveniet si eos consulat.

Illud etiam diligenter observari aveo, quod licet sententia de prædeterminatione ad actus naturales, atque etiam ad materiale peccati, tanquam probabilior à Thomistis eligatur; non ita tamen ab illis traditur, ut ex præmotione ad actus naturales, vel ad materiale peccati pendeat veritas illa cardinalis de gratia per se efficaci ad actus supernaturales, & meritorios salutis necessaria. Generalem quippe prædeterminationem admittunt duntaxat Thomistæ ut probabilem secundum rationem naturalem, & non ut necessariò cum fide catholica connexam. Gratiam verò per se efficacem tenent ut conclusionem theologicam ab Augustino, & Aquinate clarissimè traditam, & post articulos fidei omni exceptione majorem, in proxima & veluti ultima dispositione definibilem. Unde etiam si nulla ad actus merè naturales, vel morales physica prædeterminatio admitteretur, eam tamen in ordine supernaturali ad rectè, christianèque vivendum ad-

mitten

mittendam contendimus , generalemque præmotionem idè solum astringimus , ut per eam ad gratiam per se efficacem uberiùs , fortiusque stabiliendam viam muniamus , ad eamque propugnandam serviat etiam Philosophia. Quare gratiæ per se efficacis assertionem unicè querimus,unicè intendimus. Unde, ut optimè *Alvares lib.3. de auxiliis, disp.24.n.27.* observavit, Thomistarum nonnulli Deum præmovere ad actum peccati , etiam ut actus est , inficiati sunt, quanvis ad unum omnes gratiæ victricis , & per se efficacis omnipotentissimam potestatem à prævisione scientiæ mediæ independentem constantissimè asseverent ; & de illa processit olim coram Clemente VIII. & durat adhuc Patres Societatis inter , & Dominicanos disputatio.

Hæc observare operæpretium in hujus dissertationis coronide duxi, quia quamplurimos adverti adversarios hac arte Thomisticæ de gratia sententiæ invidiam accersere , quòd nostra sententia Deum malorum actuum faciat præmotorem. sed ut dixi, de præmotione generali non est principalis , sed tantùm accessoria disputatio. Gratiam per se, & ab omnipotentia Dei efficacem Prædicatorum Ordinis tutelæ summo Dei beneficio concreditam propugnamus; hanc à Theologiæ Angelo Præceptore nostro D. Thoma ad nos transmissam pro virili defendimus; pro illa coram Clemente, & Paulo Catholicæ Ecclesiæ Præsulibus Thomas de Lemos, Didacus Alvares, aliique non mediocris eruditionis, & pietatis laude certarunt ; hæc veluti cæleste, sacrumque depositum Scholæ nostræ commissum , ut in sacri Ordinis perpetuitate perpetuos

tuos habeat prædicatores, & interritos defensores, custodimus; hanc à Deo quotidianis precibus, & votis enixè postulamus, quam speravit Patriarchæ, quam prædixerunt Prophetæ, quàm è vulneribus suis effudit Christus, quam Paulus docuit, quam Augustinus illustravit; hanc, quâ solâ egemus, nobis concedat Deus Benedictus in sæcula. Ad hanc gratiam omni genere argumentorum stabiliendam integram dissertationem in duo capita, & in sex speculationes, methodo nobis familiari dissectam paraveramus, ubi ex theologicis decem locis latissimè patentibus rationes deprompseramus multitudinem varias, doctrinæ ecclesiasticæ ubertatē refertas: sed quia melior est obedientia, quàm victima; & de ligno vitæ edere piaculum est, eam idcirco supprimendam censuimus, ne à debita Romanis Pontificibus hujus quæstionis tractationem vetantibus obedientia vel latum unguem discedamus.

REFLEXIO.


Non est quod impius se in suorum patratiōe flagitiorum excuset; desinet enim quisque de Dei motione conqueri, vel de Dei gratia, quòd ipsum deferat, obmurmurare, si desertionem suam intelligat se mereri. Observat Augustinus *li. 2. de Genes. ad Manich.* nihil esse tam familiare peccantibus, quàm tribuere Deo velle undecumque accusantur. Immodò illum esse superbæ humanæ characterem, confirmat lib. de nat. & grat. c. 25. *Procliviores sumus*, inquit, *quare potius quid contra ea respondeamus, quam nostro obijciuntur errori, quàm intendere quàm sint salubria*

lubria, ut careamus errore. Perperam concursum Dei accusas, quem ad peccatum inflectis. Nemo te facit malum, nisi tu ipse; non enim naturâ, sed liberè peccando malus factus es. Audi Deum *Psal.49.* ineptas causationes tuas objurantem, & dicentem tibi: *Hæc fecisti, & tacui. Existimasti iniquè, quod ero tui similis.* Quasi dicat, ut ibi expendit Augustinus, à vindicta supersedi, severitatem meam distuli, patientiam tibi prolongavi, pœnitentiam tuam diu expectavi: Ergone quia mala tua placent tibi, placere credis & mihi? Me quia non pateris ultorem, vis habere participem, & tanquam corruptum judicem, prædæ socium. His peccatoris excusationibus non minuitur culpa, sed immensum augetur. Quod probat Magnus Gregorius *lib.22. Moral. cap.9.* exemplo Protoparentum, qui adhibere sibi met defensionis s. latia, quàm confessionis elegerunt. Cùmque excusare peccatum voluerit vir per mulierem, mulier per serpentem, auxerunt culpam, quam cueri conati sunt: obliquè Adam Dominum tangens, quod ipse peccati e. rum author extiterit, qui mulierem fecit; & Eva culpam ad Dominum referens, qui serpentem in paradiso posuisset.

Ergo non excusatione, sed confessione, sed pœnitentiâ peccata nostra diluamus. Timemus quidem confiteri judici homini, & idcirco excusamus, ne fortè confessum puniat. Deo scelera nostra fateri, & apud illum accusare ne dubitemus, quia si nos dijudicamus, non dijudicabimur, efficimusque Deum confitendo propitium, quem negando non facimus nescium. Solâ punitivâ satisfactione peccata delemus, quæ ascitis excusationum coloribus aggravamus.

Rectè

Rectè Augustinus in Psal. 58. *Non potest Deus misereri omnium operantium iniquitatem, quasi blandiens peccatis, aut non eradicans peccata. Prorsus aut punis, aut punit. Vis non puniat? Punit tu.* Nullus ergo de Deo, nullus de divina gratia, nullus de concursu Dei conqueratur; justificatur enim Deus in sermonibus suis, & vincitur cùm judicatur. Ne accuses Deum, sed opponentem se Deo accuses libertatem tuam. Quis es tu involvens sententias sermonibus imperitis? Qualis tu, qui litem Deo moveas, vel intendas? Crede mihi, si quid in te boni adverteris, totum Deo tribue, ne gloriaris: mala uni tibi tua ascribe, ut humilieris: gratiam advoca non contentione, sed oratione: Ora gemitu voluntatis, ut impetres donum facilitatis; & ut os tuum obstruatur, audi Bernardum dicentem tibi: *Multi queruntur deesse sibi gratiam; sed multò justius gratia queretur deesse sibi permultos.*



DISSERTATIO II.

*De Deo infirmitatem nostram tum
ad dignoscendum verum, tum
ad operandum bonum per gra-
tiam adjuvante : & quid, ac
quotuplex sit illa gratia.*



Uta ut docet Augustinus *lib. de
grat. Christ. cap. 24.* operatur
Deus in cordibus hominum in-
ternâ & occultâ potestate, non
solum veras revelationes, id est
veritatis notitiam intus affulgentem, sed etiam
bonas voluntates; quia nimirum post univer-
salem peccati originalis stragem & ratio nostra
caligat, & voluntas torpet; illa erroris offusis
tenebris approbat falsa pro veris, ista concupis-
centiæ illecta illecebris eligit mala pro bonis:
ideo qua ratione lumine gratiæ egeamus, & il-
lustremur ad cognoscendas veritates, quomodo
ea adjuvemur ad veritatem cognitam ad praxim
reducendam, priori capite explicamus, acturi
in posteriori de ejusdem gratiæ essentia, & mul-
tiplici divisione.

CAPUT

CAPUT I.

Divine gratiæ infirmitatem humanam adjuvantis necessitas stabilitur.

Effectus gratiæ est veritas in mente, & amor in corde; ideo in præfenti veritatis notitiam cum operis bonitate conjungimus, quia ad hoc tendit divina gratia, ut intellectum illustret, & affectum ad benè agendum inflammer. Unde August. lib. de grat. Christi, cap. 13. ait: *Hac gratia, si doctrina dicenda est, certè sic dicatur, ut altiùs, & interiùs eam Deus cum ineffabili suavitate credatur infundere; ita ut non ostendat tantummodò veritatem, verùm etiam imperiet charitatem.* Et lib. de spiritu & lit. cap. 3. sic: *Nos dicimus, humanam voluntatem sic divinitus adjuvari, ut præter quod creatus est homo in libero arbitrio, præter doctrinam, quã ei præcipitur quemadmodum vivere debeat, suscipiat Spiritum sanctum (vel saltem ejus motionem) quo fiat in animo ejus delectatio, dilectioque summi illius, & incommutabilis boni; & cum id quod agendum est, cœperit non latere, nisi etiam delectet, & ametur, non agitur, non suscipitur, non benè vivitur.* Priùs autem agimus de vero, & bono ordinis naturalis, ut magis infirmitatis humanæ debilitas innotescat: ex quibus in
fine

fine capitis necessitas gratiæ ad verum, bonum, que supernaturale colligetur, & sine negotio suadebitur.

SPECULATIO I.

Ad cognoscendas naturales veritates, non quidem gratiâ supernaturali, sed tamen auxilio Dei moventis, & illustrantis indigemus.

HAnc assertionem cum omnibus suis partibus apertè tradit, & probat Doctor Angelicus q. 109. art. 1. ubi sic formaliter ait : *Nem solum à Deo est omnis motio, sicut à primo movente, sed etiam ab ipso est omnis formalis perfectio sicut à primo actu. Sic igitur actio intellectus, & cujuscumque entis creati dependet à Deo in quantum ad duo: uno modo in quantum ab ipso habet perfectionem, sive formam, per quam agit; alio modo in quantum ab ipso movetur ad agendum.* Ubi perspicuè admittit S. Doctor necessitatem auxilii Dei moventis ad cognoscendas veritates naturales; addit tamen, ad eas dignoscendas non esse per se necessarium lumen fidei, vel aliud supernaturale, quia veritates naturales non sunt extra sphaeram objecti connaturalis intellectus, ut statim expendendo ejus rationem ponderabimus. Idem repetit ad primum, his verbis : *Dicendum, quod omne verum, à quocumque dicatur, est à Spiritu sancto, sicut ab infundente naturale*

rale lumen, & movente ad intelligendum, & loquendum veritatem; non autem sicut ab inhabitante per gratiam gratum facientem, vel sicut largiente aliquod habituale donum nature superadditum. Quod inculcat responsione ad 3. Semper, inquit, indigemus divino auxilio ad cogitandum quodcumque, in quantum ipsum movet intellectum ad agendum. Et in argumento Sed contra, illud August. 1. retract. cap. 14. Non approbo quod in orat. one dixi: Deus qui non nisi mundos verum scire voluisti. Responderi enim potest multos etiam non mundos multa scire vera. Illud, inquam, testimonium ita interpretatur, ut Augustinus solam gratiam habituales excluderet, quâ homo mundus efficitur, secundum illud Psal. 50. Cor mundum crea in me Deus.

Ratio primæ partis est, quia ut ait D. Thomas: Vnaquæque forma indita à Deo rebus creatis habet efficaciam respectu alicujus actus determinati, in quem potest secundum suam proprietatem; ultra autem non potest nisi per aliquam formam superadditam, sicut aqua non potest calefacere nisi calefacta ab igne. Sic igitur intellectus humanus habet aliquam formam, scilicet ipsum intelligibile lumen, quod est de se sufficiens ad quadam intelligibilia cognoscenda, ad ea scilicet in quorum notitiam per sensibilia possumus devenire. Altiora verò intelligibilia intellectus humanus cognoscere non potest, nisi fortiori lumine perficiatur, sicut lumine fidei, vel prophetia, quod dicitur lumen gratia, in quantum est natura superadditum. Quæ ratio sic ad formam reducit: Quælibet facultas potest sine aliquo supernaturali sibi addito in illud ferri, quod continetur intra sphaeram sui objecti propo-

tionati. Atqui veritates naturales continentur intra sphaeram objecti proportionati intellectus, cum in illarum notitiam per sensibilia studio, meditatione, & speculatione deveniamus. Ergo non est opus gratiâ supernaturali ad veritates naturales dignoscendas.

Hanc etiam veritatem supponere videtur Scriptura, quæ *Sap. 13.* docet, à magnitudine speciei & creaturæ posse cognoscibiliter Creatorem videri: & *Rom. 1.* invisibilia Dei per ea, quæ facta sunt, intellecta conspici. Supponit etiam Augustinus, dum *lib. 1. ad Simplician. q. 2.* affirmat, Deum nec intuitu melioris ingenii, nec ratione cognitionum, vel doctrinæ, quas sibi quis studio comparavit, nec propter opera ex objecto honesta gratiam suam impartiri. *Non habeo, inquit, quod insuear in eligendis hominibus ad gratiam salutarem, si ad examen hujus electionis aliqua cogitatione pramitter, nisi vel majus ingenium, vel minora peccata, vel utrumque: addamus etiam, si placet, honestas, utilesque doctrinas. Quisquis ergo fuerit minimis peccatis irretitus, atque maculatus (nam nullis quis potest?) & acer ingenio, & liberalibus artibus expolitus, eligendus videtur ad gratiam. Sed cum hoc statuero, ita me ridebit ille, qui infirma mundi elegit, ut confundat fortia; & stulta mundi, ut confundat sapientes, ut eum intuens, & pudore correptus ego irrideam multos, & pra quibusdam peccatoribus castiores, & pra quibusdam peccatoribus oratores.*

Denique hanc primam partem convincit nedum experientia, quâ compertum est, Gentiles non paucos lumine naturali ductos, nec supernaturali luce illustratos multas veritates cum
speculati

speculativas, tum morales agnovisse ; sed etiam id persuadet tum Patrum , tum Theologorum omnium praxis, quâ plures demonstrationes de Deo , de virtutibus, aliisque è ratione duntaxat naturali petitas adversus infideles , vel impios urgent, quas subinde ab ipsis lumine naturali penetratum iri supponunt.

Dices : His rationibus probaretur, posse sine gratia supernaturali hominem cogitationes cordium, vel futura contingentia viribus naturalibus cognoscere, cum illa sint objecta naturalia, ac proinde intra sphæram objecti connaturalis intellectus comprehensa. Ergo adducta D. Thomæ ratio non convincit.

Respondeo , id minimè sequi : ad cujus evidentiam considerandum est , cognitiones naturales bifariam dividi ; quædam enim sunt naturales ex parte objecti & medii simul, in quorum nimirum notitiam devenimus per medium aliquod sensibile, vel saltem è sensibus remotè expressum ; cum teste Philosopho , omnis nostra cognitio à sensibus ortum habeat , & intelligentem ad phantasmata respicere oporteat : aliæ cognitiones sunt naturales ex parte objecti duntaxat, quod nimirum in seipso nihil habet cognitionem merè naturalem excedens ; nullum tamen inest nobis medium sensibile, vel à sensibus subministratum , per quod in illius objecti cognitionem perveniamus ; & hujusmodi sunt cogitationes cordium , & futura contingentia, propter rationes in tractatu de Angelis adductas : inde non mirum , si ad ea cognoscenda revelatione supernaturali opus sit.

Secunda pars affirmans hominem indigere auxilio Dei ad cognoscendas veritates ordinis

naturalis, apertè traditur, à D. Thoma *art. 1. as-*
ferente, hominem indigere auxilio Dei moven-
tis ad cognoscendas quascunque veritates, non
verò gratiâ habituali, vel lumine supernaturali
fidei, vel prophetiæ: quæ exceptio cum firmet
regulam, sicut homo non indiget gratia habi-
tuali, vel lumine supernaturali ad dignoscendas
veritates naturales, ita ad easdem sine errore
pèrcipiendas auxilio speciali indigere intelle-
ctum humanum fatendum est. Unde lib. 4. contra
Gent. cap. 52. pœnis originalis culpæ annumerat
vulnus ignorantie intellectus, cum speculativi,
tum practici, dicens: Inter spirituales pœnas po-
tissima est debilitas rationis, ex qua contingit,
quod homo difficulter pervenit ad veri cogni-
tionem, & de facili labitur in errorem, & ap-
petitus bestiales omninò superare non potest, sed
multoties obnubilatur ab eis.

Ratio verò est, quia licèt hanc, vel illam ve-
 ritatem in particulari seorsim sumptam, & divi-
 sim ab aliis possit homo cum solo concursu ge-
 nerali cognoscere; tamen in statu naturæ lapsæ
 plures cognoscere, quin in errorem incidat, non
 potest: ergo ad veritates naturales dignoscen-
 das opus est auxilio Dei moventis speciali. Con-
 sequentia patet; sicut enim rectè concludimus,
 hominem indigere speciali Dei opitulantis au-
 xilio ad vitanda peccata mortalia, quia licèt ra-
 tione libertatis possit quodlibet in particulari
 vitare, non continget tamen, quin illiciente
 concupiscentia in aliquod non cadat, nisi spe-
 ciali Dei auxilio adjuvetur: ita rectè inferimus,
 intellectum speciali Dei illustrantis auxilio
 egere, si plures veritates naturales absque per-
 mixtione erroris in statu naturæ lapsæ sine Dei
 dirigen

dirigentis speciali auxilio cognoscere nequeat, tametsi quamlibet ordinis naturalis veritatem in se spectatam solo cum generali concursu Dei cognoscere valeat.

Antecedens verò, in quo solo est difficultas, probatur : tum quia experienciâ compertum est, ipsa splendidiora Gentium, seu Philosophorum lumina sibi relictâ sæpissimè caligasse; & ut benè notavit Doctor Angelicus, inde convenientiam fidei stabiliens, veritates naturales non nisi pauci, & illi pauci non nisi post longum tempus; & adhuc post illud longum tempus, non nisi cum admixtione multorum errorum assequuti sunt. Ergo ut multi, & per breve tempus, & sine permixtione errorum veritates naturales assequantur, convenienter quidem fides, sed necessitò Dei adjuvantis motio specialis exigitur. Tum quia intellectus est potentia indifferens ad verum & falsum, ad hoc objectum potius quàm ad illud: ergo ut hîc, & nunc non cadat in errorem, nec verisimilibus falsitatibus decipiatur, singularis auxilii beneficio opus est, cum in hoc statu præclive sit falsa pro veris approbare. Tum quia pro veritatis assequutione, pro errorumque fuga divinum lumen invocamus, pro veritatibus notis gratias agimus, pro occultis oramus: nihil autem apud Augustinum incunctius, quàm quod oratio est clarissima gratiæ, sin supernaturalis, certè naturalis auxilii specialis testificatio; nam pro concursu generali non oramus, nec illud petimus, quod in nostra est potestate. *Non fallamus homin. s*, inquit Augustinus epist. 107. *nam Deum fallere non valemus. Non oramus Deum, sed orare nos fingimus, si nos ipsos, non ipsum facere credimus, quod ora-*

*mus. Non gratiam Deo agimus, sed nos agere fingimus, si unde illi gratias agimus, ipsum facere non putamus. Nec obest si dicas, ideo nos pro veri assequutione orare, & gratias agere, quia assequutio veritatis habet aliquid contingentiae, & fallibilitatis, sicut propter eandem rationem oramus pro pluvia, vel serenitate obtinenda. Non obest, inquam: tum quia sufficit, quod assequutio veri sit contingens, & fallibilis, ut ad ejus assequutionem specialis luminis directione egeamus: tum quia post corruptionem primi peccati, & ob perpetuas concupiscentiae nebulas, non solum assequutio veritatis est fallibilis, sed etiam difficilis, quia ut ait Scriptura Genes. 6. *Cogitatio hominis intenta est ad malum.* Et Sap. 9. *Cogitationes mortalium timida, & incerta providentiae nostrae.* Unde ad eam sine permixtione erroris obtinendam speciali auxilio opus est.*

Hac divini luminis semitas nostras, ne cespitemus, continenter dirigentis, & tenebras dissipantis necessitate adeo persuasus erat Doctor noster Angelicus, ut quanvis esset ingenio, memoria, & judicio ad miraculum fermè instructus, nunquam tamen se lectioni, aut scriptioni dedit, nisi post orationem; unde & precandi formulam, quam studiis suis prae mittebat, posteris reliquit, in qua sic orat: *Creator ineffabilis, qui verus fons luminis, & sapientia diceris, infunde super intellectus mei tenebras radium tuae claritatis, duplicem à me removens privationem, & tenebras, peccatum scilicet & ignorantiam. Da mihi intelligendi acumen, retinendi capacitatem, interpretandi subtilitatem, &c.* Quam quidem veritatem ab Augustino Magistro suo didicerat, apud quem *lib. 10. Confess. cap. 5.* legerat:

Quod

Quod de me scio, te mihi lucente scio. Unde & cap. 6. addit, quod si Deus misertus fuerit, cœlum & terra surdis loquuntur laudes Dei. Legerat lib. 2. de peccat. merit. & remiss. cap. 5. quod sicut corporis oculus non adjuvatur à luce, ut ab eadem luce clausus aversusque discedat, ut autem videat, adjuvatur ab ea, neque hoc omnino, nisi illa adjuverit, potest: ita Deus qui lux est hominis interioris, adjuvat nostra mentis obturum, ut (addit libro contra epist. fundam. cap. 2.) ex quântulacumque parte possit intelligi. Legerat quod variis locis repetit Augustinus, Deo, non mentis nostræ studiotribuendum esse verum omne quod loquimur: Magistrum hominis verum non hominem esse, sed Deum, seu æternam, & incommutabilem veritatis lucem, intus lucentem, intus coruscantem, ut quid verum, falsumve sit, dignoscere valeamus: Peccatum superbiæ, propter quod Philosophorū primores in desideria cordis sui traditi sunt, in eo fuisse positum, quod Dei cognitionem se fuisse naturaliter, id est solis intellectus viribus, assequutos arbitrarentur: Veros Christianos publicis Ecclesiæ precibus admoneri, veritatis cognitionem à Deo solo esse petendam, ut & aperiat quod latebat, & suave fiat quod non delectabat. Denique Platonicos hac de causa ceteris esse Philosophis anteponendos, quod ad intelligendam veritatem intellectum nostrum divinitus adjuvandum esse docuerunt, & ut lib. 8. de Civit. cap. 7. ait: *Lumen mentium esse dixerunt ad discenda omnia eundem ipsum Deum, à quo facta sunt omnia.* Hæc, inquam, & alia multa legerat D. Thomas; & ideo ad praxim tam accuratè reducebat.

Quod si ad veritates speculativas sine ullius permixtione erroris dignoscendas divini auxilii naturalis speciali luce indigeat intellectus. humanus ignorantiam post primi parentis lapsum vulneratus, multò magis ad veritates morales intelligendas, easque à falsis veritatis fucata coloribus illitis discernendas. Nam cum omnes Theologi post D. Thomam fateantur, luctuoso primi parentis peccato non solum corpus esse vitiatum, sed magnam funesti vulneris partem in animo impressam fuisse, non video quomodo hanc labem intellectus participaverit, vel quomodo sit primi peccati granditate cæcata, vel obscurata mens, ut Patres conclamant, si inens ad veritatis intelligentiam non obtorpeat. Imò sustinere nullatenus quisquam potest, voluntatem fuisse à summo bono averfam, & in creaturarum, sui que ipsius amorem defluxisse, quin intellectum in veritatibus moralibus discernendis, seu in recto de bonis, malisque rebus iudicio sæpius cespitare fateatur. Cum enim ex corruptione appetitus sensitivi, & voluntatis infirmæ languore tenebræ exoriantur, quibus obscuratus animus ea facile probat, quæ voluntas male diligit, inde fit ut in regulis morum dignoscendis intellectus offusus ex concupiscentia potissimum infusceretur, quia ut aliàs non semel observavimus, rectum de moralibus iudicium appetitum rectum requirit, & talis unusquisque est, ut ait Philosophus, qualis & finis videtur ei. Unde Augustinus *lib. de vera, & falsa pœnit.* veridicè scripsit: *Non potest sentire qua lucis sunt tenebrosa voluntas.* Et tract. 25. in Joan. *Tenebra metuenda sunt, non oculorum; & si oculorum, non exteriorum, sed interiorum, unde discernitur*

cernitur non album, & nigrum; sed justum, & injustum. Vide etiam eundem Patrem in illud Psal. 57. *Supercecidit ignis, & non viderunt Solum.* Ubi ait, quod ignis est concupiscentia, quæ facit ut Sol justitiæ videri nequeat. Et in illud Psal. 35. *Non proposuerunt Deum ante conspectum suum.* Ubi ait, non posse Deum proponere ante conspectum suum eos, ante quorum conspectum non est nisi sæculum.

Et certè ad hanc veritatem comprobendam ipsa experientia satis, superque sufficit; nam præterquam quod innumeras cernimus esse nationes, in quibus patet, quàm sibi relicta ratio ad mali, bonive cognitionem parum valeat; præterquam quod per bis mille, & amplius annos sivit Deus homines infinitis aberrationibus suæ cæcitatæ experimentum capere, *ut convinceretur eorum superbia de defectu scientiæ*, sicut observat S. Thomas in cap. 3. epist. ad Gal. lect. 7. præter illa, inquam, præjudicia convincentia, quis dubitandi locus superesse potest, postquam spectante, & lugente universo Orbe Christiano, intra ipsum catholicæ veritatis sinum sub umbone probabilitatis fruticare vidimus infelicem, & amplam perversorum dogmatum segetem latius proculdubio grassaturam nisi eam Alexander VII. veluti cauterii ustione cohibuisset? Non vacat ea iterum repetere, quæ aliàs dum de probabilitate, fusissimè adduximus, nec eorum doctrinæ flagitiorum catalogum texere, quæ probabilitas opiniosa invexit: sed illud impræsentiarum urgeo, nihil ad nostram de necessitate divini auxilii ad rectum de moribus judicium habendum sententiam confirmandam esse efficacius, quàm incredibilis novitiarum opinio-

num numerus, ad quas referendas sufficit communis sensus, & quibus auditis tota Ecclesia cohorrui, illasque Summus Pontifex pertæsus, publicis censuris prosequutus est. Post adco portentosa laxissimæ doctrinæ flagitia, quis credat volaticam sine gratia duce rationem posse sibi ab erroribus temperare? Initium veræ sapientiæ est sapientiæ suæ diffidere, & in moralibus præsertim consiliis humanæ rationi peccatorum & concupiscentiæ nebulis obscuratæ parum credere, sed divinum lumen jugi oratione invocare, mentis argutias, & probabilitatis colores in obsequium fidei captivare, & ad incorruptos Ecclesiæ, & Sanctorum de moribus sensus opinionationes suas exigere. Utinam ignorantia, & tenebrarum nostrarum, & fœditatis nostræ rectè convinceremur, quia ut Augustinus nomine Dei unicuique nostrum in *Psal. 4.* suggerit: *Si videres te, & displiceret tibi, & placeret mihi; quia verò te non vides, placuisti tibi, displicebis & mihi, & tibi; mihi cum judicaberis; tibi cum ardebis: videbis tunc fœlicitatem tuam, non ut corrigas, sed ut erubescas.* Plura Patrum testimonia longè præclarissima in proximè futura reflectione referemus.

Solutio objectionum.

Sed objicies ex D. Thoma q. 109. art. 1. *Intellectus non indiget ad cognoscendum veritatem in omniis novâ illustratione superadditâ naturali illustrationi, sed in quibusdam qua excedunt naturalem cognitionem.* Ergo ad veritates naturales dignoscendas non indiget homo auxilio speciali, sed solum concursu generali.

Respon

Respondeo S. Doctorem manifestum esse suæ sententiæ interpretem ; excludit namque verbis præfatis auxilium duntaxat supernaturale, vel gratiam habitualement, quam utique necessariam ad veritates naturales habendas non asserimus. Cæterum ibidem necessitatem auxilii divinæ gratiæ, id est gratis dati, admittit his luculentissimis verbis : *Ad cognitionem cujuscumque veri homo indiget auxilio divino, ut intellectus à Deo moveatur ad suum actum.*

Instabis : Intellectus non debet esse deterioris conditionis, quàm sint aliæ formæ naturales, cum sit illis perfectior : sed aliæ formæ naturales cum solo concursu generali efficiunt actus suos, nec ullius egent specialis adjutorii additamento. Ergo idem de intellectu à fortiori dicendum est ; perfectior siquidem forma, sicut est magis ab imperfectione materiæ remotior, ita est ad agendum efficacior ; ac proinde si calor potest cum concursu generali calefacere, oculus videre, auris sonos audire, ita intellectus quascumque veritates naturales speculatione assequi facile quit.

Respondeo hoc argumento, vel potius sophismate probatum iri, voluntatem etiam posse quodcumque bonum honestum operari, nec ullo egere specialis auxilii adjumento, cum non sit forma deterioris conditionis, cum sit perfectioris activitatis, quàm sint formæ naturales, quæ solo concursu generali adjunctæ in suos actus prorumpunt. Et tamen omnes Catholici necessitatem auxilii ad singulos actus bonos, saltem difficiles, contra Pelagianos confitentur : unde patet argumentum factum à veritate aberrare. Dicendum ergo, intellectum non esse deterioris condi-

156. *Lib. VIII. Dissert. II. Cap. I.*

conditionis ; tum quia quamlibet veritatem in particulari cognoscere, quemlibet errorem vitare viribus naturalibus potest, tametsi diu ab errore abstinere non possit : tum quia divini luminis capax est, quo perfusus veritates spirituales & æternas agnosce:re valet. Non est autem deterioris, sed longè melioris conditionis, qui potest perfectiorem actum elicere, tametsi cum auxilio alterius, quàm qui sine auxilio non potest nisi actus inferioris, & longè imperfectioris ordinis operari, ut docet D. Thomas id confirmans præclaro à sanitate petito exemplo, aliàs relato *tom. 1. dissert. 5. cap. 1. spec. 1.* vide ibi *pag. 182, & 183.*

Nec est simile quod dicitur de potentiis, vel formis naturalibus, calore, visu, auditu ; est enim latum, & ferè toto cœlo discrimen : tum quia formæ naturales non sunt ullo vulnere sauciatae, sicut intellectus manet vulnere ignorantia læsus ; unde tam sæpe falsa pro veris approbat. Unde monebat Salvator Luc. 6. *Vide ne lumen, quod in te est, tenebra sint.* Quod potissimum in moralibus contingit ; nam ut dicitur Proverb. 16. *Est via qua videtur homini recta, & novissima ejus ducunt ad mortem.* Cujus præclaram, & multis experimentis, heu nimium ! in hoc probabilitatis sæculo cōrobatam rationem affert S. Ambrosius in Psal. 118. vers. 105. *Multa fovea, multi scopuli in istius sæculi caligine non videntur: ubi putas solidum esse vel siccum, ibi lubricum est.* Alludit ad ignes fatuos, qui nos sæpius in præcipitia dirigunt : sic ratio sæpe venisimilibus malesuadae probabilitatis coloribus, in errorem adducit, nisi sit lucerna pedibus nostris verbum Dei, & lumen semitis nostris. Tum
quia

quia multæ sunt veritates naturales morales, quarum iudicium non à sola intellectus perspicacia, sed etiam ab appetitu recto pendet, ut toties diximus, & variis rationibus totius superioribus communivimus: unde nisi divini luminis splendor affulgeat concupiscentiæ tenebras dispellens, mundanusque affectum, à vero sæpe sapius ratio discedet. Unde præclare Augustinus: *Quod vis videre, mundum est, & immundum est unde vis videre. Prius ergo cogita de corde mundando.*

Alia adversariorum argumenta, quibus probant, lumen intellectus speculativi, vel practici non esse extinctum, nec funditus deletum conscientia & syntereleos motum, cum sit signatum super nos lumen vultus divini, ratione cujus gentes quæ legem non habent, sunt sibi lex, habentque opus legis scriptum in cordibus suis; hæc, inquam, argumenta nihil contra nos efficiunt, cum fateamur intellectum posse aliquas veritates per aliquod breve tempus cum admixtione multorum errorum agnoscere, sed non omnes; imò nec plures, nec nisi post longum tempus, & cum multorum permixtione errorum, ut frequenter dixit S. Thomas, attingere valet.

R E F L E X I O.

Domine, ut videam, da mihi intellectum, ut discam mandata tua: Da mihi intellectum, & scrutabor legem tuam: Intellectum da mihi, & vivam. Ita rogabat cæcus, ita & oculatus rogabat Propheta Regius, & quidem ambo prudentissimè; ille ut videret, iste ut benè videret avertenturque

renturque oculi ipsius, ne viderent vanitatem. Incipiebat cæcus benè videre, dum lumen à Christo petebat : perdiderat David lumen, quod habebat, nisi à Deo donatum, donandumque veritatis intellectum crederet, quia ut præclare in *Psal. 118. vers. 73*. Augustinus : *Non parvi est intellectus eum nosse, à quo poscendus est intellectus.*

Hac veritate persuasus Paulus : *Non sumus*, inquit *2. Corinth. 3. sufficientes cogitare aliquid ex nobis quasi ex nobis, sed sufficientia nostra ex Deo est.* Hinc tenebrarum menti nostræ post primum peccatum offusarum conscius divinum lumen continuis precibus ab eo, à quo omne donum desursum descendit, flagitabat. *Non cessamus*, inquit *Coloss. 1. pro vobis orantes & postulantes, ut impleamini agnitione voluntatis ejus in omni sapientia, & intellectu spiritali ; ut ambuletis dignè, Deo per omnia placentes, & crescentes in scientia Dei.* Hinc Ecclesia, quàm obsecrata, & quasi cæcata sit humanæ mentis intelligentia probè sciens, divinum lumen reveretur, & Sancti spiritus ducatum continenter in omnibus fermè orationibus suis postulat, ut nimirum rationis inconstantia felicissimis divinæ veritatis & legis vinculis ab opinandi libertate compescat. Quidni similiter & tu orabis, dicisque cum Propheta : *Revela oculos meos, & considerabo mirabilia de lege tua ?* cùm teste Augustino *tract. 3. in Ioan.* unde depromptit Concilium Arausicanum can. 9. *Nemo habet de suo, nisi mendacium & peccatum : si quid autem habet homo veritatis, atque justitia, ab illo fonte est, quem debemus siire in hac eremo ?* Quidni iterum, iterum ve gemitibus inenarrabilibus exorabis, ut faciem suam illuminet super servum suum

suum Deus, id est, ut exponit Augustinus, ut suam manifestet subveniēdo & opitulando præsentiam. Si non vis errare, agnosce te multiplici obnoxium esse errori, quia ut præclare dixit Ambrosius in Psal. 118. versu 176. *Non perit qui agnoscit errorem.* Si non vis errare, illum invoca, qui illuminat omnem hominem venientem in hunc mundum, & cum Augustino in *solil. c. 13.* sic precare: *O lux, qua illuminat omnia, simul, semel, & semper absorbe me in charitatis abyssum, ut videam undique te in te, & cuncta sub te.* Pro tuis etiam conscientiae rectoribus, atque pro pastoribus tuis frequentes preces funde, ne cæcus ducaris à cæcis, illudque contingat quod Mag. Gregor. 1. p. *Past. cap. 1.* formidat his verbis: *Pastorum saepe imperitia meritis congruit subditorum, qui quanvis lumen scientia, suâ culpâ exigente, non habeant, districto tamen Dei iudicio agitur, ut per eorum ignorantiam hi etiam, qui sequuntur, offendant.*

SPECULATIO II.

Nullum prorsus etiam moralis ordinis bonum velle, vel efficere absque speciali Dei adjuvantis gratia in statu naturæ lapsæ homo potest; quæ quidem gratia licet fidem communiter præsupponat, non tamen necessario, & multò minùs gratiam habitua-lem, vel charitatem.

HÆc positio, quæ ni fallor germanissimam B. Augustini mentem exprimit, media est inter extremas Authorum sententias. Quidam enim ad quodvis honestatis opus gratiæ habitualis influxum, & charitatis imperium desiderarunt, ut Michaël Baius: Jansenius influxum saltem fidei christianæ necessario exigit: alii ad opera bona moralia concursum Dei duntaxat generalem necessarium esse contendunt, ut Suares, & discipuli Molinæ, quos sequitur noster Baptista Gonet *disput. 7. art. 3. §. 5.* à quibus extremis sententiis cum Augustino, & Doctore Angelico, veteribusque Thomistis nostra assertione recedimus, quæ per singulas partes probanda est.

Prima pars, Dei adjuvantis gratiam ad benè moraliter operandum requirens, non tam vide-
tur

tur veritas theologica, quàm communissima christiænæ pietatis notio, quæ sicut ad opera quævis bona Dei adiutorium rogat, ita necessarium veluti sponte sua credit, & in communi etiam loquendi modo passim fatetur; & meritò. Postquam enim Veritas tam luculenter dixit, Joan. 15. *Sine me nihil potestis facere*: postquam veritatis Apostolus ipsam quoque cogitationem boni, quæ omnis honestatis initium est, donum Dei esse pronuntiavit: *Non sumus*, inquit 2. Cor. 3. *sufficientes cogitare aliquid ex nobis quasi ex nobis, sed sufficientia nostra ex Deo est*; quis est ille tam subtilis Dialecticus, qui aliquid inveniat, ubi Veritas nihil esse definiit? Bonum honestum morale nonne est aliquid? Uti-que aliquid est, cùm bonum sit proprietas entis, & bonitati entis adjiciat etiam bonitatem virtutis & honestatis. Ergo si bonum illud sine Christo est, non verè dixit Veritas, *sine me nihil potestis facere*. Quem locum ponderans Augustinus tract. 81. in Ioan. veridicè inquit: *Sive ergo parum, sive multum sine illo fieri non potest, sine quo nihil fieri potest.*

Huic veritati adstipulantur Summi Pontifices. In primis Zozimus in epistola quam scripsit ad totius orbis Episcopos, hæc habet: *Quod ergo tempus intervenit, quo ejus non egeamus auxilio? In omnibus igitur actibus, causisque, cogitationibusque, & motibus adjutor & protector orandus est; superbum est enim, ut quidquam sibi humana natura presumat.* Atqui si homo posset opera moraliter bona sine Dei adjuvantis gratia exercere, daretur utique tempus, quo Dei non egeremus auxilio, nec in omnibus actibus, causis, cogitationibus, & motibus Deus esset

701

orandus;

orandus ; & quidquam, imò multùm possèt sibi humana natura præsumere, ut per se patet. Ergo ex mente illius Summi Pontificis nullum prorsus opus bonum morale sine gratiæ adjuvantis auxilio velle , vel perficere homo potest.

Idem docet, & inculcat Cælestinus I. in epistola ad Episcopos Galliæ, unde hæc selectiora testimonia depromere brevitatis gratiâ sat erit. Sic ait cap.7. *Nemo nisi per Christum libero benè utitur arbitrio.* Et c.8. *Omnia studia, & omnia opera ac merita Sanctorum ad Dei gloriam, laudemque perferenda sunt, quia nemo ei placet, nisi ex eo, quod ipse donaverit.* Ne autem credatur Pontificem loqui duntaxat de operibus ordinis supernaturalis, addit cap.9. *Ita Deus in cordibus hominum, atque in ipso libero operatur arbitrio, ut sancta cogitatio, omnisque motus bonus voluntatis ex Deo sit, quia per illum aliquid boni possumus, sine quo nihil possumus.* Et c.10. *Utrumque donum Dei est, & scire quod facere debeamus, & diligere ut faciamus.* Atqui per bona opera moralia homo benè utitur libero arbitrio ; per illa etiam quadantenus homo placet Deo, cui omne bonum placet ; quod enim justis hominibus placet, Deo qui iustitia est, displicere non potest ; opus etiam honestum non fit sine sancta cogitatione, & motu bono ; illud etiam dum exercemus, & scimus quid facere debeamus, & diligimus ut faciamus. Ergo ut bonum opus morale velimus, vel faciamus, Dei adjuvantis gratiâ opus est.

Plurima alia possem in medium proferre Summorum Pontificum testimonia, ut Felicis IV. in capitulis ad Arausicanum Cōcilium transmissis: Bonifacii I I. in epistola, quâ præfatum Concilium

lium Arausicanum secundum confirmat. Brevitatis tamen gratiâ ea missa facio, hoc duntaxat Magui Gregorii *hom. 9. in Ezechielem*, oraculo contentus: *Sciendum quod mala nostra solummodò nostra sunt; bona autem nostra ex omnipotentia Dei sunt, & nostra; quia ipse aspirando nos pravenit ut velimus, qui adjuvando subsequitur, ne inaniter velimus; sed possimus implere quod volumus.*

Eandem veritatem sacra Concilia suo calculo comprobarunt, præsertim Carthaginense *canone 4.* à Cœlestino verbis suprâ relatis memorato, & Arausicanum secundum *can. 9.* his verbis: *Divini muneris est, & cum rectè cogitamus, & pedes nostros à falsitate & injustitia continemus; quoties enim bona agimus, Deus in nobis, atque nobiscum ut operemur, operatur.* Et *canone 22.* illa Augustini verba speculatione præcedenti relata consecrat: *Nemo habet de suo, nisi mendacium & peccatum; si quid autem habet homo veritatis atque justitiæ, ab illo fonte est, quem debemus sitire in hac eremo.* Et *can. 2.* *Multa in homine bona fiunt, quæ non facit homo; nulla verò facit homo bona, quæ non Deus præstet ut faciat homo.* Quæ etiam verba ex Augustino *lib. 2. ad Bonifac. cap. 9.* deprompta sunt. Denique variis in Conciliis definitum est, *gratiam Dei necessariam esse ad singulos actus.* Quod & ipse Pelagius, ut Augustinus refert, in Concilio Palæstino fateri coactus est.

Dies me citiùs deficeret, si singula, quæ ex Augustino proferri possunt testimonia producerem, selectiora duntaxat recensebo. *Lib. 12. de peccat. merit. cap. 18.* postquam dixit, voluntatem non posse inter bonum & malum mediam

consistere, sed bonam in omnibus actibus esse, vel malam; bonam, si justitiam diligit; malam, si non diligit, sic concludit: *Voluntas aut bona est, aut mala, & utique malam non habemus ex Deo; restat ut bonam voluntatem habeamus ex Deo.* Ne autem quis dicat S. Doctorem velle duntaxat bonam voluntatem esse ex Deo ut concurrente, non verò ut per gratiam opitulante, hoc effugium præcluserit Doctor sanctissimus capite 17. ejusdem libri, his verbis: *Cum voluntate humana, gratiâ adjuvante divinâ, sine peccato in hac vita possit esse homo, cur non sit, possem facillimè, ac verissimè respondere, quia homines nolunt: sed si ex me queritur, quare nolint, imus in longum. Verumtamen hoc sine præjudicio diligentioris inquisitionis breviter dicam. Nolunt homines facere quod justum est, sive quia latet an justum sit, sive quia non delectat. Tanto enim quidquam vehementius volumus, quanto certius quàm bonum sit, novimus, eoque delectamur ardentius. Ignorantia igitur, & infirmitas vitia sunt, quæ impediunt voluntatem, ne moveatur ad faciendum opus bonum, vel ab opere malo abstinendum. Ut autem innotescat quod latebat, & suave fiat quod non delectabat, gratia Dei est, quæ hominum adjuvat voluntates. Quod & repetit S. Augustinus lib. de Spirit. & lit. cap. 3. Neque liberum arbitrium quidquam nisi ad peccandum valet, si lateat veritatis via; & cum id quod agendum, & quo nitendum est, cœperit non latere, nisi etiam delectet & ametur, non agitur, non suscipitur, non benè vivitur: ut autem non lateat, gratia Dei est; & ut delectet, gratia Dei est.*

Item lib. I. ad Bonifac. cap. 3. *Nec potest homo boni*

boni aliquid velle, nisi adjuvetur ab eo, qui malum non potest veile, hoc est gratia Dei per Iesum Christum Dominum nostrum. Quod & lib. de corrept. & grat. c. 11. inculcat his verbis: *Liberum arbitrium ad malum sufficit, ad bonum autem nihil est, nisi adjuvetur ab omni ipotenti bono.* Augustinum sequuntur ejus discipuli Prosper, Fulgentius, & alii postea adducendi, qui usque adeo hac in parte Augustino adhæserunt, ut etiam influxum fidei ad operis honestatem desiderasse videantur. Vnum jam producam Bernardum acerrimum Augustini de gratia sententiæ ubique sectatorem. Sic habet serm. 1. de Annunc. *Certum est ad suam originem universa, quantum in eis est tendere, & in eam semper esse partem procliviora: sic & nos, qui de nihilo creati sumus, constat quia si nobis ipsis relinquimur, in peccatum semper, quod nihil est, labimur.* D. etiam Thomas apertissimè huic doctrinæ suffragatur; nam articulo secundo explicans quænam bona opera possit homo per virtutem suæ naturæ efficere, ait ea posse sine auxilio gratiæ elicere, quæ ad naturæ commoditatem, vel externam Reipublicæ commoditatem ordinantur, putà *adificare domos, & plantare vineas.* Porro ad opera virtutis & honestatis moralis omninò auxilium gratiæ exigit in statu naturæ corruptæ, 2. 2. q. 136. art. 3. ad 2. *Bonum politica virtutis, inquit, commensuratum est naturæ humanæ, & ideo absque auxilio gratiæ gratum facientis potest voluntas humana in illud tendere, licet non absque auxilio gratiæ Dei.* Dicere verò S. Doctorem loqui ibi de concursu duntaxat generali, est manifestè textui contradicere, & vim clarissimis verbis inferre, cum Doctor Angelicus seipsum interpretetur
dicens

dicens, se per gratiam non intelligere gratiam gratum facientem, sed auxilium gratiæ; concursus autem generalis non est auxilium gratiæ, seu non est membrum dividens gratiam ut sic, quæ secatur in gratum facientem, & auxiliantem. Quam doctrinam repetit q.24. de verit. art.14. his luculentissimis verbis : *Si gratiam Dei vultimus dicere non aliquod habituale donum, sed ipsam misericordiam Dei, per quam interius motum mentis operatur, sic nec ullum bonum hominipotest facere sine gratia Dei.* Nomine autem misericordiæ non intelligitur concursus generalis, sed gratia specialis. Quanvis enim in omni opere Dei, etiam creationis, reluceat Dei misericordia, juxta illud Psal.24. *Universa via Domini misericordia & veritas,* quod præclare explicat S.Thomas 1.p. q.21. art.4. attamen cum de auxilio divino est sermo, nomen misericordiæ non attribuit Doctor accuratissimus nisi auxilio gratiæ præservantis à miseria peccati, ratione cujus auxilii Deus cujus vult miseretur; aliàs si auxilium gratiæ Dei diceretur misericordia, propter illam generalissimam rationem ex 1.parte, q.21. citata deductam, posset etiam dici, Deum ex justitia adjuvare hominem ad bonum, quia in omni opere, sicut misericordia, ita & justitia invenitur. Quare locum præfatum questionis de Veritate per illam generalem doctrinam 1. partis, q.21. interpretari, est doctrinâ S. Thomæ abuti.

Innumeras adducunt rationes Theologi nostræ sententiæ defensores, quæ vel nimium, vel non satis probant. Illud tamen fatendum, rationes pro præcedenti speculatione stabilienda allatas præsentī assertioni non parum favere.

Etenim

Etenim non minùs ad bonum agendum gratiam Dei rogamus , quàm ad veritates dignoscendas,quin & multò magis ; nam omnes actiones nostras divina gratia aspirante præveniri , & ad justitiam , nedum perficiendam , & opere complendam, sed etiam optandam divinitus adjuvari universa petit Ecclesia , quæ & pro singulis bonis actis operibus gratias agit. Nihil autem in Augustini doctrina fundatius, quàm orationem, gratiarumque actionem divinæ esse gratiæ clarissimam significationem. Pro concursu autem generali Ecclesia tam jugiter , & continenter non oraret. Quavis enim Ecclesia interdum pro bonis naturalibus , pluviâ, fructibus , sanitate , aliisque hujusmodi obtinendis preces fundat , eas tamen duntaxat orationes frequentat quando vel ob aëris inclementiam, vel corporis infirmitatem compellitur, citra quas occasiones temporalia illa non tam studiosè petit Ecclesia solius æternitatis candidata. Verùm actus bonos, pietatis opera , spiritum cogitandi quæ recta sunt , rationabilia meditandi , bona dictis exequendi & factis , bona nutriendi, & pietatis studio quæ sunt nutrita custodiendi, in omnibus fermè collectis Ecclesia exorat.

Non potest autem dici, Ecclesiam bona opera moralia, prout duntaxat conducunt ad salutem, postulare : non potest , inquam , dici ; tum quia sic facilè omnia enervarentur Augustini argumenta ex oratione petita, & in promptu fuisset responsio , quâ Pelagiani omnia illa adversum se molimina eludere absque negotio potuissent, dicendo Ecclesiam gratiam Christi non nisi ad merendum vitam æternam postulare ; vel quia concursus Dei est aliquid contingens & fallibile

le

le, ideo illum sicut pluviam postulamus. Ergo illa adversariorum solutione Augustiniana doctrina ab imis subruitur fundamentis, nec quidquam adversarii proferunt, quod non libentissimè Pelagiani arripuissent. Tum quia omnia pietatis opera nullâ peccati labe sordidata, tametsi naturalia sint, nec proximè conducant ad salutem, remotè tamen ad illam disponunt, quatenus removent impedimenta salutis: Ergo si illa possit homo ex viribus naturæ operari, vincent Semipelagiani, qui nihil aliud volebant, quàm dari in nobis bona salutis initia, non utique supernaturalia (non enim erant sic stupidi viri, quorum eximiam sapientiam laudat Prosper in sua ad Augustinum epistola,) sed naturalia, putà desiderium conversionis, amorem honestatis, & alia facilia. Quin etiam in hoc Semipelagianus error videtur esse rationi conformior Adversariorum sententiâ (absit verbo injuria, non enim Adversariorum sententiam censurâ afficere intendo, sed vim consequentiæ urgeo,) quòd cum utrique hominem lapsum per vires solius liberi arbitrii absque ulla Dei opitulantis gratia posse aliqua bona opera efficere contestentur, Adversarii tamen nolunt ea conducere ad salutem, nec placere Deo, nec esse initia, quæ Deus veluti ansas apprehendat. Cum enim Deus talis sit, ut egregiè opusculo de moribus divinis ait D. Thomas, *cui omne bonum placet*, quidni ei placebit bonum opus honestum, labisque purum? Et sicut aliàs dicebamus, si bona est argumentatio Prosperi contra Collatorem: *Neque enim ullius meriti haberi potest petentis fides, quarètis pietas, pulsantis industria*; cur similes dicere non licebit: Nullius meriti esse non potest.

potest bonum opus honestum, bonus usus liberi arbitrii ex naturæ viribus proficiscens, atque illa bonæ voluntatis initia sese per opera facilia explicantis repudiare nequit Deus, cui omne bonum pergratum est.

Ratio fundamentalis hujus asserti sic formatur. Voluntas hominis in statu naturæ lapsæ nedum est ad bonum & malum indifferens, sed etiam magis est ad malum, quàm ad bonum propensa, ratione cujus propensionis non solum non curant homines peccatum fugere, sed etiam peccati miseriam delectantur, seu ut eleganter ait Prosper cap. 33. de ingratis, *tantum nocet error, ut juvet errare, & veteris contagia morbi tam blandè obrepunt, ut quo languetur, ametur.* Sed potissimum amor sui ita omnia in se reflectit, ut semper quæ sua sunt vel apertè, vel latenter querat, ut meritò dixerit Joannes, quidquid est in mundo, aut esse concupiscentiam carnis, aut concupiscentiam oculorum, aut superbiam vitæ. Ergo ut honestum, quia honestum est, puiè & propter Deum, sin formaliter, certè virtualiter, uti tenetur diligat, opus est gratiâ inclinâte, cordis affectus erigente, & amorem honesti castum inseminante. Antecedens est evidens, nec ab ullo, ut reor, Christiano negari potest. Consequentia verò probatur. Tum quia voluntas eodem modo prosequitur objectum, quo afficitur circa illud, id est dominanti propensioni semper obsequitur, quo sensu dixit Augustinus: *Quod enim magis nos delectet, & unde in illud operemur necesse est.* Quod utique non de necessitate absoluta, sed de necessitate infallibilitatis verum est, ut sit sensus, quod licet voluntas possit majoribus suis inclinationibus obistere, nun-

quam tamen obſiſtet , quia nunquam obſiſtere
 volet ; quomodo enim non volet quod magis
 amat ? Ergo cùm in ſtatu naturæ lapſæ voluntas
 ſuapte propenſione magis feratur in utilia , de-
 lectabilia , & in bonum proprium , quàm in bo-
 num honeſtum & divinum , ſemper in exercitio
 opera etiam ex officio bona in ſe reflectet , & re-
 flectendo inficiet , nec ad Deum referet , niſi in-
 dito à gratia honeſti , Deique amore reformetur.
 Tum quia , juxta Philoſophorum receptiſſimam
 ſententiam , quam ipſe Gonet *tract. de actibus*
human. diſp. 9. art. 3. fuſè defendit , licèt volun-
 tas poſſit reſpuere , & ſæpe reſpuat id , quod in-
 tellectus judicat ſpeculativè melius , ſi minus bo-
 num , minusque amabile convenientius hîc &
 nunc appareat ; attamen illud quod per judicium
 practicum hîc & nunc apprehenditur , melius ſal-
 tem apparenter voluntatem ad ſe rapit ; quia
 cùm voluntas ſit potentia cæca , ductum judicii
 ſequitur , ac proinde cùm intellectus non judicet
 minus bonum eſſe præferendum convenientio-
 ri , nec plures illecebras detegat in bono minùs
 convenienti , quas voluntati alliciendæ offerat ,
 conſequens eſt , voluntatem licèt poſſit minus
 bonum repudiare , nunquam tamen repudiare ,
 donec in objecto , quod apparet minùs conve-
 niens , incipiat relucere major bonitas , quæ al-
 liciat & inſcet appetitum . Atqui in ſtatu cor-
 ruptionis , in quo degimus , bonum ſenſibile &
 delectabile , bonumque proprium apparent vo-
 luntati corruptæ convenientiora ; voluntas enim
 à ſummo bono averſa in creaturatum , ſuique
 ipſius amorem deflexit : intellectus etiam pra-
 cticus offuſis ſibi ex concupiſcentia tenebris , bo-
 num proprium hîc & nunc ſemper judicat con-
 venientius ,

venientius, ut speculatione præcedenti demonstratum fuit: ergo ut præponderet amor honestatis, alia debet cordi nostro affecto per gratiam indi, ut bonum morale absque ulla peccati sorde operemur.

Hanc rationem ubique Patres urgent, dum asserunt, concupiscentiam inficere omnia nostra opera, quantumvis ex officio, objectoque bona, dum inculcant profectum spiritalem in diminutione cupiditatis situm esse; tunc verò cupiditatem imminui, dum amor Dei crescit. *Fosicimus in hac vita*, inquit Augustinus, *deficiente cupiditate, crescente charitate; perficiemur in altera cupiditate extincta, charitate completa*. Hinc viri sancti ad mortem tanquam ad finem peccatorum, & concupiscentiæ exterminium tantoperè suspirant, & ut loquitur Magnus Augustinus, *patienter vivunt, & delectabiliter moriuntur; & non amant vitam, sed corrumpunt*. Quia nimirum amor sui, sive cupiditas omnia etiam bona in se refert, & referendo sordidat, dum quæ sua sunt quærit, non quæ Jesu Christi. *Duo amores sunt* (inquit Magnus Leo serm. 9. de jejun. 7. mensis,) *ex quibus prodeunt omnes volūtates ita diversa qualitatibus, sicut dividuntur authoribus. Rationabilis etenim animus, qui sine dilectione esse non potest, aut Dei amator est, aut mundi: in dilectione Dei nulla nimis, in dilectione autem mundi cuncta sunt noxia*. Quia ergo quotiescūque homo agit ex amore mundi, vel ex amore Dei, sin perfectō, certè imperfecto agit, proculdubio ut benè agat, ut non peccet, ut ex amore Dei cupiditatem vincente agat, gratiâ Dei eget, quia natura sibi relicta non nisi propter se, amore sui, amore

mundi, amore cupiditatis agere potest, ac proinde licet à peccato abstinere possit, peccat tamen, quia peccare magis amat: quod egregiè explicat S. Prosper cap. 27. de ingratis.

——— *Manet ergo voluntas*

*Semper amans aliquid, quò se ferat, & labyrintho
Ex'litur, ambages labyrin'rum ingressa viarum
Vana cupit, vanis tu net, & timet, inqumodaque
Mobilitate ruens in vulnere vulnere surgit.
Quos versus sic gallicè eximius Poëta Gallicus
expressit:*

*Ainsi la volonté dans ses tours & retours
Porte de toutes parts ses differens amours;
Et comme en un Dedale errante & vagabonde
Va d'objet en objet par les faux biens du monde.
Vaine dans ses frayeurs, vaine dans ses desirs,
Vaine dans son orgueil, vaine dans ses plaisirs.
Elle tombe, & tombant sa superbe foiblesse
S'élève encor sans cesse, & sans cesse se blesse.*

Hinc Sancti, & inter Sanctos lumina sanctitatis ipsos etiam verentur pietatis affectus, qui: cum ab actibus veræ charitatis in hujus vita caligine internosci non possint, timent ne conatus humani ab amore sui oriantur, ac proinde vitiosi sint; quia etsi motus ab amore proprio proficiscentes longè & ferè immensum minus mali sint quàm scelera illa, quibus impii se dedunt; mali tamen sunt, quia quod absque vel minime peccato non est, per unum bonum minimè est, ut dixit alicubi Bernardus. Sancti viri, inquit Magn. Gregor. lib. 5. Moral. cap. 6. cum mala superant, sua etiam benè gesta forroйдant, ne cum bona agere appetunt, de actionis imagine fallantur; ne pestifera labes putredinis sub boni specie late accoloris: sciunt enim quia corruptionis ad-

que

huc pondere gravati dijudicare bona subtiliter nesciunt, & cum ante oculos extremi examinis regulam deducant, hac ipsa in se nonnunquam & qua approbant metuunt, & tota quidem mente interna desiderant; sed tamen de incertitudine operum trepidi, quò gradiuntur ignorant. Hanc etiam latentis concupiscentiæ fraudem gemebundus deplorat Augustinus lib. 10. confess. c. 37. Multum vereor occulta mea quæ norunt oculi tui, mei autem non. Tu nosti de hac re, ad te gemitum cordis mei, & flumina oculorum meorum. Quin à capite 28. usque ad finem illius libri per quindecim capita hujus vitæ, in qua nihil securum est, miseriam deplorat Doctor sanctissimus, quia in hac tam immensa sylva plena insidiarum & periculorum, post innumera præcisa virgulta iniquitatis, & nova germinant, & putata repullulant. Nam cõtendunt mœrores mali cum gaudiis bonis, & ex qua parte stet victima nescimus, quia non sumus concupiscentiæ visco expediti. In cibo etiam moderato insidiatur nobis laqueus concupiscentiæ; & cùm salus sit causa edendi & bibendi, adjungit se tanquam pedissequa periculosa jucunditas, & plerumque præire conatur, ut obtentu salutis obumbrat negotium voluptatis. In aliis etiam operibus vana delectatio nos fallit, sunt enim & istæ plangendæ tenebræ, in quibus nos latet facultas nostra, quæ in nobis est; & nemo securus esse debet in ista vita, quæ tota tentatio nominatur. Sed quid dicam de concupiscentia oculorum, seu curiositate cognoscendi multipliciùs periculosa? Quid de superbia & laudis amore? Quid de avaritia? Vide ibi Augustinum præfata omnia plangentem, & tandem concluden-

tem: *In his omnibus, atque huiusmodi periculis, & laboribus vides tremorem cordis mei.* Si ergo Sancti illi divino lumine pleni, & abundantiam divinæ suavitatis eructantes opera sua sanctiora verentur, ne à latente concupiscentia (quæ ut benè dixit S. Franciscus Salesius, est primum vivens, & ultimum moriens) inficiantur, quis credat opera non à gratiæ auxilio orta esse bona? cum testante universa Catholica Ecclesia, sine Spiritu sancto non modò nihil bonum sit, sed planè nihil innoxium: *Sine tuo numine nihil est in homine, nihil est innoxium.*

Fides ad bona opera communiter, non tamen indispensabiliter, & essentialiter est necessaria.

Secunda pars affirmans, fidem esse ad bona opera communiter & ordinariè necessariam, evidentissimè traditur infinitis in locis Augustini, quibus brevitate gratiæ omisissis, illa longè manifestissima verba proferre sat erit, quæ *lib. 4. contra Iulian. cap. 3. & sequentibus* habet, quia ibi materiem istam ex professo pertractans, quidquid dici præclarissimè potest, exhaustit; quidquid ab Adversariis responderi valet, occupavit. *Noveris itaque (inquit) non officiis, sed finibus à vitiis discernèdas esse virtutes. Officium autem est, quod faciendum est. Cum itaque facis homo aliquid ubi peccare non videtur, si non propter hoc facit, propter quod facere debet, peccare convincitur.* Et quia statim responderi posset, homines etiam sine fide posse operari bona ex officio propter bonum finem, nempe honestatem,

tem, tametsi ea propter Deum non efficiant, sic contrà arguit Augustinus: *Absit ut virtutes vera cuiquam serviant, nisi illi, vel propter illum, cui dicimus: Deus virtutum cōverte nos. Proinde virtutes, quæ carnalibus delectationibus, vel quibusque commodis & emolumentis temporalibus serviunt, vera prorsus esse non possunt. Quæ autē nulli rei servire volunt, nec ipsa vera sunt; vera quippe virtutes Deo serviūt in hominibus, à quo donantur hominibus; Deo serviunt in Angelis, à quo donantur & Angelis. Quod totum sic exemplo illustrat: Possunt aliqua bona fieri non benè facientibus, à quibus fiunt; bonum est enim ut subveniatur homini periclitanti, præsertim innocenti: sed ille qui hoc facit si amando gloriam hominum magis quàm Dei facit, non benè bonum facit, quia non bonus facit, quod non bona voluntate facit. Absit enim ut sit, vel dicatur voluntas bona, quæ in aliis, vel in seipsa, non in Domino gloriatur. Quare censet infideles etiam illos, qui bona aliqua fecisse perhibentur, eo ipso peccare, quod opera illa per se laudabilia ad Deum non referunt; cum quibus stat, longè minùs peccare, qui in operibus per se honestis se exercent, quàm qui flagitiosis duntaxat operam dant. Unde minùs Fabricius quàm Catilina peccavit, minùsque punietur, non quia Fabricius bonus fuerit, bonaque benè fecerit, sed quia Catilina peior fuit; non veras virtutes habendo, sed à veris virtutibus non plurimùm deviando, addit ibidem Augustinus.*

Ratio autem hujus partis traditur ibidem ab Augustino, quia quidquid homo facit, ex amore alicujus finis ultimi facit, cùm finis ultimus se habeat in operabilibus sicut primum principium

in speculabilibus, juxta maximam à S. Thoma
 tam crebrò inculcatam. Ergo cùm infidelis
 agit, vel agit ex fine infidelitatis, putà ex amore
 falsæ divinitatis; vel sistit in fine operis, putà
 in honestate misericordiæ: quidquid autem fa-
 ciat, peccatum ordinariè non effugiet. Et qui-
 dem si ex fine infidelitatis, atque ex amore fal-
 sæ divinitatis operatur, manifestum est, ipsum in
 peccatum prolabi; nam sicut falsum Deum ado-
 rare, ita & propter illum operari, illique actio-
 num per se honestarum thus adolere impium
 est & sacrilegum. Si autem infidelis in fine ope-
 ris sistit, peccatum non fugit: tum quia virtuali-
 ter ordinat omnia opera in præintentum infide-
 litatis suæ finem; intentio enim finis tandiu
 moraliter perseverat, quandiu per actum oppo-
 situm non revocatur: tum quia etsi opera bona
 in finem illum pravum virtualiter non referat,
 sicut non refert justus peccata venialia in Deum,
 quia sicut ista sunt præter verum Deum, ita for-
 tassis illa præter Deum falsum; attamen volun-
 tas eo ipso, quod in operis honestate civili sistit,
 peccat peccatò omissionis, opus suum in Deum
 verum minimè referendo, quia ut docet August.
*in finit in locis, omnia bona hominis in summum
 bonum referenda sunt. Imò lib. 19. de Civit. c. 15.*
asserit, quod virtutes dum propter se appetuntur,
superba vii sunt. Unde tunc in illo opere con-
 tingit mixtura boni & mali, quam dum de mo-
 ralitate, operosè exposuimus. Et in hoc sensu
 explicat Augustinus omne quod non est ex fide
 peccatū esse, quia qui non agit ex fide, non so-
 let de bonis operibus in Domino gloriari. *Pro-
 fus, inquit, operire nudum, in quantum non est
 ex fide, peccatum est, non quia per se ipsum
 factum,*

factum, quod est nudum operire, peccatum est; sed de tali opere non in Domino gloriari, solus impius negat esse peccatum.

Magistrum Augustinum sequuntur celeberrimi Discipuli, ejusque rationem confirmant, tum Fulgentius lib. 1. de verit. prædest. capite 18. Priusquam accipiat (voluntas hominis) fidem, punitionem per seipsam potest mereri, non fidem; omne enim quod non est ex fide, peccatum est, & sine fide impossibile est placere Deo: qui autem Deo non placet, sine dubio displicet; & qui Deo displicet, non eum mitigat, sed potius exacerbat. Et lib. 2. cap. 5. Deo non placemus, nisi velimus; sed ab ipso nobis tribuitur ut velimus, à quo nisi voluntas hominis mutetur ut bona sit, aut semper appetit malum, aut nunquam appetit bonum: ac sic dum in rebus bonis rectum ordinem non tenet, Deo vero, & bono nullatenus placet. Tum Venerabilis Beda in cap. 14. epist. ad Rom. Omnis infidelium vita peccatum est, & nihil bonum sine summo bono; ubi enim deest cognitio aeterna, & incommutabilis veritatis, falsa virtus est etiam in optimis moribus. Tum S. Prudentius adversus Ioannem Scotum cap. 4. tum Lupus Servatus lib. de tribus questionibus, q. 1. tum Lupus Ferrariensis in collectaneo, quest. 2. Sed omnium limpidissimè S. Rhemigius, & Ecclesia Lugdunensis lib. de tribus epist. cap. 22. Verè mortua sunt omnia opera infidelium, non solum quando apertè vitis, & peccatis serviunt, sed etiam quando naturali bono, in quantum omnipotens Creator tribuit, instigati, vel naturali lege commoniti, quadam bona opera, & velut quasdam virtutes habere, atque exercere videntur; quia fidem Dei & Christi ejus vel ignorantes, vel odio habentes, aut etiam persequentur, quod ex illa fide non operantur.

omninò nec bonum opus, nec vera virtus esse potest, qua non procedit ex radice veritatis, & bonitatis. Dum enim illa ipsa, qua secundum homines videntur esse bona opera, nequaquam vera fide ad Dominum referuntur, quem ignorant, nec propter eum agunt, sed propter aut quandam honestatem, quã inter homines magni videntur, vel propter cupiditatem alicujus commodi temporalis, ipsa impietate infidelitatis, ipsa inflatione elationis, ipsa perversitate cupiditatis ita immunda, & inquinata sunt omnia, ut apud Deum non virtutes, sed vitia judicentur. Et in lib. de tenend. veritate Script. cap. 10. Habent itaque omnes homines, etiam qui alieni sunt à Christo, liberum arbitrium, sed tale quale isti Patres ostendunt, id est in pravicatione Adæ infirmatum, naturali possibilitate & innocentia spoliatum, sipe Christo nullo bono usui aptum. Habent naturaliter insitum arbitrium voluntatis, ut eodem arbitrio possint velle mala, possint velle etiam quadam bona, sed humana affectione ad humanam societatem, atque honestatem pertinentia, quæ eadem humana affectione, vel propter aliqua temporalia commoda appetuntur, vel propter ipsam solummodò vitæ honestatem: sed hujusmodi humana bona, quæ humana affectio potest velle, potest etiam nonnunquam agere humana natura; cum propter temporalia bona appetuntur, sine dubio cupiditates sunt; cum propter solam vitæ honestatem, sine dubio inflata, & elata sunt. Quæ verba admodò plana sunt, ut expensione obscurari potius quàm elucidari possint.

Denique D. Prosper multis in locis divini Præceptoris mentem expressit. Videri potest
epist.

epist. ad Rufinum, cap. 7. & libr. de vocat. Gent. cap. 6. & 7. ubi expressè ait: *Etiamsi in bonis moribus homo agat, malè adhuc vivit, si non in Dei gloriam vivit. Sine cultu Dei, etiam quod virtus videtur esse, peccatum est, nec placere ullus Deo sine Deo potest: qui verò Deo non placet, cui nisi sibi, & diabolo placet?* Et carmine de ingra. is, cap. 16. sic modulatissimè pagit:

*Omne etenim probitatis opus, nisi semine vera
Exoritur fidei, peccatum est, inque reatum
Vertitur, & sterilis cumulat sibi gloria pœ-
nam.*

Nec potest responderi, Augustinum, ejusque sanctos discipulos laudatos accepisse nomen peccati in lata, & minùs propriè dicta significatione, nimirum pro actu ad vitam æternam sterili, & in malo vitiatæ conscientiæ statu elicitò. Non potest, inquam, hoc effugio tot testimoniorum splendor obscurari: tum quia Patres recensiti ad eam quam astruunt sententiam confirmandam, Paulinum illud usurpant, *Omne quod non est ex fide, peccatum est*; unde in eodem sensu nomen peccati accipiunt, in quo nomen illud Apostolus accepit. Nemo autem hætenus dubitavit, nomen peccati in stricta acceptione fuisse usurpatum. Licèt enim dissentiant Interpretes in explicanda illa particula (quod non est ex fide) aliis per fidem conscientiam intelligentibus, aliis veram fidem sine qua impossibile est placere Deo, significari cum Augustino volentibus, aliis de conscientia quam dirigit fides, cum S. Thoma ubique Augustino indivulsè adhærente accipientibus, concors tamen sententia peccatum propriè dictum intellexisse Apostolum credit, & patet ex verbis præcedentibus,

ubi agit Paulus de actione manducandi contra conscientiam fide directam facta, quam utique peccatum esse actuale nemo ambigit. Tum quia Julianus, contra quem disputabat Augustinus, minimè inficiabatur opera illa fieri in statu vitioso; quin oppositum asseveranter significabat, dicens opera illa esse sterilia: Ergo aliquid aliud prætendit Augustinus. Legesit S. Doctorem in fonte, & veritate coactus fatebere, voluisse illum omnia illa quæ infidelibus fiunt speciosæ pietatis opera, vel pravæ intentionis labe, vel rectæ saltem ordinationis privatione sordere; ita ut vel nihil unquam ab Augustino perspicuè dictum credendum sit, si hac in parte tenebras in ejus doctrina per se nitentissima comminiscamur. De mente Sancti Thomæ postea patebit.

Tertia pars quæ asserit, fidem nihilominus non esse essentialiter, & indispensabiliter ad bona opera necessariam, suadetur tum ratione, tum ex doctrina Augustini. Ex ratione quidem; nam ideo infideles ordinariè peccant, quia vel opera sua ex officio bona in prævum infidelitatis suæ finem referunt, vel saltem in verum finem Deum, quem ignorant, referre omittunt: atqui per auxilium divinæ gratiæ, sicut verum Deum cognoscere possunt, ita in illum opus bonum quod eliciunt, referre; eadem quippe auxiliante gratiâ, quâ Creatorem cognoscunt, possunt etiam in ejus obsequium opus per se honestum referre; & tamen nondum habent fidem. Ergo etiam si ad quodvis bonum opus requiratur gratiæ Dei opitulantis adjutorium, non tamen fidei christianæ lux. Unde hæretici etiam si infideles sunt, utpote fidem infusam, & christianam

stianam minimè habentes, cum auxilio Dei moventis aliquod opus honestum in Deum, vel Christum, quem fide humana credunt, tam benè referre possunt, quàm Pagani referunt in idolum. Accedit, quod ideo ex Augustino & Patribus recensitis infideles omnia opera sua etiam ex objecto bona inficiunt, quia cupiditate moventē ea efficere solent: atqui motum cupiditatis corrigere potest auxilium gratiæ moventis, & in Creatoris honorem referentis opus, quod homo sibi relictus in finem creatum, vel in se ordinare proclivis est: ergo ante fidem per gratiam Dei actualem infideles posse aliquod bonum morale operari perspicuum est. Præsertim quia cupiditatis motus non sola reformat fides, cum multi sint fideles variis in scelerum maculis inquinati: ergo illud in eis auxilium gratiæ operatur: ergo idem operari potest auxilium gratiæ in infidelibus Christi fide carentibus, Deum tamen verum, seu primum rerum principium lumine naturali divinitus adjuti cognoscentibus. Quamobrem Augustinus, ideo peccata ait esse infidelium opera, quia non ex amore Dei, sed ex amore sui; non ex amore Creatoris, sed ex amore creaturæ proficiscuntur: amor autem creaturæ peræquè, imò sæpè intensiùs viget in peccatore fideli, quàm in infideli: ergo amorem illum auxilium gratiæ adjuvantis erigit, nec ad hoc necessariò exigitur fides, quæ sola talem sine gratia non confert rectitudinem voluntati. Quod si contendas, Augustinum non accipere fidem strictè pro cognitione supernaturali Deo secreta sua per Ecclesiam revelanti credere, sed pro cognitione veri Dei, ita ut per infidelem intelligat homi

cumque fidem ad bonum opus exigit, sed fidem, quæ per dilectionem operatur, quæ utique in peccatore Christiano minime invenitur. Verba Augustini sunt hæc: *Disce eum, qui non facit opera bona intentione fidei bona, hoc est ejus que per dilectionem operatur, totum quasi corpus illud quod velut membris operibus constat, tenebrosus esse, hoc est plenum nigredine peccatorum.* Idem docet sexcentis aliis locis, præsertim libro de grat. Christi, cap. 26. *Quid boni faceremus, nisi diligeremus; aut quomodo bonum non facimus, si diligamus. Et si enim Dei mandatum videtur aliquando à diligentibus, sed à timentibus fieri; tamen ubi non est dilectio, nullum bonum opus imputatur, nec rectè bonum opus vocatur, quia omne quod non est ex fide, peccatum est.* Vides Augustinum illud Apostolicum, *omne quod non est ex fide, peccatum est*, de fide per charitatem operante intelligere; & tamen adversarii non influxum charitatis, sed solius fidei ad bonum opus necessariò exigunt. Ergo aliquo tenentur Augustinum interpretamento explicare.

Quare vera Augustini mens est, opera quævis sine auxilio gratiæ facta esse peccata, sive in infidelibus, sive in fidelibus; quia opera in Deum non ordinata proculdubio peccata sunt, quem ordinem ad Deum sola auxilii divini cupiditatem reformantis gratia confert. Et quia infideles opera sua ad Deum verum referre non solent, quippe qui verum Deum non norunt, proculdubio opera infidelium sunt ordinariè peccata; non tamen opera fidelis peccatoris, qui licet charitate perfecta Deum super omnia ex toto corde diligente careat, habet tamen fidem
quâ

quâ illustratus, & auxilio Dei lumini fidei con-
naturaliter correspondente robotatus, in Deum
non dum summè dilectum opus referre potest,
& sic boni sunt omnes pii motus justificatio-
nem præcedentes, tametsi non à charitate per-
fecta proficiscentes. Quia tamen nihil vetat,
Deum infideli Creatoris notitiam impertiri,
nihil etiam vetat in illum infideles opera sua
aliquando saltem referre; relinquitur opera in-
fideliū non esse necessariò peccata, etiamsi
fides non influat. Unde Augustinus *lib. citato
de spiritu & litera*, postquam dixit multa infi-
deliū opera esse ex officio non solū non
vituperanda, sed etiam meritò, rectèque lau-
danda, subjungit: *Quaquam si discutiatur
quo sine fiant, vix inveniuntur, quæ justitia de-
bitam laudem, defensionemve mereantur.* Si
vix inveniuntur, ergo aliquando inveniri cum
adjutorio gratiæ possunt. Dicere autem Augu-
stinum ibi non ex propria, fixaque sententia lo-
qui, sed per modum disputantis, ut quidam do-
ctus recentior putat, est Patres prout volumus
interpretari, in omnemque sensum opportunè
importunè flectere.

In probanda ultima speculationis parte im-
morandum non est; si enim fides non necessa-
riò exigitur ad operis rectitudinem, multò mi-
nùs gratiæ, & charitatis influxus desideratur,
aliàs omnia peccatorum opera essent scelera,
etiam pii illi motus justificationem præcedētes:
quod Tridentinum *sess. 6. can. 7.* damnat. Et
ratio est clara, quia homo peccator, seu in pec-
cato mortali constitutus, potest cum Dei adju-
torio opus bonum ex objecto & fine operari:
ex objecto quidem, quia ut rectè ait D. Thomas
suprà

tem: *In his omnibus, atque hujusmodi periculis, & laboribus vides tremorem cordis mei.* Si ergo Sancti illi divino lumine pleni, & abundantiam divinæ suavitatis eructantes opera sua sanctiora verentur, ne à latente concupiscentia (quæ ut benè dixit S. Franciscus Salesius, est primum vivens, & ultimum moriens) inficiantur, quis credat opera non à gratiæ auxilio orta esse bona? cum testante universa Catholica Ecclesia, sine Spiritu sancto non modò nihil bonum sit, sed planè nihil innoxium: *Sine tuo numine nihil est in homine, nihil est innoxium.*

Fides ad bona opera communiter, non tamen indispensabiliter, & essentialiter est necessaria.

Secunda pars affirmans, fidem esse ad bona opera communiter & ordinariè necessariam, evidentissimè traditur infinitis in locis Augustini, quibus brevitate gratiâ omiſſis, illa longè manifestissima verba proferre sat erit, quæ *lib. 4. contra Julian. cap. 3. & sequentibus* habet, quia ibi materiem istam ex professo pertractans, quidquid dici præclarissimè potest, exhaustit; quidquid ab Adversariis responderi valet, occupavit. *Novèris itaque (inquit) non officiis, sed finibus à vitiis discernèdas esse virtutes. Officium autem est, quod faciendum est. Cum itaque facit homo aliquid ubi peccare non videatur, si non propter hoc facit, propter quod facere debet, peccare convincitur.* Et quia statim responderi posset, homines etiam sine fide posse operari bona ex officio propter bonum finem, nempe honestatem,

tem, tamen ea propter Deum non efficiant, sic contrà arguit Augustinus: *Absit ut virtutes vere cuiquam serviant, nisi illi, vel propter illum, cui dicimus: Deus virtutum cōverte nos. Proinde virtutes, quæ carnalibus delectationibus, vel quibusque commodis & emolumentis temporalibus serviunt, vera prorsus esse non possunt. Quæ autē nulli rei servire volunt, nec ipsa vera sunt; vera quippe virtutes Deo serviūt in hominibus, à quo donantur hominibus; Deo serviunt in Angelis, à quo donantur & Angelis. Quod totum sic exemplo illustrat: Possunt aliqua bona fieri non benè facientibus, à quibus fiunt; bonum est enim ut subveniatur homini periclitanti, præsertim innocenti: sed ille qui hoc facit si amando gloriam hominum magis quàm Dei facit, non benè bonum facit, quia non bonus facit, quod non bona voluntate facit. Absit enim ut sit, vel dicatur voluntas bona, quæ in aliis, vel in seipsa, non in Domino gloriatur. Quare censet infideles etiam illos, qui bona aliqua fecisse perhibentur, eo ipso peccare, quod opera illa per se laudabilia ad Deum non referunt; cum quibus stat, longè minùs peccare, qui in operibus per se honestis se exercent, quàm qui flagitiosis duntaxat operam dant. Unde minùs Fabricius quàm Catilina peccavit, minùsque punietur, non quia Fabricius bonus fuerit, bonaque benè fecerit, sed quia Catilina peior fuit; non veras virtutes habendo, sed à veris virtutibus non plurimum deviando, addit ibidem Augustinus.*

Ratio autem hujus partis traditur ibidem ab Augustino, quia quidquid homo facit, ex amore alicujus finis ultimi facit, cum finis ultimus se habeat in operabilibus sicut primum principium

in speculabilibus, juxta maximam à S. Thoma
 ram crebrò inculcatam. Ergo cùm infidelis
 agit, vel agit ex fine infidelitatis, putà ex amore
 falsæ divinitatis; vel sistit in fine operis, putà
 in honestate misericordiæ: quidquid autem fa-
 ciat, peccatum ordinariè non effugiet. Et qui-
 dem si ex fine infidelitatis, atque ex amore fal-
 sæ divinitatis operatur, manifestum est, ipsum in
 peccatum prolabi; nam sicut falsum Deum ado-
 rare, ita & propter illum operari, illique actio-
 num per se honestarum thus adolere impium
 est & sacrilegum. Si autem infidelis in fine ope-
 ris sistit, peccatum non fugit: tum quia virtuali-
 ter ordinat omnia opera in præintentum infide-
 litatis suæ finem; intentio enim finis tandiu
 moraliter perseverat, quandiu per actum oppo-
 situm non revocatur: tum quia etsi opera bona
 in finem illum pravam virtualiter non referat,
 sicut non refert justus peccata venialia in Deum,
 quia sicut ista sunt præter verum Deum, ita for-
 tassis illa præter Deum falsum; attamen volun-
 tas eo ipso, quod in operis honestate civili sistit,
 peccat peccatò omissionis, opus suum in Deum
 verum minimè referendo, quia ut docet August.
*in finitibus in locis, omnia bona hominis in summum
 bonum referenda sunt. Imò lib. 19. de Civit. c. 15.*
*asserit, quod virtutes dum propter se appetuntur,
 superba vii sunt.* Unde tunc in illo opere con-
 tingit mixtura boni & mali, quam dum de mo-
 ralitate, operosè exposuimus. Et in hoc sensu
 explicat Augustinus omne quod non est ex fide
 peccatū esse, quia qui non agit ex fide, non so-
 let de bonis operibus in Domino gloriari. *Pro-
 prius, inquit, operire nudum, in quantum non est
 ex fide, peccatum est, non quia per se ipsum
 factum,*

factum, quod est nudum operire, peccatum est; sed de tali opere non in Domino gloriari, solus impius negat esse peccatum.

Magistrum Augustinum sequuntur celeberrimi Discipuli, ejusque rationem confirmant, tum Fulgentius lib. 1. de verit. prædest. capite 18. Priusquam accipiat (voluntas hominis) fidem, punitionem per seipsam potest mereri, non fidem; omne enim quod non est ex fide, peccatum est, & sine fide impossibile est placere Deo: qui autem Deo non placet, sine dubio displicet; & qui Deo displicet, non eum mitigat, sed potius exacerbat. Et lib. 2. cap. 5. Deo non placemus, nisi velimus; sed ab ipso nobis tribuitur ut velimus, à quonisi voluntas hominis mutetur ut bona sit, aut semper appetit malum, aut nunquam appetit bonum: ac sic dum in rebus bonis rectum ordinem non tenet, Deo vero, & bono nullatenus placet. Tum Venerabilis Beda in cap. 14. epist. ad Rom. Omnis infidelium vita peccatum est, & nihil bonum sine summo bono; ubi enim deest cognitio æterna, & incommutabilis veritatis, falsa virtus est etiam in optimis moribus. Tum S. Prudentius adversus Ioannem Scotum cap. 4. tum Lupus Servatus lib. de tribus questionibus, q. 1. tum Lupus Ferrariensis in collectaneo, quest. 2. Sed omnium limpidissimè S. Rhemigius, & Ecclesia Lugdunensis lib. de tribus epist. cap. 22. Verè mortua sunt omnia opera infidelium, non solum quando aperte vitis, & peccatis serviunt, sed etiam quando naturali bono, in quantum omnipotens Creator tribuit, instigati, vel naturali lege commoniti, quadam bona opera, & velut quasdam virtutes habere, atque exercere videntur; quia fidem Dei & Christi ejus vel ignorantes, vel odio habentes, aut etiam persequentur, quod ex illa fide non operantur,

omninò nec bonum opus, nec vera virtus esse potest, qua non procedit ex radice veritatis. & bonitatis. Dum enim illa ipsa, qua secundum homines videntur esse bona opera, nequaquam vera fide ad Dominum referuntur, quem ignorant, nec propter eum agunt, sed propter aut quandam honestatem, quã inter homines magni videntur, vel propter cupiditatem alicujus commodi temporalis, ipsa impietate infidelitatis, ipsa inflatione elationis, ipsa perversitate cupiditatis ita immunda, & inquinata sunt omnia, ut apud Deum non virtutes, sed vitia judicentur. Et in lib. de tenend. veritate Script. cap. 10. Habent itaque omnes homines, etiam qui alieni sunt à Christo, liberum arbitrium, sed tale quale isti Patres ostendunt, id est in pravaricatione Adæ infirmatum, naturali possibilitate & innocentia spoliatum, sipe Christo nullo bono usui aptum. Habent naturaliter insitum arbitrium voluntatis, ut eodem arbitrio possint velle mala, possint velle etiam quadam bona, sed humana affectione ad humanam societatem, atque honestatem pertinentia, quæ eadem humana affectione, vel propter aliqua temporalia commoda appetuntur, vel propter ipsam solummodò vitæ honestatem: sed hujusmodi humana bona, quæ humana affectio potest velle, potest etiam nonnunquam agere humana natura; cum propter temporalia bona appetuntur, sine dubio cupiditates sunt; cum propter solam vitæ honestatem, sine dubio inflata, & elata sunt. Quæ verba ad eò plana sunt, ut expensione obscurari potius quàm elucidari possint.

Denique D. Prosper multis in locis divini Præceptoris mentem expressit. Videri potest
epist.

epist. ad Rufinum, cap. 7. & libr. de vocat. Gent. cap. 6. & 7. ubi expressè ait: *Etiamsi in bonis moribus homo agat, malè adhuc vivit, si non in Dei gloriam vivit. Sine cultu Dei, etiam quod virtus videtur esse, peccatum est, nec placere ullus Deo sine Deo potest: qui verò Deo non placet, cui nisi sibi, & diabolo placeat? Et carmine de ingrat. is, cap. 16. sic modulatissimè pagit:*

*Omne etenim probitatis opus, nisi semine vera
Exoritur fidei, peccatum est, inque reatum
Vertitur, & sterilis cumulat sibi gloria pœ-
nam.*

Nec potest responderi, Augustinum, ejusque sanctos discipulos laudatos accepisse nomen peccati in lata, & minùs propriè dicta significatione, nimirum pro actu ad vitam æternam sterili, & in malo vitiatæ conscientiæ statu elicito. Non potest, inquam, hoc effugio tot testimoniorum splendor obscurari: tum quia Patres recensiti ad eam quam astringunt sententiam confirmandam, Paulinum illud usurpant, *Omne quod non est ex fide, peccatum est*; unde in eodem sensu nomen peccati accipiunt, in quo nomen illud Apostolus accepit. Nemo autem hactenus dubitavit, nomen peccati in stricta acceptione fuisse usurpatum. Licèt enim dissentiant Interpretes in explicanda illa particula (quod non est ex fide) aliis per fidem conscientiam intelligentibus, aliis veram fidem sine qua impossibile est placere Deo, significari cum Augustino volentibus, aliis de conscientia quam dirigit fides, cum S. Thoma ubique Augustino indivulsè adhærente accipientibus, concors tamen sententia peccatum propriè dictum intellexisse Apostolum credit, & patet ex verbis præcedentibus,

ubi agit Paulus de actione manducandi contra conscientiam fide directam facta, quam utique peccatum esse actuale nemo ambigit. Tum quia Julianus, contra quem disputabat Augustinus, minimè inficiabatur opera illa fieri in statu vitioso; quin oppositum asseveranter significabat, dicens opera illa esse sterilia: Ergo aliquid aliud prætendit Augustinus. Legesit S. Doctorem in fonte, & veritate coactus fatebere, voluisse illum omnia illa quæ infidelibus fiunt speciosæ pietatis opera, vel pravæ intentionis labe, vel rectæ saltem ordinationis privatione sordere; ita ut vel nihil unquam ab Augustino perspicuè dictum credendum sit, si hac in parte tenebras in ejus doctrina per se nitentissima comminiscamur. De mente Sancti Thomæ postea patebit.

Tertia pars quæ asserit, fidem nihilominus non esse essentialiter, & indispensabiliter ad bona opera necessariam, suadetur tum ratione, tum ex doctrina Augustini. Ex ratione quidem; nam ideo infideles ordinariè peccant, quia vel opera sua ex officio bona in prævum infidelitatis suæ finem referunt, vel saltem in verum finem Deum, quem ignorant, referre omittunt: atqui per auxilium divinæ gratiæ, sicut verum Deum cognoscere possunt, ita in illum opus bonum quod eliciunt, referre; eadem quippe auxiliante gratiâ, quâ Creatorem cognoscunt, possunt etiam in ejus obsequium opus per se honestum referre; & tamen nondum habent fidem. Ergo etiam si ad quodvis bonum opus requiratur gratiæ Dei opitulantis adjutorium, non tamen fidei christianæ lux. Unde hæretici etiam si infideles sunt, utpote fidem insulam, & christianam

stianam minimè habentes, cum auxilio Dei moventis aliquod opus honestum in Deum, vel Christum, quem fide humana credunt, tam benè referre possunt, quàm Pagani referunt in idolum. Accedit, quod ideo ex Augustino & Patribus recensitis infideles omnia opera sua etiam ex objecto bona inficiunt, quia cupiditate moventē ea efficere solent: atqui motum cupiditatis corrigere potest auxilium gratiæ moventis, & in Creatoris honorem referentis opus, quod homo sibi relictus in finem creatum, vel in se ordinare proclivis est: ergo ante fidem per gratiam Dei actualem infideles posse aliquod bonum morale operari perspicuum est. Præsertim quia cupiditatis motus non sola reformat fides, cum multi sint fideles variis in scelerum maculis inquinati: ergo illud in eis auxilium gratiæ operatur: ergo idem operari potest auxilium gratiæ in infidelibus Christi fide carentibus, Deum tamen verum, seu primum rerum principium lumine naturali divinitus adjuti cognoscentibus. Quamobrem Augustinus, ideo peccata ait esse infidelium opera, quia non ex amore Dei, sed ex amore sui; non ex amore Creatoris, sed ex amore creaturæ proficiscuntur: amor autem creaturæ peræquè, imò sæpè intensius viget in peccatore fideli, quàm in infideli: ergo amorem illum auxilium gratiæ adjuvantis erigit, nec ad hoc necessariò exigitur fides, quæ sola talem sine gratia non confert rectitudinem voluntati. Quod si contendas, Augustinum non accipere fidem strictè pro cognitione supernaturali Deo secreta sua per Ecclesiam revelanti credere, sed pro cognitione veri Dei, ita ut per infidelem intelligat homi

hominem non cognoscentem, nec adorantem
verum Deum lumine naturali ex creaturis co-
gnosibilem, & per fidem cognitum, sed servien-
tem idolis, seu falsis divinitatibus; tunc ultrò
fateor omnia hujus infidelis opera esse semper
peccata, vel commissionis dum mala agit, vel
bona propter idolum; aut saltem omissionis,
dum opera per se bona in verum Deum nec
formaliter, nec virtualiter refert. Cum enim
hominem non minùs quàm cæteras creaturas
Deus propter semetipsum creavit, iniquum est,
hominem non omnia opera sua in verum Deum,
supremum Dominum, ultimum finem ordi-
nare.

Hanc totam nostram resolutionem perspicuè
tradit S. Thomas 2.2. q. 10. art. 4. ubi postquam
ostendit, infideles non posse elicere ullum opus
meritorium vitæ æternæ, quia carent gratiâ quæ
est principium meriti, sic addit: *Tamen bona
opera, ad quæ sufficit bonum natura, aliquantulum
operari possunt; unde non oportet, quod in omni
opere suo peccent. Sed quodcumque aliquod
opus operantur ex infidelitate, tunc peccant.*
Vides ex ejus mente opera infidelium non esse
necessariò peccata, nisi quando operantur ex
infidelitate; tunc autem operantur ex infideli-
tate, vel quando opera sua in falsum Deum re-
ferunt, vel in verum Deum referre omittunt.
Nihil autem vetat, quin Deus infideli notitiam
veri Dei per ea quæ facta sunt cogniti, imper-
tatur ante fidem; nihil vetat quin voluntas
Deum cognoscentis aliquid in Deum sic cogni-
tum cum adjutorio gratiæ referat. Neque enim
infidelis necessitatur ad hoc, ut omnia sua opera
in finem infidelitatis referat. *Sicut enim habens
fidem*

fidem, inquit D. Thomas memoratus, potest aliquod peccatum committere in actu, quem non refert ad fidei finem, vel venialiter, vel etiam mortaliter peccando: ita etiam infidelis potest aliquem actum bonum facere in eo, quod non refert ad finem infidelitatis. Quam rationem tradiderat ipse Augustinus lib. de spiritu & lit. cap. 28. his verbis: Sicut non impediunt à vita aterna justum quadam peccata venialia, sine quibus hac vita non ducitur: sic ad salutem aeternam nihil prosunt impio aliqua bona opera, sine quibus difficillimè vita cujuslibet pessimè invenitur.

Atque ex his etiam mens Augustini elucescit, nihil enim aliud intendit Doctor sanctissimus, quàm opera sine fidei adjutorio facta, esse ordinariè & regulariter peccata, imò & semper, nisi speciali gratiâ infideles adjuventur, quia infideles quà tales, non agunt nisi ex regula infidelitatis & erroris sui; vel saltem in verum Deum opera sua referre, & in Domino gloriari prætermittunt. Unde locò citato contra Julianum, idèò ait operire nudum, tametsi sit opus ex officio & objecto bonum & laudabile, in infideli tamen obscurari nigredine peccati, quia de tali opere non in Domino gloriatur, id est illud ad Dei gloriam non refert. Et certè ut manifestum sit Doctores influxum fidei ad quodcumque bonum essentialiter desiderantes, mentem Augustini capite illo tertio libri quarti contra Julianum expressam non esse plenè assequutos, observa Augustinum ea ibi proferre, quæ nisi aliquo lenimento temperentur, probant omnia peccatoris etiam fidelis opera esse peccata; Augustinus enim non qualen-
cunque

cumque fidem ad bonum opus exigit, sed fidem, quæ per dilectionem operatur, quæ utique in peccatore Christiano minime invenitur. Verba Augustini sunt hæc: *Disce eum, qui non facit opera bona intentione fidei bona, hoc est ejus que per dilectionem operatur, totum quasi corpus illud quod velut membris operibus constat, tenebrosum esse, hoc est plenum nigredine peccatorum.* Idem docet sexcentis aliis locis, præsertim libro de grat. Christi, cap. 26. *Quid boni faceremus, nisi diligeremus; aut quomodo bonum non facimus, si diligamus. Et si enim Dei mandatum videtur aliquando à diligentibus, sed à timentibus fieri; tamen ubi non est dilectio, nullum bonum opus imputatur, nec rectè bonum opus vocatur, quia omne quod non est ex fide, peccatum est.* Vides Augustinum illud Apostolicum, *omne quod non est ex fide, peccatum est*, de fide per charitatem operante intelligere; & tamen adversarii non influxum charitatis, sed solius fidei ad bonum opus necessariò exigunt. Ergo aliquo tenentur Augustinum interpretamento explicare.

Quare vera Augustini mens est, opera quævis sine auxilio gratiæ facta esse peccata, sive in infidelibus, sive in fidelibus; quia opera in Deum non ordinata proculdubio peccata sunt, quem ordinem ad Deum sola auxilii divini cupiditatem reformantis gratia confert. Et quia infideles opera sua ad Deum verum referre non solent, quippe qui verum Deum non norunt, proculdubio opera infidelium sunt ordinariè peccata; non tamen opera fidelis peccatoris, qui licet charitate perfecta Deum super omnia ex toto corde diligente careat, habet tamen fidem
quâ

quâ illustratus, & auxilio Dei lumini fidei con-
naturaliter correspondente roboratus, in Deum
nondum summè dilectum opus referre potest,
& sic boni sunt omnes pii motus justificatio-
nem præcedentes, tametsi non à charitate per-
fecta proficiscentes. Quia tamen nihil vetat,
Deum infideli Creatoris notitiam impertiri,
nihil etiam vetat in illum infideles opera sua
aliquando saltem referre; relinquitur opera in-
fidelium non esse necessariò peccata, etiamsi
fides non influat. Unde Augustinus *lib. citato
de spiritu & litera*, postquam dixit multa infi-
delium opera esse ex officio non solum non
vituperanda, sed etiam meritò, rectèque lau-
danda, subjungit: *Quaquam si discutiatur
quo fine fiant, vix inveniuntur, quæ justitiæ de-
bitam laudem, defensionemve mereantur.* Si
vix inveniuntur, ergo aliquando inveniri cum
adjutorio gratiæ possunt. Dicere autem Augu-
stinum ibi non ex propria, fixaque sententia lo-
qui, sed per modum disputantis, ut quidam do-
ctus recentior putat; est Patres prout volumus
interpretari, in omnemque sensum opportunè
importunè flectere.

In probanda ultima speculationis parte im-
morandum non est; si enim fides non necessa-
riò exigitur ad operis rectitudinem, multò mi-
nùs gratiæ, & charitatis influxus desideratur,
alias omnia peccatorum opera essent scelera,
etiam pii illi motus justificationem præcedētes:
quod Tridentinum *sess. 6. can. 7.* damnat. Et
ratio est clara, quia homo peccator, seu in pec-
cato mortali constitutus, potest cum Dei adju-
torio opus bonum ex objecto & fine operari:
ex objecto quidem, quia ut rectè ait D. Thomas
suprà

suprà relatus *ad 3.* per peccatum etiam infidelitatis non corrumpitur totaliter ratio naturalis, quin remaneat aliqua veri cognitio, per quam facere possunt aliquod opus de genere bonorum. Quod & antea ducuerat Augustinus libro præfato de spiritu & litera, his verbis: *Quia non usque-adeò in anima humana imago Dei terrenorum affectuum labe detrita est, ut nulla in ea velut lineamenta extrema remanserint, unde meritò dici possit etiam in ipsa impietate vita sua facere aliqua legis, vel sapere.* Ipsa etiam experienciâ compertum est, nullum adeò esse nefandum, à quo lumen vultus divini signati super nos, & inextinguibilis honestatis amor voluntati inseminatus aliqua pietatis naturalis, justitiæ, misericordiæ & religionis opera non extorqueat; & quanvis illa per se laudabilia officia cupiditas in se reflectere soleat, quia ut benè canit Prosper c.17. *Arbitrium per devia lapsus claudicat, & cæcis conatibus, inque ligatis motus inest, non error (practicus) abest.* Attamen Deo adjuvante in honorem Creatoris quadantenus referre opera honesta peccatores possunt; quod auxilium licet Deus denegare possit, & sæpe denegat, conferre tamen potest: imò & interdum conferre conveniens est, cum remanentibus illis divinæ imaginis lineamentis, superstiti illi honestatis amoris tametsi nunquam debeantur, interdum tamen respondent auxilia, quibus voluntas aliquo saltem imperfecto æternæ justitiæ, honestatis, & bonitatis amore inescetur.

Solvuntur objectiones.

Contra primam partem speculationis ob-
 ciunt primò Lessius, Tannerus, & post illos no-
 ster Gonetus nimis hac in parte Molinæ disci-
 pulis adhærens; obijciunt, inquam, varias au-
 thoritates, tum illum Apostoli locum Rom. 2.
Gentes qua legem non habent, naturaliter ea
qua legis sunt, faciunt; idest, per virtutem natu-
 ræ, solo rationis naturalis dictamine prælucen-
 te opera legis exequantur: ergo sine gratia Dei.
 Tum varia Augustini testimonia, quibus S. Do-
 ctor affirmat, multa infidelium opera justè, me-
 ritoque laudari; additque, ideo illa ab eis fuisse
 effecta, quia terrenorum affectuum labe non om-
 ninò deteritur impressa mentibus nostris divini-
 tatis imago. Tum quædam, pauca tamen, &
 valde jejuna D. Thomæ verba, ubi asserit, homi-
 nem in statu naturæ corruptæ posse *per virtu-*
tem suæ naturæ aliquod bonum agere, ut tradit
 q. 109. art. 2. Tum quædam Conciliorum ora-
 cula magnâ vi detorta, putà illud Tridentini
 sess. 6. can. 1. *Si quis dixerit hominem suis operi-*
bus, quæ vel per humanæ naturæ vires, vel per
legis doctrinam fiunt, absque divina per Iesum
Christum gratia posse justificari coram Deo,
anathema sit. Quibus verbis indicatur aliqua
 bona opera per naturæ vires absque Christi gra-
 tia effici posse. Denique magis speciosè proferunt
 Bullam B. Pii V. & Gregorii XIII. inter alias
 propositiones Michaëlis Baii istas damnantiū:
Cum Pelagio sentiunt qui textum Apostoli ad
Rom. 2. Gentes quæ legem non habent, naturaliter
ea quæ legis sunt faciunt, intelligunt de gētibus
fidei

fidei gratiam non habentibus. Item, *Liberum arbitrium sine gratia & Dei adjutorio non nisi ad peccandum valet.* Cum Pelagio sentit, qui boni aliquid naturalis, hoc est quod ex natura solis viribus ortum ducit, agnoscit. Quibus verbis, inquit Gonet, expressè damnatur nostra sententia; quod confirmat autoritate Lessii & Tanneri constanter asserentium nostram doctrinam non esse tutam, utpote ab his Ecclesie Catholice capitibus disertè proscriptam. Sic illi contra intentionem Pontificis seipsum manifestissimè declarantis, novos articulos fidei pro libito fingentes & diffingentes liberaliter exculpunt; an satis sobriè, postea videbimus.

Respondeo his paucis testimoniorum explicatu facillimorum moliminibus non elevari posse, vel concuti firmissimam sententiæ nostræ veritatem tot Scripturarum, Patrum, Conciliorum, Summorumque Pontificum clarissimis sententiis communitam, nec ullo verisimilitudinis colore obtendi posse, Beatissimum Pium V. in Schola D. Thomæ nutritum, ac proinde Augustini amantem, & Pontificem antiquitatis adeò tenacem voluisse puram putam Augustiniano- rum dogmatum medullam erroris insimulare. Sed age singula ventilemus auctoritatum momenta.

Ad primam ex Apostoli loco depromptam abundè respondimus in materia de fide, ubi locum illum intelligendum diximus vel de gentibus ad fidem conversis, & per naturam gratiâ reformatam operantibus, ut Augustinus censuit, cujus mentem S. Thomas pluribus locis, nominatim verò in commentario illius loci approbavit; & planè viro Thomista indignum est,

Augu

Augustinianam illam explicationem Angelici Doctoris calculo probatam inter damnatas Bani propositiones collocare, præsertim cum Pii V. constitutio tot evidentissimis modis possit, intemerata manente Augustini expositione, explicari, ut postea clarebit. Dicuntur autem gentes illæ, tametsi conversæ, legem non habere, vel quia nondum erat scripta lex Christi, vel quia lex Christi in spiritu potissimum sita est, non in litera, sicut lex Moysis. Secundò diximus, locum illum Apostolicum, si intelligatur de gentibus fidei lumine nondum illustratis (ut intelligi posse cum nostro Angelico Magistro non abnuimus,) ita interpretandum esse, ut *ly naturaliter*, non opponatur gratiæ, sed legi, quasi dicat Paulus: Non est vobis gloriandum, ô Judæi, quòd legem Moysis acceperitis, quia gentes quæ legem illam non habent, naturaliter, id est sine auxilio illius legis, faciunt opera legis. Ubi ut doctissimus Estius observavit, illud *naturaliter*, in sensu literali opponitur tantum legi, non gratiæ, ut sit sensus, Gentes naturaliter, id est in statu naturæ lege destitutæ permanentes, opera legis naturalis faciunt; sed sicut mandata legis scriptæ observare nequibant Judæi sine gratia Dei, nisi cum Pelagio totam gratiæ opitulationem ad legem forinsecus sonantem reducamus; ita sine Dei adjuvantis gratia gentes legem naturalem scriptam in cordibus suis nequaquã observabant. Et certè si locus ille Apostolicus secundum mentem adversariorum veniret intelligendus, proculdubio probaret, quod ipsi non admittent, nimirum ad servandam legem naturalem, ad operaque pia & iusta, quæ lex illa præscribit, toto vitæ decursu peragenda, sufficere legem

legem naturalem, cum gentes quæ legem non habent, naturaliter, id est ut ipsi fingunt, per naturæ vires, ea quæ legis sunt, faciunt. Ergo juxta illos hoc uno verbulo Apostolus gratiæ in illa epistola, cujus unicus scopus est gratiam Christi, ejusque necessitatem, potestatem, & gloriam stabilire, totam christianæ gratiæ necessitatem ab imis fundamentis subruisset. Quid enim opus est gratiâ Redemptoris, si gentes quæ legem non habent, naturaliter, id est solius naturæ viribus, ea quæ legis sunt faciunt? Vide etiam S. Thomam q. 109. art. 4. ad 1.

Ad Augustinum respondeo S. Doctorem non negasse opera ex officio bona, sed pravarum circumstantiarum maculis sordidata ab infidelibus posse fieri: opus autem ex integra causa bonum ab illis, & sine auxilio gratiæ effici posse, nunquam dixit Augustinus, cum & in illis paucis locis, quæ referunt adversarii, & continentiam Polemonis, & Schismaticorum pro Christo morientium patientiam, & aliorum pudicitiam conjugalem, donum Dei apertissimè dixerit. Quod tamen ipsemet Augustinus sic interpretatur lib. 1. de nupt. & concup. cap. 3. his verbis: *Quid ergo dicimus, quando & in quibusdam impiis invenitur pudicitia conjugalis? Vtrum eo peccare dicendi sunt, quod dono Dei malè utantur, non id referentes ad cultum ejus, à quo acceperunt? An fortè nec dona Dei putanda sunt ista, quando hæc infideles agunt, secundum Apostoli sententiam dicentis: Omne quod non est ex fide, peccatum est? Quis audeat dicere donum Dei esse peccatum? Unde juxta Augustinum hæc opera per se eximia in infidelibus, regulariter non sunt sine peccato, sed si aliquando sine peccato fiant,*
pro

proculdubio non sine auxilio Dei fiunt. Unde nihil unquam contra nos producent ex Augustino adversarii ; quia etsi eis concedamus aliquando opera bona ab infidelibus fieri (quod possibile cum Dei auxilio esse non inficiati sumus suprà) nunquam tamen aliquid in Augustino invenient , quo significetur , illa sine ope specialis Dei adjutorii esse peracta.

Dices : Ex Augustino *lib. 5. de Civ. cap. 15.* à Romanis multa præclarè gesta sunt , quibus & merces reddita est , amplum nimirum orbis imperium in virtutum civilium remunerationem. At Romanis non concedebatur specialis gratia ad virtutes illas civiles exercendas : ergo sine gratia possunt multa virtutum opera fieri.

Respondeo ægrè adversarios probaturos Romanis saltem quibusdam nunquam Deum auxilium gratiæ, non quidem gratum facientis, sed moventis fuisse impertitum , cùm ipsi omnibus & singulis & semper auxilium sufficiens nedum offerri , sed etiam conferri contestentur. Sed utut sit , ad has angustias minimè nos reducit argumentum frigidissimum. Tum quia idem Augustinus eòdem loci illa Romanorum gesta præclara, peccata esse pronuntiat : *Ista*, inquit, *laudis aviditas, & cupido gloria multa illa miranda fecit, laudabilia scilicet, atque gloriosa secundum hominum estimationem: amore itaque primitus libertatis, post etiam dominationis, & cupiditate laudis, & gloria multa magna fecerunt. Sanius autem videt, ut ait cap. 13. qui & amorem laudis vitium esse cognoscit. Huic igitur cupiditati, addit cap. 14. melius resistitur sine dubitatione, quàm ceditur.* Tum quia merces non est reddita Romanis in præmium veræ virtutis

virtutis , sed in commendationem operum ex officio honestorum. Tum quia catenus dicitur Romanis merces reddita , quia quod ambibant , obtinuerunt , eo sensu quo Veritas dixit , hypocritas recipere mercedem suam , non quòd opera hypocritarum , quæ faciunt ut glorificentur ab hominibus , mercedem ullam promereantur , sed quia gloriam quam unicè hypocritæ intendunt , consequuntur : intentioni ergo respondet merces quæ sita per iniquitatem , non retributa per justitiam. Videsis eundem S. Doctorem cap. 18. ejusdem libri. Tum demùm quia licèt laudis cupido vitiosa sit , non tamen adeo probrosa sicut cætera vitia ; & quia illâ cupiditate valde humanâ cætera vitia longè deteriora Romani præferunt , & etiam aliquatenus virtutum civilium honestate permoti sunt ; ideò præmium temporale sortiti sunt , quod Deus operibus malis , aliquo tamen honestatis radio permixtis indulgere solet , ut patet in obstetricibus Ægyptiorum , quarum egregiam in pueros Hebræorum pietatem remuneratus est , eisque ædificavit domos , id est , ut Augustinus , & Theodoretus interpretantur , earum res familiares auxit , & locupletavit.

Ad D. Thomam dico patere ex ipso contextu expositionem ; quis enim negaverit homines aliquod opus ex objecto civiliter bonum , quale est *ædificare domos , & plantare vineas* (quæ sunt ipsa accuratissimi Doctoris exempla) sine speciali gratiæ adiutorio effici posse ? Nec contra hoc quicquam efficit Gonetus , dum ait S. Thomam velle hominem posse plantare vineas , & ædificare domos ex deliberatione , tanquam bonum proportionatum naturæ. Nihil , inquam , efficit ;

efficit ; quia etsi homo plantando vineas delibere-
ret, & ædificando domos intendat facere aliquid
proportionatum naturæ & urbanitatis decori,
hoc nihil aliud probat , quàm dari opera bona
ex fine operis , quod in moralibus est idem cum
objecto ; sed ut finem operis in Deum, prout re-
netur operans referat, gratiâ opus est. Itaque
concedit solùm D. Thomas, posse dari sine gra-
tia bonos architectos, & bonos vinitores , sed
non bonos justos. Alia quæ ex D. Thoma profer-
ri possunt, vel suum secum interpretamentum
vehuat , vel certè adversariis obsunt magis,
quàm prosint : unde patet eorum sententiam esse
à probationibus è S. Thoma petitis desertissi-
mam.

Ad testimonium ex sacro Tridentino Conci-
lio petatum respondeo , identidem mihi excide-
re, dum verba objecta relego, quæ pacto illa ad
suam sententiam detorquere adversarij possint.
In his quidem cerno, opera quævis nihil ad ju-
stificationem valere : sed bona opera per solas
naturæ vires, vel per legis doctrinam fieri, san-
cta Synodus nunquam dixit, cum & ipsum sa-
crum timorem, qui est initium, quique ante ju-
stificationem haberi potest, donum esse Spiritus
sancti, nondum quidem inhabitantis, sed mo-
ventis disertissimè definiat.

Ad constitutionem B. Pii V. Prædicatoriæ
familix & Thomisticæ Scholæ immortalis or-
namenti respondeo observando, certum mihi
videri, adversarios Bullam illam vel in fonte
non legisse, vel certè illam minimè expendisse.
Etenim ut, superiori dissertatione, *cap. i. specul. i.*
explicantes statum naturæ integræ observavi-
mus, idem B. Pontifex in fine ejusdem Constitu-

tionis apertissimè declaravit, plures è Baianis propositionibus posse legitimum & catholicum pati sensum, easdemque plures fuisse ex Augustino totidem verbis depromptas; eas tamen omnes suam Sanctitatem proscribere vel ob censuræ à Baio superadditæ atrocitatem, vel ob pravam earundem intelligentiam. Cum ergo manifestum sit, locum Apostolicum, *Gentes quæ legem non habent*, &c. intelligi ab Augustino & Aquinate de gentibus ad fidem conversis, ut ipsemet Gonetus *disp. 1. art. 3. §. 5.* confitetur, relinquitur illam Baii præpositionem, quæ nobis primo loco objicitur, esse de numero illarum, quas sua Sanctitas bonum habere posse sensum, & in illo à censura immunes esse declaravit, eique duntaxat subjacere voluit, quatenus vel nimiam censuræ acrioris severitatem continent, vel in pravam sensum à Michaële Baio detorquebantur. Itaque prima propositio jure damnatur, quia omnem aliam expositionem loci Apostoli vocat Pelagianam: *Cum Pelagio sentiunt*, inquit Baius, *qui textum Apostoli intelligunt de gentibus fidei gratiam non habentibus.* Nam quod locus possit intelligi de gentibus nondum fidei gratiam habentibus, quæ legem naturalem, non tamen sine auxilio Dei observant, tradunt multi Doctores, qui Pelagiani non sunt, sed Pelagii errores detestantur. Sed ut sit, manifestum est, primam propositionem nostram sententiæ nedum non ferire, sed nequidem tangere. Nōs enim non illos dicimus cum Pelagio sentire, qui textum Apostoli de gentibus fidei gratiam non habentibus exponunt; sed illos duntaxat cum Pelagio sentire dicimus, qui legem naturalem sine Dei gratia observari posse,

particu

particulâ illâ, *naturaliter*, quæ habetur in textu Apostoli, abutentes affirmant.

Secunda etiam propositio in sensu Baii falsa est, nimirum : *Liberum arbitrium sine gratia & Dei adjutorio non nisi ad peccandum valet.* Sensus autem Baii est, liberum arbitrium indigere gratia sanctificante, & charitate, ut benè agat : quod evidenter ex aliis propositionibus in ea Balla recensitis colligitur, quæ tales sunt : *Omne quod agit peccator, vel servus peccati, peccatum est.* Censet ergo Baius, requiri ad hoc ut opus non sit peccatum, quod operans non sit peccator, seu quod habeat gratiam sanctificantem. Item : *Distinctio duplicis justitiæ, alterius quæ sit per spiritum charitatis inhabitantem, alterius quæ sit ex inspiratione Spiritus Sancti, similiter rejicitur.* Vides ergo manifestè Baium nullum opus bonum esse voluisse, nisi à gratia sanctificante profectum ; siquidem justitiæ ab inspiratione Spiritus sancti excitatam, ab inhabitante distinctam rejecit. Ergo cum dixit liberum arbitrium sine gratia & adjutorio Dei nihil valere nisi ad peccandum, per gratiam, perque adjutorium justitiæ inhabitantem, sine qua nihil bonum esse posse vult, intellexit. Idem clarissimè colligitur ex altera ejusdem Michaëlis propositione, quæ sic habet : *Illæ distinctio duplicis vivificationis, alterius quâ vivificatur peccator dum ei pœnitentia & vita nova propositum, & inchoatio per Dei gratiam inspiratur ; alterius quâ vivificatur qui verè justificatur, & palmæ vivus in vite Christo efficitur, pariter commentitia est.* Si autem nulla sit inchoatio vivificationis & pietatis, nullaque sit gratia, quæ non vivificet formaliter, planum est ad evitandum in omni.

actione peccatum opus esse gratia sanctificante, in qua vita formalis animæ sita est. Qui Baii sensus non solum falsus, sed hæreticus est; ex eo enim sequitur, dispositiones quibus peccator ad justificationem manuducitur, esse peccata; quod in Novatoribus nostris sacra Tridentina Synodus damnavit.

Ex his etiam patet responsio ad tertiam propositionem; cum enim Baius nullam aliam veram gratiam agnoscat præter sanctificantem, seu habitualement, quidquid ex gratia sanctificante non proficiscitur, ex solis naturæ viribus ortum habere consequenter credidit; unde cum dixit: *Cum Pelagio sapit, qui boni aliquid naturalis, hoc est quod ex natura solis viribus ortum ducit, agnoscit*; idem est ac si dixisset: Cum Pelagio sentit, qui sine gratia sanctificante bonum aliquod opus agnoscit; qui utique sensus dammandus est. Accedit, quod propositio illa per se prolata falsa est; cum enim ex naturæ viribus possit homo bonum ex officio opus efficere, imò & finem operis honesti sibi præstitueret, falsum est absolutè, nullum dari bonum naturale, seu ex solis naturæ viribus ortum; opus enim ex objecto & fine operis bonum, tametsi bonum purum non sit, si ultimi finis veri circumstantia desit, bonum tamen est, cum actus sicut ab objectis speciem, ita & denominationem sortiantur; unde actus respiciens objectum bonum bonus est, & talis jure nominatur.

His omnibus addi potest, responsiones hætenus datas ipsi Bullæ interpunctioni inniti, quæ adversariis magis placet, sic enim præfatæ Bullæ censuram legunt: *Quamquam nonnulla aliquo pacto sustineri possent, in vigore & proprio verborum*

rum sensu hæreticas, erroneas, suspectas, temerarias, scandalosas, & in pias aures offensionem immittentes respectivè damnamus, circumscribimus, abolemus. Juxta quam interpunctionem præfatæ propositiones in suorum duntaxat authorum sensu proscriptæ sunt, qui damnatorum authorum sensus ex aliis propositionibus à nobis adductus patet. Manifestum est autem, unam, eandemque propositionem in uno sensu hæreticam, in alio esse orthodoxam, ut probat Augustinus *lib. de hæres.* exemplo Coluthianorum & Florianorum, quorum illi damnati sunt, quòd dicerent Deum non facere mala; isti etiam proscripti, quia è contrario Deum creare mala pronuntiabant. Porro amborum sensus divinis eloquiis resistebat, ut enim ibi Augustinus docet, creat Deus mala pœnas justissimas irrogando, quod Coluthus non videbat; non autem malæ naturas & substantias creando, uti Florinus errabat. Sic etiam teste Athanasio *libro de Synodis*, Paulus Samosatenus in Concilio Antiocheno secundo damnatus est, quòd diceret Christum esse consubstantialem Patri; quia vocem consubstantialis corporaliter accipiebat; & in Nicæno Concilio generali proscriptus est Arrius, eo quòd Filium non esse Patri consubstantialem blasphemavit, quia vocem consubstantialis pro divinæ identitate substantiæ, quam filio Dei denegabat, accipiebat: & utrumque Concilium bene pro subjecta materia definivit, & reapse inter se Patres illi consenserunt, quia sensum hæreticum sub æquivocis vocibus latentem detexerunt, verumque & orthodoxum retinuerunt. Hæc, inquam, dicta sunt juxta interpunctionem ab adversariis adhibitam, secundum quam so-

lus Baii sensus vel per se patens, vel ex aliarum propositionum collatione elicitus damnatur. Ceterum non omnes illam interpolationem probant; testantur enim se legisse Bullas Romæ typis reverendæ Cameræ Apostolicæ editas, in quibus per modum unius integræ clausulæ sic censuram restringentis legitur: *Quamquam nonnulla aliquo pacto sustineri possint in rigore & proprio verborum sensu, hæreticas, &c.* Juxta quam lectionem certum esset, aliquas earum aliquo pacto sustineri posse.

Addi secundò potest, ex terminis ipsius censure liquidò constare, non omnes articulos ideo à Beato Pio V. & consequenter à Gregorio XIII. fuisse damnatos, quòd omnes sint falsi, vel hæretici, cum articuli illi hæretici, erronei, suspecti, temerarii, scandalosi, & in pias aures offensionem immittentes respectivè dicantur. Unde colligere est nonnullos ex iis ideo duntaxat esse reprobatos, quòd iis quidam offenderentur, atque inter Theologos contentiosius quàm par erat hinc inde disputantes, turbandæ pacis & piæ quorundam teneritudinis occasio præberetur. Unde etiam P. Gabriel Vasques *in 1. 2. dispnt. 189. cap. 12.* ubi nostram sententiam post promulgatam Bullam fusè, nec minùs eruditè defendit, ex Cardinalibus Toletò & Bellarmino doctrinà ac pietate magis quàm purpurâ eminentissimis testatur, nonnullas ex præfatis propositionibus ideo esse damnatas, quia nimia verborum acerbitate, quâ etiam hæreseos aliorum opiniones insinuat Baius, Summi Pontificis, vel Concilii œcumenici auctoritatem sibi arrogans, prolata erant.

Addi ultimò potest, quod licèt nonnullæ ex illis

illis propositionibus absque censuræ amarore prolatae reperiantur, quæ aliquo pacto sustineri possunt, tamen modus exprimendi Baianus typhum ubique & supercilium redolens, vel nudè prolatus multos jure potuit offendere. Vnde potuit & debuit prudentissimus Pontifex eas propositiones reprehendere, quibus fidelium animi offendeantur, easque tandiu pro bono pacis prohibere, quandiu eis persistit essentia catholicorum hominum teneritudo. Sic controversiæ de auxiliis multifariam à Romanis Antistitibus veritæ sunt, sapienter existimantibus à doctrinæ non necessariæ prædicatione supersedendum, cum inde gravia scandala, & periculosa perturbationes timentur. Sic etiam dum eram Romæ conclusiones de scientia media, de prædestinatione, de aliisque affinibus materiis palam propugnari veritatem erat. Sic ubique, præsertim verò in Hispania, de Immaculato Virginis Dei-paræ Conceptu disputare nefas est. Quia cum in variis Christiani orbis locis, sed nominatim in Hispaniis quæstio illa, quæ olim pacificè, & solius veritatis inquisitione ventilabatur, acerbissimis sit disputationibus agitata, argumentis etiã non rarò dicteria, verborum acores, & fortassis alia graviora continentibus, sapientissimè Ecclesiæ Pastor, cujus est charitatem fovere, violatam filiorum concordiam restituere, & amarulenta animorum dissidia sedare, non semel eam prohibuit, rei tamen veritate indecisâ manente, & prohiberiâ alterutrius sententiæ censurâ, ne ea sententia, quæ B. Virginem negat immunem à peccato originali, publicè doceretur. Et quavis illius sententiæ assertores doctrinam suam in Scripturis fundatam, & ut loquitur Cajetanus, requiescere

quiescere in sinu Sanctorum contestentur ; prudentissimè tamen Summus Pontifex propter anticipatas populorum opiniones , Hispanorum præsertim offensionem, opinantium B. Virginem cum peccato originali esse conceptam , silentium imposuit, certissimo hoc principio usus, in sententiis ferendis & traditionis Patrum summam rationem esse habendam , & simul fideles in schismatis discrimen non esse conjiciendos. Unde utrique parti opinandi quod probabilius vitium fuerit, libertatem reliquit, ne extinguatur lucerna in Israël ; & simul omnibus publica de hac controversia dissertatione interdixit. Si enim vera & definita dogmata crudè, ut ita dicam, proposita dum occasio sunt ruinæ infirmorum, prudenter silentio prætermittuntur , juxta illud: *Multa habeo vobis dicere, sed non potestis portare modò* ; unde in primitiva Ecclesia adorandæ Eucharistiæ mysterium ob ingentem, quam secum invehit difficultatem, quamve sine scandalo Capharnaitæ olim audire non potuerunt, catechumenis, & multò magis infidelibus magna cum cautela occultabatur ? quanto magis regula illa in assertionibus dubiis, & nondum clarè decisis locum habet ?

Alia objectiones è ratione petita dissolvuntur. Examinatur præceptum omnia in Deum referendi.

Objiciunt præterea adversarii : Creatura rationalis per facultatem suæ naturæ potest cum concursu generali actum naturæ suæ consentaneum elicere, ne sit deterioris conditionis aliis creaturis,

creaturis, quæ actus sibi convenientes eliciunt, ut cum ignis calefacit, sol illuminat, arbor fructus edit. Atqui actus honesti & boni sunt naturæ rationali consentanei, cum sint regulis rationis conformes, sicut mali à ratione recedentes, contra naturam esse dicuntur. Ergo opera moraliter bona, nullaque peccati labe sordidata potest creatura rationalis sine auxilio gratiæ efficere.

Respondeo hoc argumento probatum iri, posse etiam voluntatem absque Dēi adjuvantis auxilio & totam legem servare, & à peccato abstinere, & tentationes superare, cum hi actus sint naturæ rationali consentanei, sicut eorum oppositi rationi & naturæ repugnant; & tamen hoc adversarii, ne in superbiam Pelagianam incendant, non admittunt. Ergo nimis probat, subindeque nihil, hoc argumentum. Dicendam ergo, quod licet creatura rationalis pura & sana possit bona opera cum solo concursu generali efficere, non tamen debilis & infirma, qualis est nostra in statu corruptionis: unde non nisi motus imperfectos intra sphaeram vitæ civilis elicere potest. putà ædificare domos, plantare vineas, ut ait D. Thomas. Adde quod quia liberum arbitrium primi peccati granditate non extinctum, sed attenuatum duntaxat est & infirmatum, ideo non negamus, plura posse à voluntate effici opera ex objecto, officioque honesta, tametsi in illis gloriari in Domino sine Domini adiutorio non possit. Patet autem opus objectum bonum respiciens, tametsi recta ad Deum relatione carens, bonum esse, sed mixtum, nec purum, ut aliàs dum de moralitate, demonstratum est. Hic autem bonitatis moralis radius sub obscurus, in

actum ex objecto per se honesto refusus laudabilis est. Nam sacræ litteræ, in quibus sicut non fallimur, ita ex eis non fallimus, multorum opera laudant, qui Deum verum non agnoverunt; quia opus per se honestum amabant, licet non benè amare dicendi essent, qui de bonis operibus non in Domino gloriabantur. Sic legimus laudari Cyrum, & Darium Reges, quòd Templum Jerosolymitanum instaurari curarint, captivitatemque populi Judaïci laxari mandaverint. Laudatus est etiam Assuerus Rex, quia exaltato Mardochæo, & Aman justâ vindictâ affecto, Judæos ab iniqua internecione liberavit. Commendatur etiam Nabuchodonosor, quòd cum perfido, perjuroque Sedecia loquutus sit judicium. Ninivitarum etiam pœnitentia, quâ temporalem vindictam averterunt; & Regina Austri diligentia, quæ audiendæ sapientiæ Salomonis gratiâ longinquam peregrinationem confecerat, ab ipsa Veritate probantur. Denique Actorum ultimo Barbarorum Apostolo Paulo, sociisque naufragis non modicam humanitatem præstantium hospitalitas celebratur. Porro illis omnibus operibus ex objecto bonis, vel defuit semper ultimi finis debita circumstantia, vel si non defuit, actualis gratiæ beneficiuni fuit.

Dices: Hoc ipso, quod voluntas non refert opus ex objecto bonum, putà eleemosynam, in finem pravum, sed in præcisa misericordiæ honestate sistit, tunc actus sponte sua ex se tendit in Deum totius honestatis fontem, & finem, saltem interpretativè, cum per pravi finis appositionem à Deo minime detorqueatur operis impetus in Deum, non secus ac lapis in centrum naturâ

naturâ suâ proclivis. Ergo actus erit perfectè bonus sine auxilio gratiæ.

Respondeo, ad integram operis honestatem non sufficere ut objectum, & finis proximus honestate gaudeant, nisi etiam operans finem ultimum verum, in quem omnia opera sua formaliter, vel virtualiter referre tenetur, ut postea dicemus, sibi præstituat, cum de bono opere non in Domino gloriari solus impius neget esse peccatum, ut ait Augustinus. Dum ergo quis honestatem operis amat, per hoc quidem non peccat, cum rationi consonè agat: quòd virtutis honestatem in se reflectat, & in Deum referre omittat, sine peccato esse non potest. Adde quod sine gratiæ adjutorio vix, ac ne vix quidem virtutis honestas volutatem in statu corruptionis primò & per se movere potest potentia consequenti, & in sensu composito; quia ut suprà ponderavimus, occultus sui amor cordi nostro invisceratus, etiam dum honesta amare sibi videtur, quæ sua sunt latenter quærit, & mentitur iniquitas sibi; id est, ut exponit Magnus Gregorius, *sape fit ut aliud in intimis intentio supprimat, & aliud tractantis animo superficies cogitationis ostendat.* Quare duplici de causa adjutorium gratiæ necessarium est, & ut objecti honestas sincerè ametur, & ut in Deum referatur. Maxime quia cum juxta principia Augustini amor castus justitiæ, honestatis, & veritatis, sit amor ipse Dei, tam non possumus honestatem benè, si purè sine gratia diligere, quàm non possumus diligere Deum; quod certum esse fatentur ii contra quos agimus. Principium autem prædictum tradit Augustinus lib. 2. de lib. arb. cap. 19. *Neque, inquit, prudentiâ cujusquam sit prudens alius,*

quis

aut fortis fortitudine, aut temperans temperantiâ, aut justus justitiâ hominis alterius quiscquam efficitur; sed coaptando animum illis incommutabilibus regulis, luminibusque virtutum, quæ incorporaliter vivunt in ipsa veritate, sapientiaque communi, quibus & ille coaptavit, & fixit animum quem istis virtutibus præditum sibi ad imitandum proposuit. Quam justitiam & veritatem intus apud nos, vel potius supra nos in ipsa veritate conspici à nobis testatur idem Pater lib. 8. de Trinit. cap. 9. Unde subdit: In Deo concipimus incommutabilem formam justitiæ, secundum quam hominem vivere oportere judicamus. Quod & repetit serm. 17. de verb. Apost. cap. 3. Interrogo, utrum ames justitiam? Dominus autem justitiæ est, non enim ibi fingere debes Deum quasi idolum.

Urgebis: Gratis, & sine fundamento dicimus, teneri nos omnia ad Deum tanquam ultimum finem semper referre, saltem virtualiter; nonne enim satis, superque creaturæ rationalis officio satisfacimus, si opus propter finem proximum de se honestum efficiamus, cum tunc rationi consonè agamus?

Respondeo hanc quæstionem tractari solere à Theologis Moralibus, vel in tractatu de peccatis, ubi quæritur an homo possit primò peccare venialiter; cujus occasione inquirunt, num homo in primo rationis exordio, sin physico, certè morali, in Deum converti teneatur; vel in materia de charitate, ubi præceptum dilectionis Dei examinatur. Sed dabit veniam Lector optimus oblivioni meæ; postquam enim de præcepto Fidei & Spei multa satis in superiori tomo tradidi, à primo & magno mandato pertractando

do supersedere decreveram, & ferè hujus argumenti disputatio è memoria exciderat, quæ utinam nunquam absit à corde. Nec mirare, Lector; ad credendum enim difficilia, ad sperandum ardua præceptis Theologorum studio exponendis, inculcandisque opus est. At verò ad Deum amandum quid opus est lege? cum amorem illum natura suggerat, ratio suadeat, auctoritas evincat, in ejusque inculcationem universæ divinorum eloquiorum sententiæ totæ quantæ conspirent. *Clamat*, inquit Doctor Mellifluus, lib. de dilig. Deo, *intus innata, & non ignota rationi justitia, diligendum esse illum, cuius nos totos esse, & cui totum debere non ignoramus.* Et ideò ut observat S. Thomas, de hoc præcepto in Decalogo non fit mentio hoc nomine, quòd evidentius sit.

Sanè non credebam de hocce dilectionis divinæ præcepto disputatum iri unquam apud Christianos, cujus dubitatio apud Gentiles non omninò occæcatos sacrilega meritò haberetur. Non credebam inventum unquam iri Theologos, magnum istud præceptum subtilitatibus inconditis ad nihilum redacturos; præceptum, inquam, quod si Scripturarum omnium compendium, Prophetarum votum, Evangelii summam, Christianismi animam, perfectionis regulam, cunctarum formarum virtutum, unum incarnati Verbi scopum, legis finem, solidæ pietatis principium simul & coronamentum dixeris, à veritate non aberrabis.

Enimverò quis crederet in illas extremæ calamitatis extremas tenebras prolapsuram unquam humani ingenii non omninò extinctam lucem, ut amoris divini, & in Deum omnia refe-

rendi necessitatem negaret , quo sine virtutes in vitia degenerant , externa legis impletio in hypocrisim convertitur , & suavissima filiorum Dei lex in gravissimum servorum jugum commutatur. Hæc non credebam , nec credere poteram , & vix oculis meis credo , dum apud quosdam lego , Christiano sufficere virtutes paganas , nullo ad Deum ordine consecratas ; imò & Christianum posse per totum vitæ curriculum creaturis frui (creatis enim rebus fruitur qui eis non utitur propter Deum) & amorem divinum , ejusque praxim ad mortem usque tutò posse procrastinari , & ab illo etiam in articulo mortis eximi beneficio attritionis Sacramento conjunctæ ; his artibus contra sacri Tridentini mentem & Summorum Pontificum decreta suo loco referenda omnem Dei amorem in lege amaroris exterminantes.

Quis tam vecors , tam sine corde , tam corde indignus his assertionibus divini amoris inimicis credat ? Quis tam cæcus , ut non videat , quod sicut in quolibet humanæ vitæ instituto finis primùm & ratione sui quæritur , & impensè prædiligitur , ut cætera deinde eligantur , quæ in finem illum referantur : ita in humanæ , & præsertim Christianæ vitæ œconomia , quæ peræquè præstantissima , atque ordinatissima est , priùs quærendus , priùs diligendus est totius humanæ vitæ finis , qui utique nec est , nec esse potest alius , quàm Deus summè amandus , ex cujus deinde amore cætera volumus & operamur : unde primùm illi adhærendum est , primumque parendum , ut ab illo honesta vitæ primordia ducamus. Certè facilius , & tolerabilius est negare Deum , quàm illi semel agnito omnia offerri nō debere

debere affirmare. Unde graviter monet Sini-
chius Academię Lovaniensis nullâ unquam obli-
vione delendum decus, quod hoc præceptum
tam apertum negantis *non procul ab Atheis-
mo distet assertio; immò multò facilius om-
nium hæreticorum & impiorum errores pote-
rit propugnare.*

Ridiculus foret ille Dialecticus, qui contra
omnes Logicę, & communissimę rationis leges
conclusiones vellet sine ullo præmissarum præ-
vio assensu derivare. At longè absurdior est
Theologus, qui opera absque ullo prævio in
Deum amore immaculata esse pronunciat; cùm
sicut se habet primum principium in speculabi-
libus, ita & se habeat finis ultimus in operabili-
bus. Certè nec Theologi nomine dignus est qui
talìa docet; si enim Theologia, ut aliàs dixi-
mus, & nomen ipsum sonat, Deum solum quæ-
rit, & aliud quodvis objectum quàmlibet insig-
ne quidem inspicere dignaretur, nisi in illo divi-
nus quidam ordo, & veluti radius eniteret, &
ideo objectum formale adæquatum Theologię
non est aliud quàm Deus solus; quomodo suo
nomini, & verę Theologię non renuntiant, qui
opus non in Deum ordinatum, bonum posse esse
testantur? Detestantur omnes Orthodoxi nefan-
dum illud impii Calvinij dogma, quo solâ fide,
sine amore, & operibus nos posse salvari blas-
phemavit: sed sodes, nihilo deterior videtur
assertio, quę opera sine amore Dei posse in salu-
tem perducere credit; nam si fides sine operibus
mortua est, profectò opera sine amore Dei non
vivunt. Mirro argumenta ex præceptis charita-
tis petita; nam si in Deum verum credere, si
in omnipotentem sperare specialibus præceptis
jube

jubemur ; quidni summè amabilem ex præcepto charitatis amare teneamur ? Anne Deus minùs bonus,quàm verax,vel omnipotens ? An minori jure pollet bonitas,quàm veritas,vel potestas ? An ita imperfecta est charitas, ut nunquam cor vero affectu tangat, nec ullos animi motus, nulla studia in Deum rapiat ? Cur ergo Deus se *ex toto corde, tota anima, tota mente* diligì imperavit, si interiori affectu ferri in Deum minimè teneamur ?

Nec dicas sufficere ad implendum dilectionis amorem,ut quis contra eam nihil faciat, sed cætera quæque præcepta observet ; nam qui habet præcepta mea,& servat ea, ille est qui diligit me, inquit Veritas. Non,inquam, id dicas ; nam contra dilectionem facit qui nunquam diligit, peccatum enim omissionis contra legem est, cùm omne peccatum sit contra legem æternam. Nec etiam alia præcepta custodit, qui nullum unquam divini amoris affectū elicit ; observatio enim externa ab interiori affectu sejuncta judæicus ritus est, nō Christianus, imò nec verè humanus, cùm potissima hominis pars non corpus sit, sed spiritus. Ergo qui externis tantum officiis contentus est, non adorat in spiritu & veritate ; labiis Deum honorat, cor autem ejus longè est à Deo, qui tamen se *ex toto corde, ex tota anima, ex tota mente* præcipit diligì, quia totum cor hominis possidere avens, & in eo consortem non patiens, *nullum à se rivulum duci extrà patitur, cujus derivatione dilectio Dei minuatur,* ut August. lib. 1. *de doctr. Christi.* tradit.

Nec dicas iterum, observationem legis, putà cultum parentum, subventionem pauperum, & aliorum prohibitorum fugam sine prævia Dei amandi

amandi intentione, sed alio laudabili, & moraliter honesto fine exercitam, esse amorem Dei effectivum, et si non affectivum; qui enim aliqua bona intentione ita officii sui tenax est, & ita comparatus, ut malit ab omnibus suis desideriis, & emolumentis recedere, quam præcepta sub mortali obligantia violare, diligere Deum censendus est. Non itaque id dicas; neque enim effectivè amat, qui nullatenus amat, quive nullum dilectionis affectum sentit. Certè non ideò dicitur amor effectivus, quia caret affectu; tam enim impossibile est dari amorem sine interno motu, quàm albedinem sine colore, vel colorem sine qualitate, vel qualitatem sine accidente, vel accidens sine ente; sed eatenus dicitur effectivus, quia in affectu non sistit, sed in effectum transit, & externa officia eo animo imperat, ut in omnibus honorificetur, & ametur Deus. Amor verò dicitur affectivus, qui divinam bonitatem intus sapiens, gustat quoniam suavis est Dominus; qui interiori affectu fervens in Deum fertur, in externa verò opera non diffuit, vel quia deest occasio, vel facultas, non voluntas; vel ne externorum officiorum sollicitudine erga plurima turbata, unum necessarium interrumpatur, & optima pars, quam Maria in contemplatione elegit, deferatur. Sed de his vide quæ dicemus circa amorem Christo debitum libro decimo de Deo conversante, *differt. 1. cap. 2. specul. 3. per totam.*

Ex his sequitur, ex Dei amandi præcepto, quo Deum sincerè, & castè diligere jubemur, teneri homines omnia opera sua bona actu voluntatis referre in Deum; cùm enim Deus debeat amari ut ultimus finis, & summum bonum; ultimus
verò

verò finis omnem sibi voluntatis electionem subiciat, cum repugnet dari duos ultimos fines, ut fusè alibi demonstravimus, evidens est, debere homines omnes suas electiones, omnia opera deliberata in Deum ultimum finem vel formaliter per actum expressum, vel virtualiter per actum amoris præteritum, & moraliter, donec retractetur perseverantem referre. Certè qui aliquod opus bonum elicit, & solum bonitatem moralem quarit, in eaque quiescit, eâ etiam fruitur, vel saltem non utitur prout debet, cum in Deum, quo solo fruendum est, non referat, ac proinde Deum ex toto corde non diligat. Nam ut ait August. suprâ laudatus: *Hæc regula dilectionis divinitus constituta est: Diliges proximum tuum sicut teipsum; Deum verò ex toto corde, ex tota anima, & ex tota mente, ut omnes cogitationes tuas, & omnem vitam, & omnem intellectum in eum conferas, à quo habes ea ipsa, qua confers. Cum autem ait, toto corde, tota anima, tota mente, nullam vita nostra partem reliquit, qua vacare debeat, & quasi locum dare, ut alia re frui velit; sed quidquid aliud diligendum venerit in animum, illuc raptatur, quò totus dilectionis impetus currit. Et libro 10. de Civit. cap. 4. postquam dixit ex amore Dei nomen, & vim suam religionem mutuari, quia nimirum dum bona propter Deum beatitudinis fontem, & omnis appetitionis finem eligimus, Deum quem negligentes amiseramus, veluti reeligentes amore recuperamus, sic ait: *Hoc bonum diligere in toto corde, in tota anima, & in tota virtute præcipimur; ad hoc bonum debemus & à quibus diligimur duci, & quos diligimus ducere. Sic complentur duo illa præcepta, in quibus tota lex pendet, & Propheta.**

Porrò

Porrò præcepta illa exigere ut omnia in Deum referamus, sic aperte, & formaliter docet verbis quæ statim adjungit: *Ut enim homo se diligere nosset, constitutus est ei finis, quò referret omnia quæ ageret.*

Hanc etiam doctrinam Anglicus Præceptor infinitis locis tradit, & superius indicatis rationibus confirmat. Sic enim habet 1. 2. q. 100. art. 10: *In hoc præcepto, Honora patrem, non includitur quod honoretur pater ex charitate, sed solum quod honoretur pater: unde qui honorat patrem, licet non habeat charitatem, non efficitur transgressor hujus præcepti, etsi sit transgressor præcepti, quod est de actu charitatis, propter quam transgressionem meretur pœnã. Et in responsione ad 2. Dicendum, inquit, quod sub præcepto charitatis continetur ut diligatur Deus ex toto corde, ad quod pertinet, ut omnia referantur in Deum. Et ideo præceptum charitatis implere homo non potest, nisi etiam omnia referantur in Deum. Sic ergo qui honorat parentes, tenetur ex charitate honorare, non ex vi hujus præcepti, quod est Honora parentes, sed ex vi hujus præcepti: Diliges Dominum Deum tuum ex toto corde tuo.*

Idem ex professo probat *tota quæst. 44. 2. 2.* quia ut ait art. 1. finis spiritualis vitæ est ut homo uniatur Deo; unde dicit Apostolus, quod finis præcepti est charitas: finis autem primò & per se intenditur, unde primò, & per se in Deum ferri tenemur, in alia verò propter Deum. Quare amor Dei præintenti se habet in vita humana, ut docet art. 2. sicut prima principia in scientiis speculativis. Ex quibus infert art. 4. *Quod cum præcepta dantur de actibus virtutû, hoc modo*

do

do aliquis actus cadit sub precepto, secundum quod est actus virtutis. Requiritur autem ad actum virtutis non solum quod cadat super debitam materiam, sed etiam quod vestiatur debitis circumstantiis, quibus sit proportionatus tali materie. Deus autem est diligendus sicut finis ultimus, ad quem omnia sunt referenda, & ideo totalitas quadam fuit designanda circa preceptum de dilectione Dei. Ergo ex D. Thoma, qui bonum opus ex fine proximo bono agit, quod ad Deum non refert, peccat; quia etsi eliciat actum, qui cadit super debitam materiam, delictum tamen eum circumstantiis non vestit. Hinc S. Thomas variis in locis in loco illo Apostolico 1. Cor. 10. Sive manducatis, sive bibitis, vel quid aliud facitis, omnia in gloriam Dei facite, verum preceptum agnoscit, quo tenemur & nos, & vitam nostram, & verba, atque opera nostra in Deum non quidem formaliter semper propter huius status debilitatem, sed virtualiter referre. Quod eximie explicat Doctor sanctissimus in disputatis questionibus, *quest. de charitate, art. 11. ad 2.* his verbis: Dicendum, quod omnia actu referre in Deum, non est possibile in hac vita, sicut non est possibile, quod semper de Deo cogitetur. Sed quod omnia referantur in Deum, hoc pertinet ad perfectionem charitatis, ad quam omnes tenentur. Ad cuius evidentiam considerandum est, quod sicut in causis efficientibus virtus prima causa manet in omnibus causis sequentibus, ita etiam intentio principalis finis virtute manet in omnibus finibus secundariis. Vnde quicumque actu intendit aliquem finem secundarium, virtute intendit finem principalem: sicut Medicus dum colligit herbas, actu intendit conficere potionem, nihil fortassis de
sanita

sanitatis cogitans; virtualiter tamen intendit sanitatem, propter quam potionem dat. Sic igitur cum aliquis se ordinat in Deum sicut in finem; in omnibus quæ propter seipsum facit, manet virtute intentio ultimi finis, qui Deus est. Unde in omnibus mereri potest, si charitatem habeat. Hoc igitur modo Apostolus præcipit, quod omnia in Dei gloriam referantur.

Cum ergo S. Præceptor virtuales boni operis in Deum relationem ex præcepto necessariam exigat, manifestum est, teneri omnes aliquando actuali & formali affectu se & omnia sua sincerè in Deum referre; virtualis namque relatio formalem, & actualem præsupponit, quæ virtute manere dicitur, quia etsi actus cesset, manet tamen ejus impetus influens in opus; quidquid enim vi, & impulsu prioris intentionis fit, in finem prius intentum virtute refertur, unde priorem intentionem vel involvit, vel certè supponit. Aliud est referre habitualiter in Deum, inquit D. Thomas mox relatus ad 3. & aliud virtualiter. Habitualiter enim refert in Deum & qui nihil agit, nec qui actualiter aliquid intendit, ut dormiens. Sed virtualiter aliquid referre in Deum, est agentis propter finem ordinantis in Deum. Unde habitualiter referre in Deum non cadit sub præcepto; sed virtualiter referre in Deum cadit sub præcepto charitatis, cum hoc nihil aliud sit, quam habere Deum ultimum finem. Ergo manifestè, imò insulsè, & crassè mentiuntur qui dicunt S. Thomam ejus fuisse sententiæ, habitum charitatis, non actum præcipi; nullus enim unquam Theologiæ moralis error fuit, vel esse potest, qui capitaliùs S. Doctori advesetur. Et cum tot locis à nobis citatis, aliisque
in

innumeris brevitatis gratiâ omiſſis divini amoris neceſſitatem inculcaverit; & ex profeſſo invictis rationibus ſtabiliverit, mirum eſt quosdam recentiores in doctrina D. Thomæ peregrinos tam nefarii erroris fœditatem tanto Doctori aſſerere auſos eſſe, ejuſque præſidio, quod per ſummam ſibi vindicant injuriam, ſuam prolapſionem communire.

Nec obest, quod aliquoties S. Thomas dicat, præceptum dilectionis impleri per hoc, quod nihil contra ſacram dilectionem cor hominis recipiat, vel nihil contra dilectionem Dei agat, vel ſe, & ſua homo in Deum actu, vel habitu referat, ut 2.2. q. 44. art. 4. ad 2. & art. 6. & opuscul. 18. cap. 5. legere eſt. Non obest, inquam, quia teſtimonia illa in fonte legenti manifeſtum erit verba S. Doctōis perversiſſimè ab ipſius mente detorqueri. Nihil enim aliud vult S. Doctōr, quàm quod homo non tenetur actu, & ſemper elicere actus amoris, ut præceptum de diligendo ex toto corde Deo impleat; quia ut illi totalitati, quæ amoris continuationem poſtulat, ſatisfaciat, debet ſolùm charitatis habitum perenniter conſervare; quod facit etiam qui venialiter peccat, etiamſi peccatum veniale nec formaliter, nec virtualiter in Deum referat. Et rationem S. Doctōr adjungit, quâ ſuam mentem, & adverſariorum impoſturam evidentiffimè detegit: *Quia* (inquit) *peccatum veniale non tollit habitum charitatis, ſed ſolùm impedit charitatis uſum.* Ergo vult ſolùm S. Thomas, præceptum diligendi ex toto corde Dei non obligare ad perpetuum dilectionis uſum, & nunquam interruptum motum cordis in Deum; quia ut loco ſuprà adducto ex 1.2. q. 110. dixerat, præcepta licet

licet sint de actibus (quam propositionem mil-
lies repetit, ne suâ quis doctrinâ abuteretur, velu-
ti futurum recentiorum abusum prævidens;) ta-
men præcepta affirmativa non obligant ad sem-
per. Unde tantum abest ut nobis noceant testi-
monia illa ex 2.2. relata, quod potius in illis di-
fertè & sine ambagibus affirmat S. Doctor, actû
amoris Dei esse in præcepto. Et in eodem sen-
sû loquitur opusculo citato, ubi idem præceptû
Dei ex toto corde diligendi exponit, vultque
quod licet ad præceptum dilectionis imple-
dum requiratur actus, quo ut ibidem ait, *qua-*
cumque homo amat, in Deo amat, & universaliter
suam omnem affectionem ad Dei dilectionem re-
fert: unde dicebat Apostolus 2. Cor. 5. Sive
enim mente excedimus Deo, sive sobrii sumus uc-
bis; charitas enim Christi urget nos. Et omnia in
Deum refert, sicut in finem, sicut Apostolus dicit 1.
Cor. 10. Sive manducatis, vel bibitis, vel quid
aliud facitis, omnia in gloriam Dei facite; quod
quidem impletur cum aliquis vitam suam ad Dei
servitium ordinat, & per consequens omnia, qua
per seipsum agit, virtualiter ordinantur in Deum,
nisi sint talia, qua à Deo abducant, ut sunt pecca-
ta, quæ omnia impleri sine actu impossibile
est; tamen ait ibidem S. Doctor, ad illum di-
lectionis modum omnes ex necessitate præcepti
obligari. Cum ergo dicit hominem ad dili-
gendum ex toto corde Deum debere omnia
actu, vel habitu in Deum referre, non excludit
actum quem tam necessarium inculcat, sed vult
quod perennitas amoris actibus etiam veniali-
bus interrupta perseveret in patria, & nullo pec-
cato mortali extinguatur.

Vide quàm immanè distet neotericorum, &
sacro

sacrorum Doctorum Theologia. Et certè satis mirari non possum de hac Dei amandi necessitate ullam unquam suboriri potuisse dubitationem, cùm juxta communissimam Theologiæ vocem, Deo solo, non autem ulla re creata frui licitum sit, quâ duntaxat utendum est; nihilque aliud peccatum esse possit, quàm fruendis uti velle, atque utendis frui, ut August. *lib. 83. qq. 9. 30.* docet: *Omnis humana perversio, quod etiam vitium vocatur, est fruendis uti velle, & utendis fru.* Frui autem est amore inhærere alicui rei propter scipsam: uti verò est id quod in usum venerit, ad id quod amas, obtinendum referre, ut idem S. Doctor *lib. 1. doct. Christ. c. 21.* tradit. Porro ut ibidem dicitur, in omnibus rebus illæ tantùm sunt, quibus fruendum est, quas æternas, & incommutabiles dicimus; cæteris autem non nisi utendum est, ut ad illarum perfruitionem pervenire possimus. Quid hac doctrinâ notius, & juxtâ sacratius; & tamen adeò constantem veritatem labefactant, qui volunt opus in Deum nec actu, nec virtute ab operante relatum, ab omni peccato etiam veniali esse immune. Certè frustra laborant hi Authores, dum homines à Deo amando eximere volunt, cùm nec ipse Deus à sui amandi lege dispensare possit, ut divinè Augustinus pronuntiavit. *Iubet enim, inquit lib. 1. de liber. arbit. c. 5. 6. & 15. aterna lex avertere amorem à temporalibus, & eum mundatum convertere ad aterna.* Quid illa lex, quæ summa ratio nominatur, quàm cui semper obtemperandum est? Intelligo hanc æternam esse, atque incommutabilem legem; neque enim ulla vis, ullus casus, ulla rerum labes unquam effecerit, ut justum non sit omnia esse ordinatissima.

Quam

Quamobrem his sacris Doctoribus, & ipsius etiam naturæ voci Dei amorem imperanti credamus, Lector optimè, ne inhæreamus inferioribus, quàm nos sumus; nosque ipsos inter illa quæ infra nos, & illa quæ supra nos sunt, ita Deo & Domino nostro opitulante ordinemus, ut inferioribus non offendamur, solis autem superioribus delectemur. Nam ut idem incomparabilis Doctor *lib. 6. musica, & epist. 52.* & alibi tradit: *Tanto nobis melius est, quanto magis in illum imus, quo nihil melius est. Imus autem non ambulando, sed amando; quia ad eum qui ubique præsens est, & ubique totus, non pedibus ire licet, sed moribus; non gressu, sed affectu.*

Ex his principiis cælo & terrâ immobilioribus intulit D. Thomas 1. 2. q. 89. art. 6. & in aliis omnibus locis ibi in margine citatis, teneri creaturam rationalem in primo rationis diluculo ad Deum se convertere, illum ultimum finem agnoscere, & primitias amoris sui illi consecrare, quem ut aliàs vidimus, non potest invincibiliter ignorare. Nec nimis citò, ut quidam garrit, ad Deum amandum nos obligat Doctor Angelicus, qui probè noverat totum Deo tempus deberi, & omnia opera propter Deum esse vel formaliter, vel certè, virtualiter efficienda: ordinatio autem virtualis actum formalem vel involvit, vel saltem præsupponit: ut ergo opera libera & humana ad Deum virtualiter, ut ad minus tenemur, referantur, debuit in prima rationis aurora effectus divini amoris elici, qui in cætera deinde opera influat, & ad eum omnia dirigat, qui se toto corde diligi imperavit.

Et confirmatur. Præceptum convertendi se in Deum ut ultimum finem, ad quod inclinatur lex naturalis, quod virtualiter continetur in primo Decalogi præcepto de colendo. D. o (nam ut ait August. in Psal. 77. *Hoc colitur, quod diligitur; unde quia Deus rebus omnibus major, aut melior invenitur, plus omnibus diligendus est, ut colatur;*) quodve cum præcepto dilectionis Dei, quo totus Christianismus continetur, coincidit; hoc, inquam, præceptum aliquando obligat, id est aliquem actum elici illius conversionis imperat, cum præcepta non dentur de habitibus, sed de actibus. Atqui si aliquo tempore obligat, nullum aliud tempus potiori jure assignari potest, quo urgeat illud mandatum, quam primum discretionis momentum: Ergo tenetur homo ad Deum se in primo rationis diluculo convertere. Major & consequentia apertæ sunt: minor propositio sic probatur. Primum quod occurrit, vel occurrere saltem debet homini discretionem habenti, est ut ait D. Thomas, *deliberare de seipso*; imprudentissimus quippe est, qui se neglecto circa alia se occupat, assimilaturque viatori iter capessenti, nullâ præstitutâ peregrinationis merâ; vel nautæ, qui explicatis velis mari, scopulis, & tempestatibus se permittit, ignorans portum in quem appellat, in quemve se recipiat, cui procul dubio certum naufragium imminet. Et ratio est, quia cum homo sit omnium quæ in mundo sunt finis, oportet quod amor aliorum supponat amorem sui; prius enim debet intendi finis, quam media eligantur: prius ergo tenetur deliberare de se, quam de aliis, quæ sunt extra se. Aliunde verò cum homo non sit finis

ulsi

indicat per hoc, in illo rationis crepusculo solem invisibilem, qui illuminat omnem hominem venientem in hunc mundum, immittere cogitationem deliberandi de se, quibus intimatur, & veluti promulgatur lex naturalis; cui legi obtemperans, *si ad debitum finem seipsum ordinaverit, per gratiam consequetur remissionem peccati originalis; si verò non ordinet seipsum ad debitum finem, secundum quod in illa aetate est capax discretionis, peccabit mortaliter, non faciens quod in se est.* Tum demùm, quia videmus multos pueros septennes amore Dei ferventes, in pietatem proclives, offensam Dei formidare, quod sine aliquo Dei amore non faciunt; licet enim de amore Dei in actu signato non cogitent, internum tamen sentiunt pondus, quo in divina feruntur. Et pueros nonnullos martyrium pro Christo perpeßos fuisse constantissimum est.

Observent quæso hanc doctrinam longè probabilissimam parentes, observent Parochi, observent pædagogi, observent ludimagistri, ut tenerrimam ætatem divinis imbuant institutis, illique amorem ejus inspirent, qui parvulis dixit venire ad se. Ætas illa sicut innocentior, ita flexibilior, tractabilior, & in omnem partem paratior est: assimilatur tabulæ rudi & rasæ, ad omnem impressionem facili; ceræ molli, omnis figuræ capaci; materiæ primæ ad omnem formam indifferenti: Ergo ad omnem pietatem fingi potest, si benè educetur. Et sanè licet daremus adversariis, non esse præceptum amoris primordia, & veluti cordis novalia primo principio & ultimo fini consecrandi; neminem tamen ita rusticum esse reor, qui nolit id saltem

rem urbanitatem postulare : nam si pueri benè nati in diei exordio parentibus salutem dicunt, quid sin iustius , certè honestius , quàm primo rationis luceſcentis mane priores cogitationes, priores curas , priora vota ſaltem per modum donarii , ſi nomen neceſſarii veſtigaliſ reformides, Deo optimo , maximo , & cœleſti Patri offerre ? quanvis in ſententia S. Thomæ ex Auguſtini principiis neceſſariò conſequuta obſequium illud iuſtitia poſtulet. Si enim Rex in primis coronæ auſpiciis, in ipſo in regnum ingreſſu ſubditos profeſſionis ſacramento adigit, quid æquius quàm ut clientelæ munus in ipſo rationis , & vitæ humanæ limine coram ſummo Domino profiteamur ? Ita planè juſtum eſt, ut in illo incipiat , proficiat , & finiatur vita mortalis, in æternam poſtea commutanda , in qua non eſt heri & cras , ſed hodie perpetuum viſionis continentis, & nunquam intermiſſi amoris. Ad hanc vitam nos perducatur ipſe , qui eſt alpha & omega, principium & ſinis, quique cuſtodit introitum, & exitum noſtrum, Deus benedictus in ſæcula.

REFLEXIO.

Non mirum , ſi bonum honeſtum ſine Dei gratia effici poſſe plures affirmant, cùm ut bonum ſit, ad Deum minimè referendum eſſe contendunt. Certè ſicut bonum illud non invidemus, ita ad illud gratiam non eſſe neceſſariam libenter permittimus, ad quod operandum ſufficit natura ſibi relicta. Ad huiusmodi officia, vel potiùs virtutum ſimulachra gratia non inſluit, quæ ſicut à Deo eſt, ita ad Deum jugiter

movet, cùm sit fons aquæ vivæ salientis in vitam æternam, & ad locum unde exeunt flumina, revertantur. At nos qui à Patribus didicimus, omne opus bonum, ut bonum sit, in Deum debere sin actu, certè virtute referri; ultrò & necessariò gratiæ ad singulos actus bonos necessitatem confitemur, quâ & in animum immittatur affectiva cognitio honestatis, & amor divinitatis; quâ homo justus, fortis, & prudens coaptet animum illis incommutabilibus regulis, luminibusque virtutum, à quibus qui recedit, injustus est; ad quas qui accedit, justus evadit.

Hæc cùm ita sint, Christiane Lector, non solum gratiæ lumen, ut opera luciseliciamus continuis precibus invocare tenemur, sed pro bonis quæcumque agimus, continentes Deo persolvere gratias æquissimum est. Unde Divinus Apostolas, divinæ gratiæ prædicator egregius, gratiarum actionem ab oratione nunquam sejungit, sed indivulsam utriusque coherentiam hominum animis penitiùs infigens, *Sine intermissione orate*, inquit 1. Thess. 5. *in omnibus gratias agite*. Et Coloss. 4. *Orationi instate, vigilantes in ea in gratiarum actione*. Hinc est, ut monent Patres, ideo sæpè suam nobis gratiarum abundantiam Deum denegare, quia ingrati sumus, nec omnia in illum referimus, ut illi soli boni operis gloria tribuatur: unde magnum nobis malum ex magno bono detorquemus, dum gloriam Domini nostri servi nequam, imò fures, & latrones nobis usurpamus. *De magnis bonis mala eriri non minima solent*, ait S. Bernardus serm. 84. in Cant. *cùm facti eximii de bonis Domini, vivimus donis tanquam non datis, nec damus gloriam Deo*. Orandum ergo est,

& sine intermissione orandum, ut præveniat nos Deus in benedictionibus dulcedinis, & citò anticipent nos misericordie ejus, quia pauperes facti sumus nimis: verùm secundam gratiam gratiarum actione prævenire tenemur, si ingrati animi suspicionem, & notam depellere studeamus. *Disce*, monet idem Doctor Mellissus serm. 51. in Cant. *in referendo gratiam non esse tardus, aut segnis: disce ad singula dona gratias agere. Diligenter inquit.* (subauditur Sapiens Prov. 33.) *considera quæ tibi apponuntur, ut nulla videlicet Dei dona debitâ gratiarum actione frustrentur, non grandia, non mediocria, non pusilla. Denique jubemur colligere fragmenta, ne percant, id est nec minima beneficia oblivisci. Nunquid non perit quod donatur ingrato? Ingratitudo inimica est anima, exinanitio meritorum, virtutum dispersio, beneficiorum perditio, ventus urens, siccans sibi fontem: id est, rem misericordia fluenta gratia. Ergo si gratiam amas, ingraticulinem fuge, de nulloque gloriare, quando nihil est nostrum.*

SPECULATIO III.

Ex præactis fundamentis necessitas gratiæ speciali, & singulatim quibusdam consuetudinibus derivatur.

STATUTÂ semel divini adjutorii ad quævis opera bona necessitate, facilè, imò sponte fluunt

quæ de necessitate ejusdem gratiæ ad vincendas tentationes, vitanda peccata, amandum Deum, servandam legem Angelicus noster Doctor toto quæstionis 109. decursu tradit, cujus doctrinæ medullam sequentibus consecrariis exponemus.

CONSECTARIUM I.

Nulla sine gratia Dei superari tentatio potest.

PROBATUR: Omnis tentatio, seu impulsus provocans & sollicitans ad malum, vel est extrinseca à dæmone suggerente, aut homine inducente, aut malo exemplo pertrahente immissa; vel est intrinseca, cum nimirum caro concupiscit adversus spiritum, lex membrorum repugnat legi mentis, & appetitus inferior contra superiorem insurgit. Atqui nullam tentationem, sive intrinsecam, sive extrinsecam sine gratia vincere homo potest ex odio peccati, & amore recti. Tum quia nullum opus morale ex objecto & circumstantiis bonum, potest voluntas creata sine Dei gratia efficere; nulla autem tentatio sine bono opere vincitur, nisi cum vitium vitio vincitur: quod non est tentationem vincere, sed mutare; non enim cupiditas cupiditate sanatur. Tum quia nulla est tentatio, quâ superatâ gratias Deo agere non debeamus, & pro qua superanda divinum auxilium implorare non debeamus, & dicere: *Et ne nos inducas in tentationem.* Unde veridicè à Psalmista cantatur Psal. 17. & Psal. 117. *In te eripiar à tentatione, & in Deo meo*

meo transgrediar murum. Impulsus eversus sum ut caderem, & Dominus suscepit me. Tum quia ita docent Sacra Concilia : Arausicanum epistolâ synodicâ , quæ est 9. inter Augustinianas : *Istorum, inquit loquens de Pelagianis, sacrilegas disputationes necessariò sequitur, ut nec orare debeamus, nè intremus intimationem. Si enim possibilitate natura & arbitrio voluntatis in potestate sunt constituta, quis non ea videat à Domino inaniter peti, & fallaciter orari, cum orando poscuntur quæ natura nostra jam ita condita sufficientibus viribus obtinentur; nec debuisse dicere Dominum Iesum: Vigilate, & orate, sed tantummodò: Vigilate, ne intretis in intimationem.* Idem feriè repetit Concilium Milevitanum in epistola etiam synodica inter Augustinianas 92. Nec minùs apertè Concilium Arausicanum I. necessitatem gratiæ ad quamcunque intimationem, siue gravem, siue levem docet *can. 9. & can. 14.* his verbis : *Divini muneris est cum rectè cogitamus & pedes nostros à falsitate, & injustitia continemus. Nullus miser de quantacumque miseria liberatur, nisi qui Dei misericordiâ prævenitur.*

Tum quia ita tradunt Summi Pontifices Innocentius I. in rescripto ad Concilium Carthaginense; his verbis : *Nisi magnis precibus gratia in nos implorata descendat, nequaquam terrenæ labis, & mundani corporis vincere conamur errores, cum pares nos ad resistendum non liberum arbitrium, sed Dei solum facere possit auxilium. Quotidiana præstat ille remedia, sine quibus nullatenus vincere humanos peterimus errores; necesse est enim, ut quo auxiliante vincimus, eo iterum non adjuvante vincamur.* Idem docet Zozii-

mus Papa in epist. ad universos orbis Episcopos: *Quod tempus intervenit, quo eius non egeamus auxilio? In omnibus igitur actibus, causisque, cogitationibus, motibus adjutor & protector orandus est: superbum enim, ut quidquam sibi humana natura presumat. Subscribit Papa Cælestinus epist. ad Episcopos Gallia, cap. 6. his verbis: Nemo etiam baptismatis gratiâ renovatus idoneus est ad superandas diaboli insidias, & ad evincendas carnis concupiscentias, nisi per quotidianum adjutorium Dei perseverantiam bonæ conversationis acceperis.* Astipulatur Bonifacius I I. in epistola Arausicani Concilii confirmativa, necnon Magnus Gregorius lib. 9. *Moral. cap. 7. asserens quod homo dimissus sibi cuiuslibet tentationis aut à rareatur. Quod & repetit in expositione Psalmi tertii pœnitentialis, dicens: Necessariò sequitur, ut omni tentationi sit subditus quicumque ab eo fuerit derelictus.*

Nec potest dici, summos illos Ecclesiæ Catholicæ Pastores loqui de tentationibus gravibus, ad quas auxilium Dei necessarium esse definiunt. Non, inquam, id potest dici. Tum quia universaliter de omni tentatione loquuntur, nec luculentas Conciliorum, Romanorumque Pontificum de jure definitiones licet pro humanæ rationis arbitrato exceptionibus novis, & à Patrum traditione desertis eludere. Tum quia ad vincendam *quancunque peccati* in tentatione *miseriam*, *quotidianus remedium* nos indigere docent: levis autem tentatio est quædam miseria; quotidianum etiam remedium non est necessarium, nisi ad quotidianas tentationes, quæ utique non sunt quotidie in omnibus graves. Verba etiam Gregorii adducta planiora sunt, quàm ut
ullo

ullo interpretamento detorqueri possent. Tum demùm quia Patres, Pontifices, & nominatim laudatus Gregorius docent, Deum homines ad vincendas graves & periculosas tentationes sæpe opitulati, & tamen ipsos levioribus succumbere, iudiciis inscrutabilibus, sive ut humiliati totum Deo tribuant, & videant quod *magna pralia electis permittit Deus, quæ vincant; levius excitat, in quibus cadunt, ut cadentes se facilius erigant, & eos fortia, in quibus victores steterunt, non extollant*, inquit lib. 5. in Reg. Hinc timendum monet lib. 2. *Moral. cap. 26.* quia *sæpe quem tentationis certamen superare non valuit, sua detrius securitas stravir.*

Summis Pontificibus consentiunt Patres, Ambrosius in Psal. 41. *Quis est tam fortis, ut nequam in tentatione moveatur, nisi Dominus ei adiutor existat?* Chrysostomus hom. 34. in 1. ad Cor. Sunt ergo, inquit, tentationes, quæ ferri non possunt. Et quæ hæ sunt? Omnes, ut semel dicam: posse enim ferri, situm est in Dei nutu. Quantus verò sit in hac doctrina, & quàm totus Augustinus, nemo in ejus lectione peregrinus ignorat. Nam *lib. de grat. Christ. cap. 27.* asserit, quod nullo modo spiritui nequam sine Spiritus sancti adjutorio resistere possumus. Et *serm. 13. de verb. Apost.* testatur, quod sine gratia, non dico vincere, sed nec pugnare possumus. *Quia nisi ille regat, cadis; nisi ille erigat, jaces.* Cætera missa facio, utpote infinita. Augustinum sequuntur Prosper cap. 35. contra Collatorem: *Quisquis, inquit, in tribulatione non deficit, ibi illo se non dubitet adjuvari, ad quæ quotidie cordis universorum fidelium canunt: Ne nos inferas in tentationem.* Et Fulgentius epist. 4. cap. 4. *Nec est*

quoties restiterimus, toties coronabimur; attamen de nostra nobis fortitudine nullatenus esse præsumendum, sed ad ejus misericordiam tota humilitate currendum, qui etiam cadentes suscipit, si tamen ab humilitate suscipiantur; & in Altissimi esse adjutorio habitandum, atque in protectione Dei cœli commorandum; quia minimè decet esse securum hominem, qui secum portat laqueum suum: unde uni Dei adjutorio fidendum est, ut in hac vita, quæ merito tota tentatio appellatur, quemadmodum undique bella, ita undique sint & præsidia. Hoc præceptum viris præsertim spiritualibus inculcandum docet Bernardus *serm. 1. in Psalm.* Qui habitat: *Timeo, fratres, ne fortè etiam sit in nobis qui non habitet in adjutorio Dei altissimi, sed confidat in virtute sua, & in multitudine divitiarum suarum. Fortè enim fervorem habet aliquis, potens in vigiliis, in jeuniis, in labore, & ceteris hujusmodi; aut etiam multorum, ut sibi videtur, divitias meritorum longo tempore acquisivit, & in his confidens remissior est in timore Dei, facile jam ad otiositates & curiositates perniciose quadam securitate declinat, murmura, detrahit, dijudicatque. Qui profectò si habitaret in adjutorio Dei, attenderet utique sibi, & timeret offendere quem sibi cognosceret adhuc tam necessarium esse. Tanto siquidem amplius time Deum, & magis sollicitus esse debuerat, quanto majora ejus munera jam percepit. Neque enim quæ habemus ab eo, servare, aut tenere possumus sine eo. O si scires, quàm parum est quod habes, & hoc ipsum quàm citò perdes: si non servaverit ille qui dedit! Hac enim duo sunt, quæ valde sollicitos & subiectos Deo nos reddere possunt.*

ut non simus de his qui propterea non habitant in adjutorio Altissimi, quia non reputant illud sibi necessarium esse. Et serm. 6. Leviter volat, leviter penetrat; sed dico tibi, non leve infligit vulnus, citò interficit. Nimirum sagitta hac vana gloria est. Non est unde hac impugnet pusillanimes, & remissos: qui ferventiores esse videntur, ipsi paveant, ipsi sibi caveant in hac parte; nihilominus adhuc solliciti non deserere scutum inexpugnabile veritatis. Quid enim aliud tam contrarium vanitati? Nec sanè huic opponenda sagitta secreta illa, & quodammodo intima veritatis exigimus (putà altitudinem judiciorum Dei inscrutabiliū, mysteria prædestinationis & gratiæ, charitatis & occultæ cupiditatis vix internoscendam similitudinem, & alia similia:) semetipsam noverit anima, de se teneat veritatem. Difficile prorsus, ni fallor, homo verbis laudantium hominem in vita sua, adduci poterit altum sapere, si se intus ad lucem veritatis sollicita consideratione discutiat. Nonne enim si propriam cogitat conditionem, dicturus est sibi: Quid superbis terra & cinis? Nonne si propriam consideret corruptionem, fateatur necesse est, quoniam non est in eo bonum? Sed & si fortè aliquid habere videtur, non inveniet, puto, quod respondeat Apostolo dicenti: Quid habes quod non accepisti? Et alibi: Qui stat, videat ne cadat.

Huic tam ingenti locupletissimorum testium nubi nihil habent quod opponant adversarii, quàm Bullam Beati Pii V. adversus Michaëlem Baium editam, in qua proscribitur hæc illius Authoris propositio: Non solum fures hi sunt & latrones, qui Christum viam & esum veritatis

Et vita negant, sed etiam quicumque aliunde quàm per ipsum in viam iustitia, hoc est ad aliquam iustitiam, conscendi posse docent, aut temptationi ulli sine gratia ipsius adjutorio resistere hominem posse, sic ut in eam non inducatur, aut ab ea non superetur. Verùm ut suprà notavimus, hoc qui obijciunt, Beati Pii constitutionem in fonte non legerunt, cùm enim plures propositiones Pontifex propter verborum asperitatem, ac censuræ acerbicatem condemnarit, nulla est quæ potuerit potiori illo jure damnari, cùm nulla sit acriori stylo prolata, utpote quæ adversarios suos fures vocat & latrones. Accedit quod cùm Baius gratiam duntaxat sanctificantem agnoscat, ut ex suprà dictis claret, manifestum est, nostrum toto cœlo distare sensum ab illo Michaëlis, cui omnis & una gratia sanctificans fuit. Demùm falsum est, hominem adjutorio destitutum necessariò illi tentationi succumbere, cùm sæpè peccatores unam cupiditatem aliâ superent, ut cùm Bruti in filios amorem & pietatem vicit amor patriæ, laudumque immensa cupido: unde non necessitatur peccator ad illud peccatum, ad quod temptatione inducitur, tamen si nisi à Deo adjuvetur, dum unum superat, in aliud cadat, & ut canit Prosper aliàs laudatus, *in vulnera vulnere surgat.*

Alia objecta, quibus hoc consuetarium impugnari potest, quia peræquè contra sequentia militant, ideò omnia simul in fine hujus speculationis refellemus.

CONSECTARIUM II.

*Nequit homo in statu naturæ lapsæ Deum
super omnia efficaciter sine gratia
diligere.*

SEquitur omninò ex dictis ; si enim nullum
opus bonum sine gratia efficere possumus,
quantò minus elicere actum, qui est totius legis
impletio ? Sed insuper hæc veritas Catholica
suadetur ; tum primò , quia si Deum super om-
nia ex viribus naturæ diligere possemus , frustra
daretur in nobis charitas, quæ ut Scripturæ pas-
sim testantur, à Deo est, & diffunditur in cordi-
bus nostris per Spiritum sanctum , qui datus est
nobis. Tum quia si possemus Deum super om-
nia ex viribus naturæ diligere , daretur in nobis
initium salutis, & expectanda solùm foret aliqua
formalitas, à Deo , nempe modus supernatu-
ralitatis, sicque tota charitatis dilectio non esset
à Deo : quod impium esse negat Augustinus li-
bro 2. ad Bonif. cap. 2. *Nec initium ejus ex
nobis, & perfectio ejus ex Deo ; sed si charitas
ex Deo est , tota nobis ex Deo est : avertat
enim Deus hanc amentiam , ut in ejus donis
nos priores faciamus , posteriorem ipsum ; quo-
niam misericordia ejus prævenit me.*

Tum terriò, quia ita tradunt sacra Concilia,
Carthaginense *can. 4.* ubi definitur , utrumque
donū Dei esse, & scire quid facere debeamus,
& diligere ut faciamus. Arausicanum *can. 25.*
Prorsus donum Dei est diligere Deum. Triden-
tin. sess. 6. c. 6. & *can. 3.* Si quis dixerit , inquit,
sine

sine præveniente Spiritus sancti inspiratione absque ejus adjutorio hominem posse diligere Deum sicut oportet, anathema sit. Porro qui diligit Deum super omnia, profectò Deum sicut oportet, diligit, cum Deum diligat sicut Deus ipse præcepit. Nec potest ille amor tam bonus non esse meritorius, cum in doctrina S. Thomæ q. 21. art. 2. & 3. lumini naturali nota, meritum sit proprietas bonitatis. Unde si ex viribus naturæ Deum super omnia diligere possumus, proculdubio gratiam Dei promereri poterimus; diligenti enim Deum super omnia gratiam suam denegare non potest Deus qui diligit diligentes se. Unde tam sæpe inculcat Augustinus, nihil esse steriliter bonum; & quod si datur in nobis bonum initium, datur etiam meritum, ut contra Semipelagianos libro de prædest. SS. prosequitur inferens eos, velint nolint, in Pelagianum errorem asserentem gratiam secundum merita nostra dari, incidere; quem tamen ipse Hæresiarcha in Concilio Diospoli celebrato, ne damneretur, reprobavit. Maxime quia Augustinus in omnibus suis libris docet tunc opus esse meritorium, cum opus bonum bene sit: quis autem dubitare potest, an cum Deus diligitur super omnia, fiat opus bonum, & bene?

Tum quartò, quia ita docent Patres, sed potissimè Augustinus. Ad cujus majorem evidentiam considerandum est, nunquam fuisse controversiã inter Augustinum & Pelagianos, utrum Deus ut author supernaturalis possit per vires naturæ diligi; hoc enim nunquam somniare potuerunt Pelagiani in Philosophia versatissimi: solum ergo volebant illi hæretici, posse nos viribus naturæ Deum toto corde; sine vitio, sine obliquitate

tate sincerissimè diligere, quod à Deo esse, non ab hominis viribus, ita contendit S. Pater, ut non dubitet asserere, quod si amorem illum voluntatis viribus asseramus, *vicerunt Pelagiani*; si autem ex Deo proficisci teneamus, *vincimus Pelagianos*, ut *lib. de grat. & lib. ub. cap. 18.* legere est. Infinita testimonia passim obvia prætermitto; sufficiat istud ex *serm. 15. de verb. Apost. cap. 11. Deus non amatur nisi de Deo.* Et istud ex *epist. 107. ad Vitalem: Liberum arbitrium ad diligendum Deum primi peccati granditate perdidimus.* Accedit quod in via Augustini amor castus justitiæ & veritatis est amor ipse Dei, cum Deu sit ipsa veritas, ipsaque justitia, ut præclaris ejusdem Patris testimoniis speculatione præcedenti ostendimus, quibus adde illud in *Psalm. 61. Cum sis injustus, esse non potes justus, nisi convertendo te ad quandam justitiam (id est Deum) à qua si recedis, injustus es; ad quam si accedis, justus es.* In qua justitia veluti in speculo videri rectitudinem operum ex ea dirigendorum, egregiè tradit idem divinus Pater *serm. 14. de divers. cap. 6.* his verbis: *Justitia præsto est justè viventi; secundùm ejus regulam videt quemadmodum justè vivat; & sicut justì benè vivendo eam vident, ita injusti malè vivendo eam non vident. Nam & ille justè vivit, cum eam videt ut secundùm eam actus suos dirigat; quia nisi secundùm justitiæ regulam direxerit actus suos, in errorem iniquitatis impingitur.* Quid autem apud Augustinum frequentius, quàm justitiā non posse purè, & callè sine Dei gratia diligì. *Dilectio justitiæ*, inquit *lib. de Spiritu & lit. cap. 14. non litera, sed spiritus donum est; cum ipsa delectatio boni, quā etiam non consentit ad malum, non*

timore

Necessitas gratia singulatim. 235

timore pœna, sed amore iustitia, nec est enim con-
delectari, non nisi gratia debitanda sit, addit ubi.
1. ad Bonif. cap. 10. Quod confirmat libro 3. de
Civit. cap. 5. Ut autem diligatur, & de eie ur
ipsa iustitia, non nisi divina subuenit gratia. Et
lib. de correptione & gratia. cap. 2. Quando id agunt
sicut agendum est, id est cum dilectione & delecta-
tione iustitia, suauitatem quam dedit Dominus,
accepisse se gaudeant. Ergo Deum sine Dei gra-
tia amare non possumus.

Et certè mirandum, vel potiùs dolendum est,
de hac veritate Theologos Christianos dubitare
posse, quæ Philosophos, teste Augustino, non la-
tuit. Nam *lib. 11. de Civit. cap. 25.* laudat Augu-
stinus Platonem, quòd castum Dei amorem à
Deo nobis infundi dixerit: Cui, inquit, *neque*
naturarum omnium auctor, nisi Deus visus est. &
neque intelligentia dator, neque amoris, quo benè bea-
teque vivitur, inspirator. Cùm ergo manifestum
sit Platonem non esse loquutum de amore Dei
ut fide cogniti, vel de amore modum & digni-
tatem supernaturalis meriti habente, manifestum
est, mentem Augustini esse, amorem Dei sincerum,
quo Deum ut authorem naturæ prosequi-
mur, esse Dei donum. Qua observatione omnes
adversariorum cavillos facilè elides.

Augustinum sequuntur ejus discipuli Prosper
& Aquinas: ille quidem *lib. cont. Collatorem,*
cap. 30. & 31. ubi expressè affirmat, Dei dile-
ctionem non nisi à Deo haberi, additque natu-
ram humanam gratiâ destitutam esse veluti gla-
ciali rigore torpentem. Iste verò articulo 3. præ-
sentis quæstionis 109. specialem gratiam ad
diligendum Deum, eamque majorem in statu
naturæ lapsæ exigit.

Ratio

Ratio theologica hujus conſectarii ſic poteſt formari. Amor Dei caſtè, & ſuper omnia dilecti eſt actus totius vitæ humanæ perfectiſſimus, totius divinæ legis complementum, & omnium hominis officiorum compendium: ergo actum illum elicere nequit natura corrupta ſine gratiæ Dei adjutorio. Antecedens non poteſt negari ab his, qui terminos intelligunt, Conſequentia verò probatur: tum quia actus perfectiſſimus vitæ moralis eſt ultimus naturæ ſanæ conatus: ergo in illum nequit prorumpere natura debilis, corrupta, & ſauciata. Tum quia cùm ille amor totius ſit legis adimpletio, ſi poſſit voluntas corrupta illum tam deſæcatum fructum edere, poterit alia præcepta ſine gratia Dei adimplere, ac ſubinde divini adjutorii neceſſitas funditus corruet. Maximè quia Deum ſuper omnia caſtè, ſincerè, efficaciterque diligenti facile eſt, imò & connaturale præcepta ſervare, tentationes ſuperare: tum quia præcepta non benè ſervantur, nec rectè tentationes ſuperantur, niſi cùm ab amore Dei procedit illa obſervantia, & iſta victoria. Tum quia amor caſtus & efficax, ut tali nomine dignus ſit, ab affectu ad effectum tranſit; alioquin non eſt bona voluntas, ſed velleitas, non verus amor, ſed phantaſma, ſed ludibrium, vel ad ſummum embryon amoris, de quo non diſputamus. Nam ut aiunt Patres: *Probatio dilectionis exhibitio eſt operis. Charitas magna operatur, ſi eſt; ſi autem non operatur, non eſt.*

Reſpondent adverſarii, præſertim Molina, quod licèt homo in ſtatu naturæ lapſæ poſſit Deum ut authorem naturalem diligere, non tamen ad nihilum redigitur gratiæ neceſſitas, quia

&

& ad Deum diu & permanentem diligendum, & ad amorem supernaturalem Deum ut beatificatorem respicientem desideratur. Etenim non quilibet amor Dei, etiam castus & efficax, æternæ vitæ meritorius existimandus est, sed ille duntaxat, qui ab homine gratiâ sanctificante ornato proficiscitur, vel ab amore Dei Authoris supernaturalis media charitate, vel saltem auxilio supernaturalis ordinis promanat. Quare licet substantia actus dilectionis Dei super omnia possit à viribus voluntatis oriri, modum tamen supernaturalitatis, quo vitam æternam promeremur, à gratia sanctificante & charitate, vel ab auxilio actuali supernaturali in principio justificationis effluit. De amore autem supernaturali & meritorio vitæ æternæ Patres fuisse loquutos contestantur.

Verum hæc responsio, quæ totam adversariorum doctrinæ summam complectitur, pluribus potest argumentis longè efficacissimis quoad utramque partem confutari. Prior quidem: tum quia non solum ad perseveranter, seu permanentem Deum diligendum, sed ad ipsum casti amoris actum auxilium gratiæ necessarium esse Concilia, Patres, & Theologi hætenus docuerunt: ergo non solum ad diu Deum amandum, sed ad eundem simpliciter simul, & efficaciter diligendum gratia necessaria est. Tum quia si viribus propriis potest voluntas efficacem amoris Dei super omnia actum elicere, poterit etiam sine gratiæ adiutorio in illo sese amore exercere; quo sanè exercitio actuum frequentia roborato Deum diu diligere poterit, & in casto amore sine gratia perseverare, cum actus repetiti facilitatem impertiant facultati: ergo si propria vo-

luntatis

luntatis virtus ad Deum castè diligendum sufficit, ad eum perseveranter diligendum actuum iteratorum facilitate roborata potens erit. Ergo stante adversariorum doctrina, divini adjutorii, necessitas funditus exinanitur. Maximè quia Pelagius damnatus est, quòd dixerit gratiam esse necessariam ad faciùs, non autem ad simpliciter benè operandum: dicere autem voluntatem posse diligere Deum super omnia, non tamen diu, ob difficultates tentationum & perseverantiæ, est dicere gratiam non esse necessariam ad bene simpliciter operandum, sed tantùm ad faciùs: ergo, &c.

Secunda etiam hujus responsionis pars haud ægrè confutatur: tum quia si voluntatis vires sufficiunt, ut Deum lumine naturali notum castè diligat, eadem voluntas Deum authorem supernaturalem semel per fidem detectum & cognitum sine gratiæ adjutorio diligere super omnia poterit: nam quod Deus sit author supernaturalis, non addit difficultatem amoris, sed potiùs facilitatem augeat, & voluntatem ad diligendum magis, magisque allicit, cum majorem objecti amabilitatem proponat. Si enim, v. g. sponsus futuram sponsam diligit, quia eam castam, divitem, & pulchram esse audivit, certè promptiùs & faciùs eam diligit, cum certò cognoverit eam esse castiorem, ditiozem, & pulchriorem quàm audierat. Ita similiter si Deum animarum nostrarum sponsum suavissimum, lumine naturali notum castè diligimus, quia est boni naturalis principium, certè ad eum diligendum non deterrebimur, postquam per fidem certò cognoverimus, illum eundem bonorum omnium naturalium authorem, esse etiam supernaturalem

lium largitorem benevolum, qui amantibus ſe ampliora, & lumini naturali incognita bona paravit. Ergo ad Deum authorem ſupernaturalem diligendum non eſt neceſſarium ullius gratiæ à fide diſtinctæ adjutorium. Ergo peccator fidelis ſolo fidei lumine, quod per peccatum mortale, niſi ſit infidelitatis crimen, non extinguitur, poterit Deum ſuper omnia diligere, etiam ut authorem ſupernaturalem. Conſequentiæ ſunt perſpicuæ; principia verò horrenda ſunt, cum totam divinatorum adjutoriorum neceſſitatem ab imis fundamentis labefaſcent, ut etiam ex ſequentibus conſectariis liquidum erit; cum non ſolum peccatores fideles ſine ſpeciali gratia reſurgere, ſed nec Sancti ipſi ſine Dei moventis adjutorio opera ſanctitatis elicere, in eiſque perſeverare poſſint.

Tum quia diſtinguere in eodem actu ſubſtantiam actus à modo ſupernaturalitatis, veræ Philoſophiæ repugnat, ut dum de lumine gloriæ *lib. i.* diſputabamus, obſervatum eſt. Et ratio breviter eſt, quia in actu amoris Dei authoris ſupernaturalis, & vitalitas eſt ſupernaturalis, & ſupernaturalitas eſt vitalis, cum per illum actum vivat voluntas vita ſupernaturali, juxta illud, *Juſtus ex fide*, utique quæ per charitatem operatur, *vivit* in hoc mundo, viſione Dei victurus in futuro, ſecundum illud: *Hæc eſt vita æterna, ut cognoscant te Deum verum.* Vitalitas autem actus eſt ſubſtantia actus voluntatis, cum voluntas ſit facultas vitalis: ergo diſtinguere ſubſtantiam à modo ſupernaturalitatis in amore Dei authoris ſupernaturalis, comicentum eſt à ratione alienum. Quantum verò Thomiſticæ doctrinæ hæc diſtinctio repugnet, nemo nescit: cum

cùm enim in via D. Thomæ actus specificentur ab objectis formaliter inspectis, species, seu substantia actus respicientis objectum supernaturale erit entitativè supernaturalis. Quod si præter objectum supernaturale principium supernaturale requiras ad entitatis supernaturalitatem, ecce illud, nimirum gratiam, sive habitualementem, sive actualem: neque enim à nuda voluntatis potentia, ut ipsemet fateris, sed ab ipsa per gratiam elevata amor supernaturalis proficiscitur. Ergo non est distinguenda substantia actus supernaturalitatis ab ipsa supernaturalitate.

Tum tertio, quia difficultas, & meritum amoris Dei supernaturalis non oritur solum ex eo, quod feratur circa objectum supernaturale, cum apud omnes certum sit & exploratum, quod si quis actum amoris Dei beatificatoris & auctoris supernaturalis inefficacem eliciat, complacentiam etiam de illo objecto percipiat, sed quæ propositum efficax Deo serviendi non includat, nec fundatur in executionem; talis profectò actum ex objecto supernaturalem eliciet, & tamen nihil merebitur. Difficultas ergo, & meritum amoris supernaturalis in eo situm est, quod Deus castè, purè, & per seipsum diligatur, seu ut Augustinus in epistola ad Galatas declarat: *Ille iustificatur apud Deum, qui eum gratis colit, non scilicet cupiditate appetendi aliquid ab ipso præter ipsum, aut timore amittendi.* De quo etiam amore sic scribit Bernardus serm. 83. in Cant. *Et quidem soli Deo honor & gloria; sed horum neutrum acceptabit Deus, si melle amoris condita non fuerint. Is per se sufficit, per se placet, & propter se. Ipse meritum, ipse præmiū sibi est amor, præter se non requirit causā,*

non fructum. Fructus ejus usus ejus. Amo, quia amo; amo ut amen. Dicant, sodes, adversarii, amor qui est hujusmodi, tamen si Dei ut authoris supernaturalis obliviscatur, nonne bonus, nonne sanctus, nonne meritorius est, cum sit perfectionis apex, & sponſarum spiritualium, teste Bernardo, character? Hoc negare est lumini naturæ, & impressis omnibus æquitatis, & justitiæ notio- nibus communissimis renuntiare. Ergo si ex viribus naturæ absque gratia possumus amorem Dei authoris naturalis castum elicere, utique Deo, cui omne bonum placet, placebimus: ergo & Dei amorem promerebimur; durior enim esset Deus, si amantes se, & castè amantes, & ex toto corde amantes non redamaret. Ergo amor iſte gratiam Dei merebitur, cum amor Dei quem meretur, sit infundens & creans gratiam, ut docet D. Thomas, quia est semper efficax; gratia autem est semen gloriæ; ergo ex viribus naturalibus gloriam promereri voluntas creata poterit, & infirma.

Hanc non tam rationem, quàm per se notam demonstrationem prosequitur variis locis August. Cum enim Pelagiani contendebant posse hominem Deum ex viribus naturæ diligere, non loquebantur de amore meritorio vitæ æternæ, seu regni cœlorum, ad illud enim meritum gratiam necessariam fatebantur; sed de amore qui defectu gratiæ sanctificantis esset sterilis ad vitam æternam consequendam. Augustinus verò contrà contendit, quod si voluntas satis sit valida, ut Deum castè & ex toto corde Philosophi diligant (qui utique Deum authorem supernaturalem non diligunt, sicut nec cognoscunt) vitam æternam non mereri non possunt, quia

hujusmodi amor veram justitiam efficit, omneque peccatum excludit, propter quod solum vita aeterna denegatur. Libet Augustinum *lib.4. cont. Julian. cap. 3.* audire: *Vici non potest, quantum te fallat ista opinio quâ dixisti, omnes virtutes affectus esse; per quos aut fructuosè, aut steriliter boni sumus. Fieri autem non potest, ut steriliter boni simus, sed bonum non sumus quiaquid steriliter sumus; arbor enim bona bonos fructus facit. Absit autem ut Deus bonus, à quo securus paratur arboribus non facientibus fructum, excidat, & in ignem mittat arbores bonas. Quomodo igitur, obsecro, non aut peccaris in his disputationibus, aut deliras, qui sterilium fructus arborum laudas? Qui utique aut nulli sunt, aut si melius sunt, laudandi non sunt, aut si fructus boni sunt, profectò arbores steriles non sunt; immò & bonae sunt, quarum fructus boni sunt; & debent Deo placere, cui arbores bonae non possunt nisi placere; falsumque erit quod scriptum est, Sine fide impossibile est placere Deo. Sed quid responsurus es, nisi vana? Ego, inquis, steriliter bonos dixi homines, qui non propter Deum faciendo bona quae faciunt, non ab eo vitam consequuntur aeternam. Iustus ergo Deus, & bonus bonos est in mortem missurus aeternam? Piget jam dicere quâ multa te sequantur insana talia sentientem, talia dicentem, talia scribentem, in talibus me, quod similiter non desipiam, velut censoriè reprehendentem.*

Confirmatur: Ideo S. Augustinus Pelagianos, & Semipelagianos initium fidei, vel bonæ voluntatis viribus liberi arbitrii ascribentes reprehendit, quia si daretur hujusmodi initium, non possemus rationabiliter negare, gratiam secundum merita nostra dari, quia bonus voluntatis

tatis conatus, ipsum etiam credendi & diligendi desiderium, sicut non bona, ita non meritoria esse non possunt. In quo, inquit lib. 4. cont. Jul. cap. 3. *vis hominem, sicut loqueris, ad aliquid laudabile generosi cordis stimulis excitari, in hoc eum non vis in Domino, sed in libero arbitrio gloriari, ac sic priorem dare ut retribuatur illi, eoque modo gratia jam non sit gratia, quia non est gratuita.* Quod argumentum etiam urget lib. de prædest. SS. cap. 2. *Quis autem dicat eum qui jam cæpit credere, ab illo in quem credidit, nihil mereri? Unde fit, ut jam merenti cætera dicantur addi retributione divina, ac per hoc gratiam Dei secundum merita nostra dari. Videte si aliud agitur isto modo, nisi ut gratia Dei secundum merita nostra detur quolibet modo, ac sic gratia jam non sit gratia: redditur namque hoc pacto debita, non donatur gratis.*

Denique quomodo hæc doctrina communi Patrum de infirmitate naturæ lapsæ sensui sit consentanea, planè non video; quomodo enim verum erit quod Augustinus tract. 5. in Ioan. ait: *Nemo habet de suo nisi mendacium & peccatum.* Et in Psal. 137. *Meum si videris, damnas: tuum si videris, coronas.* Et serm. 13. de verbis Apost. cap. 11. *Agis quidem illo non adjuvante liberâ voluntate, sed malè: ad hoc idonea est voluntas tua, qua vocatur libera, & malè agendo fit damnabilis ancilla.* Quomodo, inquam, hæc vera sunt, vel esse possunt, si Deum castè amare voluntas sine gratia potest, & si propriis viribus dilectionem Dei super omnia, quæ est totius legis impletio, elicere valet? Quomodo vera erunt præclara illa S. Prosperi carmina, quæ

habet libro de ingratis. capite 16. & 22.

— *Deus ergo sepulchros*

*Suscipit, & solvit peccati compede victos,
Ille obscuratis dat cordibus intellectum,
Ille ex iniustis iustos facit, indit amorem,
Quo redametur amans, & amor quem conferit
ipse est.*

*Hunc itaque affectum, quo sumunt mortua vitæ,
Quo tenebra fiunt lumen, quo immunda nites-
cunt,*

*Quo stulti sapere incipiunt, agrique valescunt,
Nemo alii dat, nemo sibi; non littera legis,
Nec naturalis sapientia, qua semel acta
In praeceptis labi novit, consurgere nescit.*

— *Submittite vela tumoris,*

*Nobiscumque humiles placido consistite portu:
Edite constanter natura vulnera victa,
Exutam virtute animam, cacataque cordis
Lumina, & in poenam propriam jaculis supe-
rantis*

*Armatum arbitrium, nunquam consurgere posse,
Inque novos lapsus semper nitendo revolvit.*

*Cui sua sit laqueus sapientia, morsque subactæ
Detineat, nisi vera salus ex manere Christi
Adsit, & oppressam dignetur gratia mentem.*

Dices: Quid ergo sibi volunt sacra Conci-
lia, dum post Augustinum aiunt, gratiam Dei
esse necessariam ad diligendum Deum sicut
oportet? Si enim ad Deum sicut oportet dun-
taxat diligendum necessaria est gratia, non
aliam ob causam gratia exigitur, quam ut ame-
tur Deus, sicut amare eum oportet, ut amor
ille æternæ vitæ sit meritorius. Ergo amore
minimè meritorio eum diligere possumus; du-
plicem enim Dei amorem, naturalem unum, &
super

supernaturalem alterum admittendum esse, in
via D.Thomæ certissimum est.

Respondeo admittendo distinctionem amo-
ris naturalis & supernaturalis, petitam ex distin-
ctione objecti, ita ut naturalis illa dicenda sit,
quâ amatur Deus intra ordinem naturæ specta-
tus; supernaturalis verò ea dicatur, quæ Deum
ut authorem gratiæ respicit. *Prima*, ut ait D.
Thomas 2. 2.q.26.art.3. *super communicatio-
ne bonorum naturalium nobis à Deo facta fun-
datur, posterior verò super communicatione do-
norum gratiæ.* Cæterum cum his stat, amorem
Dei ex toto corde etiam ut authoris naturæ di-
lecti esse in hoc corruptionis statu supernatura-
lem ex parte principii, idest exigere principium
supernaturale, & omnes naturæ vires superare.
Ita tradit clarissimè D.Thomas, qui propterea
statuit in statu naturæ lapsæ nullum dari posse
amorem Dei super omnia dilecti merè natura-
lem, non solùm quia in hoc statu homo est ad
finem supernaturalem elevatus, nec potest esse
ad finem naturalem simul conversus, & à fine su-
pernaturali averfus; hanc enim rationem (ta-
met si de se bonam) non adhibet S.Doctor, sed
propter unam voluntatis lapsæ corruptionem,
quia juxta ejus mentem, quam dum de viribus
naturæ puræ disputabamus, sequuti sumus, ho-
mo in statu naturæ puræ, & multò magis in sta-
tu naturæ integræ cum generali Dei moventis
concurfû Deum diligere poterat: *Homo, inquit*
hîc art.3. in statu natura integra non indigebat
dono gratiæ bonis naturalibus superaddita
ad Deum super omnia naturaliter diligen-
dum, licet Dei ad hoc eum moventis auxilio
indigeret. Sed in statu natura corrupta indiget

hon. etiam ad hoc auxilio gratiæ naturam sanantis. Ubi S. Præceptor eundem amorem vires naturæ lapsæ excedere asserit, quem docet non excedere vires naturæ integræ, imò nec vires naturæ puræ, ut in ejusdem articuli argumento *Sed contra* tradit, nec illud refutat, ut solet quando argumentum *Sed contra* conclusioni articuli repugnat, ut nemo in lectione D. Thomæ versatus ignorat. Atqui homo in statu naturæ integræ, & multò minus in statu naturæ puræ Deum ut authorem gratiæ sine gratia, & charitate diligere non poterat, ut tradit ibidem S. Doctor ad 1. & rationem dat: *Natura enim, inquit, diligit Deum super omnia, prout est principium & finis naturalis: charitas autem secundum quod est objectum beatitudinis, & secundum quod homo habet quandam societatem spiritualem cum Deo.* Ergo in statu naturæ lapsæ non solum amor Dei ut est objectum beatitudinis, excedit naturæ vires, sed etiam amor Dei authoris naturalis; siquidem ex S. Doctore, ille amor est naturæ lapsæ viribus impossibilis, qui erat possibilis naturæ integræ vigori: homo autem integer ad Deum authorem gratiæ sine gratia diligendum ex eodem S. Thoma impar erat, & invalidus.

Quamobrem ex admissa distinctione amoris Dei in naturalem & supernaturalem (quam bonam & commodam, non vanam, ut Baius dicebat, esse contendo, cum ex ea naturæ integræ & lapsæ vires dignoscantur,) nihil contra nos effici potest, cum juxta veridicam D. Thomæ sententiam, non solum amor Dei beatificantis, sed amor Dei primi principii, si purus & castus sit, omnes naturæ lapsæ vires exsuperet. Dum ergo

ergo sacra Concilia dicunt, necessariam esse gratiam ad amorem Dei prout oportet eliciendum, illius distinctionis Dei ut beatoris, & ut primi principii, seu authoris naturalis & supernaturalis nullam rationem habuerunt; Pelagiani enim nunquam negarunt necessitatem gratiæ ad Deum ut beatificatorem promerendum; vel potius nunquam disputarunt, an amor Dei ut beatoris excedat naturæ vires, sed loquebantur de amore ipsis Philosophis gentilibus utique Deum glorificatorem non cognoscentibus possibili. Itaque Concilia verba illa, *sicut oportet*, in ipso Augustini, unde deprompta sunt, sensu intellexere. Manifestum est autem, verba illa nunquā adhibuisse Augustinum, ut amorem Dei castum naturæ corruptæ possibilem esse astrueret, ut ex superioribus liquet, sed ut amorem Dei castum à non casto secerneret, qui amor non castus, amor quidem Dei est, sed profectò non est sicut oportet: *Omnis præcepti finis est charitas*, inquit opportunè Augustinus in Enchir. c. 121. *id est ad charitatem refertur omne præceptum. Quod verò ita sit vel timore pœna, vel aliqua intentione carnali, ut non referatur ad illam charitatem, quam diffundit Spiritus sanctus in cordibus nostris, nondum sit quemadmodum fieri oportet, quanvis fieri videatur.* Et in Psal. 118. expendens versum illum? *Quàm dulcia faucibus meis eloquia tua!* sic habet: *Hæc est illa suavitas, quam Deus dat ut terra nostra det fructum suum, ut bonum verè benè, id est non mali carnalis formidine, sed boni spiritualis delectatione faciamus.* Tunc ergo amor Dei nondum est plenè & purè castus, cum illi terrenæ aliqua cupiditas permiscetur; sæpe enim quæ

benè agere nobis videmur, non sincerus Dei amor offert, sed occulta cupiditas inficit, ut sæpe dictum est.

Alia argumenta, quibus probari potest voluntatem hominis lapsi posse Deum viribus suis naturalibus diligere, quia æquè militant contra omnia hujus speculationis consectaria, in fine confutabimus.

CONSECTARIUM III.

*Præcepta legis naturalis sine speciali
Dei auxiliantis gratia servare ho-
mo in statu natura lapsa non po-
test.*

PROBATUR: Duplex est præceptorum divinæ legis observatio, ut docet S. Thomas; alia quantum ad substantiam operum, prout scilicet homo fortia, iusta, & alia virtutis opera exercet; alia observatio est secundum substantiam simul & modum agendi, ut scilicet ex charitate fiant. Atqui neutro modo potest voluntas totam legem naturalem sine gratia servare; & quidem, quod non possit totam legis naturalis substantiam ex modo charitatis servare, seu quod idem est, quod nequeat integram legem ex amore Dei casto implere, patet ex dictis consectario superiori: quod autem nec ipsam operum præceptorum substantiam fideliter, & inviolabiliter sine gratiæ adiutorio servare possit voluntas in hoc corruptionis statu, variis argumentis suadetur contra Scotum & Durandum.

Tum ex Scripturis, in quibus lex dicitur infirma, imbecillis, & impotens ad justificandum, præceptorum observationem reddens difficilior, hominem sub peccato arctius concludens, ut Paulus præsertim inculcat. Specialiter verò Rom. 7. sic habet: *Occasione acceptâ peccatum operatum est in me omnem concupiscentiam: sine lege peccatum in me mortuum erat, sed cum venit mandatum, peccatum revixit. Peccatum occasione acceptâ per mandatum seduxit me, & per illud occidit.* Et cap. 8. idem repetit. Quod confirmat 2. Cor. 3. *Idoneos nos ministros novi Testamenti fecit, non literâ, sed spiritu; litera enim occidit, spiritus autem vivificat.* Et paulò post prædicationem legis veteris nuncupat *ministrationem mortis, & damnationis.* Item Galat. 3. *Si data esset lex, quæ posset vivificare, verè ex lege esset iustitia; sed conclusit Scriptura omnia sub peccato, ut promissio ex fide Iesu Christi daretur credentibus.* Denique ad Hebr. 7. præcedens mandatum appellat *infirmum, & inutile.* Quorum verborum sensus non est, ut impii Novatores impiè interpretantur, observationem legis esse inutilem, imò & peccatum; sed germanus ille sensus est, quem B. Augustinus lib. 1. de peccat. merit. cap. 11. tradit, quia nimirum *lex jubere tantum, & non adjuvare poterat.* Et quia *litera occidit augendo concupiscentiam, & iniquitatem pravaricatione amulando, nisi liberet gratia.* Ea namque est corruptæ, superbæque voluntatis conditio, ut in prohibita promptius & suavius feratur libertatis amans, subjectionis impatiens; unde triti illi versus: *Nisimur in vetitum, volumus, cupimus que negata: Vxor amanti sordet, amica placet.* Quod explicat Augu-

stinus exemplo aquæ, cujus impetus vehementior fit obice posito, & tandem evicto violentius per prona pervolvitur: sic hoc ipsum, quod concupiscitur, fit jucundius dum vetatur. Igitur voluntas non potest sine gratia imposita sibi legis mandata servare; si enim ad ejus observationem vires naturæ sufficerent, utique lex erudiendo juvaret monstrando voluntati quid posset. Hinc idem Augustinus relatus à Prospero *sentent. 44.* sic habet: *Lex data est, ut gratia quæreretur; gratia data est, ut lex impleretur: neque enim suo vitio non implebatur, sed prudentia carnis; quod vitium per legem demonstrandum, per gratiam sanandum fuit.* Astipulatur Fulgentius libro de verit. prædest. cap. 20. *Lex sine gratia ostendere potest agnitum, non sanare; vulnera monstrat, medicamina non ministrat: ut autem legis impleatur præceptum, gratia ministrat auxilium; ac si lex revelat culpam, gratia confert indulgentiam: legis est igitur, quod peccata cognoscimus. gratia quod vitamus.*

Eodem planè modo loquuntur sacra Concilia, & Summi Pontifices. Etenim Concilium Carthaginense in epistola synodica ad Innocentium Papam, quæ est 90. inter Augustinianas, refert Pelagianos esse damnatos, quod dixerint, *in eo Dei gratiam esse deputandam, quod talem hominis instituit, creavitque naturam, quæ per propriam voluntatem legem Dei posset complere, sive naturaliter in corde scriptâ, sive literis datam.* Et in altero Concilio Carthaginensi *can. 4.* definitur per gratiam nobis præstari, *ut quod faciendum cognoverimus, etiam facere diligamus, atque valeamus.* Et *can. 5.* anathemate fitur, qui asseruerit hominem sine gratia posse implere

Necessitas gratiæ singulatim. 157
implere divina mandata. Quam doctrinam Innocentius, Cœlestinus, alique Pontifices confirmarunt.

Augustini testimonia referre supervacaneum est; tum quia satis multa protulimus; tum quia hanc veritatem ex professo multis in locis S. Doctor omnibus argumentis stabilit. Quid enim aliud toto de spiritu & littera libro, necnon integro de verbis Apostoli sermone 13. intendit Augustinus, quàm sine spiritu gratiæ legem non impleri, quia data est lex, ut inveniret se homo; non ut morbus sanaretur, sed ut prævaricatione morbo crescente medicus quæreretur. Non possum tamen silentio præterire præclara ista ex libro de gratia Christi, cap. 8. verba: *Vsque aded aliud est lex, aliud est gratia, ut lex non solum nihil possit, verum etiam plurimum obsit, nisi adjuvet gratia. Et hac ostenditur legis utilitas, quoniam quos facit prævaricationis reos, cogit confugere ad gratiam liberandos, & ut concupiscentias malas superes adjuvandos; iubet enim magis, quàm prævat; docet morbum esse, non sanat; imò ab eo potius, quod non sanatur, augetur.*

Ratio S. Thom. art. 2. 4. 8. & 9. petita ex infirmitate naturæ efficax est; nam homo qui legem servare tenetur, vel est justus, vel peccator. Si peccator, id est si in statu peccati mortalis existat, manifestum est, ipsum divinæ gratiæ adiutorio egere, ne in peccatum, in quod continuis immoderatarum passionum motibus incitatur, miserè prolabatur; cum enim viæ peccatorum, ut ait Psalmographus Psal. 34. sint *tenebra & lubricum, & Angelus Domini persequens illos, sine dubio non infrequentius peccando cadunt,*
quàm

quàm offendere solent qui per lubrica in tenebris ambulant. Et hic est sensus verborum horum sacrorum textuum, Eccles. 27. *Qui non in timore Domini continuerit se, citò corruet domus ejus.* Et Thren. 1. *Peccatum peccavit Ierusalem, propterea instabilis facta est.* Et Isaïæ 57. *Impii quasi fervens mare, quod quiescere non potest, & redundant fuentus ejus in conculcationem & lutum.*

Etenim, ut ratiocinatur D. Thomas, antequam hominis ratio reparetur per gratiam justificantem, potest quidem homo singula peccata mortalia vitare, & per aliquod tempus, quia non est necesse, quod continuo peccet in actu; sed quod diu maneat absque peccato mortali, esse non potest. *Quia sicut rationi subdi debet inferior appetitus* (verba sunt S. Thomæ) *ita etiam ratio subdi debet Deo, & in ipso constituere finem suæ voluntatis: per finem autem oportet, quod regulentur omnes actus humani, sicut per rationis judicium regulari debent motus inferioris appetitus. Sicut ergo inferiori appetui non totaliter subiecto rationi non potest esse, quin contingant inordinati motus in appetitu sensitivo: ita etiam ratione hominis non existente totaliter subiecta Deo, consequens est, ut contingant multa inordinationes in ipsis actibus rationis. Cum enim homo non habet cor suum firmatum in Deo, ut pro nullo bono consequendo, vel malo vitando ab eo separari vellet, occurrunt multa, propter quæ consequenda vel vitanda homo recedit à Deo, contemnen. o præcepta ipsius; & ita peccat mortaliter. Præcipuè quia in repentinis homo operatur secundum finem præconceptum, & secundum habitum præexistentem: quantum ex præmeditatione rationis homo possit*
aliquid

aliquid agere præter ordinem finis præconcepiti, & præter inclinationem habitus. Sed quia homo non potest semper esse in tali præmeditatione, non potest contingere, ut diu permaneat, quin operetur secundum convenientiam voluntatis deordinatæ à Deo, nisi citò per gratiam ad debitum ordinem reparetur. Quam doctrinam deprompsit Angelicus Doctor ex Patribus, Augustino lib. de Spirit. & lit. cap. 26. & lib. de catechiz. rudibus, cap. ult. Gregorio 22. Mor. c. 12. ubi ait: Peccatum, quod per pœnitentiam mox non deletur, suo pondere in aliud trahit. Chrysostomo etiam in in cap. 11. Matth. docente, quod quemadmodum fracto gubernaculo navis, non quò vult nauta vadit, sed quò tempestas impellit; ita homo gratia destitutus in peccata præceps ruit. At peccata non committuntur, nisi dum præcepta divina violantur: Ergo non potest peccator præcepta divina sine gratia servare.

Idem quoque de homine iusto facilè demonstrari potest, non solùm ratione generali petita ex eo, quod nulla res creata potest in quemcunque actum prodire, nisi virtute motionis divinæ, sed etiam ratione speciali, inquit D. Thomas art. 9. id est, propter conditionem status naturæ humanæ. *Quæ quidem licet per gratiam sanetur quantum ad mentem, remanet tamè in ea corruptio, & infectio quantum ad carnem, per quam servit legi peccati, ut dicitur ad Rom. 7. Remanet etiam quadam obscuritas in intellectu, secundum quam, ut etiam dicitur Rom. 8. Quid oremus sicut oportet, nescimus. Propter varios enim rerum eventus, & quia etiam nos ipsos non perfectè cognoscimus, non possumus ad plenum scire quid nobis expediat, secundum illud Sap. 9. Cogitationes*

tationes mortalium timida, & incerta providentia nostra. Et ideo necesse est nobis, ut à Deo dirigamur, & protegamur, qui omnia novit, & omnia potest.

Quæ ratio sic potest ad formam reduci: Homo etiam justificatus, gratiâ actuali destitutus non potest omnia peccata mortalia vitare: ergo nec totam legem servare. Consequentia patet, cum lex non nisi peccatis mortalibus violetur. Antecedens verò probatur. Tum quia, ut ait August. lib. de nat. & grat. c. 26. *Sicut oculus corporis etiam plenissimè sanus, nisi candore lucis adjunctus non potest cernere: sic homo plenissimè justificatus, nisi aterna luce justitia divinitus adjunctus, rectè non potest vivere.* Tum quia in in hujus vitæ periculis, urgente præsertim concupiscentiæ, quæ per gratiam non tollitur, motu, occurrunt varix & graves tentationes, non solum ab extrinseco, sed etiam ab intrinseco, quæ voluntatem debilem ad peccatum pertrahunt; quia nimirum voluntas majorem sequitur delectationem, trahit enim sua quemque voluntas, nisi vel gratia voluntatem proclivem retineat, vel majori, & puriori infusa delectatione, quæ à gratia inseritur, dominans cupiditas superetur: quam quidem cupiditatem voluntas tentata vincere quidem libertate sua potest, nunquam tamen vincet, nisi divinitus in bonum inclinetur, & muretur mentis affectio, quam ex cupiditate alliciente contrahit. Tum quia Justii ad mandata divina servanda auxilium Dei in quotidianis Ecclesiæ orationibus postulant, & pro servata lege gratias agunt. Hinc Auresianum Concil. can. 10. sic habet: *Adjutorium Dei etiam renatis & sanctis semper est implorandum.*

ms

ut ad finem bonum pervenire, vel in bono possint opere perdurare. Tum quia ad illud auxilium facilius obtinendum hortantur Sancti, ut ad Sacramenta piè accedamus, quia gratia sacramentalis ius quoddam importat habendi à Deo auxilia in necessitatibus, & in tribulatione, ut suo loco dicitur. Tum quia Iusti bonorum omnium suorum, fugæ peccati, & observationis mandatorum gloriam Deo ascribunt, illudque Davidicum sincerè decantant: *Non nobis, Domine, non nobis, sed nomini tuo da gloriam.* Denique quia ex effectibus idem apparet; sæpe enim Iustos cadere sinit Deus, ut sibi non tribuant quod stent. Nam ut ait Augustinus hom. 23. inter 50. *Agnosce gratiam ejus, cui debes & quod non admisisti. Mihi debet iste quod factum est, & dimissum vidisti; mihi debes & tu quod non admisisti.* Nullum est enim peccatum quod fecit homo, quod non possit facere alter homo, si desit rector à quo factus est homo. Quapropter idem Doctor sanctissimus docet justos debere gratias agere Deo, quod à peccatis servati sint. *Diligam te, Domine,* inquit lib. 2. Confess. c. 7. *& gratias agam, & confitebor nomini tuo: quoniam tanta dimisisti mihi mala, & nefaria opera mea. Gratia tua deputo, & misericordia tua, quod peccata mea tanquam glaciem solvisti. Gratia tua deputo & quacumque non feci mala. Et omnia mihi dimissa esse fateor, & quæ mea sponte feci mala, & quæ te duce non feci. Quis est hominum, qui suam cogitans infirmitatem, audeat viribus suis tribuere castitatem, atque innocentiam suam, ut minùs amet te, quasi ei minùs necessaria fuerit misericordia tua, quàm donas peccata conversis ad te. Qui enim vocatus à te sequutus est vocem tuam*

Et vitavit ea, quæ me de meipso recordantem & fatentem legit, non me derideat ab eo medico agrum sanari, à quo sibi prælitum est ut non agrotaret, vel potius ut minùs agrotaret. Et ideò tantumdem, imò verò amplius diligit, quia per quem me videt tantis peccatorum meorum languoribus exui, per eum se videt tantis peccatorum languoribus non implicari.

CONSECTARIUM II.

Ad vitanda quævis peccata venialia requiritur præter gratiam speciale privilegium, soli Deipara Virgini eximium.

SEquitur planè ex dictis; cùm enim gratia, quæ communiter datur, sive habitualis sit, sive actualis, non tollat infirmitatem humanæ naturæ, quam in hoc statu sentimus, nec amorem Dei actuale semper inspiret, nec divinæ nos regulæ infallibiliter conjungat, nec corruptionem inferioris appetitus perfectè sanet, fit inde, quod licet ratio motus appetitus singulos possit sua libertate & vigilia reprimere, non tamen omnes, inquit S. Thomas art. 8. Quia dum uni resistere nititur, fortassis alius insurgit; & etiam quia ratio non potest esse semper ter vigil ad hujusmodi motus vitandos. Hinc Tridentinum sess. 6. cap. 11. sic habet: Licet in hac mortali vita, quantumvis sancti & iusti, in levia saltem & quotidiana, quæ etiam venialia dicuntur, peccata quandoque cadant, non propterea desinunt esse

e. Te iusti; nam iustorum illa vox est & humilis, & verax: Dimitte nobis debita nostra.

Hanc doctrinam deprompsit sacra Synodus ex Scripturis & Patribus. 3. Reg. 8. *Non est homo, qui non peccet.* Psal. 31. *Remisisti iniquitatem peccati mei: pro hac orabit ad te omnis* (non solum peccator, sed) *sanctus.* Psal. 142. *Non intres in iudicium cum servo tuo, quia non iustificabitur in conspectu tuo omnis vivens.* 1. Joan. 1. *Si dixerimus quoniam peccatum non habemus, ipsi nos seducimus.* Sed Augustino maximè placuit locus ille orationis Dominicæ: *Dimitte nobis debita nostra.* Quæ verba ponderans lib. de natura & grat. c. 25. sic ait: *Parum attendit, cum sit acutissimus* (Pelagius) *non frustrà etiam iustos in oratione dicere: Dimitte nobis debita nostra; Dominumque Christum cum eam orationem dicendo explicasset, veracissimè subdidisse: Si enim dimiseritis peccata hominibus, dimittet vobis Pater vester peccata vestra: per hoc enim quotidianum spiritale quoddammodo incensum, quod ante Deum in altari cordis, quod sursum habere admonemur, infertur, etiamsi non hic vivatur sine peccato, dum subinde veniâ deletur quod ignorantia, vel infirmitate committitur. Idipsum docet Concilium Milevitanum cap. 6. Quisquis sic accipiens dum puraverit, ut dicat propter humilitatem dici nos habere peccatum, non quod verè ita est, anathema sit.*

Porro Augustinus hanc Catholicam veritatem non solum docet, sed probat ex professo variis in locis, atque Pelagianorum objectiones efficaciter dissolvit. Sic libro 2. de peccat. merit. c. 7. & 8. explicat illud Joannis: *Qui natus est ex Deo, non peccat, sed nec peccare potest.*

quia

quia semen eius in ipso manet. Quorum verborum sensus est, hominem qua parte renovatus est, nec peccare, nec peccare posse; sed quia per justificationem non perfectè absumitur vetustas, ideò qua parte homo adhuc in vetustate est, peccatum habet: regeneratus quippe, & similis Deo est, & dissimilis: similis per primitias spiritus, dissimilis per reliquias vetustatis: primo modo considerati peccare non possumus, sed posteriori sæpe peccamus, donec tota sanetur infirmitas, & accipiatur tanta libertas, in qua sicut necesse est, permaneat beatè vivendi voluntas, ita ut sit etiam benè vivendi, & nunquam peccandi voluntaria, felixque necessitas.

Id confirmat S. Pater *cap. 10.* exemplo Noë, Daniel, & Job, quibus tam magnum justitiæ Scriptura perhibet testimonium, ut *Ezech. 14.* dicatur: *Si fuerint tres viri isti in medio ejus, Noë, Daniel, & Job, ipsi juventutem suam liberabunt animas suas.* Et tamen tres istos non fuisse sine peccato, Scriptura ipsa testatur; nam & Noë ebrietatem refert, *Genes. 9.* & Daniel *cap. 9.* confitetur peccata sua: & Job seipsum peccatorem esse pronuntiat, *c. 9. 13. 14.* & aliis multis. Nec obest, quod variis ejusdem libri capitibus summis Job laudibus extollatur, dicaturque adeò justus, adeoque se ab omni opere malo abstinens, ut nullus esset ei similis super terram. Non itaque obest, quia ut ibidem Augustinus exponit, laudatur quidem Job tanquam excelsus, sed non tanquam absque omni peccato. Imo ideò justus dicitur, quia licet gravia peccata divinæ amicitiae repugnantia non committeret, veraciter tamen, & humiliter venialia sua, & quotidiana peccata confitebatur.

Eodem

Eodem ferè modo explicat idem Pater elogium Zachariæ & Elizabeth, de quibus *Luc. 1.* dicitur, *quod erant juſti ante Deum ambo, incedentes in omnibus mandatis, & juſtificationibus Domini ſine querela.* Quibus verbis eminens quidam eorum ſanctitas designatur, ſed minimè ab omni peccato veniali immunitas. Maximè quia eorum ſpectabilis vita talis erat, quam nullus hominum juſtè poſſet in accuſationis & criminationis querelam vocare; & ideo ante Deum juſti ambo dicebantur, quia probabilis, atque laudabilis eorum converſatio nullâ homines diſſimulatione fallebat, ſed ut apparebant hominibus, ita erant noti in oculis Dei. Non autem dictum eſt hoc ſecundùm perfectionem illam juſtitie, in qua verè, atque omni modo immaculati, perfectique vivamus. Ita totidem ferè verbis Auguſtinus *lib. de grat. Chriſti, c. 48.*

Ratio verò hujus veritatis ea eſt, quam tradit S. Doctor *art. 8.* Quia nimirum nequit homo omnes ſenſualitatis motus, unde peccata venialia proficiſcuntur, reprimere: dum enim uni reſiſtere nititur, ſæpè conſurgit alius; nec poteſt ratio ita eſſe pervigil, ut omnes illos impediatur. Maximè quia concupiſcentia, fomes peccati, qui à peccato eſt, & ad peccatum jugiter inclinatur, amor ſui, & amor mundi cor noſtrum ſemper ſolicitant, motus noſtros etiam pios inficiunt, dum obliquant: unde ut ait Bernardus, pedes qui ſunt animæ affectiones, dum in hoc pulvere gradiuntur, ex toto mundi eſſe non poſſunt, quia aliquando vanitati, aliquando voluptati, aut curioſitati pluſquàm oportet cedat animus vel ad horam. Ergo ſicut ex ulcere aperto, ſi non ſemper, ſaltem ſæpè ſanies fluit & pus; ita ex concupif

cupiscentiæ plagâ primi peccati granditate inflictâ peccati alicujus putredo & fœtor frequenter promanant. Peccatum enim primigenium; in quod cecidimus omnes, non in lutum solum, sed & super acervum lapidû non modò nos fœdavit, sed etiam vulneravit : unde *peccatum*, ut docet August. lib. de perf. just. c. 4. *sequuta est peccatum habendi dura necessitas, donec tota sanetur infirmitas, & accipiatur tanta libertas, in qua sicut necesse est, permaneat beatè vivendi voluntas, ita ut sit etiam benè vivendi, & nunquam peccandi voluntaria, felixque necessitas.*

Quæ ratio S. Thomæ ex Patribus deprompta convincit, ni fallor, quod licèt nequeat justus sine speciali auxilio, imò nec sine privilegio singulari diu à peccatis venialibus ex importuna & continenti concupiscentiæ impugnatione rationem plenè deliberatam præveniente, & voluntatem sensim sine sensu in suas partes alliciente proficiscentibus abstinere; nihil tamen vetat, quin justus aliquis eximium præsertim sanctitatis gradum adeptus possit peccata venialia plenè deliberata, quæve non nisi ob materiæ levitatem venialia dicuntur, absque speciali privilegio cum auxiliis sibi quadantenus connaturaliter impertitis vitare. Ad cujus evidentiam considerandum est, quod licèt ordo gratiæ, ut nomen ipsam sonat, merè gratuitus sit, totusque ex divina voluntate pendeat, ac proinde liberè à Deo cujus judicia abyssus multa, gubernetur; nihilominus tamen iuxta ordinatam Dei authoris supernaturalis providentiam invenitur in eo usitatus quidam gratiæ cursus, à quo Deus rarò, nec nisi nostrâ culpâ abscedit. Usitatus autem ille divini gratiæ modus in eo positus est

est, ut pro ratione, & distinctione gratiæ, & sanctitatis habitualis, gratias actuales nunc validiores & frequentiores, nunc infrequentiores & invalidiores largiatur: ad quem usitatum, & solitum agendi modum Deus non ita astringitur, quin interdum occultis iudiciorum suorum iudiciis homines non solum in virtute non multum adhuc progressos ad altiore sanctitatem attollat, sed etiam occallentes peccatores emolliat, & ad eminentem sanctitatis gradum brevi provehat; sicut è contra eximie virtutis viros in peccata prolabi interdum sinat, ut qui gloriatur, in Domino gloriatur. Cæterum nos de usitato gratiæ cursu sermonem habemus. Igitur qui ad sublimem sanctitatis, & christianæ puritatis gradum pervenere, his veluti continenter auxilia Deus infundit, quibus cum Deo perenniter conjuncti, ad superna semper anhelant, in cælis conversantur, mortalia floccifaciunt, humanis, terrenisque nec moti blanditiis, nec terribi minis, tentationes nullo negotio superant, quibus alii succumbunt. Quamobrem licet in illis excellenti sanctitate præditis sint quotidiana peccata, attamen peccata ex objecto venialia consultò, & prudenter, sin nunquam, certè rarò committunt. Quæritur illi quidem, & verè queruntur, multis sese & occultis insidiantis concupiscentiæ laqueis irretiri: ipsi etiam vel maximè sobrii gemunt se voluptati servire, dum servire valetudini sibi videntur: lamentantur etiam, se non rarò quæ sua sunt, non quæ *JESU-CHRISTI* quærere. Verumtamen viri illi pietate præstantes, quales erant Apostoli, Baptista, S. Joseph, &c. alii-que primæ notæ Apostolici viri, vix ac ne vix qui

quidem aliter quàm per ignorantiam, vel subreptionem peccant. Purissimæ namque animæ omne quo Deum offensum iri certò, & prudenter vident, continuò summo studio, summâ diligentia, summâ cautione declinant.

Et ratio S. Thomæ est convincens : Ideò namque S. Præceptor probat, hominem quemlibet justum non posse venialia vitare peccata, quia ratio non potest continenter attendere, nec jugiter vigilare, *propter corruptionem inferioris appetitus sensualitatis, cujus motus singulos quidem ratio reprimere potest (& ex hoc habent rationem peccati, & voluntarii.) non autem omnes ; quia dum uni resistere nititur, fortassis alius insurgit, & etiam quia ratio non potest semper esse pervigil ad hujusmodi motus vitandos.* Atqui defectus attentionis & vigilæ efficit peccata ex sola indeliberatione venialia, nec contingit in his, quæ talia sunt ex materiæ tenuitate prudenter admissa. Ergo viri sanctitate præstantes à venialibus deliberatis absque singulari privilegio, cum divinæ gratiæ auxiliis sibi concedi solitis & abstinere possunt, & diu interdum abstinere. Ex quibus sine negotio argumentis P. Gonet & aliorum oppositum sentientium occurret.

Secunda confectarii pars duas virtualiter includit. Prima ait, Beatissimam Virginem Deiparam ab hac peccandi venialiter necessitate esse excipiendam ; altera contendit, privilegium aliud uni esse Deiparæ eximium, nec esse ulli alteri concessum. Primum ampliùs demonstrabimus in fine tractatus de Incarnatione, dissertatione speciali, ubi pro modulo incomparabilis Matris dotes prosequemur ; in præsentì solùm Concilii Tridentini decretum, quo *sess. 6. can.*

23. docet hunc esse constantem Ecclesiæ Catholice sensum, proferemus: Si quis, inquit, hominem semel iustificatum dixerit posse in tota vita peccata omnia etiam venialia vitare, nisi ex speciali privilegio, quemadmodum in B. Virgine tenet Ecclesia, anathema sit. Nec est audienda impia Calvini vox in suo pestifero Concilii Tridentini antidoto aientis, se tale Virginis privilegium ultrò crediturum cum cœleste diploma protulerimus. Sed mentitur iniquitas sibi; diplomati enim cœlesti non crederet, qui Ecclesiæ, de qua Filius Patris cœlestis testimonium perhibuit, fidem negat: nihil ergo mirum si Matri Dei peccata asserit, qui sponsæ Dei Ecclesiæ errores ascribit. Patientur, si placet, nostri Novatores, ut Augustini iudicium Calvini sententiæ præferamus. Sic autem habet S. Pater lib. de nat. & grat. c. 36. *Exceptâ Sanctâ Virgine Mariâ, de qua propter honorem Domini nullam prorsus, cum de peccatis agitur habere questionem. Inde enim scimus, quod ei plus gratiæ collatum fuerit ad vincendum omni ex parte peccatum, quæ concipere ac parere meruit eum quem constat nullum habuisse peccatum, Sed de his plura loco memorato.*

Quod verò Deipara sola inter puras creaturas fuerit à peccato veniali exempta, nec illa prærogativa sit in alios Sanctos quâmlibet insignes dilatanda, tradit idem S. Pater, ibidem subiungens: *Hac ergo Virgine excepta, si omnes illos Sanctos & Sanctas, cum hîc viverent, congregare possemus, & interrogare utrum essent sine peccato, quid fuisset responsuros putamus? Nonne una voce clamassent: Si dixerimus, quia peccatum non habemus, ipsi nos seducimus, & veritas*
in

in nobis non est. Nec obest quod de B. Joanne Baptista canat Ecclesia, ipsum antra deserti teneris sub annis petivisse, ne levi fame vitam macularet. Non obest, inquam; tum quia illud de peccato veniali deliberato, quodve tale sit ex solius materiæ levitate, non verò ex subreptione, intelligi commodè potest; tum quia de peccato veniali in certa materia, putà vaniloquii, elogium illud interpretari possumus. Nam Sanctorum nonnullos à quadam peccati specie immunes dono speciali fuisse, ita ut nunquam contra aliquam virtutem in gradu heroico divinitus sibi concessam, sive mortaliter, sive venialiter peccaverint, putà B. Josephus contra castitatem, Apostoli contra fidem, juxta gratiarum divisiones, alii sic, alii verò sic, creditu piissimum est.

Contra statutam veritatem catholicam pauca è Scripturis deprompta testimonia Pelagius objiciebat, putà illud Matth. 5. *Esote perfecti, sicut Pater vester cælestis perfectus est.* Talis autem, ac tantus perfectionis gradus, qui Patris cælestis perfectionem æmulatur, procul dubio peccatum veniale excludit. Sed illud, aliaque hæretici Scripturis abutentis deliramenta validè confutat S. Augustinus *lib. 2. de peccat. merit. cap. 15.* Non enim perfectio Divina imitanda proponitur quasi ex æquo exscribenda, sed tanquam exemplar, ad quod aspirare, & juxta quod virtutes nostras reformare pro virili parte tenemur. Proponitur ergo nobis divina perfectio, non quam assequamur, sed ad quam piè proficientes, & peccata quotidiana plangentes, & spiritum nostrum scopentes accedamus. Alia argumenta è ratione petita in fine solvemus.

CONSECTA

CONSECTARIUM V.

*Perseverantia est speciale gratiæ donum,
imò & gratiarum omnium coronis.*

RECTè monet Angelicus noster Præceptor, perseverantiam trifariam accipi posse. Primò namque perseverantia significat habitum, per quem homo firmiter stat, nec à virtutum praxi per tristitias irruentes dimovetur: unde sicut continentia concupiscentias frenat, & delectationes moderatur, ita perseverantia mœroribus, tristitiæ, & tædio, quæ virtutum praxim non rarò comitantur, obstitit. Secundò accipitur perseverantia pro habituali dispositione, quâ quis firmum in bono perseverandi propositum experitur: quod propositum est gratiæ sanctificantis, virtutumque infusarum, atque acquistarum fructus suavissimus. Tertiò denique, & magis strictè accipitur perseverantia pro ipsa perenni boni praxi & continuatione ad finem usque vitæ inclusivè perdurante, de qua sic habet August. lib. de don. persever. cap. 1. *Asserimus donum Dei esse perseverantiam, quâ usque in finem perseveratur in Christo; finem autem dico, quo vita ista finitur, in qua tantummodò periculum est, ne cadatur.* Hoc prælibato,

Veritatem hujus consecrarii probat in primis Augustinus ex Scripturis. Psal. 15. *Providebam Dominum in conspectu meo semper, quoniam à dextris est mihi, ne commovear.* Psal. 65. *Non dedit in commotionem pedes meos.* Psal. 69. *Fiat manus tua super virum dextera tua, & su-*

per filium hominis, quem confirmaſti tibi, & non diſcedimus à te. Ex quibus verbis ſic inferit Auguſtinus lib. de don. perſever. cap. 7. *Manus ergo Dei eſt iſta, non noſtra, ut non diſcedamus ab eo.* Ponderat ibidem Auguſtinus illud Jerem. 32. *Timorem meum dabo in corde eorum, ut non recedant à me.* Quod quid eſt aliud, inquit S. Doctor, quàm talis, ac tantus erit timor, quem dabo in cor eorum, ut mihi perſeveranter adhareant? Expendit etiam illud Philip. 1. *Vobis donatum eſt pro Chriſto, non ſolum ut in eum credatis, ſed ut etiam pro illo patiamini.* Horum quippe unum (verba ſunt Auguſtini) pertinet ad initium, alterum ad finem; utrūque tamen eſt Dei donum, quia utrumque dictum eſt eſſe donatum: quod enim eſt initium verius Chriſtiano, quàm credere in Chriſtum? Quis finis melior eſt, quàm pati pro Chriſto? Adducit etiam in ejuſdem veritatis confirmationem, tum illud Rom. 14. *Domino ſuo ſtat, aut cadit; ſtabit autem, potens eſt enim Dominus ſtatuerre illum.* Tum illud 1. Petri 3. & 5. *Qui cœpit in vobis opus bonum, perficiet. Deus omnis gratia, qui vocavit nos in æternam ſuam gloriam in Chriſto Ieſu, modicum paſſos ipſe perficiet, confirmabit, ſolidabitque.*

Eandem veritatem tradunt ſacra Concilia, tum Carthaginenſe cap. 3. definiens adiutorium Dei valere, ut peccata non committantur, ac proinde ut in cœpta juſtitia permaneamus. Tum Arauſicanum II. cap. 9. *Divini muneris eſt cum rectè cogitamus, & pedes noſtros à fallacitate, & injuſtitia continemus.* Et can. 10. *Adiutorium Dei etiã renatis, ac ſanctis ſemper eſt implorandum, ut ad finem bonum pervenire, vel in bono poſſint opere perdurare.* Denique Tridē-
tinum

tinum *sess. 6. cap. 13.* expressè docet perseverantiæ munus, de quo scriptum est, *Qui perseveraverit usque in finem, hic salvus erit*, haberi non posse, nisi ab eo qui potens est eum qui stat, statuere, ut perseveranter stet; & eum qui cadit, restituere. Et *can. 22.* sic pronuntiat: *Si quis dixerit, justificatum vel sine auxilio speciali Dei in accepta iustitia perseverare posse, vel cum eo non posse, anathema sit.*

Denique hanc fidem docent summi Pontifices, cæterique Ecclesiæ Patres, una voce dicentes, boni operis initium, progressum, & finem speciali Dei auxilio esse ascribendum; quia sicut Deo auxiliante vincimus, ita eo iterum non adjuvante vincimur; nec sumus ad superandas diaboli insidias, & evincendas carnis concupiscentias satis idonei, nisi per quotidianum Dei adiutorium perseverantiam bonæ conversationis acceperimus.

Rationes autem hujus veritatis multæ à sacris Doctoribus proferuntur, quas breviter attingemus. In primis valdè urget Augustinus rationem ex orationibus & gratiarum actionibus Ecclesiæ petitam, quam unam abundè sufficere ait, nec opus esse ut operosas hac in re disputationes instituamus. Cum enim Ecclesia quotidie oret, ut credentes perseverent, ut sint in fide stabiles, & in opere efficaces; ut congregata Deus restauret, & restaurata conservet; ut quæ sunt bona nutriat, & pietatis studio quæ sunt nutrita custodiat, denique aliis missis, ut det nobis Deus perseverantem in sua voluntate famulatum, planè relinquitur perseverantiam usque in finem nobis à Deo donari. Sed inter orationes eminere Dominicam, & præ cæteris

veritatem istam in ea inculcari tradit idem Augustinus cap.7. *Si alia*, inquit, *documenta non essent, hac Dominica nobis ad causam gratia, quam defendimus, sola sufficeret.* Hinc ibidem observat, in singulis ferme petitionibus, sin expressè, certè tacitè perseverantiam postulari: v.g. quando justus petit à Deo, *sanctificetur nomen tuum*, quid aliud petit & rogat, quàm ut qui in Baptismo sanctificatus est, in eo quod esse cœpit perseveret, atque in illis permaneat bonis, quæ se accepisse novit. Similiter cùm petit, *adveniat regnum tuum*, nihil aliud poscit, nisi ut in sibi data sanctitate perseveret; neque enim aliter ei veniet regnum Dei, nisi quia perseveraverit usque in finem. Item cùm rogat, *Fiat voluntas tua*, perseverantiam petit; cùm enim voluntas Dei jam facta sit in Sanctis, ut adhuc fiat non petunt, nisi ut in eo quod cœperunt perseverarent. Cùm enim in ea petitione optent non solum ut homines ex infidelibus fiant fideles, quod ad bonum initium videtur pertinere, sed etiam ut justi in facienda voluntate Dei æquentur Angelis Dei, utique perseverantiam demonstrantur orare, quoniam nemo pervenit ad illam summam, quæ in regno est, beatitudinem, nisi in ea, quam in terra inchoavit, sanctimonia in finem usque perseveret. Sic etiam quando panem quotidianum & supersubstantialem petunt, nedum alimenta ut conserventur, sed etiam auxilia, quibus animus quotidie reficiatur, exorant; nedum corpus Christi petunt, à quo nolunt separari, sed ut in ea sanctitate permaneant petunt, quæ nullum crimén admittat, quo à Christo separari mereantur. Denique cùm dicunt Sancti, *Et ne nos inducas*

in tentationem, perseverantiam etiam rogant; neque enim quisquam in proposito Christianitatis perseverare desistit, nisi in tentationem primitus inferatur.

Secunda ratio S. Thomæ est hujusmodi. Omne quod est de se variabile, ad hoc ut figatur in uno indiget auxilio alicujus moventis immobilis: homo autem variabilis est de bono in malum, & de malo in bonum: ad hoc igitur ut immobiliter perseveret in bono, indiget auxilio divino. Ad cujus pleniorum elucidationem considerandum est, gratiam in hoc viæ statu imperfectè ab homine justo participari, quia nimirum diffusa in viatores gratia nec Deo actuali amore semper eos conjungit, nec appetitum perfectè sanat, nec divinæ regulæ indefectibiliter animum connectit. Ergo præter gratiam habitualement necessariam est justo speciale divinæ opitulationis auxilium, ut voluntas, quavis infirma, non deficiat tamen, nec adversitate aliqua superetur. *Cum liberum arbitrium de se sit vertibile* (verba sunt S. Thomæ 2.2.q.137.art.4.) & hoc ei non tollatur per habitualement gratiam præsentis vite, non subest potestati liberi arbitrii etiam reparati, ut se immobiliter in bono statuatur, licet sit in potestate ejus, quod eligat; plerumque enim cadit in nostra potestate electio, sed non exequutio. Quam solidissimam ratiocinationem ex Magistro suo Augustino deprompserat Doctor Angelicus; sic enim discurret S. Pater lib. de correp. & grat. cap. 12. *Si in tanta infirmitate vite hujus ipsi (Sanctis) relinqueretur voluntas, ut in adjutorio Dei, sine quo perseverare non possunt, manerent si vellet, nec in eis operaretur ut vellent, inter tot*

& tantas tentationes infirmitate suâ voluntas ipsa succumberet, & idæo perseverare non possent, quia deficientes infirmitate nec vellēt, aut non ita vellēt infirmitate voluntatis, ut possent. Subventum est igitur infirmitati voluntatis humana, ut divinâ gratiâ indeclinabiliter & insuperabiliter ageretur, & idedò quanvis infirma, non tamen deficeret, neque adversitate aliqua vinceretur.

Tertia ratio est, quia si justī semel in gratia constituti non indigerent speciali dono, quo perseverantia ipsa donetur, discretio perseverantis à non perseverante in liberum arbitrium, in illiusque bonum usum refunderetur, Deoque sola perseverandi facultas, non verò ipse perseverantiæ fructus asfereretur: Deo namque tanquam authori speciali illud solū tribuitur, quod largitur; non largiretur autem in illa hypothēsi ipsam perseverantiam Deus, sed unam duntaxat perseverandi potestatem. Consequens autem catholicus refugit sensus: tum quia illi repugnat Paulino oraculo 1. Cor. 4. *Quis te discernit? Quid habes quod non accepisti? Si autem accepisti, quid gloriaris quasi non acceperis?* Tum quia cū actus sit consummatio potestatis, & perseverantia actualis ipsā perseverandi facultate potior, quod minus est bonum summo bono Deo, majus autem bonum voluntati creatæ adscriberetur, quo nihil iniquius. Tum quia perseverantia est specialis prædestinationis effectus, imò beneficiorum omnium prædestinato concessorum coronis. Ergo in gratuitam Dei voluntatem revocandum est, cū prædestinatio sit gratuitum miserēdi propositum, & gratuita etiam beneficiorum præparatio, quibus certissimè

certissimè liberantur quicumque liberantur, ut aliàs satis, superque demonstratum est. Objectiones in fine dissoluemus.

CONSECTARIUM VI.

Gratiæ adjutorium ad opera supernaturalia omninò desideratur.

Non eget multis probationum momentis hujus consecrarii veritas per se lucens; etenim si ad opera moraliter bona, si ad tentationes superandas, si ad observanda legis naturalis mandata divinæ auxiliò gratiæ opus est, procul dubio ad opera supernaturalia, id est naturæ vires prætergressa, desiderari gratiam fatendum est. Nec enim alia de causa supernaturalia dicta sunt, nisi quia omnem naturæ conatum excedunt, atque naturalis facultatis sphaeram transiliunt. Denique omne illud, quod est ordinis supernaturalis, per se auxilium ejusdem ordinis exigit, ut debita causam inter & effectum, dispositionem inter & formam proportionis servetur. Ergo omne opus, quod per se ad gratiam sanctificantem, quæ est ordinis supernaturalis veluti substantia, manuducit, ex auxilio supernaturali procedere necesse est. Unde Tridentinum *sess. 6. can. 3.* definit, omnia quæ conducunt ad hoc ut gratia justificationis conferatur, esse à præveniente Spiritus sancti inspiratione.

Dices: Videtur quidem per se notum, opus entitativè supernaturale naturæ vires excedere; sed quid vetat dicere, dari in natura initium operis supernaturalis, & justificationis, quatenus

facienti quod in se est ex viribus naturæ, ex pacto & lege statuta largitur Deus justificationis beneficium, ita ut per bona moralia ex fine honesto elicitæ præparetur animus ad ea sibi asciscenda auxilia, quibus justificationis gratiam infallibiliter consequetur?

Respondeo hanc doctrinam, quæ unum ex præcipuis Ludovici Molinæ sententiæ capitibus continet, nulla nobis posse ratione probari. Tum quia in natura nullum esse quit justificationis initium, quod sit primæ gratiæ conferendæ motivum: prima quippe gratia, si quæ ulla, gratis omnino donatur; unde secundum omnes Theologos, licet in dubium revocetur, an prædestinatio ad gloriâ prævisa merita supponat, de prædestinatione tamen ad gratiam id in controversiam vocare nefas est. Nam *non ex operibus, sed ex vocante dictum est: Iacob elegi, Esau autem odio habui*, ut dicitur *Rom. 8*. Tum quia multos ad gratiam peccatores evehit Deus, non sese parantes, vel ad justificationem operum naturalium honestate viam sternentes, sed obices actu ponentes: imò interdum occulto iudicio nonnullos brevi ad cumulû sanctitatis ex sentina iniquitatis extollit, aliosque minùs perversos relinquit; & nunquam eximie pietatis Sanctos levibus succumbere tentationibus sinit, ut qui gloriatur, in Domino glorietur. Ergo obstruatur omne os necessarium est, nec in dispositiones à libero arbitrio iactas refundi potest justificationis æconomia. Tum quia pactum illud dandi gratiam benè naturalibus viribus agentis, vel exigit totius legis naturalis observantiam, vel uno, aut altero bono opere naturali contentum est. Primum est impossibile, cum nequeat

homo

homo ſine ſpeciali Dei gratia totam legem ſervare: ergo ſi requiritur totius legis cuſtodia, homo faciens ex viribus naturæ quod in ſe eſt, nunquam debitam diſpoſitionem obtinebit. Secundum verò eſt evidentiffimè falſum, ſequitur enim ex eo, omnes quàmlibet perditos, juſtificationis gratiam conſequi oportere, cum nullus adeò ſceleſtus reperiatur, qui bonum aliquod ex officio opus non efficiat. Veridicè enim Auguſtinus *lib. de ſpirit. & lit. cap. 28.* pronuntiavit: *Sicut non impediunt à vita aterna juſtum quædam peccata venialia, ſine quibus hæc vita non ducitur: ſic ad ſalutem aeternam nihil proſunt impio aliqua bona opera, ſine quibus difficillimè vita cujuſlibet peſſimi hominis invenitur.* Ergo fictitium eſt illud pactû, cum nequeat deſignari opus viribus voluntatis elicitum, cujus intuitu Deus gratiam juſtificationis largiatur. Et certè Chriſtus author gratiæ pactura illud non inivit, quo totus gratiæ ordo à fundamentis ſuffoditur, quo efficitur ut gratia non ſit gratia, utque gratia non detur gratis. Tum etiam, quia bonorum ille operum naturalium apparatus exigitur vel tanquam aliquid improporcionatum, vel tanquam aliquid proporcionatum ad gratiam, vel ut latiniùs loquar, illa naturalis honeſtatis apparatio ad obtinendam gratiam vel inæquabiliter diſponit, vel rigido, ſtricto que jure eam promeretur. Secundum eſt purum putum Pelagianismi virus: primum verò eſt impertinens; ridiculè namque Deum ad gratiam largiendam aſtringi comminiſcimus propter opus ad gratiam conſequendam per ſe ineptum. Ergo omne opus ad acquirendam juſtificationem ordinatum, non voluntatis creatæ ſibi relictæ parvus

est, sed auxilii Dei supernaturaliter moventis fructus, qui & voluntatem adjuvandam præparat, & adjuvat præparatam.

Ex quibus intelliges veritatem illius suppositionis, quam tradit S. Thomas q. 14. de verit. art. 11. ad 1. *Si quis in sylvis nutritus ductum rationis sequatur in appetitu boni, & fuga mali, certissime tenendum est, quod ei Deus per inspirationem revelaret ea quæ ad credendum sunt necessaria, vel aliquem fidei prædicatorem ad eum dirigeret, sicut misit Petrum ad Cornelium.* Porro ille sic nutritus non sequeretur ductum rationis sine gratiæ adjutorio: non negamus autem, sed ultrò fatemur, Deum ex certa lege dare gratiam, imò & gloriam facienti quod in se est ex viribus gratiæ, juxta illud August. lib. 18. de Civit. *Deus naturarum omnium sapientissimus conditor, & justissimus ordinator, qui terrenorum ornamentorum maximum instituit mortalæ generis humanum, dedit hominibus quadam bena huic vitæ congrua, eo pacto æquissimo, ut quicumque mortalis talibus bonis rectè usus fuerit, accipiat ampliora atque meliora, ipsam scilicet immortalitatis pacem.*

Dices. rursus: Opera illa moraliter honesta, quibus Deus in sententia Molinæ ex pacto cum Christo inito justificationem spondit, non sunt accommodatæ ad gratiam dispositiones veluti positivæ, sed veluti negativæ, removens impedimenta gratiæ, quam Deus unum ob peccatum denegat. Sublato ergo peccati objectaculo, gratiam Deus ex congruitate sua in misericordia fundata largitur.

Respondeo rationes superiùs adductas omnes. illas dispositiones etiam negativas gratiam
infalli

infallibiliter obtinentes refutare, cum praesertim sine gratia natura propriis viribus permitta, impedimenta peccati non remotura, sed positura sit, quin & voluntas ope gratiae deserta apponit iniquitatem super iniquitatem, cum legem sine gratia servare non valeat. His omnibus adde S. Thomam in cap. 12. ad Hebr. lect. 3. ad illa verba, *Contemplantur ne quis desit gratia Dei, sibi obicientem, quod si gratia non detur ex operibus, sed tantum ex hoc, quod aliquis non ponit obstaculum: ergo habere gratiam dependet ex solo libero arbitrio, & non ex electione Dei, quod est error Pelagianus*; Respondere: *Dicendum, quod hoc ipsum, quod aliquis non ponit obstaculum, ex gratia procedit*. Ergo dispositio etiam negativa ad gratiam est gratiae beneficium, nec in liberi arbitrii vires refundenda est. Et ratio est, quia quod cor sit rectum, sit carneum, sit docile, nec divinae gratiae desit, est gratiae effectus & opus dexteræ excelsi, non naturæ corruptæ, ut ex dictis hactenus satis, superque liquet; alioquin daretur in nobis justificationis initium, & primitiva discretionis unius ab alio ratio à libero arbitrio gratiae obicem non ponente peteretur. Ergo quidquid cum justificatione connexionem habet, non à natura, sed à principio supernaturali proficiscitur.

Dices tertio. In actu supernaturali duo distinguuntur; substantia, seu entitas actus; & modus illius; nempe supernaturalitas: v. g. cum assentior veritatibus revelatis, assensus ille, utpote actus vitalis, ab intellectu procedens non potest non esse quoad speciem, subindeque quoad entitatem naturalis; ex eo verò, quod assensus ille ex vi pie motionis voluntatis in finem superna

supernaturalem referatur, modum supernaturalitatis nanciscitur: licet ergo ad modum illum adventitium efficiendum gratia supernaturalis desideretur, attamen ad substantiam actus efficiendam sola sufficit virtutis naturalis efficacia, cum effectus naturalis vires naturæ nequaquam excedat.

Respondeo doctrinam hocce in argumento contentam multoties fuisse à nobis refutatam, & posse amplius refelli: tum quia absolutè Scriptura, Concilia, & Patres tradunt actum fidei esse ex gratia. *Vobis*, inquit Doctor Gent. Philip. 1. *donatum est pro Christo non solum ut in eum credatis, sed etiam ut pro illo patiamini*. Utrumque ergo ad gratiam pertinet, & fides credentium, & tolerantia patientium, cum utrumque dicatur esse donatum. Ephes. 1. *Gratiâ Dei estis salvati per fidem, & hoc non ex vobis, Dei enim donum est*. Ioan. 6. *Nemo potest venire ad me, nisi Pater qui misit me, traxerit eum*. Venire autem ad Christum est in Christum credere; subiungit enim Veritas post verba præfata: *Omnis qui audivit à Patre, & didicit, venit ad me.::: Sunt quidam ex vobis, qui non credunt, propterea dixi vobis, quia nemo potest venire ad me, nisi Pater qui misit me, traxerit eum*. Hinc August. lib. de prædest. Sanct. cap. 8. *Quid est, ad me veniet, nisi credet in me? Ergo trahi à Patre ad Christum, & audire, ac discere, ut venias ad Christum, nihil aliud est, quàm donum accipere à Patre, quo credat in Christum*. Certè si attestante Apostolo 2. Cor. 3. *Non sumus sufficientes cogitare aliquid ex nobis quasi ex nobis, sed sufficientia nostra ex Deo est, quomodo poterimus veritatibus supernaturalibus sine Dei*
gratia

gratia credere, cum minus sit cogitare, quam credere; cum credere nihil aliud sit, quam cum assensu cogitare, cum cogitet omnis qui credit, nec nisi cogitando credere possit. Si ipsemet Doctor Gentium veniam se dicat esse consequutum, 1. Cor. 2. *ut fidelis esset*, non quia fidelis erat, manifestum est fidei assensum non nisi Deo miserante obtineri. Idem docent sacra Concilia: Carthaginense can. 4. *Donum Dei est & scire quid facere debeamus, & diligere ut faciamus*. Arausicanum can. 7. *Falluntur spiritu qui putant absque illuminatione, & inspiratione Spiritus sancti homines posse per natura vigorem aliquid quod ad salutem pertineat, cogitare*. Et can. 9. *definit, divini esse muneris cum & veritatem cogitamus*. Quod & docet Tridentinum sess. 6. ubi anathemate percellit asserentes, sine præveniente sancti Spiritus inspiratione, atque ejus adjutorio hominem credere posse.

Patres eandem veritatem contestantes refert Augustinus lib. *de don. persever. cap. 17.* ubi laudat illud Cypriani: *In nullo gloriandum quando nihil est nostrum*. Illud etiam Ambrosii: *Non est in potestate nostra cor nostrum, & nostra cogitationes. Deus quos dignatur, vocat; & quem vult, religiosum facit*. Illud itidem Nazianzeni: *Qui dedit credere, dabit & cōfiteri*.

Varias etiam profert sanctissimus Doctor rationes, quibus hanc veritatem stabilit. Tum ex necessitate orationis; nemo enim orat nisi ad consequendum quod non habet. Fideles autem orant pro fidelibus, ut ad fidem convertantur. Inaniter, & perfunctorie potius quam veraciter pro eis, ut doctrina cui adversantur, credendo consentiant, Deo fundimus preces, si ad ejus non per-

tinet

tinet gratiam convertere ad fidem suam, inquit August. epist. 107. Inaniter etiam, & perfuntoriè potius quàm veraciter magnas cum exultatione agimus Deo gratias, quando aliqui eorum credunt, si hoc in eis ipse non facit. Non fallamus homines, nam Deum fallere non valeamus. Non oramus Deum, sed orare nos fingimus, si nos ipsos, non illum credimus facere quod oramus. Non gratias Deo agimus, sed nos agere fingimus, si unde illi gratias agimus, ipsum facere non putamus.

Tum quia alii articulis fidei assentiuntur, alii non assentiuntur: illi quidem ex misericordia, isti ex justo Dei judicio. Quod autem nonnullis ex Dei misericordia convenit, aliis verò ex judicio Dei denegatur, ad gratiam Dei pertinet. Unde *lib. de predest. Sanct. cap. 6. ait: Multi audiunt verbum veritatis, sed alii credunt, alii contradicunt: quis hoc neget? Quis hoc ignoret? Sed cum aliis praparetur voluntas à Domino, aliis non praparetur voluntas à Domino, discernendum est utique quod veniat de misericordia ejus, quod de judicio. Et cap. 8. Fides igitur, & inchoata, & perfecta donum Dei est (vides & assensum, & perfectionem assensus apertè indigitari per fidem inchoatam, & perfectam.) Et hoc donum quibusdam dari, quibusdam non dari omnino non dubitet, qui non vult manifestissimis sacris literis repugnare. Cur autem non omnibus detur, si deum movere non debet, qui credit ex uno omnes esse in condemnationem sine dubio justis man: isa ut nulla Dei esset justa reprehensio, etiamsi nullus inde liberaretur. Unde constat, magnam esse gratiam, quod plurimi liberantur, & quid sibi deberetur, in iis qui non liberantur, agnoscant: & qui gloriantur, non in suis meritis, quæ paria videntur*

vident esse damnatis, sed in Domino gloriantur.

Tum quia si substantia, & entitas assensus fidei è viribus naturæ proficiscatur, daretur in nobis initium salutis; ille enim assensus, tam bonus, tamque utilis non potest non juvare ad salutem: unde in negotio salutis primas daremus voluntati, & componentes cum Deo partem fidei nobis vindicaremus, & partem Deo relinqueremus; & quod indignum est, primam partem, nempe entitatem actus, nobis; sequentem, nimirum modum accidentalem, Deo tribueremus, & in eo quod dicimus esse amborum, priores nos, posteriorem Deum faceremus. Quam rationem prosequitur August. *de predest. Sanct. cap. 2.*

Tum quia si substantia & entitas actus fidei è solius naturæ viribus procedat, id est si intellectus possit assentiri mysteriis tam arduis & excelsis, qualia sunt supernaturalia, poterit etiam voluntas assensum illum in finem supernaturalem semel cognitum & creditum ordinare, imò connaturaliter ordinabit, cum motus voluntatis cognitioni intellectus accommodetur: ergo si ad entitatem assensus non sit necessaria gratia supernaturalis, nec etiam necessaria erit ad modum illum supernaturalem ex ordine ad finem supernaturalem enatum. Unde omnis gratiæ necessitas prorsus de medio tolletur; postquam enim difficiliora viribus naturæ asseruimus, frustra ad faciliora influxum gratiæ desideramus; postquam initium salutis, nempe entitatem assensus vires naturales non excedere diximus, perperam progressum salutis eas prætergredi comminiscimur. Discursus est Augustini *de predest. Sanct. cap. 2.* his verbis: *Cum autem*

& quem misit Jesum Christum. Hinc Bernardus *lib. de grat. & lib. arb.* totum quod est in actu supernaturali, à gratia proficisci sic egregie declarat : *Quid igitur agit , ait , liberum arbitrium? Breviter respondeo, salvatur. Tolle liberum arbitrium , non est quod salvetur : tolle gratiam, non erit unde salvetur. Opus hoc sine duobus effici non potest ; uno, à quo fit ; altere, in quo fit. Non partim gratia , partim liberum arbitrium, sed totum singula opere indivisus peragunt. Totum quidem hoc, totum illa, sed ut totum in illo, ita totum ex illa.*

Instabis : Assensus ille, quem intellectus præbet veritatibus revelatis, obtineretur ex vi signorum credibilitatis , quibus permota voluntas movet intellectum , ut mysteriis quæ credantur dignissimis assentiatur : atqui signa credibilitatis vi intellectus naturali penetrantur : ergo vis naturalis satis potens est ad assensum illum eliciendum.

Respondeo concurrentibus etiam præclaris illis , & luminosis Christianæ Religionis argumentis, desiderari insuper divinæ gratiæ opitulationem ; nisi enim Deus intus luceat , intus moveat , intus coruscet , & ut loquitur Concilium Arausicanum can. 7. *in consentiendo sinceritatem infundat*, frustra prædicator forinsecus tonabit, frustra & miracula patrabit. Nam Judæi visis signis occalluere, nec ad fidem, vel poenitentiam tantis Christi virtutibus permoveri potuerunt. *Percurrat Apostolus orbem, prædicet, hortetur, plantet, riget, increpet, instet : ut tamen his studiis auditor permoveatur, non Doctor, neque Discipulus, sed gratia sola efficit, canebat olim laudatus Prosper. Præclara in hujus veritatis*

veritatis confirmationem Augustini testimonia
 suprâ retulimus, quibus illud adjunge ex libro
 de prædest. Sanct. c.8. *Cùm Evangelium prædi-
 catur, quidam audiunt, quidam non credunt; sed
 qui credunt prædicatore extrinsecus intonante,
 intus à Patre audiunt, atque discunt; qui autem
 non credunt, foris audiunt, intus non audiunt,
 neque discunt: hoc est, illis datur ut credant, illis
 non datur; quia nemo, inquit, venit ad me, nisi
 Pater qui misit me, traxerit eum.*

Urgebis: Illa motio si sit supernaturalis, sup-
 ponit judicium supernaturale, cùm nihil sit vo-
 litum quin præcognitum, & ignoti sit nulla cu-
 pido. Atqui nullum judicium supernaturale præ-
 cedere potest piam illam voluntatis motionem
 unde actus fidei proficiscitur, cùm fides sit vitæ
 supernaturalis initium: Ergo motio illa vi na-
 turalis virtutis ante fidem habetur; quidquid
 enim præcedit piam motionem, fidem ipsam
 antevertit, cùm fides motionem illam præsup-
 ponat.

Respondeo motionem, & affectum volunta-
 tis præveniri non solum propositione articulo-
 rum & credibilitatis eorundem, sed etiam judi-
 cio interno, mediante auxilio supernaturali eli-
 cito, quo intellectus practicè judicat objecta
 proposita esse credibilia; tale judicium sequi-
 tur motio, & affectus voluntatis divinitus per-
 motæ, & gustantis divina, quem affectum fides
 deinde, seu assensus perfectus comitatur: in
 divinis enim prius gustamus, postea videmus,
 juxta illud Propheticum, *Gustate, & videte*; &
 illud: *Nisi credideritis, non intelligetis*; non
 quòd voluntas prius velit quàm cognoscat ra-
 tio, sed quia veritatibus cognitis, & propositis

non

non assentitur intellectus, nisi voluntatis divina sapientis affectu permotus.

Insistes : Hæreticus multis articulis assentitur etiam supernaturalibus, nec tamen gratiam supernaturalem habet, quâ ad assentiendum permoveatur : ergo assensus non à gratia supernaturali, sed à naturalis facultatis viribus procedit.

Respondeo, facultatem naturalem in objectum supernaturale materialiter sumptum posse motivo naturali ferri ; sic hæretici aliquos articulos supernaturales fide humana recipiunt, alios de humano arbitratu rejiciunt ; ideoque in ipsis nullus assensus supernaturalis invenitur, sed merè naturalis, non è pia voluntatis motione, sed ex pertinacia, & propria electione profectus : unde in eis fides non est, sed fidei larva ; non aurum, sed aurichalcum.

Posset difficultatem aliquam facessere auctoritas S. Thomæ 2.2. q. 171. art. 2. ad 3. dicentis : *Aliquid est supra naturam hominis, vel quantum ad substantiam actus, ut miracula facere, & cognoscere occulta divina sapientia ; alia quantum ad modum actus, non quantum ad substantiam ipsius, ut diligere Deum, & eum cognoscere in speculo creaturarum.* Ubi subindicare videtur, dilectionem Dei esse supra naturam hominis, subindeque supernaturalem quantum ad modum actus, non quantum ad substantiam ipsius. Verùm prætermisissis variis Interpretum expositionibus, ea solùm contentus ero, quam textus ipse subindicat. Loquitur nimirum Doctor Sanctus de amore Dei naturali, cognitioni Dei in speculo creaturarum correspondenti, qui quoad substantiam vires naturæ non superat, sed ejus potius

potius inclinationi est admodum consentaneus; tamen si quoad modum, nempe ut sit efficax, ut sit super omnia, ut omnia Deo etiam ingruentibus tentationum difficultatibus subiciat; quoadmodum, inquam, illum naturæ vires exsuperet.

CONSECTARIUM VII.

Objectionum, quæ contra hætenus statuta proponi solent, confutatio.

Totum objectionum momentum ad duo, aut tria capita revocatur, quibus omnia, & singula statuta consecratoria peræquè impugnantur. Etenim si gratia & ad vincendas tentationes, & ad diligendum Deum, & ad servanda legis præcepta, & ad non peccandum; seu mortaliter, seu venialiter, & ad perseverandum desideretur; ægrè intelligi potest quomodo vel libertas arbitrii salva consistat, cum non sit ad illa prædicta prompta & expedita? Quomodo imputari potest sive officiorum omissio, sive præceptorum transgressio, si gratia desit, sine qua nec benè agere, nec à peccato possumus abstinere? Denique si non minùs justis quàm impiis necessaria sit divinæ gratiæ opitulatio, istis ut convertantur, illis ut in data sanctitate permaneant, perperam boni dicentur validiores, sed omnes peræquè erunt invalidi, cum utrique cum adest gratia, bene agant; cum deest, malè operentur. Ergo nihil juvat in virtute procedere, cum eandem semper infirmitas, cui semper gratiæ adminicula necessaria sunt, perseveret.

Verùm

Verum hæc argumenta variis Theologiæ nostræ locis contrita sunt, ibi præsertim ubi de efficacibus divinæ voluntatis decretis tomo primo lato calamo disputavimus. Quare ut ab iisdem cantilenis recantandis, & importunis infinitarum tricarum nodis liberemur, solida quædam principia stabiliemus, quorum splendore suprapositarum, & aliarum sine fine fruticantium replicarum offutiæ discutientur.

Sciendum itaque primò, libertatem in statu naturæ corruptæ permanere quidem, sed infirmam; ut enim ait Bernardus, cecidimus omnes in Adamo simul in lutum, & super acervum lapidum: unde nedum coinquinati sumus originali culpa, *sed & collisi, & confracti, & in omnibus viribus graviter vulnerati*. Voluntas ergo nedum spoliata gratuitis, sed & in naturalibus vulnerata, semivivaque relicta, libertatem quidem retinet, sed debilem & lauciam; quid ergo mirum, si adjutorio Dei egeat, quo infirmitas adjuvetur? Permanet ergo potentia physica boni malique capax, sed in malum ptona, ad bonum autem nõ satis comparata, nisi adjuvetur ab omnipotenti bono. Porro auxilium illud gratiæ, ut ex Augustino docet Angelicus Doctor, quibuscumque datur, misericorditer datur; quibus autem non datur, ex justitia non datur in pœnam præcedentis peccati, saltem originalis. Nec propterea ad impossibilia nos Deus astringit, quia ut *art. 4. ad 2.* & alibi pluries docet idem D. Thomas: *Illud quod possumus cum auxilio divino, non est nobis omnino impossibile, secundum illud Philosophi in 3. Ethic. Quæ per amicos possumus, aliquantulum nos possumus*. Quod quidem auxilium quia est in manu amici, omnibus Deus offert, illad-
que

que conferret, nisi alicujus peccati obex intercederet. Deus enim gratiam nisi ex culpa non denegat, jubendoque admonet. facere quod possis, petere quod non possis. Hinc Augustinus *lib. de grat. & lib. arbit. cap. 16.* ait : *Ideo jubet Deus aliqua, quæ non possumus, ut noverimus quid ab illo petere debeamus. Ipsa est enim fides, quæ orando impetrat quod lex imperat.* Nec est simile de homine, cui tibiæ amputatæ sunt, qui incedendi vim habere dici non potest, tametsi per miraculum ambulandi facultatem recipere queat. Non est, inquam, simile; quia miraculum illud tibiærum restitutivum juxta solitum divinæ providentiæ cursum omnibus non offertur; secus verò gratia, quæ nullum prorsus deserit, nisi prius ipsa deseratur. Ex quibus facile secundæ instantiæ occurre, quomodo nimirum justè etiam carenti auxilio culpa imputeretur. Sed de his alibi fusissimè diximus.

Sciendum secundò, alio etiam modo explicari commodè posse, quomodo voluntas & liberè mala patret, & imputabiliter patret; modo, inquam, in via S. Thomæ solidissimo, ex duplici capite petito. Primum est, quod voluntas potest opera saltem ex objecto indifferentia efficere, subindeque minora gratiæ impedimenta ponere: unde habent semper homines quid agant, ne malè agant. Possunt etiam opera ex objecto moraliter bona, tametsi aliquà semper circumstantiâ sordidata elicere, quæ dum faciunt minùs mali sunt, minusque Deo reluctantem voluntatem custodiunt. Qua de causa etsi ad gratiam sese disponere nequeunt, possunt tamen minora impedimenta apponere, subindeque ad Dei lumen quandocumque affulserit accipien-
dum

dum se reddere quadantenus paratiores , vel certè minùs imparatos ; debent enim, ut Augustinus tradit, facere timore poenae, qui nondum possunt amore justitiæ. Secundus explicandi modus , longèque planissimus in hoc situs est, quod possit voluntas etiam infirma quodlibet peccatum , sive mortale , sive veniale vitare, quanquam omnia simul , nec diu vitare queat. Scio contra hoc fieri solere argumenta calculatoria, ex partibus ad totum, ex unitatibus ad numerum, à sensu diviso ad compositum. Verùm hujusmodi sophismatum inanitas sponte abibit in fumum, si consideretur in moralibus, & etiam in exercitio facultatum naturalium usum & continuationem grandem invehere difficultatem. Sicut ergo absurdissimè argumentaretur , qui contenderet hominem infirmum mille posse decurrere passus , quia & illum , & illum seorsum sine labore passum peragere potest ; qui suadere vellet posse stomachum debilem vigintiquatuor horas à cibo abstinere , quia in qualibet designabili à cibo potest sine difficultate sibi temperare ; ita nihilo minùs ridiculus habendus esset qui credit voluntatem infirmam quodlibet peccatum vitare valentem , posse etiam omnia collectivè effugere ; in vita enim morali continuatio est difficultas difficultatum, quia eâ fatigatur cor humanum alioquin infirmum. Ut ergo firmetur arbitrii instabilitas , ut sanetur infirmitas , ut roboretur imbecillitas , ut leniatur fastidium , cœlestis gratiæ virtute , & suavitate opus est , quâ dilatatum cor viam mandatorum fortiter currat & alacriter. Quamobrem , ut benè observat sapientissimus Magister Joannes à S. Thoma , in his argumentis calca

calculatoriis debet fieri inductio hoc pacto. *Po-*
test hunc actum, & illum, & illum elicere, & diu,
& continenter elicere, & difficultates actuum
proxim impediētes superare : ergo potest to-
tam legem implere. Et tunc falsum est antece-
dens.

Sed dices : *Esto hæc vera sint pro impiis, sed*
cur tantam gratiæ necessitatem ad justos ipsos
dilatamus? Quid in eis operatur gratia sancti-
ficans? Quid virtutum infusarum innumerabilis
honestas? Quid donorum Spiritus sancti beatif-
sima copia, si insuper continenti Dei adjutorio
justus indigeat?

Respondeo hæc instantia contineri tertiam
 suprà positam difficultatem, ad cujus elucidatio-
 nem

Sciendum tertio, quod ut aliàs observavimus,
 quanvis ordo gratiæ totus ex divina voluntate
 pendeat, cujus consilia inscrutabilia humili ob-
 sequio adoranda, non temeraria disquisitione
 scrutanda sunt; attamen datur quidam consue-
 tus, & usitatus gratiæ cursus, quem Deus serva-
 re assolet. In hoc autem consistit Dei superna-
 turalis authoris consueta agendi ratio, ut pro
 modo & gradu sanctificantis & habitualis gratiæ
 distinctas etiam gratias actuales connaturaliter
 impertiatur: suavis namque Dei providentia
 juxta exigentiam, & inclinationem formarum
 concursus exhibet suum, subindeque gratiæ
 sanctificantis, virtutibus infusis, donis Spiritus
 sancti auxilia proportionata ministrat; sicut
 etiam distinctis Sacramentis devotè susceptis
 distincta auxilia correspondere alibi dicemus,
 dum gratiam sacramentalem suo loco interpre-
 tabimur. Multum ergo invat in gratia proce-
 dere

dere, & ire de virtute in virtutem; non solum quia habitualis infirmitas sanatur, & concupiscentiæ æstus temperatur; sed etiam quia pro distinctione gradus sanctitatis distincta etiã auxilia conferuntur; & sicut animæ minùs provectæ minoribus gratiæ actualis auxiliis fruuntur, subindeque tentationibus faciliùs succumbunt, & frequentius: ita magis provectæ, & altiore sanctitatis gradum adeptæ actuales gratias & fortiores habent, & crebriores. Itaque omnes Iusti beneficio gratiæ sanctificantis & veritate peccata, & servare præcepta legis possunt. Quo sensu dixit Angelicus Doctor 3. p. q. 62. art. 6. ad 3. *Minima gratia potest resistere in libet concupiscentiæ.* Quia nimirum gratia sanctificans, virtutesque illi annexæ dant posse in actu primo, quod quibusdam auxiliis actualibus roborari solet. Sed insuper verum est, vires Justorum esse inæquales, & quia gratiæ sanctificantis gradus inæqualis est, & quia distinctæ illis gratiæ actuales correspondent.

Instites: Perperam dicimus, Sanctorum alios aliis esse validiores, cum utrique gratia efficaci egeant, quæ ut ait S. Prosper, hominem cum salvat, causis anceps non suspenditur ullis; quia nimirum est omnipotens, & ut Augustinus lib. de predest. Sanct. cap. 8. dixit, *hæc gratia cum cordibus hominum divina largitate tribuitur, à nullo duro corde respuitur; ideo quippe tribuitur, ut duritia cordis primitus auferatur.* Ergo viz quamlibet emeritæ virtutis, non minùs erit invalidus, quàm minùs sanctitate provectus, cum sine gratia efficaci nec ille benè agat, nec cum gratia efficaci ipse benè agere omitat.

Respondeo, vires magis, minusve Iusti semper

per esse inæquales : tum quia vires se tenent ex parte actus primi ; unde eo homo rectè validior dicitur , quo facultates habet ad agendum expeditiores , promptiores , & proniores ; quam quidem pronitatem , promptitudinem , & expeditam facilitatem habitus causant. Tum quia juxta suavem , & usitatum divinæ providentiæ supernaturalis cursum majoribus donis habitualibus instructo validiora & crebriora auxilia impertitur , sicut accedenti religiosè ad Sacramenta specialiora , id est efficacia , in necessitate , in opportunitatibus , in tribulatione auxilia confert.

Scio alios aliter hunc nodum explicare dicentes , gratiam efficacem dupliciter spectari posse , vel in se separatim , vel cum divina voluntate conjunctam : priori modo considerata non solum dissentienti potentiā non aufert , sed etiam illa eadem , quæ levi cum cupiditate pugnans victrix fuerat , auctâ deinde & acrius inflammatâ cupiditate , veluti ingruente fluctu superatur. Unde consequitur , ut qui levem tentationem gratiâ victrici superavit , ampliori , validiorique superetur. Posteriori autem modo considerata , prout nimirum est instrumentum cum omnipotentî Dei voluntate , cui nulum resistere arbitrium potest , potentiâ saltem consequenti , conjunctum , tunc suum semper sortitur effectum , quem proposuit Deus ; quia voluntas illa omnipotens pro gravitate tentationis & validiorem inspirat suavitatem , & alimenta , seu incitamenta cupiditatis subtrahit. Unde semper verum est , voluntatem divinam superari ab humana non posse ; verum item est , gratiam à Dei voluntatis omnipotentia suam
effi

efficaciam derivare ; verum etiam est quod ait Augustinus, Deum alia de causa omnipotentem non vocari, nisi quia quidquid vult potest, nec voluntate cuiuspiam creatæ voluntatis omnipotentis impeditur effectus.

Ab illo loquendi, explicandique modo non abhorrent quidam Thomistæ recentes, qui addunt modum illum à præstanti in paucis Thomista Gonzale traditum esse, illicque tantò lubentiùs subscribunt, quantò ad intricatissimas difficultates resolvendas faciliior videtur & planior. Si enim gratia efficax in se seorsim à divina voluntate spectata variè affectis animis collata hos convertat, illos non convertat pro diverso malitiæ & cupiditatis gradu; quanvis nunquam contingat, ut animis similiter affectis eadem illapsa gratia hunc convertat, illum non convertat; si, inquam, hæc ita sint, & argumenta è libertate petita facilè diluemus, cùm entitati gratiæ secundùm se consideratæ interdum resistatur; & victricem gratiæ vim servabimus incolumem, cùm gratia illū, semper sortiatur effectum, quem voluntas Dei definivit, cui proinde conjuncta effectum suum infallibiliter consequetur, juxta celebre illud S. Thomæ pronuntiatum 1. 2. q. 112. art. 3. *Potest ea*, id est præparatio ad gratiam, *considerari secundùm quod est à Deo movente; & tunc habet necessitatem ad id, ad quod ordinatur à Deo, non quidem coactionis, sed infallibilitatis, quia intentio Dei deficere non potest.*

Verùm modus ille dicendi, tametsi reverà à Ludovici Molinæ, & sequacium sententia discrepet distinctione illa gratiæ bifariam spectatæ; attamen modus loquendi non solum est

phrasi Molinistarum consentaneus, & ferè
 contèrminus, atque ab avita Scholæ nostræ sen-
 tentiendi, loquendique formula alienus, sed
 etiam ipsam Molinæ sententiam nimis imita-
 tur. Si enim gratia efficax secundùm se specta-
 ta juxta malitiæ voluntatis gradum suum for-
 tiatur effectum, ita ut quæ quatuor iniquitatis
 gradus exsuperat, à quinque superetur, quid fa-
 vorabilius desiderare poterunt Molinistæ etiam
 mitiores, qui gratiæ efficacitatem ab eventu de-
 rivant. Itaque perperam gratia illa efficax di-
 citur, quæ omnem concupiscentiam, & resisten-
 tiam non vincit; omnipotens enim gratia, quæ
 hominem salvat, causis anceps non suspenditur
 ullis, ei tempus agendi semper adest, quæ gesta
 velit; non moribus illi fit mora, ut cecinit
 Prosper *cap. 15. de ingratiss*: certè apud Augu-
 stinum illa sola gratia efficax est, & jure dicitur,
 quæ est executio omnipotentissimæ Dei vo-
 luntatis, unde illam à voluntate Dei sejungere
 est novum gratiæ efficacis commentum effinge-
 re in Augustino peregrinum. Audi quomodo
 S. Pater loquatur de gratia efficaci lib. de grat.
 & lib. arb. cap. 16. *Certum est nos velle dum vo-*
lumus, sed ille facit ut velimus: certum est nos
facere cum facimus, sed ille facit ut faciamus,
præbendo vires efficacissimas voluntati. Vires
 porrò efficacissimæ omnem concupiscentiam fle-
 ctunt. Et lib. de corrept. & grat. cap. 12. ait: *Su-*
ventum est ergo infirmitati voluntatis humanæ
ut divina gratia indeclinabiliter, & insupera-
biliter ageretur. Ergo gratia efficax in se spe-
 ctata, à divina voluntate seorsim sumi non po-
 test, cum illi semper annexus sit effectus. Unde
 gratia, quæ concupiscentiam non vincit, est
 tantum

tantum Thomistico sensu sufficiens, quia licet posse agere in actu primo tradat, actum tamen secundum non infert: quod si non infert, efficax dici nequaquam potest.

Sciendum quartò pro solutione eorum, quæ diximus de dilectione Dei, præ oculis habendum esse, dilectionem ad quam gratiam exigimus, esse & efficacem, & super omnia: efficacem quidem, quia non debet esse simplex & sterilis summi boni complacentia; voluntati enim connaturale est, imò necessarium bonum tam amabile cognitum amore complacentiæ prosequi: super omnia verò, ita ut non solum voluntas nihil tali bono præferat, sed etiam omnia illi, tanquam ultimo fini, verè & sincerè subjiciat. Hunc autem amorem esse opus gratiæ, nemo dubitare quit; quomodo enim voluntas esset ita contra omnem naturæ instantiam firmata, appetitus rebellis domina, tentationum hunc amorem præpedientium, vel aggrredientium victrix, nisi Dei adjutorio roboretur? Sanè opus tantæ sanctitatis naturæ infirmæ vires excedat necessum est. Hinc August. *lib. de grat. & lib. arbitr. cap. 18.* ait: *Vnde est in hominibus charitas Dei & proximi, nisi ex ipso Deo? Nam si non ex Deo, sed ex hominibus, vicerunt Pelagiani: si autem ex Deo, vicimus Pelagianos.* His adde, quod licet Deus sit objectum naturale cordis humani, fecit enim nos Deus ad se, & inquietum est cor nostrum donec in ipso requiescat; imaginem quippe Dei quidquid Deo minus est, nunquam implebit; attamen objectum illud naturaliter appetibile, imò & appetitum, non est naturaliter asequibile, sed per gratiam, ut superiori dissertatione satis diximus.

Sciendum quintò pro solutione eorum , quæ de necessitate gratiæ ad observationem legis statuimus , legem posse impleri vel quoad substantiam , vel quoad modum : quoad substantiam , si fiat opus præceptum , putà cultus parentum , subventio pauperis : quoad modum verò , si fiat ex inclinatione virtutis , pura nimirum intentione , vera electione ; vel ex imperio charitatis , & principio meriti ; vel modo firmo , & stabili : substantia quidem actus naturalis sine gratia sæpe elicitur , sed veræ virtutis modus à gratia proficiscitur. Porro actus naturalis sine modo virtutis ad nihilum valet ultrà , nisi ut respuatur à Deo , qui ut ait Magnus Gregorius , *non quantum quarit , sed ex quanto* ; & ut P. Granatensis addit , *non tam verba quarit , quàm ad verbia*. Nec obest , quod homo retinet semper potentiam physicam , ut possit benè bonum operari. Non , inquam , obest ; quia ex culpa sua non retinet potentiam moralem , eo ipso quod ab amore veri finis àversus est. Cùm enim finis ultimus sit principium vitæ moralis , qui à vero fine àversus est , in pravum conversus , procul dubio potentia mortali caret , imò & moraliter mortuus est , cùm extinctum in eo sit primum honestæ vitæ principium , non minùs ad honestam vitam necessarium , quàm motus cordis ad functiones vitæ animalis obeundas.

Sciendum sextò , ad ea quæ contra donum perseverantiæ objici possunt refellenda , justis gratiâ sanctificanti , & pretiosa virtutum supellectile instructis auxiliis adhuc continentis perennitatem desiderari non solùm ad graves vincendas tentationes , non solùm propter operum supernaturalium emiaentiam , non solùm propter

pter perfeverantiæ faſtidia & tædia ; ſed etiam propter fomitis æſtus in juſtificatis etiam ad agonem jugiter erumpentes , unde conſequitur rebellio appetitus, debilitas rationis, infirmitas voluntatis. Quare ſi momento hominem deſerat Deus, neceſſe eſt, ut ſicut eo adjuvante ſterit, ita eo iterum non adjuvante cadat. Habet quidem juſtus , quandiu gratiâ adornatur , juſ ad gloriam ; ſed quod gratia ſua ſibi petenniter conſervetur, nullum juſ habet, aut meritum.

Dices : Virtuti perfeverantiæ inſuſæ titulo connaturalitatis debetur auxilium ad perfeverandum , ſicut virtuti eleemoſynæ auxilium ad erogandum , virtuti charitatis auxilium ad amandum; quælibet namque virtus ſicut in proprium actum ſponte ſua proclivis eſt , ita concurſum Dei ad illum eliciendum connaturaliter poſtulat. Ergo ſupervacaneum eſt ſpeciale perfeverantiæ donum à gratia ſanctificante, & auxiliis eam comitantibus diſtinctum.

Reſpondeo : In ſtatu quidem illo fortunato, in quo pars inferior ſuperiori, ſuperior Deo plenè ſubjiciebatur , non indiguiſſet homo ſpeciali perfeverantiæ dono , ſed ſatis & abundè perfeverantia per gratiam ſanctificantem , virtutes & auxilia eis correfpondentia (quæ tamen ratione ſubordinationis per ſe efficacia fuiſſent) haberi potuiſſet : in iſto tamen corruptionis ſtatu ignorantia veri, difficultate recti prægravato ſpecialiſſimum perfeverantiæ donum deſideratur, nec ad hoc ſufficit virtus perfeverantiæ inſuſæ, nec auxilium ei reſpondens, quia rebellionem concupiſcentiæ minimè extingunt. *Ille (Adamus) non opus habebat eo adjutorio, quod implorant Sancti cùm dicunt : Video aliam legem in*

membris meis repugnantem legi mentis meae. Quoniam in eis caro concupiscit adversus spiritum, & spiritus adversus carnem, atque in tali certamine laborantes ac periclitantes dari sibi pugnandi, vincendique virtutem per Christi gratiam poscunt. Ille verò nulla rixa à seipso adversus seipsum tentatus, atque turbatus in illo beatitudinis loco sua secum pace fruebatur. Itaque per habitum perseverantiæ infusæ infunditur quidem inclinatio ad perseverandum, & per auxilia ei correspondentia elicitur perseverandi propositum ad justificationem omninò necessarium, sed minimè perseverantia ipsa conaturalitatis titulo donatur; quia habitu illo non tollitur concupiscentia, nec ligatur, cui si Deus nos permittat, à bono perseverandi proposito dimovebimur. Unde Sancti perseverantiæ donum sine intermissione à Deo postulant, quia sola coronat opus, & in Christianis non sola quærantur initia, sed finis. Hinc, ut ait Bernardus, absque perseverantia nec qui pugnat victoriam, nec victor palmam consequitur. Tolle perseverantiam, nec obsequium mercedem habet, nec beneficium gratiam, nec laudem fortitudo.

Porro auxilium ad perseverandum plura complectitur: in primis singularem importat divini numinis protectionem, quâ occasiones peccati, & tentationes, sin removentur planè, certè ita temperantur, ut omnia cooperentur in bonum his qui secundum popositum vocati sunt sancti. Deinde vigorem affert specialem, quo & tentationibus resistitur, & ad benè operandum fortiter & juxtà suaviter cor hominis inclinatur. Præterea protectionis prædictæ continua

tinuationem & jugem auxiliorum necessariorum influxum includit. Ex quibus constat, perseverantiam esse quandoque donum Dei extrinsecum, ut cum quis post justificationem moritur; tunc enim conjunctio gratiæ cum morte, qui est caracteristicus perseverantiæ fructus, non est donum internum, sed effectus specialis providentiæ, quâ mors quam vitæ constat esse contrariam, ut Augustinus ait, instrumentum fit, per quod transitur ad vitam. Et de hac gratia intelligitur locus ille Sapient. 4. *Raptus est ne malitia mutaret intellectum ejus, aut fictio deciperet animam ejus*. Interdum verò dona interna perseverantia infert, ut cum in articulo mortis vel tentationes vincendæ sunt, vel bona opera exercenda. Quamobrem præclare Augustinus observavit, in negotio perseverantiæ catenam connecti egregiam, & verè auream, quâ Sancti ad superna trahuntur. Primus ejus annulus fides est, ex qua totius oritur salutis initium; fidem nutrit spes habitans in adjutorio Altissimi, & in protectione Dei cæli commorans; spem dilectio perficit, qui enim non diligit, manet in morte, & frustra æterna bona sperat, qui ea non amat terrenis adhærens; dilectionem demonstrant opera, probatio namque dilectionis exhibitio est operis, opera coronat perseverantia, quâ quis tenet quod habet, quæve sola informat meritum, remunerat currentem, coronat pugnantem, ad portum ducit navigantem; cui beata æternitas redditur, & simul hominem reddit æternitati. In cassum namque bonum agitur, si ante terminum vitæ deferatur; quia & frustra velociter currit, qui priusquam ad metas ve-

niat, deficit, ut Magnus Gregorius *lib. I. Moral.* prosequitur.

Hanc finalis perseverantiæ gratiam continuis sine intermissione orationibus flagitare debemus; donum enim Dei est, & non ex nobis. De *perseverantia munere*, ait Tridentinum sess. 6. cap. 13. *nemo sibi certi aliquid absoluta certitudine polliceatur. Ex duobus parvulis* (inquit Augustinus *lib. de bono persever. cap. 9.*) *originali peccato pariter obstrictus*, cur iste assumatur, ille relinquatur: & ex duobus ætate jam grandibus impiis, cur iste ita vocetur, ut vocantem sequatur; ille autem aut non vocetur, aut non ita vocetur, ut vocantem sequatur, inscrutabilia sunt judicia Dei. :: Quanam est tandem ista discretio? Patent libri Dei, non avertamus aspectum; clamat Scriptura divina, adhibeamus auditum. Non erant ex eis, quia non erant secundum propositum vocati, non erant in Christo electi ante constitutionem mundi, non erant in eo sortem consequuti, non erant predestinati secundum propositum ejus qui universa operatur: nam si hoc essent, ex illis essent, & cum illis sine dubitatione mansissent. Ergo qui stat, caveat ne cadat, & illum jugiter invocet, qui & cadentes erigit, & stantes confirmat, & confirmatos coronat.

Sciendum demum, præ oculis semper habendas esse has duas veritates catholicas, quæ inter oppositas disputantium Theologorum contentiones salvæ semper consistunt & incolumes, nimirum & gratiam internam esse ad implenda officia necessariam, & simul officia illa nunquam esse observatu impossibilia; quia quantàquanta sit scelesti hominis perversitas, quandiu tamen
viato

viatoris statum degit, & liberum arbitrium retinet, tametsi infirmum; & per gratiam sanari quit, quæ nullum deserit, nisi deserta. Unde ait S. Prosper in responsione ad 7. objectionem Vincent. *Multorum hominum talis est malitia, qualis est demonum: sed hoc inter malos homines distat & daemones, quòd hominibus etiam valdè malis superest, si Deus misereatur, reconciliatio; demonibus autem nulla est in aeternam servata conversio.* Ex quibus patet, nunquam hominem ad peccandum necessitari, & quia semper liberè agit, & quia voluntaria gratiæ obstacula ponit, & quia frequentia peccatorum sibi ipsi compedes facit & vincula, quibus sceleris consuetudo sit necessitas blandiendo premens, premendo blandiens. *Nescio quo pravo, & miro modo* (ait Bernard. serm. 81. in Cant.) *ipsa sibi voluntas peccato in deterius mutata necessitatem facit, ut nec necessitas, cùm voluntaria sit, excusare valeat voluntatem; nec voluntas, cùm sit illecta, excludere necessitatem.* Cui præluserat Augustinus lib. de profect. just. cap. 4. *Per arbitrii libertatem factum est, ut esset homo cum peccato; sed jam pœnalis vitiositas subsequuta ex libertate fecit necessitatem; unde ad Deum fides clamat: De necessitatibus meis educ me, sub quibus positi vel non possumus quod volumus intelligere, vel quod intellexerimus volumus, nec valemus implere.* Unde ei dicit gratulans iustus: *Salvasti de necessitatibus animam meam.*

REFLEXIO.

Si gratiæ adiutorium tantoperè necessarium est, malis ut boni sint, bonis ut meliores sint, melio

melioribus ut perfecti sint, perfectis ut perseverantes sint, omnibus ut bona faciant & benè, illam solam quæramus, illam gemitibus inenarrabilibus postulemus quæ sola est quæ egemus. Sed gratiarum fonti & auctori totos nos potissimum permittamus, ut nos vivificet gratiâ, qui nos sanguine redemit: quomodo enim denegabit gratiam habentibus fiduciam in introitu Sanctorum in sanguine Christi, qui voluit mori ut viveremus, servire ut regnaremus, exulare ut repatriaremur (phrasis est Bernardi *serm. 2. de Ascens.*) & usque ad servilissima opera inclinari, ut constitueret nos super omnia opera sua? Postquam sanguis divinus factus est pretium nostrum, habemus unde gratiam emamus: postquam sanguis Christi lavacrum nostrum evasit, habemus unde dealbemus stolas in sanguine agni. Heu! quàm amandus rubor, quàm efficax, quàm salubris, qui dealbandi non caret effectu! Certè sicut nihil est ad mortem, quod non Christi morte salvetur; ita nihil est tam pretiosum, quod non Christi cruoris valore obtineatur.

Hanc veritatem dulciorem super nœl & favum inculcat Augustinus in *Psalm. 40. & 66. & 35. & 95. & 103. & in serm. 5. ad Fratres*. Tot gemmas uno obtutu visendas oculis Lectoris obijcio, quibus omnes diffidentia offutias vir justus excutiat. *Filius Dei pro nobis mortuus est, securus esto accepturus te vitam ipsius, qui pignus habes mortem ipsius. Quam vitam tibi servat justificato, qui suam mortem donavit & impio? Quàm certâ, & quàm firmâ promissione servat justis vitam tuam, qui donavit injustis mortem suam? Impium te quasi vit, ut redimeret; redemptum deseret, ut perdat? Mala vestra pertulit,*

peruli, bona mea non reddam? Fons vita mortuus est propter nos, negabit vitam suam, qui pro nobis erogavit mortem suam?

Ad omnia, fateor, pietatis officia gratiæ ad-
jutorium desideramus, quia plenè, & veraciter
confitenda est gratia Dei; nec ejus plenitudi-
nem videtur agnoscere, qui aliquod ei subtra-
hit opus honestatis, dicente Prospero epist. ad
Demetriadem, cap. 7. *Gratia Dei nisi tota susci-
pitur, tota repellitur: sicut enim alienus est à
numero fidelium, & sorte Sanctorum, qui in ali-
quo à catholice veritate dissecit, ita extra gra-
tiam efficitur, qui aliquid de ejus plenitudine
disstetur.* Anne propterea torpori, & injuriæ in-
dulgendum? Absit. Sed contra omni potiùs stu-
dio laborandum, & sine intermissione orandum,
& gratia sic petenda, & tantùm petenda, quomo-
do & quantum res tanta petenda est: ita tamen,
ut qui benè agunt, non in se, sed in Domino glo-
rientur. Ideo enim, ut Augustinus tradit, quis-
que nostrum bonum opus suscipere, agere, im-
plere nunc scit, nunc nescit, nunc delectatur, nunc
non delectatur, ut noverit non suæ facultatis,
sed divini muneris esse, vel quod scit, vel quod
delectatur, ac sic ab elationis vanitate sanetur.
Illi ergo nos permittamus, qui prior dilexit nos,
& tradidit semetipsum pro nobis; qui dona sua
magis avet effundere, quàm nos recipere cupia-
mus, quem nemo diligit, nisi præventus; nemo
amittit, nisi sponte deceptus; nemo possidet, nisi
beatus.

CAPUT II.

*Quid sit Christi gratia adiutorium,
exponitur.*

STabilitâ divinæ gratiæ necessitate, investigare operæpretium est, quid & qualis sit eximia illa Christi gratia, cujus opitulationem tanto-perè, tamque meritò commendamus. Ut autem dilucidè in resignando tanto mysterio procedamus, præmittenda primùm est multiplex gratiæ divisio apud Patres & Theologos frequentata, ut inter tot gratiarum nomina margaritam quam quærimus, discernere valeamus. Deinde varii circa gratiam Christi errores referendi sunt, illud enim meritò ad gratiam Christi putabimus pertinere, quod hæretici gratiæ Christianæ hostes ab Ecclesia proscripti fateri detrectarunt. Demùm ex his quid sit, & in quo sita sit divinæ gratiæ opitulatio deducemus, & ea quæ de divina motione schola Angelica docet, servatâ proportionè, & iis quæ S. Sedes Apostolica ventilari verat, prætermisiss, gratiæ Christi explicandæ accommodabimus.

SPECULATIO I.

Multiplex gratiæ divisio exponitur, & nonnullæ controversiæ dirimuntur.

REcolendum ex dictis initio hujus tractatus, varias in Scripturis legi gratiæ nominis acceptiones. Interdum namque usurpatur ad significandum decorem & venustatem. Proverb. ultimo : *Fallax gratia, & vana est pulchritudo.* Interdum accipitur pro gratitudine, seu ut loquitur S. Thomas, pro recompensatione beneficii gratis dati. 2. Reg. 2. *Retribuet vobis Dominus misericordiam & veritatem; sed & ego reddam gratiam.* Interdum sumitur pro acceptabilitate, quâ aliquis est alteri gratus, ejusque complacentiam demeretur. Genesios 39. *Invenit Ioseph gratiam coram Domino suo.* Interdum accipitur pro gratuito divinæ voluntatis favore. Rom. 4. *Fides reputatur ad justitiam secundum propositum gratiæ Dei.* Et iterum : *Ut secundum gratiam firma sit promissio.* Et rursus : *Reliquia secundum electionem gratia salva facta sunt.* In hoc etiam sensu dixit Angelicus noster Doctor 3. p. q. 86. *Gratia Dei causat bonitatem in homine grato, eo quod bona voluntas Dei, qua nomine gratia intelligitur, est causa omnis boni creati.* Interdum significat misericordiam, seu propositum miserendi. Psal. 93. *Misericordia tua, Domine, adjuvabit me.* Interdum ex parte Subjecti accipitur pro dono quovis gratis, & sine

sive præviis meritis collato, sive donum illud sit naturale gratuita Dei voluntate donatum, sive supernaturale à Deo ad vitam æternam consequendam per se ordinatum; sive donum illud sit externum, ut gratia prædicationis, exempli, miraculorum; sive internum, quo homo intus ad christianæ pietatis officia cietur.

Sciendum secundò, gratiam supernaturalem dividi in gratis datam, & gratum facientem. Prior per se non conducit ad sanctificationem, & salutem ejus cui datur; per eam tamen unus saluti alterius cooperatur. Ejusmodi est gratia sanitatum, donum linguarum, miraculorum, prophetiæ, &c. quæ dona idcirco ministris suis impertitur Deus, ut per ea in divina reducantur, qui signa illa intuentur. Posterior ad salutem recipientis per se refertur, nec solummodò gratis datur, quod unicuique gratiæ commune est, sed etiam personam Deo acceptam efficit, & amicam. Porro nulla adest necessaria, iminò nec ordinaria connexio inter gratiam gratis datam, & gratiam gratum facientem. Tum quia gratia gratis data interdum impiis, & reprobis conceditur; unde nonnullis in iudicio dicturis: *Domine, Domine nonne in nomine tuo propheta vimus, & in nomine tuo demonia ejecimus, & in nomine tuo virtutes multas fecimus?* Respondebit Veritas, ut habetur Matth. 7. *Nunquam novi vos (notitiâ approbationis) discedite à me qui operamini iniquitatem.* Tum quia gratia gratis data non confertur etiam Sanctis per modum habitus, sed per modum impressionis transeuntis. *Quia Spiritus sanctus* (inquit Magnus Gregorius hom. 9. super Ezechielem) *in Sanctorum cordibus juxta quasdam virtutes semper per-*
manet,

manet, juxta quasdam verò recessuras venit, & venturus recedit: in fide etenim, & spe, atque charitate, & in bonis aliis, sine quibus ad celestem patriam non potest veniri, sicut est humilitas, justitia, atque misericordia, perfectorum corda non deserit: in prophetia verò virtute, doctrina facundia, miraculorum exhibitione electis suis aliquando adest, aliquando se subtrahit. Quod si quis interdum aliqua specialiori dote, vel ut aiunt, talento præfulget, nequaquam inde gloriari debet, sed confundi & timere, ne Deus Præceptorem illum imitetur, qui virgas quibus discipulum affecit & emendavit, in ignem deinde arsuras projicit ut inanes. Ministris namque malis Deus bonus utitur ad electorum salutem, ministros eosdem Deus justus postea puniturus. Unde rectè monebat Vertias Luc. 10. *In hec nolite gaudere, quia Spiritus vobis subjiciuntur. Ne putarent, ut exponit Augustinus, in talibus factis majora bona esse, quàm in operibus justitia, quibus aterna vita comparatur.*

Sciendum tertio, gratiam gratis datam dividi in novem species, quas recenset Apostolus 1. Cor. 12. *Aliis, inquit, per spiritum datur sermo sapientiæ, aliis autem sermo scientiæ secundum eundem spiritum; alteri fides in eodem spiritu, aliis gratia sanctorum in uno spiritu, aliis operatio virtutum, aliis prophetia, aliis discretio spirituum, aliis genera linguarum, aliis interpretatio sermonum.* Cujus divisionis rationes profunde desumit S. Doctor ex ipsa gratiæ gratis datæ notionem. Gratia namque gratis data ad juvandos alios ut salventur, per se ordinatur: tot ergo gratias gratis datas convenienter admittimus, quot desiderari possunt ad rectè salutem alienæ coope

cooperandum. Ut autem minister Christi conversioni, & saluti animarum inserviat, pollere debet primò plenitudine cognitionis divinarum, ut alios illuminet, erudiat, excutiatque errorum tenebras convertendis animabus offusas: quam cognitionis abundantiam obtinet gratiâ fidei, quâ divinis firmitus credit, eaque veluti intelligit, seu intus legit nitentiori fidei radio illustratus; gratiâ sapientiæ, quâ divina in altissimis causis doctus à Domino intelligit; gratiâ scientiæ, quâ divinos effectus percipit in causis immediatis, ut cœlestia exponere, illustrare, & adversus contradicentes defendere valeat. Deinde exigitur ut minister Christi doctrinam, quâ imbuatur, quâve alios imbuere vult, sequentibus signis veluti sigillis magni Regis confirmet, quod utique præstat vel sanando infirmos gratiâ sanitatum, vel potentiam Christi, cui conciliare fidem & amorem hominum satagit, demonstrando operatione virtutum; vel futura prædicando dono prophetiæ, vel arcana cordis detegendo discretionem spirituum. Tunc enim Dei digitus operari jure creditur, cum ea nomine Dei facit, vel cognoscit homo, quæ solâ Dei potentiâ effici, solâ Dei sapientiâ cognosci possunt. Denique ut minister Christi fidem, quâ perfunditur, quamve miraculis firmat, convenienter proponat, & ad varias nationes dilatat, necesse est, vel ut varias linguas, seu idiomata intelligat, vel saltem ut in proprio idiomate loquens ab aliis audiatur, quod habuerunt Apostoli, alique Apostolici viri gratiâ linguarum: necesse est etiam, ut minister varia, & difficilia Scripturarum testimonia interpretetur, quæ populis prædicet, utque convenienter verbum Dei propo-

proponat, & quantum ad hoc ponitur interpretatio sermonum. Scio aliquos recentiores contendere divisionem illam Apostolicam non esse adæquatam, quia alia sunt dona Dei, quibus homo salutis proximi inservit, putà character, jurisdictio, prælatio, &c. Sed in his vitiligationibus non vacat immorari, maximè quia objectiuncularum hujusmodi levitatem citò occupabis, si consideres Apostolum distinxisse gratias gratis datas à ministrationibus & operationibus, ad quas reduci possunt, quæ illi recentiores ad gratias pertinere malè opinantur. Deinde ad gratiam gratis datam satis non est, ut donum collatum utilitati alterius cedat, sed præterea opus est, ut à Deo immediatè, & non per homines conferatur, nec sit in libera hominis facultate gratiam illam sibi asciscere. Characterem autem, & jurisdictionem Deus per Episcopos ministris largitur; ministris, inquam, volentibus, nec opus est speciali Dei irruentis impressione.

Sciendum quartò, gratiam dividi in habitua-lem, & actua-lem. Gratia habitualis est donum Dei permanens, quo homo intrinsecè justificatur fitque Deo acceptus & amicus, de qua latè dissertatione sequenti disputabimus. Gratia actualis est auxilium Dei, quo ad fidem, & pietatem per-movemur, de quo sic ait Prosper lib. 2. de vocat. Gent. cap. 26. *Gratia Dei in omnibus justificationibus principaliter eminet, suadendo exhortationibus, movendo exemplis, terrendo periculis, incitando miraculis, dando intellectum, inspi-rando consilium, corque ipsum illuminando, & fidei aff. ctionibus imbuendo.*

Sciendum quintò, gratiam actua-lem subdivi-
di

di in operantem & cooperantem. Per primam, ut ait August. *lib. de liber. arb. cap. 17.* Deus ut velimus operatur incipiens; per secundam volentibus cooperatur perficiens. *Ut ergo velimus*, inquit, *sine nobis operatur; cum autem volumus, & sic volumus ut faciamus, nobiscum cooperatur: ita sine illo vel operante ut velimus, vel cooperante cum volumus, ad bona pietatis operari nihil valemus.* De priori dicitur Philip. 2. *Deus est qui operatur in nobis velle & perficere.* De posteriori loquitur Apost. 1. Cor. 15. *Non ego, sed gratia Dei mecum.* De utraque verò sic habet Magnus Gregorius lib. 26. Moral. cap. 11. *Superna pietas prius agit in nobis aliquid sine nobis, ut subsequente quoque nostro libero arbitrio bonum quod jam appetimus, agat nobiscum.* Porro gratia dicitur operans, quatenus applicat intellectum ad pias cogitationes, & voluntatem ad sanctas affectiones: dicitur verò cooperans, quatenus cum intellectu & voluntate applicatis producit vel piam cogitationem, vel sanctam affectionem. Tunc enim gratia dicitur operans, quando facultas est per eam ita mota, ut non sit movens; tunc verò dicitur gratia cooperans, quando per eam voluntas & movetur, & sese mover. Atqui ad applicationem præfata voluntas non se mover, sed movetur; ad piam verò cogitationem, affectionem, & operationem, & à Deo movetur, & ipsa se mover. Ergo gratia dicitur operans, quatenus applicat facultates: dicitur verò cooperans, quatenus cum facultatibus applicatis bonum opus coëfficit.

Gratia autem operans, & cooperans variis solent nominibus insigniri. In primis enim gratia

gratia operans dicitur etiam præveniens ; & co-operans dicitur subsequens : dicitur quidem præveniens , quia gratia operans omnem pium cogitatum & affectum antevertit , juxta illud Psalm. 58. *Misericordia ejus præveniet me : & illud Bernardi lib. de grat. & lib. arb. Sanè ipsi nos prævenire nequaquam possumus ; qui enim bonum neminem invenit , neminem salvat , quem non prævenit.* Gratia autem cooperans dicitur subsequens , quia applicationem ad opus sequitur productio illius ; nolentem enim prævenit Deus , ut velit ; & volentem subsequitur , ne frustra velit ; prævenit inspirando bonam voluntatem , subsequitur operando boni operis facultatem ; prævenit impium , ut fiat justus ; subsequitur justum , ne fiat impius ; prævenit elisum ut surgat , subsequitur elevatum ne cadat ; prævenit ut vocet , subsequitur ut vocatus respondeat ; prævenit ut justus sanctiùs vivat , subsequitur ut semper cum Deo vivat.

Iterum gratia operans dicitur excitans , cooperans verò adjuvans nominatur : excitans illa dicitur , quia peccatorem præveniens , ipsum movet ut abjiciat opera tenebrarum , induatque arma lucis ; adjuvans verò hæc appellatur , quia ad pium opus efficiendum animum semel excitatum opitulatur ; per excitantem vocat Deus , clamat , rumpit surditatem , coruscat , splendet , fugat cæcitatem , flagrat , ungit , & infundit suavitatem ; per adjuvantem excitatus homo incipit anhelare Deo suo , gustare , & esurire , & siti-
re , atque illa diligere à quibus antea abhorrebat : sine excitante conatus nostri nulli sunt , sine adjuvante cassi sunt ; sine excitante non ducimur , sine adjuvante non sequimur : illa reducit , ista

manuducit in via , & ad terminum beatitudinis perducit.

Circa has divisiones duo observanda sunt. Primum est , divisiones illas posse quadantenus gratiæ habituali accommodari ; gratia namque dicitur operans, quando mens nostra est mota, & non movens ; dicitur verò cooperans , quando mens nostra & movet , & movetur. Atqui gratia habitualis & animam sanctificat in genere causæ formalis, quem effectum sola gratia efficit ; & simul gratia illa est principium operis meritorii, quod à gratia simul & libero arbitrio profisciscitur. Ergo gratia habitualis operans & cooperans vera quadam ratione dici potest. Dici etiam potest præveniens & subsequens ratione diversorum effectuum , quorum unus alium consequitur. V.g. quatenus dat esse supernaturale , dicitur prævenire seipsam ut moventem ad bonam voluntatem, operationem, & perseverantiam.

Secundum quod observetur dignum, est gratiam etiam interiorem vocari à D. Th. *initio q. 109.* principium exterius humanarum operationum, non quod intus non luceat, intus non moveat, intus non constet, sed quia à principio exteriori Deo descendit, nec nobis ex viribus libertatis innascitur. Ut ergo S. Doctor sacrilegam Stoïcorum , & Pelagianorum vocem confunderet, qui omne hominis bonum , omnesque spirituales divitias, quibus ad benè vivendum instrui-mur , ex proprio voluntatis fundo suboriri impiè comminiscabantur, in fronte hujus tractationis gratiam, quâ & verum purè cognoscimus, & bonum castè diligimus , exterius humanarum actionum principium Præceptor accuratissimus appel

appellavit, ut ostenderet omne donum de sursum esse, descendens à Patre luminum, simulque primo verbo veluti fulmine errores eorum contereret, qui naturæ, vel Philosophiæ, vel propriæ industriæ, vel voluntatis viribus operis boni laudem asserunt, quive propterea divinum nunquam invocant auxilium, Ægyptios aratores imitantes, qui nunquam cœlum respiciunt, quia non de rore cœli, vel aëris imbribus, sed à Nili inundatione fœcundæ terræ pinguedinem præstolantur.

Sciendum sextò, gratiam rursus dividi in gratiam Dei, & gratiam Christi. Gratia Dei dicitur non præcisè quia à solo Deo est; sic enim omnis gratia à Deo orta gratia Dei dici potest, & debet; sed ita nominatur, quia à Deo, & non per Christum, & intuitu meritorum ejus confertur. Talis fuit gratia sanctis Angelis, & Protoparentibus in statu innocentie collata. Gratia Christi est gratia interna per Christum, seu intuitu meritorum vitæ, operum, passionis, & mortis Redemptoris collata. Hanc gratiam mirè commendant Scripturæ & Traditio; quia, inquiunt, eâ Christiani sumus, eâ liberum arbitrium peccato captivatum fit liberum, quia à carnalis concupiscentiæ dominatu liberatur. Gratia Dei alio nomine vocatur gratia sanitatis, quia homini in statu innocentie & sanitatis collata fuit; gratia verò Christi vocatur gratia medicinalis, quia per eam ab infirmitate peccati liberamur. De hoc adjutorio medicinali sic habet Augustinus lib. de corrept. & grat. cap. 12. *Subventum est igitur infirmitati voluntatis humana, ut divina gratia indeclinabiliter, & insuperabiliter ageretur, & idèò quanvis infirma, non tamen deficeret, neque*

que aduersitate aliqua vinceretur. Et in Enchirid. cap. 106. Quanvis sine gratia nec tunc (id est in statu innocentiae) ullum meritum esse potuisset; quia etsi peccatum in solo libero arbitrio erat constitutum, non tamen iustitia retinenda sufficiebat liberum arbitrium, nisi participatione immutabilis boni diuinum adiutorium reuereretur. ::: Sed post illam ruinam maior est misericordia Dei, quando & ipsum liberum arbitrium liberandum est à seruitute, cui dominatur cum morte peccatum; nec omninò per se ipsum, sed per solam Dei gratiam, qua in fide Christi posita est, liberatur; ut voluntas ista, sicut scriptum est, à Domino praparetur, quâ cetera Dei munera capiantur, per qua veniatur ad regnum aeternum. Itaque gratia Christi medicinalis perfecta ea est, quâ efficitur ut homo rectè velit, & tantùm velit, tantoque ardore diligat, ut carnis appetitum contraria concupiscentem voluntate spiritus vincat; quâ non tantùm benè agendi possibilitas, sed etiam benè, & efficaciter operandi voluntas donatur, quâ fortiter, & suauiter, invictissimè simul, & liberrimè voluntas ita vult bonum, ut illud deferere nolit. Sed de hoc amplius statim.

Sciendum septimò, Gratiâ Christi dividi in sufficientem & efficacem: sufficiens est illa, quæ dat posse operari, efficax verò est quæ cū operatione, quam infert, semper conjungitur. Hanc divisionem limpidissimè expressit Cyrillus in lib. de adorat. his verbis: *Tantam benignitatem nobis exhibet universorum Salvator Deus, ut efficaci subsidio adjuvet, secundum quod scriptum est: Apprehendisti manum dexteram meam, & in consilio tuo deduxisti me; nam quoniam*

niam

niam hominis natura non valde generosa est, neque satis idonea, ut malum effugere queat, simul quodammodo nobiscum certat Deus, & du' lex concedere beneficium videtur, persuadens admonitionibus ut subsidium inveniamur, & fortius illud praestans, quàm ut malum praesens & violentum praevalere possit. Primam vocat August. lib. de gratia Christi, adjutorium possibilitatis, & lib. de corrept. & grat. adjutorium sine quo non possumus; secundam verò appellat gratiã actionis, & adjutorium quo aliquid fit. Adjutorium sine quo comparat alimentis, sine quibus nequit homo vivere, cum quibus tamen non continuò vivit, qui mori volens eis uti noluerit: adjutorium verò quo comparat beatitudini, quâ ut data fuerit, homo continuò fit beatus.

Porro per gratiam sufficientem non solùm intelligimus gratiam exteriorē, quâ Deus omnes nationes ad cognoscendum se, atque metendum, creaturarum significationibus admonet: *Ue* inquit S. Prosper lib. 2. de vocat. Gent. cap. 4. in paginis elementorum, ac voluminibus temporum communis & publica divina institutionis doctrina legeretur. Quæ gratia exterior quadante nus sufficiens dici potest, quia ut ait idem Prosper cap. 15. ejusdem libri: *Adhuc ita est semper universi, hominibus quadam superna mensura doctrina, qua etsi parvioris, occultiorisque gratiae fuit, sufficit tamen, sicut Dominus judicavit, quibusdam ad remedium, omnibus ad testimonium.* Non intelligimus etiam solam gratiam habitualement, quæ vero sensu sufficiens dici potest; per eam enim, & virtutes infusas ipsi apertas homo redditur potens supernaturaliter

operari, & in hoc sensu veridicè pronuntiavit Doctor Sanctus 1.2.q.106.art.2. ad 2. *Lex nova quantum est de se sufficiens auxilium dat ad non peccandum.* Ubi per auxilium sufficiens intelligit gratiam habitualement, ut patet tam ex titulo articuli, ubi quaerit, *utrum lex nova iustificet.* Tum ex scopo, in quem collimat S.Doctor; intendit enim probare legem novam iustificare, quia ad eam principaliter pertinet gratia habitualis, seu iustificans. Tum ex intento objectionis arguentis non pertinere ad legem novam iustificare, sed potius iram operari; quandoquidem maiori poena dignus est qui post datam legem novam peccat. Cui argumento S.Thomas respondet, gratiam novi Testamenti, habitualement nimirum, de qua in toto corpore articuli, iram non operari, quia etsi maiori poena dignus sit qui post acceptam gratiam novi Testamenti peccaverit, utpote maioribus beneficiis ingratus, attamen lex nova dans gratiam dat etiam auxilium sufficiens ad non peccandum. Qua etiam ratione q.109.art.9. gratiam habitualement appellat auxilium ad benè vivendum, & ad non peccandum. *Dicendum*, inquit, *quod homo ad rectè vivendum dupliciter auxilio Dei indiget; uno quidem modo quantum ad aliquod habituale donum, per quod natura humana corrupta sanetur, & etiam sanata elevetur ad operanda opera meritoria vitae aeternae, &c.* Ubi vides, gratiam habitualement disertè auxilium ad benè operandum à S.Doctore appellari.

Non solum, inquam, illa per gratiam sufficientem intelligimus, sed etiam gratiam actualem interiorem, quâ Deus & intellectum illustrat, & voluntatem ciet ad conversionem, quam
tamen

tamen non infert, nisi adsit gratia efficax. Hanc Augustinus gratiam parvam appellat, quia parva & imperfecta desideria, ac imbecillæ voluntatem parit. Et quanvis respectu hujusmodi imperfectorum semivolentis hominis desideriorum efficax meritò dici possit, tamen respectu principalis effectus, conversionis nimirum perfectæ, sufficiens solummodò est, quia etsi ad conversionem illam eliciendam vires det, subindeque per illam se convertere homo possit, non tamen conversionem ipsam efficit, unde nec homo se convertere potens se convertere non vult. De hoc auxilio satis clarè loquitur S. Thomas 1.2. q. 112. art. 2. ad 2. his verbis: *Contingit quandoque, quod Deus movet hominem ad aliquod bonum, non tamen perfectum, & talis preparatio precedit gratiam; sed quandoque statim perfectè movet ipsum ad bonum, & subitò gratiam homo suscipit.* Vides S. Doctorem agnoscere auxilium, quo homo movetur ad actus imperfectos, & præparatur ad perfectos.

Per gratiam verò efficacem intelligimus eam, quæ voluntatem applicat operi, & opus explicat voluntati, quæ à nullo duro corde respuitur, quia idèò tribuitur, ut duritia cordis per eam primitus auferatur, quæ operatur in nobis Deus velle & perficere pro bona voluntate, quæ hominis voluntatem bonam & præparat adjuvandam, & adjuvat præparatam; quæ certissimè liberantur quicumque liberantur; quæ auferit Deus cor lapideum, & dans carneum facit ut in præceptis ejus ambulemus, & judicia ejus custodiamus; quæ prævenit Deus hominis voluntatem bonam, nec eam cujusquam invenit in corde, sed facit; quæ non est communis bonis & malis, sed bo-

nos discernit à malis, ut in nullo quis gloriatur, sed totum detur Deo; quâ profunditatem illius quæstionis, quam secundùm admirationem Apostoli impenetrabilem confitemur, solvimus, non per liberi arbitrii velle & nolle.

Dices, immeritò primum hujus divisionis membrum gratiam sufficientem appellari, cum reapse non sufficiat, sed efficax insuper desideretur; quod enim est verè sufficiens, omnia necessaria complectitur: ergo qui gratiam sufficientem prædictam sine efficaci habet, obtinet gratiam quæ sufficit, & non sufficit; quæ verbo sufficit, re non sufficit, quia per nos habet gratiam, quæ satis sit, nec tamen habet gratiæ quod satis sit. *Illud queror*, inquit Montaltius *epist. 2.* alloquens Dominicanos recentes, *vos istud non aperte & apud populum predicare, sufficientis gratiæ nomine eam à vobis intelligi, quæ non sufficit. Vocabulorum, quibus fides exprimitur, vulgarem sensum in alienum commutatis.* Gravis culpa, nisi præmoneatis, cum omnibus gratiam sufficientem adesse dicitis, hoc vos intelligi velle, non adesse illis gratiam, quæ reipsa sufficiat. Hoc verbum ceteri omnes eodem sensu accipiunt. Exoriantur novi Thomistæ, qui per vulgatas notiones revellant. *Mulieres omnes, hoc est totius orbis dimidia pars; aulici, ac militares viri; Magistratus, ac tota turba forensis; mercatores, opifices, plebei, ad extremum præter Dominicanos universi homines idemum sufficiens appellant, in quo sunt omnia necessaria ad agendum.*

Respondeo, quod quia in omni natura, præsertim intellectuâli distinguimus esse, posse, & operari, convenienter in ordine supernaturali admittimus gratiam, quæ det esse; & hæc est
gratia

gratia sanctificans, quâ consortio divinæ naturæ dignamur ; & aliam quæ det posse , & hæc est gratia sufficiens, seu gratia possibilitatis, seu auxilium sine quo ; & aliam quæ det operari, & hæc est gratia efficax, seu auxilium quo. Convenienter autem gratiam quæ dat posse, tametsi non inferat actum, sufficiens nominatur ; sufficientia enim ex parte potentix se tenet, quæ tunc dicitur sufficienter instructa quando habet expeditam facultatem ut possit, nec illi aliud deest ut agat, nisi velle : homini autem habenti auxilium sufficiens sola deest bona voluntas, ut benè agat, quanvis gratia efficax eam conferat : ergo sine gratia efficaci voluntas vires habet sufficientes, verè potest, sed non vult : fieret autem perfecta justitia, ut ait August. si tanta voluntas adhiberetur, quanta sufficit tantæ rei. Certè licet D. Augustinus *libro de gratia Christi, & libro de correptione & gratia*, præter auxiliū possibilitatis, & auxilium sine quo admit-
tat insuper auxilium actionis, & auxilium quo ; tamen auxilium sine quo, quod sufficiens esse ibidem docet, minimè rejicit, quanvis præter illud aliud requirat. Unde non debet dici auxilium insufficiens, cum det vires quibus sola deest bona voluntas. Nec propterea pervulgatas omnium hominum notiones revellimus ; ubique namque terrarum illud sufficiens homini dicitur, præter quod nihil exigitur, nisi ut velit ; ille v. g. cibus sufficiens dicitur, præter quem alius non exigitur, sed sola expectatur hominis comedentis & dentes applicantis voluntas ; illa pecunia dicitur sufficiens, quâ homo ære alieno gravatus debita solvere potest, nec aliud requiritur, nisi ut numeret. Ergo quia

homini gratia sufficienti prævencio sola deest bona voluntas, verè gratia illa dicitur sufficiens, inter quam & actionem sola efficax voluntas interest, nec ulla ulterior exigitur gratia ut possit, sed ut velit. *Hoc autem*, inquit August. lib. 2. retract. cap. 7. & lib. de spirit. & lit. c. 31. & lib. 5. de civit. cap. 10. *quisque in potestate habere dicitur, quod si vult, facit.* Quod si iterum contendas, nos malè loqui, vel abuti terminis; respondebo cum Augustino lib. 1. contra Cresconium, cap. 13. *Cum res ipsa intelligitur, minus laborandum est, quid eam hominibus vocare placuerit.*

Queres primò, utrum Deus omnibus auxilia sufficientia conferat?

Respondeo primò. Deum illa omnibus offerre, ut sit verum illud Eccles. 15. *Ne dicas, per Deum abest.* Et ratio est, quia cùm Deus sincerè velit omnium salutem, & pro omnibus mortuus sit, & omnes ad se vocet, & Sacramenta pro omnibus instituerit, omnibus etiam media ad salutem sufficientia offert. Unde August. lib. 3. de lib. arb. cap. 19. *Nulli homini, inquit, ablatum est scire utiliter querere quod inutiliter ignorat, & humiliter confiteri imbecillitatem suam; & querenti, & confitenti subvenit ille, qui nec errat dum sublevat, nec laborat.* Et postea: *Cùm verò ubique sit præsens qui multis modis per creaturam sibi Domino servientem adversum vocet, doceat credentem, consiletur sperantem, diligentem exhortetur, conantem adjuvet, exaudiat deprecantem, non tibi deputatur ad culpam quòd penitus igno-*

ras, sed quòd negligis querere quod ignoras: neque illud quòd vulnerata membra non colligis, sed quòd volentem sanare contemnis. Et quavis, ut verum fatear, Augustinus librum illum ante Episcopatum, quo tempore nondum erat plenè mysteria gratiæ doctus, scripserit; attamen locum illum repetit Augustinus Episcopus *lib. de nat. & grat. cap. 67.* addens se eò loci gratiam Dei non evacuasse, sine qua natura humana jam contenebratà, atque vitiata illuminari non potest, atque sanari. Unde nec locum illum libro ullo retractationum revocat, quavis se ad alios libros, quos contra Pelagianorum novitates ex professo edidit, remittat. Ut sit, certum est in via S. Augustini, & D. Thomæ, Deum qui illuminat omnem hominem venientem in hunc mundum, nec est qui se abscondat à calore ejus; Deum, inquam, lumen suum omnibus offerre, qui non illud tenebrarum amore repellunt. Divina namque lux creaturis intellectualibus continenter circumfusa nullum à se unquam desertum patitur, nisi priùs deserta: semper omnibus se impertit, semper radios suos immitrit, nisi voluntaria cæcitate clausos invenerit oculos cordis; unde nullus est, quem Deus intellectui, & voluntati intimè præsens interdum non moveat, ad eum illuminandum, & movendum semper paratus, si se ipse à creaturarum amore abstraheret. Quamobrem quod circumfusæ luci oculos non aperiat, quod divinum auxilium impetrandum, si imploraretur, non impleret, ex vitio hominis est.

Respondeo secundò, auxilium illud omnibus oblatum non omnibus actu conferri, adultis quidem in pœnam peccati actualis, parvulis in

pœnam peccati originalis. Ita docet August. epist. 107. ad Vitalem : *Scimus, inquit, gratiam Dei non omnibus hominibus dari. Scimus eis, quibus datur misericordia Dei, gratuitam dari. Scimus eos, quibus non datur, iusto Dei iudicio non dari.* Hanc suam sententiam demonstrat Augustinus exemplo parvulorum, qui sine Baptismo decedunt, qui tamen unicum est medium parvulis sufficiens ad salutem. Quam rationem urget *lib. de dono persever. cap. 12.* quia plerumque festinantibus parentibus, & ministris ad conferendum parvulo Baptismum paratis & anxiiis, puer moritur. Sanè quodnam auxilium sufficiens habebant parvuli in utero materno obcuntes, nemo prudens dicere potest. Ex quo infert August. *lib. 4. contra Julian. cap. 3.* Quod cum Deus non sit benevolentior scelestissimis & impiissimis hominibus, quàm puerulis innocentibus, si Deus illis in pœnam peccati originalis denegat auxilia sufficientia, à fortiori illis in pœnam voluntariæ obdurationis auxilia sufficientia interdum subtrahit. Hoc argumentum ita convincens credidit S. Pater, ut Pelagianos alloquens dicat : *Vobis ora obscrunt, & linguas premunt, qui loqui nondum valent.*

Idem apparet in infidelibus, quibus non proponuntur mysteria credenda, unde non habent auxilium sufficiens ad fidem; quomodo enim credere in eum possunt, de quo nihil audierunt? Quomodo autem audient sine prædicante? Accedit dari secundùm D. Thomam multos infideles negativè, id est tales, in quibus infidelitas non sit peccatum, ut patet 2. 2. *quest. 10. art. 1.* Si autem infideles haberent auxilium sufficiens ad credendum, profectò eorum infidelitas non esset

esset negativa & innoxia, sed privativa & culpabilis. Idem apparet in amentibus, qui post peccatum mortale ante pœnitentiam in amentiam lapsi sunt, quibus procul dubio nullum ad est auxilium internum ad salutem sufficiens, quod tale esse nequit, quando homo usu rationis caret. Idem patet in obduratis & excæcatis, quos ut ait Propheta, tradidit *Deus voluntatē eorum*; quos ut addit Apostolus, *tradidit Deus in reprobū sensum*, quos ut ait Eccles. cap. 7. *Deus despexit*, & in quorum interitu Deus ridet. Id claret exemplo scelesti Antiochi preces ad Deum fundentis, à quo non erat misericordiam impetraturus. Et rationem dat Augustinus *serm. de verbis Domini*, quia justum est, ut cū vult, non possit peccator, qui quando potuit, noluit; ideoque per malum velle meritò perdit bonum posse. Unde D. Thomas *lib. 3. contra Gentes*, postquam *cap. 159.* docuit quod *Deus quantum est de se, paratus est omnibus dare gratiam*, vult enim omnes homines salvos fieri, & ad agnitionem veritatis venire: capite tamen 162. addit obduratos non solum infusione gratiæ, sed etiam exteriori custodiâ carere. Unde August. *in Psalm. 147.* ait: *Ecce deserit peccatorem; ecce non vocat, ecce non aperit sensum, ecce non infundit gratiam.*

Denique cū gratia sufficiens sit notio quædam ad ipias cogitationes & sanctas affectiones animum ciens, & aliunde manifestâ experientiâ compertum sit, impios nec sacris inspirationibus semper illustrari, nec piis semper motibus agi, nec conscientiæ stimulis angī, cū potius latentur cū male fecerint, & exultent in rebus pessimis; consequens est,

obduratos non semper excitare auxilia sufficientia, sicut nec pias cogitationes, quæ cum sint in nobis, & à nobis, non possent non sentiri à nobis si adessent. Admittere enim cogitationes, de quibus non cogitemus, seu quæ non sint menti conspicuæ, commentum est per se absurdum, & in dissertatione de probabilitate satis à nobis explosum. Ergo non omnibus auxilia sufficientia actu conferuntur, juxta illud frequenter ab Augustino usurpatum: *Communis est omnibus natura, non gratia*; & illud Fulgentii lib. 3. de verit. prædest. cap. 20. *Non omnibus autem istam gratiam dari, & quibus datur, non omnibus aequalit. & dari, quisquis piè quarit, eloquiorum attestatione cognoscit.* Et illud etiam Prosperi carmine de ingratis, capite 11.

— *Dic unde probes quod gratia Christi*

*Nullum omninò hominem de cunctis, qui
generantur*

*Prætereat cui non regnum, vitamque bea-
tam*

*Imperire velit? (voluntate inferente auxilia
sufficientia.)*

*Sed tamen hac aliquà si vis ratione tueri,
Et credi tam stulta cupis.*

Dices: Concilium Senonense in decreto fidei docet, gratiam semper esse in promptu, & ne momentum quidem præterire, in quo Deus non stet ad ostium, & pulset. Concilium item Colonienſe in *Enchirid. de Sacramento Pœnitent. cap. 16.* ait: *Deus aded vult omnes homines salvos fieri, ut nemini quantumlibet scelerato gratiam suam subtrahat.* Denique D. Thomas 3-part. q. 86. art. 1. docet erroneum esse dicere,
dari

dari aliquod peccatum, de quo homo pœnitere non possit: non potest autem homo pœnitere sine gratia sufficiente.

Respondeo hæc omnia priorem duntaxat nostram responsionem confirmare, offerre nimirum Deum optimum maximum omnibus quâmlibet obduratis auxilia sufficientia, paratum visitare eos per viscera misericordiæ suæ: stat ergo semper Deus ad ostium, quia lux Dei menti nostræ semper circumfusa est; & pulsare sæpè, imò semper pulsare paratus est, nisi peccator esset rebellis lumini, nisi diceret, *Scientiam viarum tuarum nolo*; nisi clauderet ostium cordis, & confortaret seras portarum suarum. Nulli etiam scelerato gratiam subtrahit sponte sua, sed iteratis occallentis animi peccatis coactus. Deinde hæc testimonia intelliguntur moraliter, non mathematicè, id est non singulis instantibus physicis Deus sceleratis pias cogitationes immittit, ut experienciâ liquet, sed frequenter. Possunt etiam hæc verba intelligi non solum de inspirationibus, & excitationibus internis, sed etiam de externis vocationibus, quibus vel per seipsum, vel per creaturas gloriam Dei jugiter enarrantes peccatores excitat Deus. Denique P. Thomas de Lemos in Congregatione de Auxiliis demonstravit, Concilium Provinciale Senonense à septem Episcopis celebratum, nunquam fuisse ab Apostolica Sede approbatum, sine cujus approbatione Concilia Provincialia non esse regulam fidei, omnes Theologi confitentur.

Ad D. Thomam dico, hominem posse quandiu est in statu viæ, salvari, converti, & de quovis peccato pœnitere; quia & semper retinet

arbi



arbitrium vertibile & flexibile in bonum, & Deus gratiam, quam offert, conferre potest. Interdum tamen per sua peccata homo potentiam sibi ipsi adimit penitendi, quia dum consuetudini non resistit, duram sibi imponit peccandi necessitatem blandiendo prementem, & premendo blandientem. Unde contingit ipsum divinis motibus non affari, quia cum in profundum venerit, contemnit; & insanabilis fit morbus postquam redditus est insensibilis. *Invenit ergo se ligatum*, ait August. in Psalm. 106. *difficultatibus cupiditatum, & non potest viam propter compedes ambulare: inclusum se sentit difficultate vitiorum, & tanquam muro impossibilitatis erecto, portisque clausis, quâ evadat, ut rectè vivat, non invenit.* Certè si peccatum quodvis mortale privet nos iure ad vitam æternam, quidni peccata mortalia toties iterata obduratum iure habendi auxilia sufficientia privabunt? Nec propterea à peccato excusabitur, quia hanc peccandi necessitatem, & desertionem sibi ipsi peccandi consuetudine accersere voluit. Hanc ipsam doctrinam tradit Doctor Angelicus lib. 3. cont. Gent. cap. 160. his verbis: *Quamvis illi, qui in peccato sunt, vitare non possint per propriam potestatem, quin impedimentum gratia præsent vel ponant, nisi auxilio gratia præveniantur; nihilominus tamen hoc eis imputatur ad culpam, quia hic defectus ex culpa præcedente in eis relinquitur: sicut ebrius ab homicidio non excusatur quod per ebrietatem committit, quam suâ culpâ incurrit.*

Quæres secundo, utrum iustis denegentur interdum auxilia sufficientia?

Respondeo, si per auxilium sufficiens intelligamus pias cogitationes & sacras affectiones, experienciâ ipsâ satis constare justos ordinarios non semper his motibus agi, subindeque nec ista auxilia sufficientia semper habere. Paucissimæ enim sunt illæ animæ, quæ ad altum illum sanctitatis gradum pervenerint, in quo perenniter cum Deo conjunctione fruuntur, ad superna desideria semper tendant, & in cœlis assiduâ cogitatione conversentur. Patet ergo justos ordinarios vios motus in se semper non experiri, subindeque nec his auxiliis semper excitari.

Quod si per auxilium sufficiens intelligantur vires sufficientes ad benè agendum, quibus sæpe sæpius correspondent piæ illustrationes, & sacri motus; dicendum est, justis nunquam deesse auxiliū sufficiens quandiu in iustitia perseverant. Quia nimirum beneficio gratiæ sanctificantis quâ ornantur, & beatissimâ virtutum infusarum copiâ, quâ instruuntur, quibus gratiæ actuales juxta usitatum providentiæ Dei cursum respondent, veram habent iusti, & expeditam benè agendi, vitandique peccati facultatem, ratione cujus præcepta Dei sunt eis proximè possibilis, nec à Deo deseruntur, nisi Deum prius ipsi deseruerint.

Scio in contrarium objici quædam Patrum testimonia, putâ Chrysostomi *hom. 72. in Ioan.*

& hom. 31. in epist. ad Hebr. dicentis : *Caſus Petri non frigidityte ſed ſuperni auxilii dereliſtu contigit ; ut ſciret quod abſque Deo n. hil poteſt fieri.* Idem tradit Auguſt. ſerm. 124. de tempore : *Quid eſt homo ſine gratia Dei , niſi quod fuit Petrus cum negavit Chriſtum ? Et ideo B. Petrum paulatim Dominus ſubdeſervit , ut in illo totum hominum genus poſſet agnoſcere , nihil ſe ſine Dei gratia prævalere.*

Verùm hæc, & alia teſtimonia abſque negotio de gratia efficaci explicari poſſunt , quæ Petro tunc defuit, & interdum juſtis deeſt, nimirum dum in peccata lethalia prolabantur. Neque enim ſemper juſtis adeſt prædominans ille boni amor, ſeu magna illa & plena Dei diligendi voluntas à gratia efficaci proficiſcens, ut docet Auguſtinus lib. 2. de peccat. merit. & remiſſ. cap. 19. Nos autem, inquit, quantum conceſſum eſt, ſapiamus, & intelligamus, ſi poſſumus, Dominum Deum bonum ideo etiam Sanctis ſuis alicujus operis juſtitiam aliquando non tribuere, vel certam ſcientiam, vel victricem delectationem, ut cognoscant non à ſe ipsis, ſed ab illo ſibi eſſe lucem, quâ illuminentur tenebra eorum ; & ſuavitatem, quâ det fructum ſuum terra eorum. Idcirco enim Sanctos & fideles ſuos in aliquibus vitiis tardiùs ſanat, ut in his eos minùs, quàm implenda ex omni parte juſtitia ſufficit, delectet bonum, ſive cum lateat, ſive cum etiam maniſeſtum eſt, ut quantum pertinet ad integerrimam regulam veritatis ejus, non juſtificetur in conſpectu ejus omnis viciuſ. Hinc tantopere hortatur Sanctos omnes idem Pater, ut in timore & tremore ſalutem operantes, jugiter Deum rogent, ut det quod jubet, atque inſpiratâ gratiæ ſuavitatem per Spiritum Sanctum faci-

ciat plus delectare quod præcipit, quàm delectat quod impedit ; hoc est quodcumque bonum temporale , cujus delectatione peccamus. Nec hoc fateri detrectabit, qui consideraverit donum perseverantiæ justis ipsis necessarium, juxta Tridentini sacra decreta non posse sub meritum cadere , & quibusdam concedi, aliis denegari. Similiter ergo Deus pro ratione inscrutabilium judiciorum suorum gratiam efficacem quibusdam pro bona voluntate confert , aliis pro sua justitia denegat. *Mirandum est quidem*, inquit August. lib. de corrept. & grat. cap. 8. *multumque mirandum, quod filius juis Deus quibusdam, quos regeneravit in Christo, quibus fidem, spem, dilectionem dedit, non dat perseverantiam ; cum filiis alienis scelera tanta dimittat, atque impetratâ gratiâ sua faciat filios suos. Quis hoc non vehementissimè stupeat ? Hic si à me queratur (dixerat paulò superius) cur eis Deus perseverantiam non dederit, quibus eam, qua christianè viverent, dilectionem dedit, me ignorare respondeo. Non enim arroganter, sed agnoscens modulum meum audio dicentem Apostolum : O homo, tu quis es, qui respondeas Deo ? Et : O altitudo divitiarum sapientiæ & scientiæ Dei, quàm inscrutabilia sunt judicia ejus, & investigabiles viæ ejus !*

Quamvis autem in judiciorum divinatorum abyssu multâ humilis quiescere debeat Christianus, non desunt tamen rationes hujus gratiæ efficacis denegationis. Prima est peccatum actuale mortale, quo sicut privamur jure ad gloriam, ita à fortiori jure ad gratiam spoliatur. Secunda causa in justis est negligentia, tepor, & benè vivendi incuria, juxta illud Apocalypscos

16. *Vtinam calidus esses, aut frigidus, sed quia tepidus es, & nec frigidus, nec calidus, incipiat te vomere ex ore meo.* Tertia est superbia & nimia præsumptio; nam ut ait Bern. *serm. 54. in Cant. argumentum superbia privatio est gratia.* Solet enim Dens humiles exaltare, superbos confundere; istis resistere, illis gratiam largiri. Quarta est ingratitude; illos enim finit Deus cadere, qui Deo non tribuunt quod stant, nec de acceptis beneficiis Deo gratias agere sunt solliciti. Hinc præclare Bernardus *serm. contra vitium ingritudinis*, sic ait: *Benè siquidem orasse, obsecrasse, postulasse leguntur, qui levaverunt vocem dicentes: Iesu fili David miserere nobis. Sed defuit eis quarta, quam adjecit Apostolus, gratiarum actio, quando nec redierunt, nec egerunt gratias Deo. Multos quoque videmus usque hodie satis importunè petentes, quod sibi deesse cognoverint, sed paucos admodum novimus, qui dignas super acceptis beneficiis gratias agere videantur. Nec reprehensibile quod instanter petimus, sed planè petitioni negat affectum, quod invenimur ingrati. Et fortè hoc etiam clementia esse videtur, ingratis negare quod postulant; ne contingat nobis, ut tantò gravius de ingratitude judicemur, quantò magis accumulatis beneficiis ingrati probabimur extitisse. Ergo misericordia reus est, in hac parte subtrahere misericordiam; quemadmodum ira & indignationis, misericordiam exhibere, eam sanè de qua per Prophetam ipse Pater misericordiarum loquitur, dicens: Misereamur impio, & non discet facere justitiam.*

Alias etiam hujus mysterii rationes adducit Augustinus, tum ut divinæ gratiæ independentia, & pura misericordia, cluceat; si enim gratia
omnibus

omnibus deberetur, jam non ex gratia, sed ex justitia liberaremur. Ad contundendas etiam Pelagianorum querelas confugit sæpè Augustinus ad peccatum originale, quod est causa sufficiens denegationis gratiæ. Unde *libr. de corrept. & grat.* Monachis Adrumetinis importunè queritantibus, & ægrè ferentibus corripì non perseverantes, quibus donum perseverantiæ defuit, & postulantibus quare defuit, respondet Doctor sanctissimus: *Quia, inquit, non sunt ab illa conspersione discreti, quam constat esse damnatam, euntibus omnibus ex uno in condemnationem. Qui perseveraturi non sunt, ac sic à fide Christiana, & conversatione lapsuri sunt, ut tales eos vite hujus finis inveniat, proculdubio nec in illo tempore, quo bene, pièque vivunt, in isto predestinatorum numero computandi sunt. Non enim sunt à massa illa perditionis præscientiâ Dei & prædestinatione discreti, & idèò nec secundum propositum vocati, ac per hoc nec electi. Aliam rationem hujus denegationis tangemus reflexione sequenti.*

Quæres ultimò, undenam gratia Christi suam efficaciam sortiatur, num ab omnipotentia Dei, num ab eventu, num à consensu per scientiam mediam prævisò?

Respondeo hîc præcipuam Theologiæ speculatiæ quæstionem proponi, cui pro merito tractandæ nec una dissertatio sufficeret. Multa equidem pararam Thomisticæ de efficaci & prædeterminante gratia sententiæ stabiliendæ, adornan

adornandaque ; sed innata Dominicanis omnibus erga sedem Apostolicam hanc controversiam, controversiæque resolutionem typis mandari non semel prohibentem reverentia , & ex oculata obedientia conceptum sermonem continere præcipit , & assertionem celeberrimam Prædicatorum Ordini concreditam, à Paulo, Augustino, Aquinate ad nos transmissam, à Dominicanis coram Clemente VIII. & Paulo V. Ecclesiæ Catholicæ Hierarchis tanta gloria propugnata silentio prætermitto , quia melior est obedientia quàm victima, & ipsius etiam gratiæ genio consentaneum est amare non rixas , sed pacem, non publicas dissensiones, sed secretum ; magisque averintus sentiri , intus lucere, intus infundere suavitatem, quàm foras erumpere, & inter amaras disputantium controversias ventilari.

Et sanè prudentissimè Apostolicæ Sedis Antistites hac quæstione examinanda Theologis omnibus interdixerunt. Cum enim ex hac controversia plura scandala orta sint, & periculosa inde perturbationes timeantur, censuerunt Christi Vicarii ab hujus doctrinæ promulgatione supersedendum , ad cujus defensionem sufficiunt & libri hætenus editi, & disputationes intra scholarum umbras celebratæ , liberèque celebrandæ. Si enim Veritas multa habebat discipulis dicere , quæ tunc non poterant ipsi portare, multa etiam, præsertim in penitissimis divinæ gratiæ mysteriis esse Summi Pontifices arbitrati sunt, quæ vel ob rei difficultatem, vel hominum infirmitatem & teneritudinem , vel disputantium æstus propalari non debent. Quare hoc silentio gratiæ victricis defensionem & tutelam

rutelam Ordo noster non abjicit, qui tot ei defensores aluit, & etiamnum instruit; neque hoc nobis commissum cœleste depositum, in cuius defensionem omnis Dominicanus miles est, deserimus, sed Pastoris gregis jussam præstolamur, ut rationales Domini canes in hujus gratiæ hostes latremus.

R E F L E X I O.

Ex tam multiplici gratiæ nobis necessariæ divisione vidisti, Lector, quod non est fructus bonus qui de gratiæ radice non surgat, & quod nihil restat liberandis nisi gratia liberantis. Ergo perpetuo continentis orationis desiderio impetra quod lex imperat; quia sicut nec diu vivit qui aërem nequit attrahere, ita nec benè vivit, qui spiritum gratiæ non accipit, nec quodammodo semper bibit de fonte lucis æternæ, ut loquitur Augustinus. Ergo non solum peccatores, sed nec ipsi etiam justi suæ se fortitudinī credant, sed cauta humilitate divinum sibi precando ejus asciscant auxilium, à quo accipimus victoriam concupiscentiæ, ne voluntate pertrahamur; à quo etiam robur patientiæ mutuamur, ne dolore frangamur. Itaque si *scienter pii* sumus, & *piè scientes*, ut loquitur August. *epist.* 107. rogemus eum qui intimo nostro intimior est, ut intus in corde legem ponat nobis spiritu suo, ut eam non tanquam servi amore metuamus, sed ut filii dilectione casta timeamus. Ideo enim tam sæpe ventilamus nos in omnem ventum (phrasis est Ecclesiastici *cap.* 5.) nec firmi sumus in via Domini, nec in veritate sensus nostri, quia totum illi non asserimus, à quo

quo omne bonum defursum est. Hinc tam crebriè contingit illud, quod tam vehementer singulis quibusque timendum monet Bernardus serm. 3. in Psalm. 90. *Et si pudor neget apostasiam corporis, tepor ipse paulatim ingerit apostasiam cordis*; quia gratiæ recessum non timemus, & donum illud, quod divinus Apostolus Ephes. 11. *Sacramentum voluntatis Dei* nuncupat, ad libitum nobis nostrum dari comminiscimur, & *libertatem Dei facientes servitutem*, ut in Apologet. ait Tertull. gratiam Dei humanæ subijcimus arbitrio voluntatis. Nec illud tam veridicè ab Augustino pronuntiatum advertimus: *Multos impedit à firmitate præsumptio firmitatis. Nemo erit à Deo firmus, nisi qui se à seipso sentit infirmum.* Quam utique infirmitatem nec tollit ætas, nec usus: etsi enim qui in virtute exercitati sentierunt, minores quidem hostes habent, sed tamen habent. Fatigati interdum sunt hostes per ætatem atque laborem, sed tamen etiam fatigati non cessant qualibuscumque motibus infestare senectutis quietem. Velint, nolint, habent concupiscentias. Titillant, blandiuntur, stimulant, infestant, surgere volunt, quibus & interdum succumbunt. Quid causæ est? Ne dubites in causa esse superbiam, etiamsi non appareat: nunquid enim Deus, qui humilibus dat gratiam, humili auferet datam? Ille solus vincit, qui ex parte sua vigilans totum se Deo permittit; neque enim quidquam timere potest homo in sinu Dei positus, si de illo nolit cadere; & quidquid ei acciderit, ad salutem valebit, non ad perniciem: si verò deseritur ope gratiæ, relinquetur in infirmitate naturæ. *Parum est mihi voluntas mea*, ait August. in Psalm. 118. vers. 35.

nisi

nisi in eo quod volui, me ipse deducas. Immo nec bene volumus, nisi voluntas à Domino præparetur; nec Dei adjutorium ad bene volendum necessarium esse satis credimus; nisi mentem aperiat qui amorem inspirat: hæc enim uni sauciatae naturæ plaga altissimè impressa illa quidem, ut ne quidem oculos mentis in altum attollere, & miseriam suam agnoscere à divino deserta lumine queat; *Nec jam captivos oculos extollere in altum sponte potest*, inquit Prosper cap. 40. *de ingrat.* quoniam hoc etiam spoliante tyranno perdidit, ut quanto jacent sub vulnere norit.

Hanc doctrinam viris potissimum spiritualibus commendandam docent Patres, ut ex una parte virtutis studium non relinquunt, ex alia verò certissimè sibi persuadeant, solâ gratiæ vi idoneos fieri, & accendi hominum animos ad rectè vivendum. Nihil ergo periculosius, quàm vitam in speciem sanctam, austeram, pœnitentem, & bonorum ex officio operum feracem edere, & hæc viribus propriis ascribere. Hoc præceptum eleganter tradit Prosper cap. 37. *carminis de ingrat.* sequentibus versibus, quibus alios in eodem carmine sparsos ad tam necessariam humilitatis basim stabiliendam subnectemus:

— *Licet in cruce vitam*

*Ducant, & jugi afficiant sua corpora morte,
Abstineant opibus, sint casti, sintque benigni,
Terrenisque, ferant animum super astra, relictis:
Si tamen hac propriâ virtute capeffere quæquâ
Posse putant, sitve ut dignus labor iste juvari,
Ingenium meruisse aiunt bona vera petentis:
Crescere quo cupiunt, minuantur; proficiendo*

Desi

*Deficiunt, surgendo cadunt, currendo recedunt.
Vnde etenim vani frustra splendescere quarunt,
Inde obscurantur: quoniam sua laudis amore,
Non quæ sunt Christi quarunt, nec sit Deus illis
Principium: & capiti non dant in corpore re-
gnum.*

*Non horum templo est Christus petra funda-
mentum.*

*Sed super instabilem arbitrii nutantis arenam
Assurgunt, sæda lapsuri mole tumoris.*

*Et tamen in sanctos animum cùm intendimus
actus,*

Cùm desideriis carnis mens casta repugnat,

Cùm tentatori non cedimus, & per acerbis

Vexati pœnas illas corde manemus,

Libertate agimus, sed libertate redempta,

*Cui Deus est rector, summoque ex lumine lu-
men:*

Vita, salus, virtus, sapientia gratia Christi est,

Quâ currit, gaudet, tolerat, cavet, eligit, instat,

Credit, sperat, amat, mundatur, justificatur.

Si quid enim recti gerimus, Domine, auxiliante

Te gerimus, tu corda moves, tu vota petentis,

Quæ dare vis, tribuis, servâs largita, creâsque

*De meritis merita, & cumulans tua dona co-
ronis.*

*Quos versus è Latina in Gallicam linguam sic
eximius Poëta transtulit:*

*Que ces maîtres hautains poussez par un faux
zele*

*Affigent tous leurs sens, domptent leur chair
rebelles;*

*Qu'ils vivent sur la croix, qu'ils soient chastes
& doux,*

Qu'ils haïssent les biens qui sont chers de tous,

Et

Et qu'étant embrasé par de plus nobles flammes,

Ils portent jusqu'au Ciel leurs genereuses ames:
S'ils croient qu'en quelque homme un état si parfait

Puisse du libre arbitre être l'illustre effet;
Ou que leur propre ardeur la grace ait meritée,
Se rendant par ses soins digne d'être assistée;
Leur ame en cet état recule en s'avancant,
En voulant monter tombe, & perd en amassant.
Comme elle suit l'attrait d'une lueur trôpeuse,
Sa lumière l'offusque & la rend tenebreuse:
Parce que son amour croissant de plus en plus
Cherche son propre honneur, non celui de Jesus.
La vertu n'est en eux qu'humaine, & non divine,

Puis qu'elle n'a que l'homme, & non Dieu pour racine;

Et nous faisant agir par nos propres efforts,
Ils ravissent au chef l'empire sur le corps.
Ils ne bâtissent point sur l'immobile pierre;
Le temple de leur cœur est un temple de terre,
Qui par eux seuls bâti sur le sable mouvant
De leur esprit volage & muable à tout vent,
Après s'être élevé dans leur orgueil extrême
Tombe de tout son poids, & se brise luy même.

Nous sçavons toutefois que lors que dans nos ames

Un vif amour agit par de plus vives flames,
Lorsque le chaste cœur par de saints mouvemens
Combat la douce amorce, & le charme des sens;
Lorsque nous repoussons par un ferme courage
Du lion rugissant les efforts & la rage;
Et que l'ardente foy plus forte que l'Enfer
Souffre sans s'ébranler & la flamme & le fer:

C'est

*C'est par la liberté que nôtre ame est conduite,
Mais cette liberté par la grace est produite.*

*Elle a Dieu pour son guide, & toute sa clarté
De ce Soleil suprême est un jour emprunté.*

*Et sous un si grand Roy librement asservie,
Puisse en luy son salut, sa sagesse, & sa vie.*

*C'est par luy qu'elle court avec un saint plaisir,
Qu'elle ressent l'ardeur d'un celeste desir;*

*Qu'elle est sage en son choix, en ses maux patiente,
Invincible en la guerre, en la paix vigilante;*

*Qu'elle est & juste & pure, & voit de jour en jour
Croistre en elle la foy, l'esperance, & l'amour.*

*Grand Dieu, quoyque t'oppose une erreur teme-
raire,*

Si l'homme fait le bien, toy seul le luy fais faire;

Ton esprit penetrant dans les replis du cœur

Pousse la volonté vers son divin Moteur;

*Ta bonté nous donnant ce que tu nous comman-
des,*

*Pour accomplir nos vœux form' encor nos deman-
des.*

Tu conserves tes dons par ton puissant secours,

Tu fais nôtre merite, & l'augmentes toujours;


Et dans ce dernier prix qui tout autre surpasse,

Couronnant nos travaux, tu couronnes ta grace.

DISSERTATIO III.

Historica.

Varii circa gratiam errores recensentur, Pelagianorum potissimè, & Semipelagianorum historia texitur.

 UANTÆ quantæ sunt Theologorum Catholicorum de gratia Christi dissensiones, concors tamen eorum omnium sententia fert, supernaturalem & internam Salvatoris gratiam esse ad christianè vivendum necessariam, eamque ad initium cujuslibet boni operis, etiam fidei, orationis, & pii desiderii exigi. Contra hanc orthodoxam veritatem multipliciter erratum fuit.

Antiquiores circa gratiam errores.

Antiquissimus, & mundi creationi fermè coævus de gratia error contigit in cælo. Ut enim in tractatu de Angelis, *dissert. 4. cap. 2. specul. 2.* annotavimus, primum Luciferi peccatum superbia fuit, quatenus summum bonum & in seipso, & per seipsum, propriasque vires obtinere, spreto Dei auxilio, superbissimè præsumpsit, juxta illud Bernardi ibi laudati: *Qui sedere præsumpsit, seipso voluit esse contentus.* Et in hoc

Tom. V.

sensu appetivit similis esse Altissimo, dum sibi sufficere, divinoque auxilio non egere practicè credidit. Unde fatuus libertatis amor, & gratiæ divinæ contemptus angelicæ ruinæ causa fuit. Id ipsum præclare tradidit Magnus Gregor. lib. 54. *Moral. cap. 18.* ubi applicans diabolo illud Job 41. *Factus est ut nullum timeret*, sic habet: *Sua perversitate talis factus est, ut nullum timeret, ei quippe à quo conditus fuerat, subesse depexit: celsus esset si participatione vera celsitudinis contentus fuisset; sed dum privatam celsitudinem superbe appetiit, jure perdidit participatam; relicto enim eo cui debuit inhaerere principio, suum sibi appetiit quodammodo esse principium: relicto eo qui ei verè sufficere peterat, se sibi sufficere posse judicavit; & tantò magis infra se cecidit, quandò magis se contra gloriam sui Conditoris erexit. Nam quem exaltabat libera servitus, dejecit captiva libertas.*

Observavimus etiam eodem tomo, *dissert. 5. cap. 2. specul. 3.* Adamum non solum Protopaiementem, sed etiam Protopelagianum extitisse, quatenus divinam independentiam æmulans voluit esse sua regula, sibi que per propriam virtutem divinitatis imitationem asciscere. Unde August. ibi relatus ait, ipsum voluisse rapere, & veluti furari Divinitatem, & magis frui potentiâ suâ, quàm Dei. Quod confirmat idem Pater lib. 2. *de Genes. contra Manich.* ubi explicans illum serpentinae tentationis sibilum, *Eritis sicut Dii*, ait: *Hoc est ergo, quod persuasum est, ut suam potestatem nimis amarent, & cum Deo esse pares vellent; sed amiserunt quod acceperant, dum id quod non acceperant, usurpare voluerunt: non enim accepit humana natura, ut per suam po-*
testat

re statem Deo non regente beata sit. Id etiam antea tradiderat Cyprianus serm. de jejunio & tent. Christi: *Adamum, inquit, in Paradiso pulsavit & stravit, cum subjectionem quam Deo debebat, fastidians, appetiit dominatum. Huic malo resistere nos Salvator edocuit, ut soli Deo subiectus sit homo quantumcunque profecerit, ut quā vocatus est superiūs, nesciat se sublimem, & per omnia agnoscat conditio conditorem, gratia largitorem.* Denique idem non obscurè indicat Prosper carmine de ingratis, cap. 43.

*Hoc patribus primis mortis sator insinuatus.
Consilio est, hac arte omnes prostravit in uno,
Dū suadet multò prastantius esse, quod ipsis
Non tribuente licet Domino sponderet habendum*

Prudens libertas, vetitoque instructa cupido.

Hac de causa observant Docti, idcirco adeo plausibilem, & naturæ corruptæ consentaneam esse Pelagianam hæresim, immò & omnes naturali fermè instinctu, nisi fide corrigantur, esse Pelagianos, quia nimirum inviscerata nobis, & ab Adamo in posteros omnes transfusæ superbæ, quæ est cordis humani primum vivens, & ultimum moriens, omninò adulatur.

Contra gratiam armarunt se deinde Judæi carnales, quæ Dei sunt non percipientes, sed arbitantes per solam à Mose latam legem justificari se posse; adversus quos totis ad Romanos & Galatas epistolis prædicator gratiæ Paulus divinissimè scripsit. Horum errorem initio nascentis Ecclesiæ sequutus est Simon Magus, ex efficacia divinæ voluntatis everisionem liberi arbitrii ineptissimè inferens, ut S. Clemens lib. 3. recognit. refert, Sequuti sunt etiam Basilides,

340 *Lib. VIII. Dissert. III. historica,*
Valentinus, & Marcion, qui referente S. Clemente Alexandrino *lib. 5. Stromatum*, fidei, opera, & salutem naturæ viribus ascribebant.

Illos divinæ gratiæ hostes sectatus est Origenes infinitarum hæreseon pater. Hic enim, ut refert S. Thomas 3. *cont. Gent. c. 89. & lib. 3. periarichôn*, docuit in tantum Deum dare nobis velle, & proficere, in quantum nobis dedit virtutem volendi, non autem sic, quod faciat nos velle hoc, aut illud. Et Hieronym. *epist. ad Ctesiphontem*, errorem Pelagii Origenis doctrinæ ramusculum appellavit. Hunc tamen errorem nec in Oriente, nec in aliis anterioribus hæreticis operosè refutare Patres, vel gravioribus tunc occupati negotiis non potuerunt, vel certè hæresim sponte labantem & in fumum abeuntem ex professo evertere noluerunt.

Hæresis Pelagiana, ejusque varii status.

Hæresim divinæ gratiæ destructricem, vel extinctam planè, vel certè sopitam suscitavit Pelagius natione Britannus, seu Anglus; Anglia enim magna Britannia dicitur, ut distinguatur à Britannia minori, quæ est una è Galliæ florentissimis provinciis; unde etiam vocatur à Hieronymo Scotus. Fuit autem professione Monachus, ut constat ex Augustino *lib. de gestis Pelagii*, qui etiam ejus ingenii acumen, facundiam non vulgarem, & circumspectionem de rebus obscuris cunctanter potiùs quàm fidenter loquentem variis in locis, sed nominatim *lib. 3. de peccat. merit. cap. 10.* laudat. Et certè
inge

ingenium ipsius non solum epistola ad Deme-
triadem, eloquentiæ nitore præstans, sed etiam
commentarii in Epistolam ad Romanos, & varia
operum ejus fragmenta apud Augustinum refel-
lentem sparsa demonstrant. Quibus non ad-
versatur Hieronymus, tamen illum non semel
indoctum, & loquendi imperitum pronuntiet;
loquitur enim Hieronymus de profunda Theo-
logiæ & Scripturarum scientia, & solido ac ner-
voso loquendi stylo, non figurarum flores, sed
veritatis fructus fundente; quæ dotes Pelagio
decerant.

Mores etiam hujus Hæresiararchæ in foro sal-
tem externo, ut loquuntur, fuisse spectabiles te-
statur idem Augustinus, qui *lib. 3. de peccat. merito
& remiss. cap. 1. & 3.* illum virum bonum, virum
egregiè christianum, virum sanctum, & non
parvo profectu christianum appellat. Conten-
dunt tamen alii Augustinum ob sparsam dunta-
xat sanctitatis illius larvatæ rumorem hujusmo-
di elogia panxisse; quia, inquiunt, S. Isidorus
Pelusiota sanctitate, doctrinâ, & Chrysostomi
discipulatu celebris, post exploratos attentius
Pelagii mores, illum ait fuisse vagabundum, ex
alio monasterio ad aliud subinde migrantem,
omniumque mentes perferutantem: *Quam-
obrem, addit, si tibi carniû nidor, atque obsonio-
rum condimentum cura est, iis qui Magistratus
gerunt potius blandire, atque urbium caminos
vestiga; neque enim homines Eremitæ facultates
eas habent, ut te quemadmodum tibi gratum est,
excipere valeant.* Et sanè mirum non est; do-
ctrina namque gratiæ Christi inimica pruden-
tiæ carnis, adulatur; gratia, quippe Christi à
cruce, à vulnibusque Redemptoris effluxa

amorem etiam crucis inspirat : unde gratiæ hostis fuit simul ventris amicus , & malè blandas carnis delicias effusè quærens.

Ut autem Pelagius errorem suum faciliùs diffeminaret , totum causæ suæ robur in astutia & calliditate posuit. Simulavit enim se velle impiam Manichæorum hæresim confutare, in quinque capitibus turpiter errantem. Primò asserbant Manichæi carnem nostram esse malam, & quia ad malum inclinatur, à principio malo processisse. Secundò volebant nuptias esse malas, quia & cum libidine exercentur, & prolem edunt peccato sordentem. Tertiò legem veterem justificare impotentem, tanquam malum reprobabant. Quartò liberum arbitrium ad malam necessitatum, & fatali vi adactum contendebant. Quintò Patres veteris Testamenti, tanquam insignes peccatores traducebant. Hos quinque errores non veritatis catholicæ luce, sed novis erroribus emendare Pelagius perperam conatus est. Unde carnem voluit ita esse puram, ut nulla etiam originali labe esset infecta. Nuptias ita bonas asse asseruit, ut nec pudenda sit libido, nec utlatus deturpata proles. Legem ita perfectam esse sancivit, ut sine gratia justificare posse deniverit. Liberum arbitrium ita sanum esse pronuntiavit, ut nullo opitulantis gratiæ adjutorio egeat. Sanctos denique ita perfectos fuisse prædicavit, ut nulla omninò peccati macula inumbrarentur. *Pelagius* (inquit August. lib. cont. duas epist. Pelag. cap. 9.) *quinque rerum obtendit obstacula, in quibus dogmata inimica gratiæ, & catholica fidei delitescant, scilicet in laude creatura, laude nuptiarum, laude legis, laude liberi arbitrii, laude Sanctorum.* Qui sanè
quinque

quinque errores satis connexi sunt, si enim nulla sit peccati originalis infectio per nuptias propagata, si liberum arbitrium sit ita sanum & robustum, ut sola detegente bonum & malum lege, illud amplecti, istud fugere valeat, inutilis prorsus erit divinæ gratiæ opitulatio.

Sed quia apud Christianos per se horrendum erat gratiam Christi omnem excludere, quam omnes novi Testamenti paginæ, & ferè voces, ac syllabæ inculcant, studuit vaferrimus hæreticus errorem suum variis verborum involucris, captiosisque velaminibus obtegere, unde & varios decursu temporis status hæc hæresis nacta est.

Primus status erat merè philosophicus & paganus, in quo volebat hominem per solas arbitrii vires peccata fugere, virtutes comparare, legemque servare posse. Unde dicebat Pelagius in epist. ad Demetriadem: *Spirituales divitias nullus tibi præter te conferre poterit. In his ergo jure laudanda es, in his meritiò cæteris præferenda es, quæ nisi ex te & in te esse non possint.* Et idè in naturæ laudes tantoperè diffuebat, sic laudans Creatorem, ut superfluum convinceretur dicere Salvatorem; sic Deo, quia nos creavit, gratus, ut eidem esset, quia nos sanavit, ingratus. Hunc errorem è Philosophorum Stoicorum sibi unicè fidentium fœtidissimis paludibus hauierat, qui in se non solum virtutes, sed etiam summum bonum invenire, imò & cum Deo de felicitate contendere per summam ignorantiam & majorem superbiam præsumebant, ut passim apud Senecam videre est, qui & plus Philosophiæ homines debere, quàm Deo, quia majus beneficium est bona vita, quàm vita, epist. 20. insolentissimè effutiit.

Secundus status talis fuit, in quo gratiam verbo tenus admittere incepit. Cum enim sibi Christianorum omnium odium conciliasset, quod gratiam negarat, liberum arbitrium gratis à Deo datum gratiam appellare cœpit, ut hoc inanissimo fucò, & ut ait Augustinus, acumine vitreo, quod quasi lucet vanitate, sed frangitur veritate, declinaret invidiam. Hic status larvatus, & nominalis meritò vocari potest.

Tertius status dici potest Judaïsmus, in quo cum urgerentur Pelagiani, quomodo impia, & non ferenda voce præsumerent omnem Christi opem abjicere, addiderunt, ut refert August. *lib. de sp. rit. & lit. cap. 2.* ideo sine operatione gratiæ nos justos esse non posse, quia legem dedit Deus, quia doctrinam instituit, quia bona præcepta mandavit. Sed quia Judaïco illi pronuntiato sponte se illud Apostolicum Gal. 2. oraculum objiciebat: *Si per legem justitia, gratis Christus mortuus est*; ideo legi exemplum Christi addebant, qui bonâ nobis vitâ suâ præluxit, ut videre est *lib. de grat. Christi, cap. 40. & 41.* Admittebant etiam in eo statu gratiam remissivam peccati, quatenus ut docet August. *cap. 2.* ejusdem libri, memoria retinentes, & reminiscentes dimissa nobis esse peccata, non peccata us ulterius, adjuti non aliqua subministratione virtutis, sed viribus propriæ voluntatis, quid sibi remissione peccatorum præstitum fuerit, peractus singulos recordantis. An autem Pelagus admiserit, vel negaverit gratiam habitualém, quâ remittuntur peccata, postea dicemus.

Quartus status est veluti semichristianismus,

in quo gratiam interiorē cœpit agnoscere, & intellectum illustrantem, & intellectum excitantem. *Adjuvat nos Deus*, inquit Pelagius apud August. lib. de grat. Christi, cap. 7. *per revelationem & doctrinam*, dum cordis nostri oculos aperit, dum futura demonstrat, dum diaboli pandit insidias, dum nos multiformi, & ineffabili dono; gratia cœlestis illuminat. Operatur in nobis, addit cap. 10. *velle quod bonum est, velle quod sanctum est*, dum nos terrenis cupiditatibus deditos, mutorum more animalium tantummodo præsentiæ diligentes, futura gloria magnitudine, & præmiorum sollicitatione succendit; dum revelatione sapientia in desiderium Dei stupentem suscitatur voluntatem, dum nobis suadet omne quod bonum est. Quare in illo statu solam illam gratiam negavit, quæ spiritum & virtutem infundit, quæ ex nolentibus volentes facit, quæ infirmam voluntatem sanat, tardam ad agendum applicat, & ut canit Prosper: *Non hoc consilio tantum, hortatuque benigno suadens atque docens, quasi normam legis haberet gratia; sed mutans intus mentem, atque reformans, usque novum ex fracto fingens virtute creandi.* Unde veridicè intulit Augustinus libro citato, quod in his omnibus non recessit Pelagius à commendatione legis, atque doctrinæ, cum ad doctrinam pertineat suadere omne quod bonum est; & ideo insuper vult idem Pater cap. 19. & 24. Deum non solum nobis ostendere veritatem, sed citam impertire charitatem, & interna, atque occulta, mirabili & ineffabili potestate operari Deum in cordibus hominum non solum veras revelationes, sed etiam bonas voluntates.

Ex quibus sequitur, Pelagium in illo statu

admisisse auxilium sufficiens, quidquid in contrarium contendat Baptista Gonet. Et ratio est manifesta multipliciter. Tum quia per auxilium purè sufficiens nihil aliud intelligunt, vel intellexerunt unquam Thomistæ, quàm gratiam interiorem, quâ illustratur intellectus, & excitatur affectus; imperfectè tamen, quia ipsum operatio non consequitur. Atqui Pelagius internas illustrationes, & excitationes admisit, ut fatetur ipse P. Gonet. Ergo. Tum quia auxilium sufficiens est illud, quod dat posse benè operari. Atqui evidentissimum est, Pelagium in hoc statu auxilium possibilitatis, seu quod dat nobis posse, admisisse, ut disertè tradit August. *l. b. de grat. Christi, cap. 3.* ubi hæc Pelagii verba refert: *Cum tria sint, posse justum esse, velle justum esse, & re ipsa justum esse; primum istorum trium, quod scilicet possumus justè vivere, esse Dei, qui possibilitatem illam dedit nobis gratuito, juvatque modis supra explicatis (scilicet lege, exemplo Christi, illustratione, & excitatione) reliqua duo nostra esse, quia ad rectè volendum, & agendum nullo indigemus ejus auxilio, neque Deus nos adjuvat ut velimus & agamus, sed solum ut velle & agere possimus. Scire quippe debemus, addit August. cap. 5. quod nec voluntatem nostram, nec actionem divino adjuvari credit auxilio, sed solam possibilitatem voluntatis, atque operis. :: Et ideò non adjuvet Deus ut velimus, non adjuvet ut agamus, sed tantummodò adjuvet, ut velle & agere valeamus.* Ergo Pelagius auxilium sufficiens, seu quod posse velle, & posse agere dat, agnovit, solum auxilium efficax, seu voluntatis & actionis repudiavit.

Nec dicas cum P. Gonet, auxilium sufficiens
red

reddere hominem perfectē & completē potentem ad actus supernaturales per vim aliquam physicē moventem, seu motionem virtuosam, seu ut loquitur Augustinus, subministrationem spiritus aut virtutis, quā voluntas physicē immutetur, & fiat potens elicere hos actus. Unde, inquit, qui gratiam moraliter tantū prævenientem admittunt, & physicē præmoventem repudiant, auxilium sufficiens de medio tollunt.

Non, inquam, id dicas; in multis enim peccat hoc argumentum: tum quia licet ad illas illustrationes, & excitationes requiratur motio Dei, & ministratio aliqua virtutis; tamen qui semel admiserit dari illas illustrationes, & motiones, verum auxilium sufficiens confitetur; an vero ad illas producendas requiratur qualitas fluens, vel motio virtuosa, vel sufficiat decretum Dei immediatē movens, est quæstio philosophica alibi examinanda, sed quæ non est ad propositum; sicut si quis concederet, dari in nobis intellectionem, dubitaret tamen de necessitate speciei impressæ, vel expressæ, frustra accusaretur negatæ intellectionis, quia de modo producendæ intellectionis dubitat. Et magis ad rem Nazarius noster censet, Deum physicē prædeterminare causas secundas immediatē per seipsum, & per suum decretum efficax, absque immissione physicæ entitatis: & Gonzales gratiam efficacem in actu indeliberato, victrici illi quidem & promovente indeclinabiliter voluntatem, non verò in aliqua entitate modali fluente, vel motione accidentali sitam esse vult. Ergo Nazarius, vel Gonzales negatæ prædeterminationis accusabuntur? Absit, quia prævium

Dei, & efficacem influxum admittunt, tamen si peculiari illud modo ad efficaciam impertinente exponant. Similiter Pelagius admisit gratiam possibilitatis, quæ apud nos appellatur auxilium sufficiens; an verò illa sit motio, vel qualitas, non dixit, nec in mentem venit, nec Augustinus desideravit. Quod verò additur, non posse admitti auxilium sufficiens, nisi admittatur prædeterminans, est perspicuè falsum; multi enim auxilio sufficienti ad conversionem cidentur, qui ad illam auxilio efficaci non perveniunt. Quod si dicas auxilium sufficiens esse efficax respectu actus imperfecti, verum dicis, sed nihil ad rem; quia qui auxilium sufficiens admittunt, non negant esse efficax respectu actus imperfecti, quem efficit.

Queres primò, utrum in illo statu Pelagius concursum simultaneum negaverit?

Respondeo nunquam negasse illum, quin & de illo nullam unquam controversiam extitisse. Neque enim de hoc reprehenderunt unquam Pelagium Concilia, vel ipsemet Augustinus. Nec obest, quod Hieronymus *epist. ad Ctesiphontem, & dialogo 1. advers. Pelagian.* inducit Pelagium dicentem: *Si voluero curvare digitum, movere manum, ambulare, stare, sedere, scribere, sponta jacere, semper auxilium Dei mei necessarium erit?* Non obest, inquam, quia de actionibus illis non agit Hieronymus, ut præcisè sunt actus naturales, sed ut sunt actus morales & deliberati, de quibus ratio reddenda est, ad quos ut benè, & sine peccato fiant, indigemus auxilio gratiæ necessario

cessario ad singulos actus. Unde Hieronymus priori loco sic habet : *Audi ingrate, imò sacrilege, Apostolum pradicantem : Sive manducatis, sive bibitis, sive aliud quid agitis, omnia in n. mine Domini agite. Injuriam tibi fieri putas, & destrui arbitrii libertatem, si ad Deum semper authorem recurras, si illius ex voluntate pendeas, & dicas : Oculi mei semper ad Dominum, quoniam ipse evellet de laqueo pedes meos. Non est in homine via ejus, & à Domino gressus ejus dirigentur. Quæ testimonia manifestè intelliguntur de gratia propriè dicta, non de naturali concursu simultaneo.*

Queres secundò, utrum Pelagiani gratiam habitualement inficiati sint, & de illa fuerit precipua Augustini cum Pelagianis controversia ?

Respondeo primò, certum esse contra P. Suarem; Pelagium gratiam habitualement sanctificantem non negasse. Tum quia Pelagius de hoc nunquam fuit accusatus. Tum quia admittebat Baptisma parvulis esse necessarium, ut consequerentur regnum cœlorum, ad quod naturæ viribus non posse pervenire fatebatur, ut pater per August. *lib. 2. de pecc. origin. cap. 5.* verba Celestii referentem : Baptismus ergo secundum Pelagianos donum aliquod supernaturale addebat. Unde Julianus apud Augustinum *lib. 1. contra ipsum, cap. 6.* ait : *Hac de causa etiam infantes baptizamus, cum non sint coinquinati peccato, ut eis detur, vel addatur sanctitas, justitia, adoptio, hereditas, fraternitas Christi, ut ejus membri*

350 *Lib. VIII. Dissert. III. historica,*
membra sint. Et ne dicatur Julianum per illam
sanctitatem à Baptismate parvulis concessam in-
telligere tantum externam Dei benevolentiam,
& favorem nihil intus producentem, audiendus
est idem Julianus apud eundem Augustinum *lib.*
1. operis jam perfecti, sic loquens: *Hanc gratiã*
locupletẽ spiritualibus donis credimus, & mul-
tis optimam muneribus, ac reverendam virtuti-
buz. Tum quia Pelagius admisit gratiam neces-
sariam pro remissione peccatorum, ut patet ex Au-
gust. *de natura & grat. c. 18.* Qui & *lib. de grat.*
Christi, cap. 37. ait, talem gratiam justificantem
admisisse Pelagium, quã *natura in melius in-*
stauratur: non instauratur autem natura per ex-
ternum duntaxat favorem, sed per internam re-
novationem. Quin ad eam gratiam impetran-
dam admittebat necessitatem orationis, ut clarẽ
docet August. *lib. de nat. & grat. cap. 18.* quan-
vis in hoc erraret, quod fidem & orationem gra-
tiam habitualement impetrantem ex viribus esse
naturæ contenderet. *Possunt quidem* (de Pela-
gianis loquitur August. epist. 105.) *dicere remis-*
sionem peccatorum esse gratiam, quæ nullis præ-
cedentibus meritis datur; quid enim boni meriti
habere possunt peccatores? Sed nec ipsa remissio
peccatorum sine aliquo merito est, si fides hanc im-
petrat. Neque enim nullum est meritum fidei,
quã fide ille dicebat: *Deus propitius esto mihi*
peccatori. Ubi non reprehenditur Pelagius,
quod gratiam remissivam peccati, qualem ad-
mittit Ecclesia, non agnosceret, sed quod ad il-
lam meritum aliquod præviæ voluntatis exige-
ret. Denique idem apparet, quia Catholici
Episcopi ad obscurissimas Pelagii æquivocatio-
nes, quibus errorem suum obolvebat, dispel-
lendas

lendas illud tandem petierunt, ut fateretur gratiam Dei ad singulos actus bonos dari. Ergo non de habituali, sed de actuali gratia litigabat. Unde in Concilio Milevitano *can. 3.* damnatus fuit, quia gratiam Dei, quâ justificamur per Jesum Christum Dominum nostrum, valere solum ad remissionem peccatorum commissorum, non verò ad adiutorium, quo non committantur, affirmabat.

Respondeo secundò, hinc liquidò apparere falsitatem sententiæ cujusdam anonymi Parisiensis Congregationis Oratorii, qui contra ejusdem venerabilis Congregationis communem mentem libro, quem *Memoires sur la grace*, seu Commentarii de gratia, gallicè scripsit, conatur ostendere, gratiam Christi, pro qua tot annis adversus Pelagianos certavit Augustinus, non esse gratiam actualem, sed gratiam duntaxat justificantem, diffusam in cordibus nostris per Spiritum sanctum, olim Adamo collatam, pueris in Baptismo restitutam, quâ sanamur, quâve filii Dei, membra Christi, templa Spiritus sancti nominamur, & sumus.

Verum præter dicta in superiori responsione, quibus hæc opinio satis, superque confutata est, innumera possunt addi ex Augustini principiis evidentissima argumenta. Tum quia Augustinus ipsis etiam justificatis, subindeque gratiâ habituali ornatis affirmat necessarium esse divinæ gratiæ adiutorium, quo bona agant, peccata devitent, tentationes superent, & in cœpta iustitia perseverent, illudque humiliter à Deo petere tenentur. Ergo præter gratiam habitua-lem, adhuc actualem effectricem bonæ voluntatis Augustinus requirebat. Tum quia [gratia Christi

Christi ad benè volendum, agendumque necessaria, de qua erat Augustinū inter & Pelagianos disceptatio, est gratia quæ nullis præcedentibus meritis, nullâ præviâ dispositione datur, cum ipsa sit meriti, & congruæ cujusvis dispositionis principium. *Nec ista esset gratia*, inquit epist. 105. *si non daretur gratuita, sed debita redderetur.* At gratia habitualis, quâ fit remissio peccatorum, dari potest præcedentibus quibusdam meritis, & dispositionibus, actibus nimirum fidei, spei, dilectionis justificationem præcedentibus; unde ibidem ait August. *Sed nec ipsa remissio peccatorum sine aliquo merito est, si fides hanc impetrat; neque enim nullum est meritum fidei, quâ fide ille dicebat: Deus propitius esto mihi peccatori, & descendit justificatus meritò fidelis humiliatus, quoniam qui se humiliat exaltabitur.*

Tum quia licet per charitarem habitualem liberemur à statu, & reatu peccati mortalis, quo juri ac potestati diaboli mancipamur, nequaquam tamen per eam expeditur à jugo concupiscentiæ, seu delectationis malæ, quo ita liberum nostrum premitur arbitrium, ut illud per solas naturæ vires excutere minimè valeamus, nisi cœlesti actualis delectationis infusione prava illa illicientis concupiscentiæ delectatio superetur. Non superatur autem per solam gratiam habitualement, quia cum illa concupiscentia in iustis manens ad agonem quotidie luctatur; sub illa autem concupiscentiæ servitute voluntatem etiam justī indigere divini adjutorii opitulatione, millies inculcat Augustinus, nec verisimiliter negare poterit qui ejus opera à limine salutaverit.

Nec potest dici, sufficientem habere ad benè agendum libertatem, qui gratia sanctificante instruitur. Non potest, inquam, dici; quia cum gratia habitualis concupiscentiam non extinguat, manet semper & ignorantia veri, & difficultas recti, & sæpe contingit sub dominante cupiditate servitus. *Nec libera voluntas dicenda est*, inquit Aug. epist. 114. *quandiu est vincitibus, & vinctibus cupiditatibus subdita.*

Verum quidem est, per gratiam & charitatem habitualement hominem justificari, vivificari, roborari, spiritum adoptionis accipere, sanari, liberari; verum ad illam justificationem, robur, sanitatem, &c. inchoanda, firmanda, & perficienda necessaria est gratia actualis; quod ex eo solo patere potest, quod homines antequam gratia sanctificante justificentur, possunt operari, & de facto operantur quædam bona opera, quibus ad justificationis beneficium sese disponunt, ut cum orando, gemendo, timendo, pœnitendo, Deumque tanquam justitiæ fontem sitire & diligere incipiendo, à concupiscentiæ captivitate incipiunt liberari. Hæc autem pia voluntatis initia cum non sint effectus naturæ, ut contra Pelagianos ostendit Augustinus, sunt profectò dona Dei per Christum, seu per ejus gratiam collata; & tamen nondum habetur gratia sanctificans, sed ad eam per hujusmodi actus homo manuducitur. Ergo gratia Christi, quam ad omnia initia bonæ voluntatis desideravit Augustinus, est quid ab habituali gratia distinctum. Denique quid in Augustino fundatius, quàm charitatem habitualement in baptismo receptam, quantumcunque vigorem renato invehat, non sufficere tamen solam ad bonum faciendum, malumque

lumque vitandum, cum ipsi renati legem carnis adversus legem spiritus quotidie militantem sentientes, tamen sint gratiâ habituali & infusarum virtutum supellectile instructi, tenentur tamen jugibus ad Deum precibus benè agendi, peccatique vitandi gratiam postulare, & ad ipsam continenter clamare: *Et ne nos inducas in tentationem.*

Ex quibus facilè omnibus hujus Authoris fundamentis absque negotio occurre, quæ ex variis gratiæ & charitatis habitualis elogiis deprompta sunt. Sed ex dictis liquet, hæc nihil obesse necessitati gratiæ Christi actuali, quâ ad habitualementem disponimur, quâ & habitualis contra concupiscentiæ impetum conservatur. Unde quæ de gratia habituali dicuntur, de actuali, & vice versa dici à Patribus potuerunt, quia una ad aliam disponit, una per aliam defenditur, perficitur, & firmatur.

Illud porrò in eo Authore videtur intolerandum, quod velit D. Thomam apertè renitentem in suam sententiam vi trahere, cum S. Doctor verbis nitidissimis, & Solis radiis clarioribus utramque gratiam distinxerit, & eam distinctionem innumeris locis ita inculcarit, ut meritò damnari possim, si ad tam luculentam falsitatem revincendam quædam S. Doctoris testimonia in medium producam. Verùm quia in vitium vitio sæpe coarctamur alieno, hæc pauca exscribo: *Dicendum*, inquit quæst. 111. art. 2. *quod sicut supra dictum est* (in omnibus ferè articulis quæst. 109. & q. 110.) *gratia dupliciter potest intelligi; uno modo divinum auxilium, quo nos movet ad benè volendum & agendū; alio modo habituale donū nobis divinitus inditum. Vtro-*
que

que autem modo gratia dicta convenienter dividitur per operantem, & cooperantem. Quod iterum repetit in eodem articulo. Et quest. 112. art. 2. ait : Dicendum, quod sicut supra dictum est, gratia dicitur dupliciter, quandoque quidem ipsum habituale donum Dei, quandoque autem auxilium Dei moventis animam ad bonum. Sed pudet in re clarissima immorari.

Denique ut supra diximus, Concilia, & Augustinus non solum impiis, sed etiam justis auxilium gratiæ ad singulos actus bonos exigebant; quod auxilium justis interdum deesse dixerunt, unde in peccatum incidentes jacturam gratiæ sanctificantis faciebant. Ergo de gratia actuali cum Pelagianis potissimè contendebant. Consequentia est clara, cum boni actus ante gratiam justificantem fiant, & mali actus, saltem veniales, à justificatis eliciantur: ergo gratia ad singulos actus bonos necessaria non est habitualis. Antecedens sic illustrat S. Augustinus lib. 2. de peccat. merit. cap. 19. sic: *Deus sanctis suis alicujus operis justis aliquando non tribuit vel certam scientiam, vel victtricem delectationem, ut cognoscant non à seipsis, sed ab ipso sibi esse lucem, quā illuminantur tenebra eorum; & suavitatem, quā det fructum suum terra eorum. Hoc ab illo esse deprecandum ejus gratiā dīdiscimus, cum antea lateret; ejus gratiā dileximus, dum antea non delectaret.* Hinc tam sæpe repetit, sinere Deum justos cadere, ne facilitatem in omnibus assequuti suum putent esse quod Dei est; & ideò relinquit Deus Sanctis concupiscentiæ conflictum, ut ad gratiæ confugiant adjutorium; in sanis etiam relinquit infirmitates, quia agit judicio suo, nec sanandi ordinem accipit

accipit ab ægroto ; vultque eos sentire difficultatem , ut facilitatem precibus impetrare persistant. Ad hoc confirmandum tam crebrò Petri adducit exemplum , cui charitas habitualis non deerat quando dicebat : *Animam meam pro te ponam.* Sed tentatione vires ejus interrogante, phrasis est Augustini , cognovit non inflari debere se inanitate jactantiæ , sed unius solidari gratiæ firmitate. *Beatissimus Apostolus Petrus,* inquit Augustinus lib.2.de origine animæ,c.17. *volebat pro Domino animam ponere. Planè volebat,neque enim Deum id pollicendo fallebat, sed quantas vires haberet, voluntas ipsa nesciebat. Proinde virtutis, qui Filium Dei esse cognoverat, se latebat. Scimus nos itaque aliquid velle, vel nolle : sed voluntas nostra etiam cum bona est, quantum valeat, quantum vires habeat, quibus tentationibus cedat, quibus non cedat, si nos non fallimus, nescimus. At Petro non deerat gratia habitualis, cujus minimus gradus omnes tentationes vincere potest, ut ait D. Thomas, & tam sæpe repetit author, quam impugnamus. Ergo illi deerat gratia actualis, qua carens culpâ suâ cecidit ; quam habens è cupla surrexit.*

Hæc dicta sufficiant contra præfati Authoris novitatem, quâ dum & scientiam mediam rejicit, & gratiam per se efficacem, seu prædeterminantem abominatur, difficultates difficultatibus addit, nodumque magis implicat, quem instituerat explicare. Hoc certè dolendum, quod doctrinæ celebris Congregationis suæ, quam in suis cunis ab uberibus Cardinalis Be-
rullii gratiæ per se efficacis (ut ab uno teste oculato accepi) tenacissimi fuxerat, desertor extiterit.

terit. Hoc unum tamen sine iniustitia prætermittere non possum, quo Authoris illius ab avita doctrina defectio quadantenus compensatur. Tantâ nimirum in suis novellis cogitationibus statuendis modestiâ utitur, tantâ in suis assertionibus confirmandis humilitate, & sacro pudore, tantâ in Authores quos refellit, reverentiâ & observantiâ nitet, ut sua pietate necessitatem gratiæ actualis demonstraverit; ad tantam enim moderationem non solum natura, sed nec ipsa gratia habitualis sola sufficeret. Cum enim videamus justos moderati animi limites pro domo sua, id est pro ea, quam defendunt sententia, non rarò transilire, proculdubio gratia prædeterminante actus Author ille fuit etiam dum contra gratiam illam tantâ temperantiâ scripsit.

Quæres tertio, utrum in illo statu Pelagiani gratiam operis, quæ facit benè velle, & benè agere, tandem admiserint?

Respondeo probabilius esse, Pelagianos post ubique damnatum Pelagium de sua pertinacia aliquid remittentes, veram Christi gratiam non quidem ad initium, sed ad perfectionem boni operis secundum merita hominum dari, eamque non ad simpliciter, sed ad facilius operandum conferri, admittere. Colligitur hæc responsio ex Augustino, tum *libr. de grat. Christi;* c. 23. ubi fatetur Augustinus admisisse tandem Pelagium sæpe damnatum, *magnum adiutorium divina gratia, ut cor nostrum, quod voluerit Deus, ipse declinet.* Sed hoc tam magnum
adiutorium

ad uicium (ecce quomodo gratiæ adjutorium Pelagius adulterabat) sicut iste desipit, tunc mere-
mur, cum sine ullo adjutorio non nisi de arbitrii li-
bertate ad Dominum currimus, ab eo nos regi cupi-
mus, voluntatem nostram ex ejus voluntate sus-
pendimus, eique adhaerendo jugiter unus cum illo
efficiamur spiritus. Hac scilicet tam ingentia bona
non nisi arbitrii secundum istum efficiamus liberta-
te, ut his precedentibus meritis sic ejus gratiam cõ-
sequamur, ut cor nostrum quò voluerit Deus, ipse
declinet. Vides initia quidem bonæ voluntatis,
benè vivendi cupidines, sanctæ orationis desi-
deria à libero quidem arbitrio proficisci, sed his
semel jactis seminibus, Deum voluntatem suæ
gratiæ adjutorio regere, & illam quò voluerit,
declinare. Nec obest, quod in sequentibus hujus
libri capitibus contendere videatur Pelagius, nec
bonam voluptatem, nec actionem, sed solam
possibilitatem divinitus adjuvari. Non obest,
inquam, quia dum Pelagius in ultimo statu so-
lam possibilitatem dixit adjuvari, non volunta-
tem, yel actionem, loquebatur de possibilitate ad
initium fidei & bonæ voluntatis, quam volebat
internis illuminationibus, & excitationibus mo-
ralibus adjuvari; ipsum verò initium fidei, ipsam
primam bonam voluntatem, primamque actio-
nem, quibus gratiam nos promereri dicebat,
non adjuvari, id est non esse dona gratiæ Chri-
sti, sed à sola possibilitatis gratia, id est, sufficien-
te & dante posse, promanare. Addi potest in eo
sensu Pelagium verè negasse gratiæ Christi ne-
cessitatem, quod licet omnino necessariam vo-
luerit esse possibilitatis gratiam, tamen gratiam
voluntatis, & operis ad faciliùs duntaxat neces-
sariam esse contendebat. Justè ergo Pelagio
impro

improperat Augustinus ipsum & seipsum, & alios fallere, quia dum gratiam operis admisisse se fingit, eam hoc ipso necessariam non esse vel le convincitur, quod ad melius duntaxat, & facilius necessariam esse pronuntiat.

Id ipsum apertius colligitur ex verbis Augustini *sem. 13. de verb. Apost.* ubi fatetur S. Doctor, Pelagianos anathematibus tandem permotos, veram gratiam fuisse confessos, & idcirco Deum benedicendum, quod ad id quod verè rectum est, pervenerint. In hoc tamen veritatem assequutam ex parte corrupisse monet, quod veram gratiam tandem admissam, ad facilius duntaxat voluerint esse necessariam. Verba Augustini sunt hæc: *Coarctati sunt aliquando gratiam confiteri, & benedicimus Deum, quia vel hoc aliquando dixerunt: accedendo enim proficere potuerunt, & ad id quod verè rectum est, pervenire. Iam verò dicunt adjutricem esse gratiam Dei ad facilius faciendum. Ista sunt verba eorum. Ad hoc dedit, inquit, Deus gratiam suam hominibus, ut quod facere iubentur per liberum arbitrium, facilius implere possint per gratiam. Volo facilius, remo difficilius; tamen & remo itur. Iumento facilius, pedibus difficilius; sed tamen & pedibus pervenitur.*

Idem etiam clarè significat Aug. lib. 2. ad Bonifac. cap. 8. *Isti* (Pelagianos appellat) *volunt in homine ab ipso homine incipere cupiditatem boni, ut hujus coepti meritum etiam perficiendi gratia consequatur.* Sed luculentiùs lib. de grat. & lib. arbitr. cap. 19. *Cum fuerint convicti, non defensores, sed inflatores, & precipitatores liberi arbitrii, quia neque scientia divina legis, neque natura, neque sola remissio peccatorum est*

illa gratia, qua per Iesum Christum Dominum nostrum datur, sed ipsa facit ut lex impleatur, ut natura liberetur, ne peccatum dominetur. Cùm ergo in his convicti fuerint, ad hoc se convertunt, ut quomodocumque contentur ostendere, gratiam Dei secundùm merita nostra dari. Dicunt enim, etsi non datur secundùm merita bonorum operum, quia per ipsam benè operamur; tamen secundùm merita bona voluntatis datur, quia bona voluntas, inquit, præcedit orantis, quam præcessit voluntas credentis, ut secundùm hac merita gratia sequatur exaudientis Dei. His verbis nihil planius, nihil evidentius. Ex eis enim claret, Pelagianos tandem convictos, & Conciliorum, ac Romanæ Sedis definitionibus oppressos, confessos fuisse, non solùm scientiam legis, & remissionem peccatorum ad gratiam pertinere, sed per gratiam etiam fieri, ut lex impleatur, ut natura liberetur, & ne peccatum dominetur, qui sunt characteristici gratiæ Christi effectus.

Denique, ut alia omittam, quando Augustinus librum de dono perseverantiæ scripsit, tunc proculdubio ad ultimum Pelagiani statum pervenerant, cùm librum illum contra Semipelagianos Massilienses, scripserit Augustinus è Pelagianorum extinctorum cineribus redivivos. Atqui in eo libro errores Pelagianorum à se devictorum scribens, ad tria eos tantùm capita reducit: *Tria sunt, inquit c. 2. qua maximè adversus Pelagianos Catholica defecit Ecclesia, quorum est unum, gratiam Dei non secundùm merita nostra dari, quoniam Dei dona sunt, & Dei etiam gratiâ conferuntur merita universa iustorū. Alterum est, in quantacumque iustitia,*
sine

sine qualibuscumque peccatis in hoc corruptibili corpore neminem vivere. Tertium est, obnoxium nasci hominem peccato primi hominis, & vinculo damnationis obstrictum, nisi reatus, qui generatione contrahitur, regeneratione solvatur. Vides cum Pelagianis in ultimo lux hæreseos statu non fuisse litem de essentia gratiæ Christi, seu quid per illam intelligendum foret, sed totam controversiam ad hoc tandem fuisse devolutam, an gratia Christi secundum merita nostra detur.

Nec obsunt conjecturæ P. Gonet oppositum sentientis, quarum primam colligit ex libro de gratia Christi: sed illam inter statuendam nostram responsionem occupavimus. Quibus adde, quod quia Pelagius gratiam Christi ad perfectionem operis non nisi invitus admisit, ideo eam verbis ambiguis interdum exprimebat: de quo idem ibi conqueritur Augustinus. Secundam conjecturam deducit ex libro de hæresibus, quem Augustinus in fine vitæ scripsit, unde & imperfectum morte præventus reliquit. Ibi autem S. Doctor affirmat Pelagium quamlibet varium, versicolorem, & multiformem, in eo semper perstitisse, quod omnem gratiam in lege atque doctrina constituerit. *Illam Dei gratiam, sine qua nihil boni possumus facere, non esse dicunt* (de Pelagianis loquitur) *nisi in libero arbitrio, quod nullis suis præcedentibus meritis ab illo accepit nostra natura: ad hoc tantum existimantes ipsum adjuvantem per suam legem atque doctrinam, ut discamus quæ facere, atque sperare debeamus; non autem ad hoc per donum Spiritus sancti, ut quæ didicerimus facienda, faciamus; ut scilicet cum sit Dei donum scientia, quæ sine*

362 *Lib. VIII. Dissert. III. historica,*
charitate inflat, non sic Dei donum ipsa chari-
tas, qua ut scientia non inflat, adificat. Verùm
hæc conjectura nihilo melior, sed longè infir-
mior est. Tum quia facile dici posset, Augusti-
num ibi solùm primum Pelagianæ hæreseos sta-
tum descripsisse, nec esse mirum, si in libro, quem
non complevit, non omnes hujus hæreseos sta-
tus descripserit. Et certè id fateri tenetur ipse
Gonet, qui credit Pelagianos præter legem at-
que doctrinam internas etiam illuminationes &
excitationes admisisse. Ergo aliquo interpre-
tamento objectum nobis à se Augustini locum
exponere debet. Tum quia meritò totam Pe-
lagii gratiam ad legem & liberum arbitrium
Augustinus reduxit; si enim gratia Christi se-
cundùm merita liberi arbitrii lege Dei infor-
mati datur, profectò in liberum arbitrium, &
legem tota Christi gratia velut in radicem re-
fundetur. Unde à suo, quem deserere voluit
errore, nunquam Pelagius recessit: verè enim
observavit D. Prosper *cap. 8. de ingratis*, id hæ-
resis Pelagianæ proprium esse, quod varii illius
errores naturali quadam colligatione ita inter
se contexti, atque aliis ex aliis nexi sunt, ut si
unicum admisseris, in cæteros omnes devolvare.
Quod & advertisse Præsules Ecclesiæ ait, perspe-
ctum notumque tenentes, *quod tota nefanda hæ-*
reseos summa exigua sub parte tegatur, de qua
plena mali labes renovetur, & omne commenti
corpus per singula membra resurgat. Verùm
enim verò, quid opus est conjecturis, vel exco-
gitatis explicationum subterfugiis, postquam
seipsum Augustinus limpidissimè interpretatus
est, in eodemque libro quartum Pelagianæ hære-
seos statum non prætermisit? Sic enim habet lib.
de

de hæresibus, hæres. 38. Denique Pelagius à fratribus increpatus, quod nihil tribueret adjutorio gratia Dei, correptioni eorum hætenus cessit, ut non eam libero arbitrio præponeret, sed infideli calliditate supponeret, dicens ad hoc eam dari hominibus, ut quæ facere per liberum jubentur arbitrium, facilius possint implere per gratiam. Vides Pelagianos increpatos à suis primis statibus, commendatione scilicet liberi arbitrii, & legis recessisse, & correptioni cedentes veram gratiam admisisse, sed in hoc veram doctrinam adulterasse, quod gratiam Christi libero arbitrio supposuerint, id est eam juxta prævia libertatis merita dari voluerint.

Damnatio Pelagii.

Errores & damnationem Pelagii compendiosè describit S. Prosper *part. 1. c. 2. de ingratis*, ubi ait, quod coluber ille Britannus docebat in primis moriturum hominem, etiamsi non peccasset: Nullum esse peccatum originis, peccatumque Adami imitatione, non propagatione posteris nocuisse: Posse hominem, si velit, ad virtutis culmen ascendere, ad hocque voluntatem satis virium habere, sive per rationem ac legem naturalem, sive per legem scriptam: Gratiam verò Christi his omnibus addi, quatenus omnibus offertur sacer Baptismatis fons, quo adultorum peccata lavantur, quodve parvulis vero vitio carentibus confertur, ut quos Deus fecit creando bonos, faciat adoptando meliores, & naturæ bonum adjecto honore illustretur. Denique neminem donorum Dei exsortem nasci.

eaque unumquemque capere prout sua voluntate promeretur.

Hæc dogmata fortiter Ecclesia rejecit, in iisque detegendis omnium per totum orbem Patrum pia cura enituit. Pestem subeuntem *prima recidit Sedes Roma Petri* per Innocentium I. anno 417. & postmodum per Zozimum anno 418. Porro Romam in hoc negotio Primam dicit Prosper, vel quia prius tempore errores illos proscripsit, vel quia in iis proscribendis studio, solitudine, zelo, & primæ Sedis autoritate primas habuit. Qui primam tempore intelligunt, decreta Conciliorum Africanorum Carthaginensis, & Milevitani ab Innocentii Apostolicis Constitutionibus non sejungunt, sed ex omnibus iis unam Pelagii damnationem constant. Qui verò ly *primam*, autoritate & solitudine interpretantur, damnationem utramque sejungunt.

Eosdem errores anathemate perculit Concilium Palæstinum Diospoli congregatum anno 415. in quo Pelagius ne damnetur, errores suos damnavit. Et tamen damnationem istam post Romanam refert Prosper, quod argumento est, per *primam*, autoritatis & Sedis primatum intellèxisse. Hoc Concilium benignum, lenè, & nimium tolerans malos appellat Prosper, quoniam & Hieronymus Synodum illam *miserabilem*, epist. 79. vocat, eo quòd Patres Latinum idioma non callentes, Pelagium latinè æquivocationibus accusationes eludentem Catholicum pronuntiarunt; quanvis, ut benè notat Augustinus, non hæresis est absoluta, sed homo hæresim negans.

Sub idem tempus S. Hieronymus Bethleï
hofs

hospes, Hebræo simul & Græco, Latinoque venustus eloquio, morum exemplar, mundique Magister, Pelagianos errores præclaris libris dissecuit. Ab Attico etiam Constantinopoleos Archiepiscopo repulsam passi sunt Pelagiani; ab Epheso quoque ejecti, atque è Sicilia pulsi inimici crucis Christi, orbem peragrans, ut alicubi tutam pestilentia cathedram invenirent. Sed in iis hæreticis debellandis Africanorum potissimum Præsulum cura & ardor emicuit in Concilio Carthagenensi, & in Milevitano, quorum decreta in primario totius Africæ Concilio sub Zozimo Papa renovata sunt. Eorundem etiam decretorum auctoritatem Imperator Honorius sequutus legem in Pelagianos anno 418. tulit. Porro in illo generali Africæ Concilio, cui dux Aurelius Carthagenensis, & ingenium Augustinus erat, non ulla vi, vel solius auctoritatis pondere oppressi sunt Pelagiani, sed omni accuratatione & diligentia eorum errores, errorumque fundamenta in examen vocata sunt, & ut canit Prosper *capite 3. de ingratiss:*

— *Discussa artes, virusque resectum est
Hæretici sensus; nullumque omnino relictum
Docta fides quod non dissolveret argumentum.
Condita sunt, & scripta manent, qua de catara-*
ctis

*Æterni fontis fluxere, undante meatu,
Et tercentenis Procerum sunt edita linguis.*

Post Conciliorum & Sanctæ Sedis sacra iudicia extincta fuere dissidia saltem ad tempus. Nam ut ait August. serm. 2. de verb. Apost. capite 10. *De hac causa duo Concilia missa sunt ad Sedem Apostolicam, unde etiam rescripta vene-*

366 *Lib. VIII. Dissert. III. historica,*
runt. Causa finita est: utinam aliquando finia-
tur error. Cæterum mortuo Innocentio, Zozi-
mum successorem circumvenire Celestius &
Pelagius conati sunt, suam in omnibus Aposto-
licæ Sedis iudicio & censuræ sententiam suppo-
nentes. Quibus credens, vel potius compa-
rians, eosque ad pœnitentiam revocare studens
Zozimus, ad Africanos Episcopos scripsit, Cele-
stii obedientiam exhibuit, non tamen cum à vin-
culis excommunicationis, quibus per Innocen-
tium innodatus fuerat, antè absolvendum cen-
sere se ait, quàm ad se Africani Episcopi re-
scripsissent. Hunc fuisse Summi Pontificis ani-
mum declarat Augustinus *lib. de pecc. orig. cap. 6.*
his verbis: Sensem suum aperire Pelagius vel
timuit, vel erubuit, quem discipulus ejus palam
sine ullius obscuritatis ambagibus apud Sedem
Apostolicam profiteri non timuit, nec erubuit. Sed
multùm misericors memorata Sedis Antistes, ubi
eum vidit ferri tanta presumptione præcipitem,
tangquam furem, donec si posset fieri, resipisceret,
maluit eum sensim suis interrogationibus, & illius
responsionibus colligare, quàm districta feriendo
sententia, in illud abruptum, quò iam propendere
videbatur, impellere. Et cap. sequenti: Hanc ejus
præloquutionem Venerabilis Papa Zozimus ferens,
egit cum homine, quem falsa doctrina ventus in-
flaverat, ut ea qua illi à Diacono Paulino fuerant
objecta, damnares, atque ut Sedes Apostolica lite-
ris, qua à Sancta memoria suo prædecessore ma-
naverant, praberet assensum. At ille noluit qui-
dem Diaconi objecta damnare, sed Beati Papa
Innocentii literis non est ausus obistere; imò se
omnia, qua Sedes illa damnares, damnaturum esse
promisit; atque ita velut phreneticus, ut requies-
ceret

ceret, tanquam leniter focus, à vinculis tamen excommunicationis nondum creditus est esse solvendus, sed interposito duorum mensium tempore, donec rescriberetur ex Africa, resipiscendi ei locus sub quadam medicinali sententia lenitate concessus est. Cujus etiam Apostolicæ Sedis clementiæ aliam rationem addit idem Augustinus lib. 2. ad Bonif. cap. 3. his verbis: In homine acerrimi ingenii (qualis erat Celestius, de quo loquitur,) qui profectò si corrigeretur, plurimis profuisset, voluntas emendationis, non falsitas dogmatis approbata est.: : Quidquid lenius actum est cum Celestio, servatâ dumtaxat antiquissima fidei firmitate, correctionis fuit clementissima suasio, non approbatio exitiosissima pravitatis.

Delatis autem in Africam Zozimi literis, contristati Patres Summum Pontificem obtestati sunt, ut in pristino statu omnia relinqueret; quibus iterum respondet Zozimus, de nimia objecta sibi credulitate se purgans. Concilium deinde 24. Episcoporum apud Carthaginem cogitur, à quo iterum Pelagius, Celestiusque damnantur, Innocentii sententiæ standum pronuntiatur, Celestius verò in speciali errores suos damnare compellitur. Quod totum dilucidè tandem agnoscens Zozimus, Celestii fraudibus reiectis, mansuetudinem sibi solitam, & Apostolicæ Sedi innatam coactus deposuit, & renitentem Celestium, atque ea quæ sibi à Paulino objecta fuerant, damnare detrectantem Apostolico fulmine contrivit, damnationisque sententiam ad totius orbis Episcopos misit, quam & Synodus Carthaginensis nondum dissoluta gratulabunda & festiva recepit.

Augulato Celestii errore, in Augustinum tumore, arrogantia, & convitiis plenissimis libris insurrexit Julianus, qui etiam epistolis Romam, & in Orientem missis, Augustinum suæ hæreseos triumphatorem, atque eo nomine sibi inuisum inhonorare conatus est, sed frustra. Sanctissimus enim Papa Bonifacius tunc Ecclesiæ clavo astans, inimicos Augustini, eisdemque hostes gratiæ Dei non solum Apostolicis, sed etiam Regiis comprimebat edictis; & quanvis ipse esset doctissimus, adversus libros tamen Pelagianorum scribere noluit, sed Augustini majus divina responsa postulare. Juliani epistolas confutavit Augustinus quatuor ad Bonifacium libris; Juliani verò libros quibus Augustini de nuptiis opus impugnabat, sex aliis elaboratissimis libris in Julianum inscriptis Augustinus confutavit. Octo alios Julianus libros adversus secundum de nuptiis Augustini librum scripsit, quorum priores quinque Alipius Romæ exscripsit, & ad Augustinum misit, quos quinque aliis libris in opere jam perfecto Augustinus evertit.

R E F L E X I O.

Fateamur itaque adversus hæreticos cum Ecclesia Catholica magnam divinæ gratiæ misericordiam, & multitudinem miserationum ejus, quibus & mundana Deus desideria pellit, & humanos convertit affectus; quibus Sanctos nos facit affectio sancta, & ipsa gemina, timor Domini sanctus, & sanctus amor, quibus quadruplex nobis, teste Bernardo, confertur effectus, *inmissio amaritudinis*, ut terrena displiceant, *subtra-*

*Etio opportunitatis, ne nos occasio impellat; virtus resistendi, cum tentatio instat; sanitas affectionis, quæ opera cuncta sanctificat. Hanc nedum fateamur, sed jugiter imploremus, quæ facit voluntarios, nec salvat invitos, quæ dum de malo mutat voluntatem in bonum, transfere, non auferit libertatem; quæ sanat, cum immutat affectum; quæ roborat, ut perducatur ad actum, quæ servat, ne sentiat defectum; quæ nociva propellit; aut vincit, profutura accersit; quæ ad bona opera dulciter permovet, & fortiter applicat; ex qua denique perenniter fluunt consilia pietatis, hortamenta interna sanctitatis, desideria æternitatis, allestamenta honestatis, splendores veritatis, inspirationes perfectionis, amores divinitatis. Felix qui eâ luce videt, eo gustu sapit, eo ardore flagrat, eo odore fragat, eo duce regitur, eâ voce pulsatur, ejusque motibus velut quibusdam brachiis suis comprehendit, amplectitur, stringit, cœlestemque sponsum tenet, & ait: *Tenui eum, nec dimittam.* Felices filii Dei, qui ita spiritu Dei aguntur, ut etiam spiritu suo quibusdam motibus humanis non deficiant ad seipsos, ne peccent, sed ita aguntur, ut quod agendum est, agant; & cum egerint, illi à quo aguntur, gratis agant. *Aguntur enim ut agant,* inquit August. de corrept. & grat. cap. 2. *non ut nihil agant: & ad hoc eis ostenditur quid agere debeant, ut quando id agunt sicut agendum est, id est cum dilectione & delectatione justitie, suavitatem quam dedit Dominus, accepisse se gaudeant.* Igitur cum fide Catholica veram Dei gratiam confiteamur, quæ non secundum merita nostra datur, sed dat merita ipse cum datur; quæ prævenit hominis voluntatem bonam,*

nec eam cujusquam invenit in corde, sed facit, quæ ante omnia bona opera misericorditer nos præveniens, etsi nihil in nobis boni invenerit, ipsa nos facit bonos, aversos convertens, conversos justificans, justificatos instruens munere bonæ voluntatis, & facultate bonæ operationis, simul & bonam donans voluntatem, & efficiens boni operis facultatem; quâ denique perceptâ, ruptis difficultatis vinculis & diligimus quod jubetur, & facimus quod diligimus, & in eo quod benè facimus, permanemus.

Prosequutio ejusdem dissertationis, de hæresi Semipelagiana, ejusque sectatoribus.

EXtincta in Pelagianis hæresis in Semipelagianis reviviscere cœpit, quorum doctrina non solum libero arbitrio favere visa est, sed etiam eorum vita spectabilis multos specie fallente decepit; veris enim sæpe subeunt falsa, & sine discrimine cæco fronte placent, quæ sine latent, ut dixit Prosper carmine sæpe citato, *cap. 4.*

Porro Semipelagianorum errores ad duo capita reducit eorum subtilissimus indagator B. Prosper parte secunda carminis de ingratis. Primum est, omnibus indifferenter hominibus gratiam Dei ita offerri, ut nullo specialiori affectu electos Deus prosequatur. Alterum est, liberum arbitrium in causa esse, cur unus gratiam amplectatur, alter respuat; unus perseveret, alter non perseveret; quia gratiæ opem ex viribus liberi

liberi arbitrii comparare sibi quisque potest; si autem non compareret, ideo est, quia neglexit eum ex primigeniæ integritatis reliquiis satis virium in natura residuum fuerit ad opem Dei desiderandam, postulandamque. Primum caput de gratia omnibus eadem voluntate oblata, ita ut non major electis, quam reprobis conferatur, refellit tum exemplo eorum infidelium, qui de fidei mysteriis nihil unquam audierunt, qui dubio procul nec gratiæ, nec salutis participes esse potuere: tum hac ratione, quia si Deus omnes peræquè homines non solum voluntate antecedente, sed etiam consequente salvos esse vellet, omnes utique salvarentur, cum haud dubiè impleatur quidquid Omnipotens voluntate consequenti peroptat. Secundum verò caput confutat, tum quia omnis nostra bona voluntas à gratia proficiscitur; à gratia, inquam, non consilio tantum, hortatuque benigno docente & suadente, sed mutante intus mentem, & faciente indeclinabiliter ut velit. Tum quia ante gratiam, quæ velle & operari in nobis efficit, nemo potest seipsum ad gratiam præparare, quoniam fides, quæ prima datur, per quam cætera impetrantur, gratuitum Dei donum est, quod sub meritum cadere nequaquam potest. Tum quia virtute gratiæ omni tempore conversa sunt pessima corda, quibus nihil rectæ voluntatis unquam infederat: *Recole innumerabile vulgus retrò senum & juvenum, qui ceca turpiter usque libertate animi per cultus demoniorum, per magicas artes, per amorem rapta tenendi, per stupra, per cades vitam duxere nefandam. Et tamen incumbente obitu, jam limite in ipso extremi status, miserantem nocte remota cognovere Deum.*

purga

372 *Lib. VIII. Dissert. III. historica,*
purgatorisque laxa crimine, nulla mali linquen-
tes signa prioris, exempli mundo mutarunt tartara
cælo. Quæ merita hic numeras? Si præcedentia
cernas impia; si quaris post addita; nulla fue-
runt.

Observat etiam idem Prosper, Semipelagianos, quanvis alta Pelagianæ hærescos capita detestari præ se ferrent, reapse tamen ipsa admittere, & cum damnatis hæreticis pacem ini-
re. Etenim si bonus affectus, & pium voluntatis initium voluntatis viribus afferatur, frustra dicitur primigenii peccati labe natura læ-
fa: si dona gratiæ sint ita proposita, ut nullus non possit ad illa suâ libertate pervenire, procul dubio ex fonte volendi, ut loquitur Prosper, profluet salus, quod est in purum putum Pelagianismum ire. Unde infert ex iis, quæ contra Pelagianos definita sunt, Semipelagianos etiam evidentissimè confutari. Quin & Semipelagianorum Ecclesiæ dogmatum approbationem fictam esse tradit, quia plenitudinem gratiæ non admittebant, nec volebant gratiam efficere, ut ipsa fides incipiat, ut radices agat, ut germinet, ut crescat, ut maturescat, ut ad finem usque perseveret, ne lolium, & tribuli, & vanæ dominantur avenæ, ne ventus frangat, torrens trahat, æstus adurat. Dum enim contendebant vocanti, & hortanti Deo ita hominem propria libertate assentiri, ut ejus conatum Deus sequatur, procul dubio hoc dogmate gratiam Christi evertēbant, quam pulsare tantum, & non aperire cordis januam volebant. Quia hoc pacto non gratia, sed liberum arbitrium bonam voluntatem agit: veluti cum quis auditis, vel lectis quæ placent, aut displicent, variè comovetur, tunc
animi

animi affectus non his quæ audit, vel legit ascribi debent, sed libero arbitrio pro suo nutu huc illuc torquente se, & flectente: unde exoritur secreta cordis in aula nunc amor, aut odium, nunc spes, metus, ira, dolorque. Ergo in Pelagianos recidunt Semipelagiani, nec veram Christi gratiam confitentur, quæ flectit voluntatem quò vult omnipotenti virtute, quam nullum remoratur obstaculum, quæ nullis anceps causis suspenditur, quæ merita non invenit, sed facit; quæ ne quidem desiderari potest, nisi cum ipsa se desiderari facit. Est enim cunctis dux venientibus ad se, perque ipsam nisi curratur, non itur ad ipsam. Ergo ad iter per iter ferimur, sine lumine lumen nemo videt, vitam sine vita inquirere mors est.

Parte tertia sui poematis argumenta Semipelagianorum S. Prosper refellit, & eorum querelas propulsat, quas ad duas potissimum revocabant. Prima erat, tolli liberum arbitrium, pietatisque studium & industriam removeri; imò nec vitiiis poenam deberi, aut præmia virtuti, si vel natura peccato corrupta mala velle sine gratia necesse habeat; & si eâ opus sit gratiâ, quæ det velle & currere, ut homo benè agat. Cui objectioni respondet Prosper primum, illud argumentum à Pelagianis illos fuisse mutuatos. Secundò ait, hac objectione fidem peccati originalis deleri: primum enim peccatum ad nos transfusum non solum corpus deturpat, sed voluntatem sauciat, nosque concupiscentiæ dominantis jugo subdit, à qua semper in malum rapimur, tametsi non nisi volentes consentiamus; quia libero arbitrio non ex toto quidem delero, sed infirmato, manet voluntas libera, sed non bona;

374 *Lib.VIII. Dissert.III. historica,*
bona; & quocumque fertur, ruit & labitur. A
qua servitute voluntatem sola Christi liberat
gratia, quæ fructui arboris vitæ similis langu-
dam mentem sola reficere, ac renovare idonea
est. Hac gratia pristinum honorem, libertatem
scilicet in Adamo amissam recuperamus: illâ
fit in nobis bonorum omnium meritum prin-
cipium, quæ eo magis crescunt, quo illam hu-
miliùs accipimus, & largitori sua dona gratia-
rum actione reddimus. Denique ut convincat
gratiam non dari secundum humanæ volunta-
tis studia, sed secundum beneplacitum, quibus
vult Deus eam gratis largiri, affert Prosper
exemplum parvulorum à baptismo mox hinc
migrantium, infinitis aliis non percepto baptis-
mate pereuntibus, meritis tamen paribus, seu
potiùs utrobique nullis. Nec potest salus eo-
rum qui baptizantur, parentum meritis ascribi,
cùm videamus multos ortos è sanctis parenti-
bus, nullo suorum studio salvari potuisse, &
alios expositos ob turpia crimina matrum, de
stercore ferri ad fontem Baptismi, & inde ad
cælum migrare. Quod maximè patere ait in
geminis, quorum alter iuterdum baptizatur,
dum alius sine Baptismo moritur, solâ eos
Christi gratiâ discernente.

Secundum Semipelagiani argumentum ex
eo petebant, quod nisi gratia peræquè omnibus
deretur, & alicui gratia efficax denegetur, reos
non fore peccati, quos gratia neglexerit, utpote:
quibus benè gerendi non data fuerit virtus.
Cui objectioni respondet, ab eis tantùm propo-
ni debere hoc argumentum, qui peccatum ori-
ginale non agnoscunt. Cùm enim auctor
Apostolo, per unius delictum in condemna-
tionem

tionem justissimam universa hominum massa defluxerit, eoque solo peccato rei nascantur omnes homines, ac digni morte, etiam si nulla ei propria scelera adjicerentur; profectò nemo queri potest se Dei gratiâ non liberari, quæ jure potuit neminem liberare. Abhorret enim à ratione, ut qui sola Dei benignitate liberati sunt, eum accusent, quòd non omnibus pariter reis eandem benignitatem præstiterit. Hinc monet justos, & pro collatis sibi donis Deo gratias agere, & consideratione justæ infidelium & peccatorum derelictionis excitari ad impetrandam eis humili prece liberationem & misericordiam, quam utique peccatores ipsi non querunt, qui & miseriâ suâ delectantur. Monet etiam, non esse curiosè scrutandum, cur ex toto humano genere pars una eligatur, alterâ rejectâ, licet eadem causa omnes implicet: tum quia id ignorare non obest; sicut non oberat olim nescire omnes gentes ad fidem fore vocandas, totumque per orbem donandum esse, quod spes tunc parvæ plebis habebat: sicut etiam non obest ignorare quando mundus finietur: sicut quoque non obest nescire, quæ sit causa tantæ varietatis in genere humano, ut eum eadem sit in omnibus natura ab uno limo producta, unus tamen regnet, alter serviat; unus decore & viribus etiam in senectute floreat, alter turpe corpus habeat & debile; unus præclaro ingenio, & ad præclaras artes comparato vigeat, alter tarditate & hebetudine ferè brutescat; unus nec licito calore incitetur ad generandum, alter insanum nequeat frenare libidinis furorem, unde concludit:

His.

*His, & mille modis semen variantibus unum
Impariles subeunt distincta exordia formas.
Nec tamen hac inter tam compugnantia quis-*
quam

*Arguit authorem, qui secum continet hujus
Legem operis, dum judicio placita explicat aquo,
Et rerum causas obscurat iusta potestas.*

*Si terrenum igitur figmentum, additaque
mori*

*Progenies ita dissimili producitur ortu:
Quid mirum si consilii super omnia magni,
Arcanum latet? :::*

*Non ergo instamus clausis, nec operata procati
Vrgemus curâ, satis est opera Omnipotentis
Cernere, & authorem cunctorum nosse bonorum;
Quo sine nihil rectum mens inchoat.*

Parte quarta ejusdem carminis comparat
Prosper doctrinam Semipelagianorum cum Pe-
lagiana hæresi, additque Semipelagianos verbo
tenus Pelagium reprobare, subtilissimum illius
hæreseos venenum retinentes. Imò in hoc Pe-
lagianis deteriores eos esse vult, quia Pelagius
quàmlibet vafer, nullo melle suæ hæresis pocu-
la prælivit, ideoque dum errores suos initio mi-
nùs obtexit, plerosque deterruit ipsa dogmatum
deformitas. At Semipelagiani tetriores erro-
res damnantes periculosius fallunt, dum aiunt
naturam suis viribus relictam, ad verum bonum
ferri posse, ad Deum tendere, & Sanctos multa
recti assuetudine firmos posse dæmonis oppu-
gnationes propriis viribus frangere, imò &
Deum utiliter justos suos interdum deferere, ut
illis sibi dimissis, detur merendi locus, quasi ori-
ginali peccato læsa natura non fuerit. Et ta-
men fides Catholica ideò primi patetis vul-

nere lauciatam humanam naturam docet, ut ne quidem oculos mentis sponte possit in Deum sine Deo tollere, nec miseriam suam agnoscere; quoniam hoc spoliante tyranno perdidit, ut quanto jaceat sub vulnere norit.

Nec obest, inquit, quod aliquid nobis ex pristini status reliquiis supersit; non obest, inquam: tum quia illæ reliquæ ad temporalem demum vitam pertinent, non ad acquirendam æternam, nec ad virtutis adjumentum, cum potius hinc superbiendi materiam natura corrupta arripiat. Tum quia si per superstites illas reliquias posset homo suo vigore ad salutem sibi viam sternere, gratis Christus mortuus fuisset. Ut ergo homo captivus, & miser, qualis sit agnoscat, quo carcere clausus, quove morbo obsessus; ut videat quanta sit humani generis ruina, consideret Verbi Dei humilitatem, quâ homo, & miser fieri dignatus est; attendat quomodo virtus infirmata, sapientia ludificata, gloria obscurata fuerit; quomodo justitia iniquitati, clementia sævitia, & tormentis innocentia subiecta fuerit, ut unius infantis mors fieret reorum vita. Deus! qualis morbus, cui eripiendo non nisi morte medici succurri potuit?

Non obest etiam si dicatur, Sanctis obtinenda coronæ causam auferri, nisi in eis reperiantur bona, quæ proprio ipsorum arbitrio accepta referri possint. Non obest, inquam; quia hæc tumida doctrina, dum falsas virtutes quærit, verâ justitiâ, & Deo homines spoliât. Vera etenim Christianorum gloria, & benè operandi, subindeque merendi spes non in fœni flore caduco, sed in Christo est: *Christus enim via iustitiæ est, quo te ducere oportet currere, ne cursus*
Christo

378 *Lib. VIII. Dissert. III. historica,*
Christo sine sit vagus error. Sicut enim palme
nullos valet edere fructus non in vite manens,
qua de radice ministra succum agat in frondes,
et musto compleat uvas ; sic infœcundi virtu-
tum, et fruge carentes perpetuiibus ignis erūt;
qui vite relicta audent effusa de libertate co-
marum fidere, ne Christi sint ubertate feraces.

Hæc de Semipelagianis in communi tradit
Prosper : verum eorum errores in speciali me-
lius dignoscemus , si sectatorum hujus hæresis
doctrinæ capita sigillatim referamus.

Monachi Adrumetini.

Cum Florus Adrumetini Monasterii Mona-
chus celebrem Augustini epistolam 105. in Mo-
nasterium detulisset, putaverunt nonnulli nume-
ro quinque Augustinianâ de gratia doctrinâ ita
gratiam Christi commendari, ut everso libero
voluntatis arbitrio nulla esset hominibus in fu-
turo judicio reddenda secundum opera sua re-
tributio. Hinc turbatum Monasterium, ex eo-
que discedentes Cresconius, & Felix Augusti-
num instruendi conveniunt, quos Sanctus Do-
ctor à se eruditos ad Monasterium remisit cum
epistolis & libro de gratia & libero arbitrio, ad
sedandas turbationes peridoneis. His Adru-
metum delatis, pace ingenti gavisi sunt, sed non
diuturna ; nonnemo enim Monachorum con-
cordiam libertatis cum gratia intelligere non
valens, neminem corripiendum esse dixit, si
præcepta Dei non facit, sed tantummodò ut fa-
ciat, pro illo esse orandum. Hujus commen-
titix consequentiæ evertendæ causâ eximium
edidit Augustinus de correptione & gratia li-
brum

brum , quo nec gratiam remove re correctionis necessitatem , nec correctionem excludere gratiæ opitulationem demonstravit.

Isti Monachi inter Semipelagianos annumerari possunt, quia non accusantur negati peccati originalis, vel aliarum Pelagii hæreseon, sed tantum adversus efficacem Christi gratiam eos murmurasse legitur; quæ difficultas, ut patebit, una fuit, quæ Semipelagianismum excitavit, & fovit.

Vitalis.

Primus qui exertè Semipelagianismum docuit, Vitalis fuit, qui ut ex 107. ad ipsum scripta epistola claret, existimabat initium rectæ in Deum fidei, & bonæ voluntatis non Dei donum esse, sed à nobis proficisci; cætera autem religiøsæ vitæ bona Deum per gratiam suam jam ex fide petentibus, quærentibus, pulsantibus donare consentiebat. Adversus hunc errorem auream illam epistolam scripsit Augustinus, & quidem fortunatissimè; nam & ab errore Vitaleni revocavit, & Semipelagianismum in Africa nascentem eradicavit.

Massilienses.

Occasione libri de correptione & gratia Presbyteri Massilienses conturbati, expressiùs Semipelagianismum docuerunt, qui & Semipelagiani simpliciter dicti sunt, quia ad initium salutis sufficere naturam, nec opus esse gratiâ Christi, ex professo tradiderunt. Hos ad Augustinum tanquam specialem fidei Patronum, & gratiæ
divinæ

380 *Lib. VIII. Dissert. III. historica,*
divinæ defensores deferendos censuerunt Pro-
sper & Hilarius Arelatensis Episcopus ; cōque
magis, quod cū clari essent, & egregii in omni
virtutum studio, magnaue esset de probitatis
illorum contemplatione reverentia, verendum
erat ne alios ad se petraherent. Illos servos
Christi appellat Prosper, & Augustinianæ ad-
versus Pelagium doctrinæ amantes ; sed librum
de correptione & gratia non solum durum, sed
etiam Patrum opinioni, & Ecclesiastico sensui,
in iis potissimum, quæ de vocatione electorum
secundum Dei propositum, & de indeclinabili
gratiæ virtute disputarat, contrarium arbitrati
sunt. Eorum dogmata sic nobis describit S.
Prosper.

Primò licet admitterent omnem hominem
Adamo peccante peccasse, & neminem per ope-
ra sua, sed per Dei gratiam regeneratione salva-
ri ; attamen universis hominibus propitiatio-
nem, quæ est in sacramento sanguinis Christi,
æquali voluntate esse propositam, nec specia-
liori affectu Deum electos prosequi asserabant,
sed potius eos in regnum suum prædestinasse,
quos gratis vocatos dignos futuros electione,
& de hac vita bono fine excessuros esse prævi-
derit.

Secundò inde colligebant doctrinam Augu-
stini de gratuita prædestinatione esse rejicien-
dam, contendentes neminem ante Augustinum
eum Apostoli ad Romanos epistolæ sensum de-
disse, quem ille dederat ; quin & doctrinam il-
lam ædificationi audientium esse contrariam, &
etiam, si vera esset, minimè esse prædicandam.
Hinc volebant certum esse prædestinatorum
numerum, sed posse minui, vel augeri, ne locum
apud

apud infideles & negligentes cohortationum incitamenta non habeant.

Tertiò volebant hominem ad gratiam, quæ est in Christo, per naturalem facultatem pervenire, quia scilicet bono naturæ benè usus est. Et quia statim se offerebat instantia parvulorum nullum voluntatis usum habentium, quorum alii ad gratiam Baptismi vocantur, alii non vocantur; respondebant confugiendum esse ad scientiam conditionatam futurorum, tales nimirum perdi, talesque salvari, quales futuros illos in annis majoribus, si ad adultam pervenissent ætatem, scientia divina præviderit. Idem servatâ proportionem dicebant de adultis, quorum nonnullis prædicatur Evangelium, aliis non prædicatur; cujus dispensationis discrimen non in Dei beneplacitum, sed in fidem & opera conditionatè præscita referebant, dicentes *dispensasse Deum tempora & ministeria prædicationis, juxta quod prævidebat aliquos credituros, & exorturam esse bonarum credulitatem voluntatum.*

Quartò affirmabant, gratiam Dei voluntati humanæ subditam esse, subindeque illam esse comitem, non præviam humanarum voluntatum, quas tamen secundum suam phantasiam ab ea volebant esse præventas. Porro non singulos à gratia idcirco renovari aiebant, quia prænoscebantur, quod non vellent renovari. Unde cum duo sint, quæ humanam salutem operentur, Dei scilicet gratia, & hominis obedientia, priorem esse volebant obedientiam quam gratiam, ut initium salutis ex eo qui salvatur, non ex eo credendum sit stare, qui salvat; & voluntas hominis divinæ gratiæ sibi pariat

opem

opem, non gratia sibi humanam subijciat voluntatem. Quam eorum doctrinam sic etiam Prosper cap. 10. de ingratis, describit:

Gratia quâ Christi populi sumus, hoc cohibetur

Limite voliscum, & formam hanc ascribitis illi,

Vt cunctos vocet illa quidem, invitetque, nec ullum

Præteriens, studeat communem afferre salutem

Omnibus, & totum peccato absolvere mundum:

Sed proprio quemque arbitrio parere vocanti,

Iudicioque suo motâ se extendere mente

Ad lucem oblatam, qua non se subtrahat ulli;

Sed cupidos recti juret, illustretque volentes.

Eadem Semipelagianorum dogmata describit Hilarius in sua ad Augustinum epistola, ubi expressè tradit primò negasse eos, dari à Deo hominibus credendi voluntatem: secundò remansisse aliquas in homine post peccatum originale reliquias vigoris, qui prædicatione posset, & correptione excitari: tertio sufficere quidem neminem sibi ad bonum opus incipiendum, vel perficiendum; sufficere tamen quemque sibi, ut velit sanari, quia velle sanari inter opera minimè computabant: quartò perseverantiam etiam usque in finem non donari à Deo, sed donum perseverantiæ posse nos emereri, & datum amittere. Unde eam Augustini divisionem, quâ gratiam partitus fuerat in eam sine qua Adam perseverare non poterat, & in eam quâ electis nunc perseverantia ipsa donatur, vehementer reprehendebant, & moleste ferebant, eaque quandam hominibus desperationem

nem exhiberi contestabantur. Quare volebant solùm in hoc nos ab Adamo distare, ut hunc integris viribus voluntatis juvaret gratia volentem, sine qua perseverare non poterat; nos verò amissis, & perditis viribus credentes tantùm non solùm erigat prostratos, verùm etiam suffulciat ambulantes.

Ioannis Cassiani, Fausti Rhegiensis, & Gennadii errores.

Unus è præcipuis Augustinianæ doctrinæ adversarius fuit Joannes Cassianus ex Diacono S. Joannis Chrysostomi factus Presbyter Massiliensis. Ejus doctrinæ summam paucis exponam.

Primò volebat hominem posse per semetipsum bonum velle; quam bonam voluntatem veluti emicantem scintillam confovet Deus, suaque inspiratione confortat; quia nihil, inquit, prodest sanitatis gratiam concupisse, nisi Dominus, qui vitæ ipsius usum tribuit, etiam vigorem incolumitatis impertiat. Videatur collatio 13^a cap. 7. 8. & 12.

Secundò asserbat, ex sola facultate liberi arbitrii posse hominem habere charitatem, & superare graves tentationes, & ideò totum non esse ita Deotribuendum, quin aliqua laus, & industria libero arbitrio servanda sit. Videatur collatio prædicta, cap. 14.

Terriò volebat, non posse quidem hominem per semetipsum apprehendere sanitatem, habere tamen eum à semetipso desiderium sanitatis; quia homini ex naturalibus conanti facere quod

in

in se est, gratia datur, quâ Deus bonos naturæ conatus dirigit & incitat ad salutem. Hos tamen conatus non esse meritorios gratiæ volebat, sed potius occasiones & veluti anfas, quas Deus apprehendebat. Videatur ibidem, *cap. 8.*

¶ II.

Cassiani errores sequutus est Faustus Rhegiensis duobus de gratia, & libero arbitrio libris; & quanquam eo in opere gratiam Dei astruere videatur, eam tamen evertere nititur. Nam non solum cum Massiliensium vulgo vult superesse nonnullas in homine primævæ integritatis reliquias, per quas fit initium salutis esse à nobis tanquam ex nobis, & facienti quod in se est ex viribus naturæ, Deum conferre gratiam; sed insuper in Pelagianismum labens, gratiam ad progressum in justitia faciendum purè externam esse pronuntiavit. Nam *lib. 2. cap. 6.* Abel divinis placuisse conspectibus per insitum à Deo generaliter bonum, id est per propriæ voluntatis affectum scripsit. Quod de aliis Patriarchis in sequentibus docet, ubi & legem Moïsis gratiam secundam, sicut legem naturæ gratiam primam appellat. Deinde hæc verba Psalmi 126. *Nisi Dominus adificaverit domum, &c.* quæ Patres de vera gratia interpretantur, de gratia externa ille exponit *lib. 1. c. 11.* *Nunquid aliter adificat & cognoscit Ecclesiam quàm per labores & officia Sacerdotum, per ministeria & exempla Sanctorum, per Apostolorum virtutes, & Martyrum mores?* Quin verba illa Salvatoris: *Nemo potest venire ad me, nisi Pater qui misit me, traxerit eum,* quæ de vera gratia unanimis Catholicorum sensus intelligit, sic ille *capite 17.* exponit: *Quid est attrahere, nisi pradi*

predicare, nisi Scripturarum consolationibus excitare, nisi increpationibus detertere, desideranda proponere, intentare metuenda, judicium comminari, premium polliceri?

Cassianum, & Faustum laudat eorum sectator Gennadius libro suo de viris illustribus, in quo & Prosperum Cassiano, & Hieronymum Rufino iniquissimè postponit. Qua de causa Gennadii, sicut & Fausti libros Gelasius Papa canone *Sancta Romana Ecclesia*, inter apocryphos numeravit. Fateor tamen præfatos tres Authores à viris gravissimis excusari; Cassianum quidem, quia nondum erat ab Ecclesia proscripta Semipelagianorum doctrina, quam post rescriptum Cœlestini Papæ revocasse ferunt, curâ præsertim Sixti Cœlestini successoris; unde ei postea contra Nestorianos scribendi provinciam Leo Magnus demandavit; unde in provincia Provinciæ inter Sanctos habetur, ut apud Sanctum Maximum, dum ibi commoraretur, accepi. Faustum verò, quia licet contra ipsum & S. Fulgentius in Africa; & Avitus Viennensis in Gallia scripserint, eum tamen ab hæresibus suis resipuisse ferunt, unde & in Regiensi Diœcesi ut Sanctus coli solet. Idem de Gennadio affirmat Baronius, quem à Papa Gelasio ad veram fidem revocatum, & ad Episcopatum deinde Massiliensem assumptum fuisse narrat.

Porro Semipelagianismus non solum à Cœlestino Papa instantiâ Prosperi, sed etiam ab Arausicano secundo Concilio sub Felice III. celebrato, & à Bonifacio II. Felicis successore confirmato damnatus est. Scio aliquos Severum Sulpitium, Vincentium^l Lirinensem, imò & Joannem Chrysostomum Semipelagianis accen-

fere. Verùm id ægrè crediderim ; licèt enim Severus Sulpitius à Massiliensibus nonnihil deceptus fuerit, tamen post Cœlestini rescriptum sensui Catholico adhæsisse constans est, ut apud Guibertum Abbatem apologiâ pro Severo editâ videre est. De Vincentio Lirinensi id minùs crediderim, cùm in aureo, & nunquam satis laudato suo contra prophanas novitates opusculo non solùm Pelagium detestetur, sed & Cœlestini rescriptum adversùs Semipelagianos latum profundâ reverentiâ laudet.

Cæterùm hunc errorem Magno Chrysostomo affingere nullus sine calumnia potest ; quidquid enim conetur Vasques carpendorum Patrum avidus, nunquam tamen vim verborum istorum elevabit, quibus vir ille divinus, & Orientis Augustinus Semipelagianismum nondum natum prævidit, & præfocavit hom. de Adam & Eva: *Omniū bonorum affectuum atque operum, & omnium studiorum, omniumque virtutum, quibus ab initio fidei ad Deum tenditur, Deum profiteamur authorem ; & non dubitemus ab ipsius gratia omnia hominis bona provenire, per quam etiam fit, ut aliquid boni & velle incipiamus & facere.* Quid is verbis limpidius, vel Semipelagianismo adversantius ? Profectò benè de Chrysostomo Vasques meritis est ; nam in materia de visione, statum gloriæ à Chrysostomo destructum, & in materia de auxiliis, statum gratiæ ab eodem esse deletum comminiscitur. Quis tantam de Ecclesiæ Patribus, & Patrum Patriarchis, & Patriarcharum lumine Chrysostomo, & ipso reluctante, ac calumniam occupante, obloquendi licentiam ferat ?

Quæres primò, utrum Semipelagiani dum vellent initium salutis esse à nobis, omnem excluderent gratia interna necessitatem?

Respondeo, Semipelagianos eam solam gratiam Christi rejecisse, quæ nocere libertati, inducere necessitatem, inutilem efficere correptionem illis videbatur, quale erat *auxilium quo*, ab Augustino libro de correptione & gratia traditum, & explicatum. Gratia autem moraliter duntaxat excitans, usum & determinationem voluntatis expectans præfata inconvenientia non parit.

Veritas autem nostræ responsionis colligitur tum quia Prosper in epistola ad Augustinum ait, Semipelagianos velle gratiam *comitem, non præviā meritum*, à qua tamen *non negant voluntates secundum suam phantasiam*, id est in aliquo sensu esse *præventas*. In nullo autem sensu voluntas potest à gratia præveniri, nisi per illuminationem, & excitationem moralem. Nec potest dici, gratiam illam desiderasse Massilienses ad opera perfecta, non ad initium fidei. Non potest, inquam, dici; nam in eodem contextu ait Prosper se loqui de præscientia, *secundum quam gratia vocantis operatur*, quæ utique gratia prima est, & pia initia præcedens.

Tum secundò, quia Semipelagiani non magis excluderunt gratiæ adjutorium ad inchoandum bonum in homine lapsò, quàm in homine sano; cum enim in homine lapsò admitterent tantum reliquias sanitatis Adami, non potuer

runt existimare, hominem læsum minoribus egere auxiliis, quàm egeret homo illæsus, majoremque inesse virtutem reliquiis naturalis possibilitatis, quàm ipsi naturali possibilitati integræ, & completæ. Atqui Massilienses, vel Semipelagianorum ullus nunquam dixerunt, hominem in primæva sua integritate constitutum non egere gratiæ internæ auxilio, sed cum Catholicis semper senserunt, Adamum ita potuisse bonum operari, ut tamen auxilio sine quo semper egeret. Unde in epistola S. Hilarii refertur, ipsos divisionem gratiæ in gratiam primi hominis, & hominis lapsi eatenus molestè tulisse, non quòd existimarent gratiâ Adamum non egere, sed quatenus credebant, stante Augustini doctrinâ de gratia & auxilio quo ad perseverandum homini lapsò necessario, desperationem hominibus exhiberi. Ergo Semipelagianum internum gratiæ, & auxilij sine quo influxum non excluderunt.

Tum tertio, quia Semipelagiani eodem modo dicebant initium fidei esse ex nobis, & ex natura, quo perseverantiam finalem, ut patet ex literis Prosperi & Hilarii, & ex Augustino libro de dono persever. cap. 17. *Hi initium fidei*, inquit, *& usque in finem perseverantiam sic in nostra constituunt potestate, ut Dei dona esse non putent, neque ad hæc habenda atque retinenda Deum operari nostras cogitationes & voluntates.* Atqui Semipelagiani nunquam excluderunt auxilium interius sine quo ad perseverandum; nam in statu innocentiae auxilium illud ad perseverandum desiderabant, ut illum integris viribus juvaret gratia volentem, sine qua perseverare non poterat, inquit Hilarius Semi-
pelagia

pelagianorum mentem referens. Non erant autem sic stolidi viri, quorum eruditionem & pietatem & famam commendat Prosper, ut crederent reliquias primævæ integritatis esse post ipsum peccati naufragium ipsa integritate validiores.

Confirmatur hoc argumentum: Ex Augustino *de dono perseverant. cap. 7.* si homo esset adhuc in sua primæva integritate, vera esset Semipelagianorum sententia; sed quia attenuata est, vitiataque natura, ait illam esse falsam. *Non est hoc* (loquitur de dono perseverantiæ) *omnino in viribus liberi arbitrii, quales nunc sunt: fuerat in homine antequam caderet. Post casum autem hominis non nisi ad gratiam suam voluit pertinere, ut homo accedat ad eum; neque nisi ad gratiam suam voluit pertinere, ut homo non recedat ab eo.* Vult ergo Augustinus veram fuisse Semipelagianorum sententiam in statu innocentie, in quo poterat homo ad Deum accedere, & à Deo non recedere per naturalem possibilitatem. Atqui quod dicebant Semipelagiani de homine lapsa, non poterat esse verum de homine innocente, nisi admitterent aliquod interioris gratiæ auxilium sine quo, quod utique homini integro necessarium fuit. Ergo Semipelagiani auxilium interius sine quo in statu naturæ lapsæ non rejiciebant, quo ad Deum accedamus per initium fidei, & à Deo non recedamus per perseverantiam.

Tum quartò, quia ipsi Semipelagiani, & Semipelagianismi acerrimi defensores gratiam illam interiorē illuminationis & excitationis ad pia initia se admittere declararunt. Nam Gennadius, lib. de Ecclesiast. dogmat. cap. 21.

Manet utique, inquit, ad quarendam salutem arbitrii libertas, id est rationalis voluntas, sed admonente prius Deo, & invitante ad salutem, ut vel eligat, vel sequatur, vel agat occasione salutis, hoc est inspiratione Dei:: Initium ergo salutis nostra Deo miserante habemus; ut acquiescamus salutifera inspirationi, nostra potestatis est; ut adipiscamur quod acquiescendo admonitioni cupimus, divini est muneris. Id ipsum æquè apertè tradit Cassianus collat. 3. cap. 3. 4. 12. & cell. 13. cap. 3. ubi ait ex Deo esse vocationem, Deum esse principium bonarum cogitationum, quibus nobis & initia sancta voluntatis inspirat, & virtutem, atque opportunitatem eorum, quæ rectè cupimus, tribuit peragendi. Hac inspiratione ait dormientes excitari voluntates ad desiderium aterna vite, ac salutis; & nos ea provocatos ad viam salutis accurrere. Illas tamen inspirationes ita se habere docet, ut nostrum sit istis vel enixius, vel remissius famulari. Ipse etiam Vitalis Semipelagianorum præcursor, qui tam actûter contendebat fidem esse in nobis à nobis, fidem non esse donum Dei, sed esse ex nostra voluntate, quam nobis in nostro corde non est operatus Deus, ut patet ex epistola 107. Augustini: ille, inquam, Vitalis gratiæ interioris moralem excitationem non excludebat; nam in eadem epistola aiebat, hominem posse Dei suasionem præcedente, consequente consensione, libertate naturali credere. Denique ipse Augustinus ante Episcopatum suum Semipelagianorum sententiæ adhærens, ut lib. de Prædestin. Sanct. cap. 3. Doctor humillimus confiteretur, nunquam tamen credidit hominem in naturæ reliquiis potuisse sine gratia, quod in integritate

tegritate naturæ non poterat; nunquam enim talem errorem retractavit vir ad revocanda & corrigenda sua opera totus fectus & comparatus. Sed non est opus conjecturis, quando res ipsa loquitur. Augustinus in libro de beata vita, quem adhuc catechumenus scripsit, expressè motionem excitationis internæ ad initia pietatis requirit his verbis: *Admonitio quadam est, qua nobiscum agit, ut Deum recordemur, ut eum quæramus, ut eum pulso omni fastidio sitiamus, de ipso ad nos fonte veritatis emanat, hoc interioribus luminibus nostris jubar sol ille secretus infundit.* Recordari autem Deum, quærere Deum, sitire Deum, pia sunt bonæ voluntatis initia.

Dices primò: Semipelagiani admittebant initium fidei esse à nobis, non esse donum Dei, nec illud Deum in cordibus nostris operari: Ergo gratiam interiorem ad illud initium non admittebant.

Respondeo, hinc potius sumi argumentum pro nostra sententia. Nam non est quod dicantur Semipelagiani eam gratiam ad initium fidei exclusisse, quâ admittâ semper stat, fidem esse à nobis, & non esse donum Dei: atqui admittâ gratiâ interiori, qualem habuit Adam in statu integritatis, stat fidem esse à nobis, & non esse donum Dei; nam admittâ illius gratiæ necessitate, nihilominus dixit Augustinus lib. de corrept. & grat. cap. 12. *perseverare, vel non perseverare, in hominis relinqui arbitrio.* Quod & repetit libris de prædestinatione Sanctorum, & de dono perseverantiæ, ubi ait, *perseverare esse in viribus liberi arbitrii.* Quod autem relinquitur libero arbitrio, quod est in viribus liberi-

392 *Lib.VIII. Dissert.III. historica,*
arbitrii, à nobis nec speciale Dei donum cense-
tur. Et ratio est clara, quia licèt inspiratio, &
excitatio interna sit donum Dei, determinatio
tamen, applicatio, & bonus usus excitationis il-
lius à libero expectatur arbitrio, nec usum il-
lum inspiratio illà operatur.

Instabis: Ex Prospero Massilienses volebant
hominem per naturalem virtutem, & faculta-
tem posse ad gratiam, quâ in Christo renasci-
mur, pervenire petendo, quærendo, pulsando;
ut ideo accipiat, ideo inveniat, ideo introeat,
quia bono natura benè usus, ut ad istam sal-
vantem gratiam initialis gratia ope meruerit
pervenire. Ergo Semipelagiani in nuda natura
omni gratiæ auxilio carente initium fidei, & me-
riti collocarunt.

Respondeo hoc argumento convictos Fran-
ciscum à S. Augustino Minoritam, & nostrum
Baptistam Gonerum, fateri quod licèt aliqui Se-
mipelagiani gratiam indifferentem liberi arbi-
trii determinationem expectantem ad initium
fidei admiserint, aliqui tamen omnem prorsus
gratiam ab initio fidei & meriti removerunt, &
in purum Pelagianismum hac in parte relapsi
sunt. Verùm etsi non sine fundamento illud in-
ter ipsos Semipelagianos schisma asseritur, attamen
argumentum factum non solùm evidenter
solvi potest, sed etiam ex eo nostra sententia
mage, magisque firmari. Etenim juxta tritum
Augustini, Patrum, Summorum Pontificum, ac
sacrorum Conciliorum loquendi modum, per
phrases istas, *Bonum opus est ab homine, fit per*
liberum arbitrium, per naturalem virtutem, &
facultatem, non excluditur quodlibet gratiæ
interioris auxilium, quia non excluditur auxi-
lium

lium sine quo, sed duntaxat *auxilium quo*. Nam August. *lib. de natur. & grat. cap. 43.* licet non neget *auxilium sine quo* Adamo fuisse necessarium, tamen Adamum *liberi arbitrii ad justè vivendum potestate* viguisse ait. Et *lib. de corrupt. & grat. cap. 10.* ait Sanctos Angelos *per ipsum liberum arbitrium in veritate stetisse.* Quod idem docet Prosper *lib. contra Collatorem, cap. 18.* & Fulgentius *lib. de incarn. & grat. cap. 22.* Hinc Cœlestinus Papa *epist. ad Episcopos Gallia, cap. 4.* definit, *in pravariatione Ada omnes homines naturalem possibilitatem perdidisse.* Quæ naturalis possibilitas nihil aliud esse potest, quàm potestas recta cogitandi, volendi, & agendi, quæ *auxilium sine quo* minimè in Adamo excludebat. Quâ observatione omnia adversariorum argumenta absque negotio dissolves.

Urgebis : Ex eodem Prospero iidem Senipetragiani volebant, priorem esse hominum obedientiam, quàm gratiam : ergo omne excludebant interioris gratiæ auxilium.

Respondeo hoc etiam argumento probari potius nostram sententiam ; manifestum est enim, obedientiam illam supponere necessariè aliam gratiam priorem, cui obediat, ratione ejus obedientiæ alia ulterior gratia ad bona, & perfecta opera concedatur. Impossibile enim est reddi obedientiam, nisi alicui prius naturâ præcipienti obtemperetur : Ergo obedientia, quæ præcedit gratiam donantem bona opera, supponit internam gratiam, cui obediat, & cujus merito plenius auxilium, seu auxilium quo concedatur, beneficio cujus non solum erigantur prostrati, sed etiam suffulciantur ambulantes.

tes. Uno verbo, ut omnia objecta occupentur, per omnia illa testimonia, quæ nobis objicere possunt adversarii, nunquam evincunt Semipelagianos excludere voluisse *auxilium sine quo*, sed unum duntaxat auxilium quo, auxilium medicinale, auxilium curationis, auxilium liberantis, auxilium quod facit ut faciamus præbendo vires efficacissimas voluntati. Negando enim illud auxilium, & admittendo solum auxilium siue quo, expectans bonum libertatis usum, verè, & consequenter dixerunt, naturam posse propriis viribus velle sanari, quærere medicum, homines priores dare Deo ut retribuantur eis, hominem quasi componere cum Deo, ut partem fidei sibi vindicet, atque illi partem relinquat, & quod est iniquius, primam tollat homo, sequentem det Deo; & in eo quod dicit amborum, priorem se faciat, posteriorem. Deum. Hæc enim duplici de causa deducebant, & quia bonum usum & determinationem libertati ascribebant, & quia illis initiis meritum gratiæ ulterioris ascribebant. Illud porrò Augustinus in hoc præsertim statu donum Dei non existimat, quod *auxilium quo* non operatur. Idque ex contextu locorum Augustini advertet facillimè Lector eruditus.

Dices secundò, nostram responsionem adversari celebri & solenni Innocentii X. & Alexandri VII Summorum Pontificum constitutioni, in qua hæc propositio ut falsa, & hæretica damnatur: *Semipelagiani admittebant prævenientis gratia necessitatem ad singulos actus, etiam ad initium fidei: sed in hoc erant hæretici; quod vellent eam gratiam talem esse, cui posset voluntas humana resistere, vel obtemperare.* Ergo

Semipe

Semipelagiani ad initium fidei gratiam interior-
rem non admiserunt.

Respondeo jure merito propositionem illam à Summis Ecclesiæ Capitibus fuisse proscriptionem; tum quia cùm complexa sit & bimembris, ut sit falsa & hæretica, sat erit alterum membrum falsitate & hæresi sordere. Porro in hoc non potuerunt esse Semipelagiani hæretici, quod dixerint gratiæ interiori, & prævenienti posse hominem resistere, vel obtemperare; cùm secundum fidem certum sit, hominem posse gratiæ cuiuslibet resistere, vel obtemperare: unde qui oppositum dicit, & falsidicus est, & hæreticus. Tum quia prævenientem singulos actus gratiam, qualem requierebant Augustinus & Concilia, nunquam Semipelagiani admiserunt; nam per necessariam ad singulos actus gratiam intelligebat Augustinus auxilium quo. Ergo falsum est, Semipelagianos admisisse prævenientis gratiæ, qualem Augustinus exigebat, quæve simpliciter gratia præveniens singulos actus dicitur, necessitatem. Addunt aliqui, quod licet veri Semipelagiani gratiam sine qua non repudiarent, tamen eorum aliqui in Pelagianismum relapsi sunt, ut patet ex istis Prosperi verbis: *Quidam horum in tantum à Pelagianis semitis non declinant, ut aliam gratiam non admittant, quàm legem atque doctrinam*, ut ibi S. Prosper describit. Quæ responsio difficultatem evacuat; si enim aliqui Semipelagiani initium fidei, & bonæ voluntatis in mera natura ab omni gratia deserta collocarint, profectò indefinita propositio æquivalens universali, quæ dicitur Semipelagianos admisisse prævenientis gratiæ necessitatem.

396 *Lib.VIII. Dissert.III.historica,*
cessitatem ad singulos actus, etiam ad initium
fidei, falsa est.

Quæri hîc solet, quid sit gratia Christi, gra-
tia operis, auxilium *quo*, an motio, an qualitas,
an actus vitalis indeliberatus. Sed hæc quæstio
non nisi iis suppositis, vel huc asportatis, quæ
de concursu Dei, de præmotione physica dispu-
tari solent, commodè resolvi potest: quæ
omnia Philosophi operosè discutere solent. Il-
lud solùm Theologo advertendum impræsen-
tiarum est, duas esse Theologorum etiam Tho-
mistarum hac in re probabiles sententias. Pri-
ma est Gonzalis 1. *part. disputat. 58. sect. 3.*
Eurielis tract. de grat. actuali, dubitat. 2. §. 6.
asserentium gratiam actualem esse actum inde-
liberatum, quia Patres, & Concilia dicunt, gra-
tiam esse vocationem, delectationem, inspira-
tionem, dilectionem, suavitatem, contactum in-
ternum. Unde Augustinus lib. 2. de peccat.
merit. & remiss. cap. 17. *Ideò, inquit, non faciunt*
homines, quia vel latet an iustum est, vel quia
non delectat. Et cap. 19. *Cùm ab illo illius ad-*
jutorium deprecamur ad faciendam, perficien-
damque iustitiam, quid aliud deprecamur,
quàm ut aperiat quod latebat, & suave fiat
quod non delectabat.

Alvares verò, & Joannes à S. Thoma fatentur
quidem, ex gratia sequi semper actus illos in-
deliberatos, quibus homo sentit se vocari, alli-
ci, gustare divina, condelectari legi Dei secun-
dum interiorem hominem; ad illos tamen
actus, qui non solùm sunt, & fiunt in nobis, sed
etiam à nobis, prærequirunt aliquam motio-
nem, vel qualitatis transeuntis impressionem,
tum quia Angeli & Christus Dominus non ha-
buerunt

buerunt unquam actus indeliberatos, & tamen gratia actuali ad singulos actus permoti sunt: tum quia ut intellectus & voluntas hos actus indeliberatos eliciant, aliquo aditamento indigent, quo ad illos producendos roborentur, & applicentur. Utut sit, mallem sentire gratiæ interioris unctionem, quàm scire ejus definitionem; illam tibi opto, Lector optime, dum istam apertè tradere non valeo. Hanc doctrinam non benè exponunt humani Magistri, nam melius explicat oratio, quàm lectio; illamque experire, si delectationem peccati justitiæ delectatione vincas, quia regnant spirituales fructus in homine, in quo peccata non regnant.

REFLEXIO.

Dominus custodiat introitum tuum, & exitum tuum. Gratiam ad initium, gratiam perseverantiæ ad exitum postulabat S. Propheta, quam Semipelagiani respuebant, Catholici fætentur, qui se & præventos agnoscunt, & provehì sentiunt, & sperant perficiendos, dantque Deo gloriam, qui gratis prævenit, excitavit, initiavit, & Deo juvante de cætero ita vivunt, quo se probent & perceptis beneficiis non ingratos, & percipiendis idoneos. Hanc gratiam, ut docet Bernardus *libr. de grat. & lib. arb.* quotidie perimus in oratione, cùm dicimus Deo: *Adveniat regnum tuum.* Regnum hoc nedū ex toto pervenit in nos; quotidie tamen paulatim aduētat, sensimque in dies magis ac magis dilatat terminos suos, in his duntaxat, quorū per
Daū

398 *Lib.VIII. Dissert.III. historica,*
Dei adiutorium interior homo renovatur de die in
diem.


Ergo à Deo omnem gratiam ad quodvis opus, sive incipiendum, sive prosequendum, sive perficiendum speremus, & postulemus. Nam ut eodem libro tradit Bernardus, velle bonum profectus est, velle malum defectus, velle simpliciter ipsum est quod proficit, vel deficit. Porro ipsum ut esset, creans gratia fecit; ut proficiat, salvans gratia facit; ut deficiat, ipsum se dejicit. Liberum arbitrium nos facit volentes, gratia benevolos: ex ipso nobis est velle, ex ipsa bonum velle: à Deo velle accepimus in conditione naturæ, velle bonum accipimus in visitatione gratiæ; in creatione quadantenus sumus nostri in liberam voluntatem; in recreatione Dei effici-mur per bonam voluntatem, ut simus initium aliquod creaturæ ejus, quoniam expedit profectò nobis magis omninò non fuisse, quàm nostros permanere: nam sicut libera voluntas nos facit nostros, ita mala diaboli, bona Dei.

Itaque voluntas humana, quæ post peccatum manet libera, etsi misera, quæ nec jacens valet per se surgere, nec stans in melius quit sine Deo proficere, ad necessariam sibi confugiat Dei virtutem, & Dei sapientiam Christum, qui ex eo, quod sapientia est verum, ei sapere infundat, & ex eo quod virtus est perfectum, posse restituat. Et certè ad quem potius, quàm ad Christum confugiemus, qui cum sit splendor gloriæ, & figura substantiæ Patris, & deformem reformabit, & debilem confortabit, & splendore suo tenebras fugabit, & virtute sua tyrannidem dæmonum conculcabit. Ipse forma est, cui confor

formandi sumus, quia ut pristinam recipiamus
formam, ex illa reformandi sumus, ex qua fui-
mus & formati. *Verum cuius ad talia provoca-*
mur exemplo, inquit laudatus Bernardus, indi-
gemus & auxilio, quo ipsi videlicet per ipsam
(formam) conformemur, & in eandem imaginem
transformemur à claritate in claritatem, tan-
quam à Domini spiritu. Ergo si à Domini spiri-
tu, iam non à libero arbitrio. : : Deus autem
Rex noster ante sacula cum operatus est salu-
tem in medio terra, dona sua, qua dedit homi-
nibus, in merita divisit, & premia, ut & pra-
sentia per liberam possessionem nostra interim
fierent merita, & futura per gratuitam sponso-
nem expectaremus, imò expeteremus ut debi-
ta. : : Dei sunt proculdubio munera tam no-
stra opera, quam ejus premia: & qui fecit se de-
bitorem in illis, fecit & nos promeritores ex his.

Hæc cum ita sint, caveamus in primis, ne
eum mala in nobis cernimus, nostræ voluntati
attribuamus, quæ infirma de virtute in virtutē,
& perfectionis culmen ascendere sine Dei gratia
non valet, quæve sibi relicta, de vitio in vitium
suo pondere devoluta ruit in præceps, prægra-
vata nimirum non solum lege peccati origina-
liter membris insiti, verum & consuetudine ter-
renæ inhabitationis usualiter affectionibus in-
colita. Totum ergo gratiæ asseramus, quæ libe-
rum excitat arbitrium, cum seminat cogitatum;
sanat cum inmutat affectum; roborat, ut per-
ducatur ad actum; servat, ne sentiat defectum. Sed
propterea negotio salutis ne segnes indormia-
mus; ad hoc enim gratia præveniens est, ut vo-
luntas sibi cooperetur, ita quod à sola gratia cœ-
ptum est, pariter ab utroque perficiatur. Non
sunt

400 *Lib.VIII.Dissert.III.historica, &c.*
sunt ergo deferenda jejunia, vigiliae, continen-
tia, operaque misericordiae, ceteraque virtutum
exercitia, per quae utique constat interiorem
hominem nostrum renovari de die in diem,
dum & intentio terrenis incurvata curis, de imis
paulatim ad superna resurgit, & affectio circa
cordis desideria languens, sensim in amorem
spiritus convalescit; & memoria veterum ope-
rum turpitudine sordens, novis, bonisque acti-
bus candidata in dies hilarescit. In his interior
renovatio consistit, rectitudine scilicet intentio-
nis, puritate affectionis, recordatione bonae
operationis. Verum haec cum certum sit divi-
no in nobis actitari spiritu, Dei sunt munera;
quia verò cum nostrae voluntatis assensu, nostra
sunt merita. Bonis igitur operibus insistamus,
quae spei seminaria, charitatis incentiva, gratiae
germina, praedestinationis indicia, futurae feli-
citatis praesagia sunt, & ut divine dixit Bernar-
dus: *Via regni, non causa regnandi.*



APPENDIX

UNICA.

Ad dissertationem precedentem de Prædestinarianis.



NIHIL invidiosius sententiæ Thomistarum opponunt adversarii, quàm nostram de prædestinatione & gratia sententiam dudum in Prædestinarianis quinto sæculo damnatam, à Uviclêso recoctam, demùm à Lutheranis & Calvinianis è cineribus impurissimis suscitata. Suas hoc pacto arbitrantur speciosis coloribus oblinire doctrinas, & Pelagianismi, vel Semipelagianismi objectam sibi consensionem recriminando depellere, si ad eñ nefandis nominibus sententiam nostram apud imperitos infament, & teterrimam ei assertioni notam inurant, quam alioquin benè sciunt non solum totius traditionis, sed clarissima potissimum Augustini & Aquinatis luce evasisse illustrissimam. Verùm his objectiuncularum nebulis Angelicam doctrinam, quam infuscare moliantur, splendidiorem invitos effecisse invictè demonstraverimus, si confictos illos Prædestinarianos, veros esse Augustini discipulos & defensores, à Semipelagianis divexatos, & atræ hærescos

hæreseos infimulatos hac appendice convinca-
mus, qui alibi verorum Prædestinarianorum, id
est Lutheranorum & Calvinianorum immanem
à nostris sensibus, & penè infinitis intervallis
dissitam dissonantiam ostendimus.

§. I.

*Nulli fuerunt quinto sæculo Præde-
stinatiani hæretici, sed eo nomi-
ne S. Augustini Discipuli à Se-
mipelagianis caluminosè tradu-
cti sunt.*

PROBATUR : Si extitissent quinto sæculo Præ-
destinatiani hæretici, illorum alicubi Augu-
stinus meminisset, illosve Patres illo tempore
Ecclesiam totis viribus defendentes, & cujusvis
erroris impatientes confutassent; nam nihil
eorum, quæ ad prædestinationis & gratiæ tra-
ctationem accuratissimam desiderari possunt, in
Augustino, Patribusque Augustinianæ doctrinæ
sectatoribus desideratur. Maximè quia Hinc-
marus Rheimensis Episcopus, præcipuus hujus
prædestinantiæ historiæ, vel potiùs fabulæ ar-
chitectus, non alios Prædestinianos agnoscit
quàm quos à B. Augustino confutatos ait : *Ne-
cessarium duximus, inquit Hincmarus de præ-
destin. c. 15. alligare in quatuor fasciculis, ad com-
burendum xizania, qua in dominici tritici medio
prisci seminarunt Prædestinatiani, quos Augusti-
nus, & Prosper suis scriptis sufficiētissimè revicerūt.*
Atqui

Atqui neque Augustinus, sive in libro de hæresibus, sive in tam multis de gratia libris, sive illis operibus, quæ sub finem vitæ in defensione divinæ gratiæ perseverans, ut ait S. Prosper, scripsit, de Prædestinarianorum hæresi mentionem facit: neque SS. Prosper, Hilarius, Fulgentius, Petrus Diaconus, Author libri hypognosticôn, inter opera Augustini tomo septimo recensiti, hanc hæresim impugnarunt, vel illius tantisper meminerunt; sed contra solos Pelagianos, Pelagianorumque reliquias fortissimè pugnarunt, ut in operibus eorum non omninò cæcutientibus claret: Ergo nulli unquam fuerunt hæretici Prædestinariani.

Dices: Non est verisimile, Bernardum de Luxemburgo opere suo de hæresibus hanc hæresim confinxisse, cum ea solùm de illa referat, quæ in chronico Sigeberti habentur, ut Alphonsus à Castro verbo *Prædestinatio*, tradit; ex quo etiam exscripsit Cardinalis Baronius quæ posteris fide Sigeberti reliquit.

Respondeo ita esse, sed hinc potius validiùs commentum Prædestinarianæ hæreseos convelli. Etenim Sigebertus hanc fabellam ex solis Semipelagianorum libris deprompsit; nullus enim ante Hinemarium de hac hæresi sermonem texuit, qui non fuerit Pelagianismi, vel Semipelagianismi fuligine tinctus. Nullibi quippe hæresis hæc reprehenditur, nisi apud authorem nuper Prædestinatum dictum, apud Tyronem Prosperum in chronico, apud Faustum Massiliensem, & Rhegiensem Episcopum, apud Gennadium, & apud Ennodium Ticinensem. Atqui omnes illi Authores suspectissimæ fidei

sunt.

sunt. Prædestinatus quidem Author Eutychete antiquior, quia ut omni legenti paret, totus liber purum-putum Pelagianiſmum ſpirat, & innumeris aliis ſcatet erroribus, & nominatim pagina 212. peccatum originale inficiatur, additque hanc impietatem eſſe à Prædeſtinationis inventâ. O hiſtoriæ Prædeſtinationis teſtem locupletem! Tyro Proſper item, qui eo libro Caſſianum laudat, & ab Auguſtino talem hæreſim ſumpſiſſe exordium inverecundè effutit. Arnobius etiam junior ſuam cum Pelagio conſenſionem in Pſalmum 50. ubi dari peccatum originale pernegat, ſatis ſuperque prodit. Fauſtum porrò Rhegienſem fuiſſe Semipelagianorum antèſignanum nemo neſcit. Gennadium quoque à Semipelagianis ſtetiſſe, libro de dogmatibus Eccleſiaſticis, & altero de viris illuſtribus opere ſatis ipſemet oſtendit, cùm ibi Caſſiano, Fauſtoque laudatis, Auguſtinum, Hieronymum & Proſperum accuſet. Idem de Ennodio Ticinenſi, viro alioquin inſigni judicium feret, qui epiſtolam ejus decimanonam, ubi Pelagianos turatur errores, attentè legerit. Nec Ennodii teſtimonium adverſariorum cauſam multùm juvat, cùm ibi non ſectam ſolam Prædeſtinationis, ſed unum duntaxat hominem reprehendat, qui aſſerebat, *in una tantùm parte, qua deterior eſt, eligendi datam eſſe licentiam.* At quis hæreticis pro domo ſua certantibus prudenter credat? Quis hæreticorum artes ignorat, ſuppoſititios errores & libros viris Catholicis declinandæ invidiæ gratiâ aſſerere ſolitos? Abſit ut illis fidem habeamus, qui fidè Deo, & Eccleſiæ detrectant. Abſit ut illis aſſentiamur, qui nimio errorum ſuorum ſtudio præpediti,

variis

variisque præjudiciis occupati, neque jus, neque æquum atque bonum sciunt, sed ut elegans Poëta ait : *Melius, pejus, profit, obfit, nihil vident, nisi quod lubet.* Nemo ignorat hæreticos ipsarum Scripturarum corruptores à veritate desertos totam in mendacio ponere spem suam, uti Magnus Gregor. ait *lib. II. Moral. cap. 13.* illud Job 3. expendens : *Nunquid indiget Deus vestro mendacio, ut pro illo loquamini dolos ?* ubi sic habet : *Deus mendacio non eget, quia veritas fulciri non quarit auxilio falsitatis. Hæretici autem, quia ea qua pravè de Deo intelligunt, ex veritate tueri non possunt, quasi ad approbandum radium luminis, umbras falsitatis requirunt.*

Sed inquires : Quid causæ fuit, cur Semipelagiani hanc Prædestinarianorum hæresim finxerint, si nunquam fuit in rerum natura ? Quid inde compendii reportabant, quo causa ipsorum hac arte promoveretur ?

Respondeo, magnum ex hac calumnia lucrum Semipelagianos expectasse ; cum enim in causa prædestinationis & gratiæ christianæ Catholicos, id est Augustini discipulos, vincere niterentur, collatam in se novæ hæreseos suspicionem, graviori & horribiliori accusatione propellebant, contendebantque Augustini defensores, quos Prædestinarianos nominabant, fatalem necessitatem inducere, & omnibus invisam & exosam Manichæorum hæresim suscitare. Volebant ergo esse victores, *non ut veritas, juxta consilium Augustini in quadam epistola, vincat errorem, sed error errorem, & quod pejus est, major minorem.* Sic olim, ut alibi observatum est, Eutychiani Catholicos distin-

ctas

ctas in Christo naturas propugnantes, tanquam Nestorianos traducebant. Nestoriani verò contra Cyrillum unitatis personæ Christi acerrimum cum Ecclesia Catholica defensorem, Apollinaristam appellabant. Vide quæ diximus *tom.1. dissert.12. pag.618.*

Et ut liquidò constet, Semipelagianos unius Augustinianæ doctrinæ fidos sectatores hujus nefandæ hæreseos insimulasse, atque adeò dilucidè & invictè confirmetur sententia nostra, sciendum illa eadem, in quibus Prædestinarianæ hæreseos virus ponebant, doctrinæ capita fuisse antè Augustino, Prospero, aliisque intrepididis Augustini discipulis objectata. Etenim apud memoratum Gennadium primum accusationis caput est, quod juxta prætenso illos Prædestinianos, *Deus non omnes homines creavit, ut omnes salvarentur, sed ut multitudine hominum ornetur mundus.* Atqui illam eandem propositionem Prospero & Augustini discipulis Galli objectione 13. opposuere his verbis: *Quidam homines non ob hoc à Deo creati sunt, ut vitam adipiscantur æternam, sed ut habitum tantummodò sæculi præsentis ornarent, & ad utilitatem nascerentur aliorum.* Cui objecto sic B. Prosper respondet: *Universos homines non ignoramus à Deo singillatim creari, & de hac universitate alios damnandos cum diabolo, alios regnaturos esse cum Christo. Quid ergo etiam hi creantur, qui æterna vitæ participes non erunt, nulla est culpa Creatoris, qui natura author est, non vitii, quod natura contraxit. Ornari autem etiam talium conditione mundi hujus varietatem quis non intelligat, qui videat studiis, & operibus quorundam impiorum tot commoda vitæ*
pra

presentis instructa in inventione artium, in ex-
structione urbium, in constitutione legum, in con-
federatione populorum? Quod confirmat dein-
de ex ipsa Religione Christiana, quæ multum
ex impiorum persecutione incrementum sus-
cepit, ut patet exemplo Christi, qui magno
Judæorum scelere redemit orbem terrarum;
tum Apostolorum tolerantiam inter persecuten-
tium fremitus triumphantium; tum innumera-
bilibus Martyrum palmis, quibus de crudelissi-
ma infidelium sævitia felix est collata victoria,
adducitque illud Apostoli Philipp. i. *In nullo
teneamini ab adversariis, quæ est illis causa
perditionis, vobis autem salutis, & hoc à Deo.*
Tum hæreticorum novitatibus, quorum errores
Deus in Ecclesia contra Ecclesiam permittit ex-
surgete, non utique eos creans aut fovens, sed
per ipsos diligentiam filiorum suorum ad inqui-
sitionem & custodiam veritatis exercens, dicen-
te 1. Cor. ii. Apostolo: *Oportet hæreses esse, ut
probatimur manifesti fiant in vobis.* Monet porro
fideles ad tenebras impiorum, & ad illuminatio-
nem filiorum respicientes, ut gratias Deo agen-
tes fiant ex collatis sibi beneficiis ferventiores,
in ruinaque pereuntium discant, in qua mala per
liberum arbitrium ruerent, nisi eis per Dominum
nostrum Iesum Christum Dei gratia subveniret.
Et versùs finem libri sic habet: *Neque quàmli-
bet innumerabilis multitudo impiorum indecora
est mundo, aut inutilis Dei regno; cum etiam per
ipsorum veniat propaginem regeneranda generatio,
& in eis tolerandis ac diligendis populus Dei fiat
illustrior, ducens bonitatem & patientiam ab illo
qui pluit super iustos & iniustos, & solem suum
oriri facit super bonos & malos.*

Secundò aiebant Prædestinianos illos à se excogitados velle, non omnes à Deo eâ voluntate vocari, ut *vecem ejus omnes sequantur.* Verùm enim verò illud ipsum Prospero objectione 5. Galli opposuere his verbis: *Qui vocati sunt, non aqualiter sunt vocati, sed alii ut crederent, alii ut non crederent.* Cui sic satisfacit Prosper: *Si vocatio in Evangelii tantum prædicatione intelligatur, non veraciter dicitur, quod aliis atque aliis, aliter atque aliter prædicetur; cùm unus sit Deus, una fides, una regeneratio, una promissio. Si autem ad effectum plantationis & rigationis aspicitur, aliud actû est cum eis; quorum exteriores aures corporali voce pulsata sunt; aliud in eis, quorum interiorem sensum Deus aperuit, & in quorum corde posuit fidei fundamentum, dilectionisque fervorem. Quosdam autem ideò vocatos dicere, ut non crederent, nimis absurdum est; quasi vocatio eis causa infidelitatis extiterit, & prædicationis fidei fecerit infideles.*

Tertiò accusabant Prædestinianos illos imaginarios, quòd vellent non omnes, qui vocante Deo obediunt inspirationi ipsius, accipere in bono exequendo perseverantiam. At illud quoque Prospero objectione 7. à Gallis his verbis oppositum fuit: *Quod Deus quibusdam filiis suis, quos regeneraverit in Christo, quibus fidem, spem, dilectionem dedit, ob hoc non det perseverantiam; quia non sunt à massa perditionis præscientiâ Dei & prædestinatione discreti.* Ad quam difficultatem sic respondet Prosper: *Ex regeneratus in Christo Iesu quosdam relicta fide, & piis moribus apostatare à Deo, & impiam vitam in sua ære fione finire, multis (quod doleandum est) proba*

probatur exemplis. Sed horum lapsum Deo ascribere immodica pravitatis est, quasi ruina ipsorum impulsor, atque author sit, quia illos ruituros propria ipsorum voluntate præscivit, & ob hoc à filiis perditionis nulla prædestinatione discrevit. Non est calumniandum Deo, quare istis non dederit quod aliis dedit; sed confitendum est, & misericorditer eum dedisse quod dedit, & justè non dedisse quod non dedit: ne quemadmodum ex libero arbitrio oritur causa latendi, ita ex ipso videatur & standi; cum illud humano fiat opere, hoc divino impleatur ex munere.

Denique, aliis omisissis, præcipuum accusationis caput erat, quod Prædestinariani illi ideales vellent, Deum impios prædestinare ad malum, sicut justos ad bonum. Sed hæc erat ipsa prima Gallorum objectio his verbis: Quod ex prædestinatione Dei, velut fatali necessitate homines ad peccata compulsi cogantur in mortem. Cui sic respondet Prosper: Prædestinationem Dei nullus Catholicus negat, fatalem autem necessitatem multi etiam non Christiani refutant. Peccatum ergo ad mortem trahit, sed ad peccandum neminem Deus cogit. Quisquis igitur, addit in fine libri, ex prædestinatione Dei velut fatali necessitate homines in peccata compulso cogi dicit in mortem, non est Catholicus. Nullo enim modo prædestinatio iniquos facit, neque cuiusquam omnino est causa peccati.

Iisdem difficultatibus respondet idem Prosper in altero libro de capitulis objectionum Vincentianarum, ut legenti perspicuum est. Ex quibus clarissimum est, sicut ex alio ejusdem Prosperi ad excerpta Genuensia, & contra Col-

410 *Lib. VIII. Appendix unica,*
latorem libro manifestum, Semipelagianos falsis, & absurdis consequentiis hæresim Prædestinarianā fuisse fabricatos, & ibi hæresim posuisse, quod ex Augustino; Augustinique discipulis frivolis sophismatis deducebant. Cum igitur Genadius, alique Prædestinarianorum confictores, nihil illis opponant, quàm quod Prospero, aliisque orthodoxis Augustinianæ doctrinæ sectatoribus oppositum fuit, planè relinquitur, Prædestinianos illos nihil ab Augustini Catholicis discipulis interesse.

Nec miram si Augustini discipulorum famæ hi obtrectatores detrahere præsumperint, cum nec Magistri nomini pepercerint. Conqueritur enim Augustinus *libro 1. contra Iulian.* inter varias contumelias, & verba maledica, sibi potissimum consensionem cum Manichæis Iulianum opposuisse. *Ostendam, inquit cap. 1. quantis, & qualibus Ecclesia Catholica Doctoribus nomine Manichæorum intolerabilem facere non curaveris injuriam, & cum me appetis, in quos tela sacrilega jaculeris.* Et cap. 3. *Sed tu, qui tam creberrè nobis Manichæorum nomen opponis, quos & quales viros, & quantos fidei Catholica defensores tam execrabili criminatione appetere audeas, si evigilas, intuere.* Et cap. 4. *Quid nomen dilaniare niteris meum, & Ambrosium facis tacito ejus nomine Manichæum? Cernis nempe cum quibus tua maledicta suslineam: cernis cum quibus mihi sit causa communis, quam nulla consideratione sobria pulsare calumniis, & expugnare conaris? Cernis quàm tibi perniciosum sit tam horrible crimen objicere talibus, & quàm mihi gloriosum sit quodlibet crimen audire cum talibus.*

Testa

Testatur etiam D. Prosper in prologo responsionis ad capitula Gallorum, quosdam doctrinam Augustini, quam contra Pelagianos inimicos gratiæ Christi, & liberi arbitrii decomptores per multos annos apostolicè asseruit, literisque mandavit, non intelligendo, aut intelligi eam nolendo reprehendisse, & quæ in Augustini libris damnabilia reperisse jactabant, brevium capitulorum indiculis publicasse. In prologo etiam libri responsionis ad objectiones Vincentianas asserit quosdam christianæ, ac fraternæ charitatis oblitos discipulorum Augustini existimationem lædere studuisse. *Contextum enim, inquit, & qualibus possunt sententiis comprehendunt ineptissimarum quarundam blasphemiarum prodigiosa mendacia, eaque ostendenda & ingerenda multis publicè, privatimque circumferunt, asserentes talia esse in nostro sensu, qualia diabolico continentur indiculo.* Et capite 1. libri contra Collatorem affirmat, Cassianum, aliosque, quorum nec ordo in Ecclesia, nec ingenia despicienda erant, contempsisse gratiam Dei, quâ Christiani sumus, ab Augustino non esse rectè defensam; libros ejus contra errorem Pelagianum conditos immoderatis calumniis impetere non quievisse, & illam suis moribus doctrinam laniasse, quæ novorum hæreticorum commenta disjecerat, & diabolicum tumorem Pelagianæ elationis eliserat.

Igitur homines illi, qui inductæ fatalitatis, necessarii ad malum impulsus asserti, Prædestinationis ad æternam damnationem invectæ accusati sunt, non alii fuere unquam, quam discipuli Augustinianæ doctrinæ, quibus per

consequentias inanes talia commenta affingebant, *asserentes*, inquit Prosper laudatus in præfat. ad object. Vincentianas, *talia esse in nostro sensu, qualia diabolico continentur indiculo.* Quæ subdit falsò in discipulos Augustini ad excitandam invidiam fuisse jactitata. Ergo tantùm abest, ideò credendum esse, fuisse sub illa tempora hæreticos Prædestinianos, quia quædam nonnullis horrenda capitula objecta sunt, quin porius nullos fuisse Prædestinianos certissimè tenendum est, cùm illi quibus objecta sunt, acerimi fuerint Catholicæ veritatis assertores. Neque enim, ut benè monet Prosper in prologo ad capitula Gallorum, hanc persuasivam temerè quis debet recipere, & *talem putare sensum scriptis Catholici inesse Doctoris, qualem eum, qui frustra calumniantur, ostendunt.*

§. 2.

Objectorum confutatione sententia nostra magis firmatur, magisque exploditur Prædestiniana hæreseos commercium.

OBjicies 1. Prædestinatorum primordià in Africa in Monachis Adrumetinis ab Augustino deprehensa sunt. Etenim teste Augustino *epist. 46. ad Valentinum*, turbatum est nonnulla dissensione Monasterium, eo quòd quidam in illo sic gratiam Dei prædicent, ut negent hominis liberum arbitrium; & quod est gravius, *dicant, quod in die judicii non sit redditurus unicui*

unicuique juxta opera ejus. Atqui per hæresim Prædestinarianam nihil aliud intelligunt qui eam extitisse aiunt : Ergo Prædestinarianæ hæresis verè tempore Augustini, tametsi non sub eo nomine, incepit.

Respondeo monasterium Adrumetinum magis Semipelagianæ, quàm Prædestinarianæ hæreseos suspicione laborasse. Etenim post acceptam B. Augustini epistolam 105. ad Sixtum Romanæ Ecclesiæ Presbyterum, & deinde Summum Pontificem, in duas partes monasterium divisum est, aliis Semipelagianis spiritu actis, vel certè ignorantia occæcatis, existimantibus stante illa gratiæ victicis necessitate, quam epistola illa tam nervosè Augustinus propugnat, humanum tolli arbitrium; & hi erant numero quinque, ut ex epistola Valentini ad Augustinum inter Augustinianas 256. patet: alii contrà epistolæ Augustini doctrinam in toto suo rigore recipientes, efficaciam divinæ gratiæ, tanquam humanæ libertati minimè officientem confitebantur. Hos inter præcipuus erat Florus, qui ut ait idem Valentinus, fuit aliorum quinque, qui in ipsum sæviebant, quòd epistolam Augustini detulisset, furore conturbatus. In hac contentione duo Monachi Cresconius & Felix ad Augustinum profecti sunt, qui Augustino exposuerunt Florum & sequaces ita gratiam prædicare, ut negent hominis liberum arbitrium, & quòd in die judicii non sit Deus redditurus unicuique juxta opera ejus.

Iaque Augustinus in epistola citata ad Valentinum, accusantium fide nixus monachos hortatur, ut neque negent Dei gratiam, neque liberum arbitrium sic defendant, ut à Dei gra-

tia separent : quia si non est Dei gratia, quemodo
saluat mundum ? Si non est liberum arbitrium ,
quemodo iudicat mundum ? Porro Augustinus
accusationi aliorum ægrè credens , & doli , vel
ignorantiae aliquid suspicatus , rogat Valenti-
num , ut ipsum , à quo dicunt Monachos fuisse
turbatos , ad se mittat : *Aut enim non intelligit
librum meum , aut fortè ipse non intelligitur ,
quando difficillimam quætionem , & paucis in-
telligibilem solvere , atque enodare conatur.* Du-
rante eodem dissidio scripsit Augustinus librum
de gratia & libero arbitrio , quia Falsorum fra-
trum accusationibus persuasus existimabat, Flo-
rum & sequaces sic gratiam Dei defendere,
ut negarent liberum arbitrium. Quos libros
cum pluribus scriptis aliis ad Valentinum trans-
misit.

His peractis Florus cum aliis Fratribus ad
Augustinum pergit. Qui ejus innocentiam il-
lico pernovit , tum ex epistolis Valentini , in
quibus sic habetur : *Servus tui Flori hac fides est
Pater (id est illamet , quam Augustinus libris
ad Monasterium missis exprefferat) non sicut
Fratres tui sunt loquuti.* Tum ore ipsius Flori
doctrinae ejus puritatem agnovit , unde & ma-
gnificum de illo testimonium perhibuit lib. de
corrupt. & grat. cap. 1. *Liberum arbitrium & ad
bonum , & ad malè faciendum consistendum est
nos habere ; sed in malo faciendo liber est , quisque
justitia , servusque peccati ; in bono autem liber
esse nullus potest , nisi fuerit liberatus.* Hanc
fidem , quæ sine dubio vera , & Prophetica , &
Apostolica fides est , etiam in fraire nostro Floro
invenisse me gaudeo : unde hi potius corrigendi
sunt , quos quidem propositio Deo correctos esse jam
exi

existim, qui eum non intelligebant. Hac de causa scripsit Augustinus aureum, & divinum illud opus de correptione & gratia, non hæresim Prædestinarianam confutaturus, sed contra eos acturus, qui Pelagiana elatione inflati, inanem esse correptionem, & deleri liberum arbitrium ex confessione christianæ gratiæ, perversis inanum consequutionum sophismatis inferebant, ut ipsemet August. libro 2. *retract. cap. ultimo, & penultimo*, ubi de libro de gratia & libero arbitrio, & de altero de correptione & gratia agit, luculentissimè testatur. Ibi namque ait se libros illos scripsisse, *propter eos, qui cum defenditur Dei gratia, putantes negari liberum arbitrium, sic ipsi defendunt liberum arbitrium, ut negent Dei gratiam.* Ex quibus omnibus claret, non aliquam fuisse temporibus Augustini Prædestinarianam hæresim, sed Prædestinarianæ hæreseos commentum à Semipelagianis ad declinandam invidiam excogitatum fuisse, ut in se collatam hæresis notam in orthodoxos hæreticorum genio transferrent. Unde infrunitè dixit Tyro Prosper, ab Augustino Prædestinarianos sumpsisse primordia.

Objicies secundò. Adversus emergentes Prædestinarianos Augustini opem implorarunt Prosper & Hilarius. Ergo Prædestinarianorum hæresis reverà exstitit.

Respondeo hoc argumentum jejunè, & sine probatione à P. Jacobo Sirmondo proponi, sed eo potius inviçtè astrui sententiam nostram, demonstratu facillimum est. Omni enim epistolæ Prosperi & Hilarii legenti perspicuum est, geminum illum Augustini discipulum adversus unos Semipelagianos communis Magistri opem im-

416 *Lib. VIII. Appendix unica,*
plorasse. Etenim, teste Hilario in sua epistola,
Augustini lucem invocarunt Massilienses, qui
perfecto de correptione & gratia libro, & illo
potissimum capite, in quo dicitur: *Nunc Sanctis
in Regnum per gratiam prædestinatis non tale*
(quale fuit in Adamo.) *adjutorium perseveran-*
tia detur, sed tale ut eis perseverantia ipsa do-
netur; non solum ut sine isto dono perseverantes
esse non possint, verum etiam ut per hoc donum
non nisi perseverantes sint. His, inquam, perle-
ctis indignati sunt: His verbis Sanctitatis tua
ita moventur, ut dicant, desperationem quan-
dam hominibus adhiberi. Idem fusiùs testatur
Prosper, afferens ex doctrina August. de propo-
sito, decreto, & prædestinatione, in quibus Deus
cuncta præscivit, atque ex gratiæ operantis &
præoperantis assertionem subinferre, & lapsis cu-
ram resurgendi adimi, & sanctis occasionem te-
poris afferri, eo quòd in utramque partem super-
fluus labor sit, si neque rejectus ullâ industriâ
possit intrare, neque electus ullâ negligentia pos-
sit excidere. Removeri itaque omnium industri-
am, & illique virtutes, si Dei constitutio huma-
nas præveniat voluntates; & sub hoc Prædesti-
nationis nomine fatalem quandam induci ne-
cessitatem, aut diversarum naturarum dici Do-
minum conditorum, si nemo aliud possit esse,
quàm factus sit. Deinde sic compendiosè illo-
rum, adversus quos Augustini patroni fidei, ut
vocat, implorat auxilium, sensum, mentemque
exponit: *Atque ut brevius ac plenius quod opi-*
nansur, exponam, quidquid in libro hoc (de cor-
rept. & gratia) ex contradicentium sensu Sancti-
tatis tua sibi opposuit; quidquid etiam in libris
contra Iulianum, ab ipso sub hac questione obje-
ctum

Etum potentissimè debellasti, hoc totum ab istis sanctis (id est Massiliensibus Presbyteris, specie sanctitatis spectabilibus) intentiosissimè concludatur. Et cum contra eos scripta Beatitudinis tua validissimis, & innumeris testimoniis divinarum Scripturarum instructa proferimus, ac secundum formam disputationum tuarum aliquid etiam ipsi, quo concludantur, astruimus, obstinationem suam vetustate defendunt.

Has, & alias Semipelagianorum querelas tota epistola expandit Prosper, quam sic concludit: *Adde eruditionem humilibus, adde increpationem superbis: necessarium & utile est, etiam qua scripta sunt scribere, ne leve existimetur quod non frequenter arguitur. Sanum enim putant esse quod non dolet, nec vulnus superinducta cute sentiunt; sed intelligant perventurum ad sectionem, quod habuerit perseverantem tumorem.* Ecce quid per illos intelligendum sit, adversum quos Prosper Augustini opem implorat: ii cettè Massilienses fuere, superbi Semipelagiani, Pelagianorum reliquæ. Sed quid ad hæc Augustinus integris de prædestinatione Sanctorum, & de dono perseverantiæ libris, quibus Prospero, Hilarioque respondet? Numnam Prædestinarianam hæresim confutat? Numnam ejus duricie Massilienses insimulat? Numnam ab eis negari liberum arbitrium, & homines in malum prædestinari vel capite ullo docuit, vel verbulo obiter indigitavit? Minimè gentium. Qua ergo fronte potuit Hincmarus tantâ asseverantiâ, tantâ confidentiâ pronuntiare, Massilienses ipsos fuisse Prædestinarianos, cum in extremam eos potiùs sententiam deflexisse, & quod Prædestinarianæ hæreseos

nomine intelligitur, Augustino per consequutiones asseruisse luce meridiana clarius sit? Vidit hunc intolerabilem Hincmari ducis alioquin sui errorem P. Sirmondus, & corrigere conatus est, Massilienses inquiens, propter oppositam Prædestinatianorum hæresim scilicet Augustini de absoluta prædestinatione sententiæ opposuisse. Sed cur, sodes, Augustinus nihil adversus Prædestinatianos turbationis confictos authores agit; & contra solos turbatos omnibus gemini operis moliminibus pugnat? Patet potro quam falsum sit Massilienses à Prædestinatianis fuisse interrumbatos, cum manifestissimis Hilarii & Prosperi relatis testimoniis, una turbationis occasio fuerit librorum Augustini, & nominatim operis de correptione gratia lectio? Egit quidem de prædestinatione Augustinus: illius indeclinabilem, & ab ulla præsciencia independentem omnipotentissimam potestatem propugnavit. Ergone propterea contra Prædestinatianos disputavit, ut Sirmondus concludit? Absoluta planè consequutio, legitima verò hæc est: Ergo egit contra Pelagianorum reliquias suam de prædestinatione sententiam infamantes. Et quomodo egit? Retractavitne quod libro de correptione & gratia docuerat, vel aliquo tandem temperamento mollivit, ut à prætenfa Prædestinatianorum sententia se discerneret? Non mollivit, non inflexit, sed astruxit fortius, firmavitque validius. *Hæc est immobilis* (inquit lib. de Prædestinat. Sanct. cap. 17. & 18. & de dono perseverant. cap. 18. *veritas prædestinationis & gratiæ. Quis hæc audiat diligenter, & intelligenter, & audeat de hac, quam defendimus, tam clara veritate dubitare? Hoc scio, neminem*

contra

contra istam prædestinationem, quam secundum Scripturas sanctas defendimus, tam clara veritate dubitare.

Objicies tertio: Prædestinariani à Cœlestino Papa, Prospero & Hilario suggerentibus, per epistolam ad Episcopos Galliæ damnati, & repressi sunt, sic enim habet: *Filii nostri presentes Prosper & Hilarius, quorum apud Deum nostrum sollicitudo laudanda est, tantum nescio quibus Presbyteris illic licere, qui dissensionem Ecclesiarum student, sunt apud nos prosequuti, ut indisciplinatas quæstiones vocantes in medium, pertinaciter eds dicant prædicare adversantia veritati: sed vestra dilectioni iustius imputamus, quando illi supra vos habeant copiam disputandi. Ergo corripiantur huiusmodi. Desinat, si rei sunt, incessere novitas vetustatem; desinat Ecclesiarum quietem inquietudo turbare. Per istas autem indisciplinatas quæstiones, per istam novitatem vetustatem incessentem, & per eam inquietudinem Ecclesiarum turbantem quietem, Prædestinarianorum hæresim Pontifex intellexit, qui authorem suæ doctrinæ Augustinum vulgò jactabant, & confictis libris mentiebantur. Quod & confirmare Photius 54. suæ Bibliothecæ capite videtur, his verbis: Mortuo S. Augustino cœperant quidam ex Clero impium dogma statuere, ac de Augustino malè loqui, eumque insectari, quasi liberi arbitrii interitum induxisset. Verùm Cœlestinus Pontifex & pro sancto viro, & contra hæresis incentores scribens ad Episcopos hujus regionis, na centem errorem combescuit. Quæ verba non de Pelagianis, quorum novus hoc tempore error non erat, sed de Prædestinarianis omnino intelligenda sunt.*

Respon

Respondeo hoc argumento magis sententiam nostram illustrari. Manifestum quippe est, non Prædestinatianos, sed unos Semipelagianos fuisse à Romano Antistite repressos. Neque enim alios reprimere Pontifici unquam in mentem venit, quàm eos, de quibus apud sanctam Sedem Prosper & Hilarius conquesti sunt. At luce clarius est, Hilarium & Prosperum de solis Pelagianorum reliquiis fuisse conquestos. Nam de illis conquesti sunt, qui in Augustinum malevoli tanti Patris famæ detrahebant; unde de illis loquens Cœlestinus ait, eos niti *etiam quiescentium fratrum memoriam dissipare, præsertim Augustini, quem nunquam sinistra suspicionis falsus saltem rumor aspergit.* At ficti illi Prædestinatiani non solum Augustini memoriam non lacerabant, ejusque scripta opprobriis laceſcebant, sed potius, ut Sirmundus ipse ait, *authorem sibi Augustinum & vulgò jactabant, & confectis libris mentiebantur.* Sed quinam sint, de quibus conquestus sit, Prosper ipse prodat, ne conjecturis agamus: *Per hunc virum* (Papam Cœlestinum intelligit) *intra Gallias illis ipsis, qui sanctæ memoria Augustini scripta reprehendunt, maleloquentia est adempta libertas, quando consultantium actione suscepta, & librorum, qui errantibus displicebant, pietate laudata, quid oporteret de eorum authoritate sentiri, sancto manifestavit eloquio, evidenter pronuntians, quantum sibi istius presumptionis novitas displiceret, qua auderet quidam adversus Magistros insolenter insurgere, & indisciplinatâ calumniâ predicationi veritatis obstrepere.* Augustinum, inquit, *sanctæ recordationis virum pro vita sua, atque pro meritis in nostra semper com-*
munionem

munione habuimus. Contra istam sacratissimæ
testimonii dignitatem, contra istam clarissimæ
laudationis tubam audet quisquam malignæ in-
terpretationis murmur emittere, & perspicuæ, sin-
cerissimæque sententia nubem obliquæ ambiguita-
tis obtendere? Ut scilicet, quia in epistola Pape
librorum, pro quibus actum est, non expressus est
titulus, hinc eos appareat non probatos, & istam
in S. Augustinum laudationem pro anteriorum
scriptorum meritis fuisse collatam. Maneat pla-
nè, maneat ista conditio, ut horum librorum no-
vitas repudiata videatur, si in eadem causa ejus-
dem viri dissentit antiquitas: & ut inutile, aut
incongruum judicetur, quod ab his, quæ contra
Pelagianos condidit, dissonans invenitur. Hoc
testimonio quid planius, quid luculentius?
Constat enim eos Cælestinum repressisse, qui
scripta Augustini reprehendebant. Constat eis
maleloquentiæ libertatem ademisse, qui adver-
sus talem Magistrum insolenter surgebant.
Constat Pontificem eorum Augustini librorum
pietatem commendasse, qui errantibus displic-
ebant. Constat hujusmodi errantium errores
ab his dissonare, quæ contra Pelagianos Augu-
stinus condidit. At illos fuisse Semipelagianos
nemo unquam Theologorum dubitavit, nemo
cordatus dubitare potest. Ergo illi, qui per Cæ-
lestinum repressi sunt, non Prædestinatiani, sed
Semipelagiani fuerunt.

Hac de causa Prosper illos, de quibus con-
queritur, passim Pelagianorum reliquias, Juliani
imitatores, Pelagiani seminis germina, pestiferæ
radicis fructus, occultos lupos Pelagianismum
sub latebris propagantes appellat. *En cujus*
dogmata sint Magistri (inquit lib. contra Colla-
torem

torem, cap.31. & cap. ultimo) qui ut catholicarum meritum castuatem gratia defensoribus calumnianto corrumpant, precipuum nostro tempore in doctrina Ecclesiastica virum rabido ore discerpunt, creduntque se omnia authoritatum munimina posse convellere, si hanc pastoralis specula val. dissimam turrim crebra Pelagiani arietis illusione pulsaverint. Sed congruenter isti non desunt partibus suis. Dignum quippe est, ut quorum sequuntur sententiam, imitentur insaniam: nec enim alia possunt dicere, quàm quæ damnatorum querelis, & procacissimis Iuliani sunt vulgata convitiis. Paria sunt unius seminis germina, & quod latebat in radicibus, manifestatur in fructibus. :: Ne hypocritarum obtineatur insidiis, confidimus Domini protectione præstandum; ut quod operatus est in Innocentio, Zozimo, Bonifacio, Coelestino, operetur & in Sixto: & in custodia dominici gregis hac sit pars gloria huic reservata Pastori, ut sicut illi lupos abegere manifestos, ita hic depellat occultos.

Ad testimonium Photii respondeo ibi etiam manifestè loqui de Semipelagianis, qui soli de Augustino malè loquebantur, soli eum insectabantur, quasi liberi arbitrii interitum induxisset. Neque enim Prædestinatiani Augustinum convitiis incessissent, quod liberi arbitrii interitum induxisset; sed hinc potius amplioribus eum fuissent laudibus prosequuti, quod suum hac assertionem firmasset errorem. Quod verò addit Sirmondus, testimonia illa de Pelagianis intelligi neutiquam posse, quorum non novus, sed per vetustus error erat; hæc, inquam, conjectura argumento ipsius nihilo melior est. Et si enim novus non esset Pelagianorum error,

novæ tamen erant Semipelagianorum querelæ, nova, & noviter inventa præscientia illa eventuum exploratrix, cui constitutio divina inniteretur, nova Pelagianæ hereseos lenimenta, novæ latebræ, novæ occultorum luporum insidiæ, novus denique explicandi modus, quanvis reapse in illis Pelagianæ perversitatis reliquiis, non mediocris virulentia fibra nutriebatur, dum principium salutis malè in homine locabatur, ut Prosper in sua ad Augustinum epistola præmonuit.

Objicies quartò. Hæresis Prædestinariana in Concilio Arausicano II. & in Valentino III. proscripta est; sic enim habet Arausicanum Concilium can. 25. *Aliquos verò ad malum divina potestate prædestinatos esse, non solum non credimus, sed etiam si qui sunt, qui tantum malum credere velint, cum detestatione illis anathema dicimus.* Idem eodem modo præstitit Valentinum. Ergo hæresis Prædestinariana aliquandiu grassata est.

Respondeo, Concilium Arausicanum II. præfide S. Cæsario Arelatensi Episcopo, perfectæ gratiæ intrepido defensore, anno Christi 529. celebratum esse, non ad damnandam imaginariam Prædestinarianorum hæresim, sed ad profligandas, extirpandasque Pelagianorum reliquias, nunquam graviore vulnere eo, quod ab hac Synodo inflictum est, percussas. In hac enim Synodo à Bonifacio Papa anno 531. Apostolica autoritate confirmata, celestis Augustini de prædestinatione & gratia doctrina cōsecrata est, ipsa Augustini verba in canones redacta sunt, factaque sunt fulmina, quibus adversariorum, & tanti Magistri obrectatorum capita contrita sunt.

sunt. Sed contra Prædestinianos nequaquam Synodus coacta est, sed contra illos duntaxat, qui ut invisam redderent Discipulorum Augustini, id est Catholicorum doctrinam, eam calumniis infamabant. Cujus evidentissimo argumento est, quod Patres ab hac horrenda blasphemia (Deum scilicet prædestinare ad malum) sese contestantur immunes : non essent autem solliciti errorem illum à se amoliri, nisi sibi, tanquam veritatis christianæ defensoribus fuisset impositus : amoliuntur autem, dum dicunt, *aliquos ad malum divinâ potestate prædestinatos esse non solum non credimus, sed etiam si qui sunt, qui tantum malum credere velint, cum omni detestatione illis anathema dicimus. Si qui sunt :* Ergo nullos certos tales tantæ blasphemix sectatores Synodus agnoscebat. Quod idem de Concilio eodem verborum tenore loquuto dicendum est.

Objicies quintò : Hæresim Prædestinarianam proscripserunt Concilium Arelatense XXX. Episcoporum, & Lugdunense. Ergo Prædestinariana hæresis non est commentum à Semipelagianis confictum.

Respondeo, quod sicut hæresis Prædestinariana à Semipelagianis olim conficta est, ut invidiam adversariis, quasi Manichæismum saperent, concitarent : ita ficta Concilia communiscebantur pravæ illæ reliquiæ, ut Pseudosynodos veris Synodis, quibus opprimebantur, opponerent. Hac fingendi arte excelluit Faustus, quem S. Isidorus lib. de viris illustribus, cap. 14. *virum profunda calliditatis* appellat, quemve Cardinalis Baronius *versipellem vulpeculam* nuncupavit.

Ratio

Rationes autem, quibus convincitur, Concilium ullum Catholicum nunquam Arelatis, vel Lugduni esse ad hoc coactum, sunt primò, quia nullus Historicus Orthodoxus, nullus posteriorum sæculorum Pater, nullus alicujus nominis Theologus, præter suspectissimæ fidei Hincmarum & Faustum Semipelagianarum partium caput, Conciliorum illorum vel tenuissimam unquam egere memoriam. Quin Gennadius neutrius Concilii, nec ipse Hincmarus Concilii Lugdunensis recordatus est. Secundò, nulla extant hujusmodi Conciliorum acta ab Ecclesia recepta, & inter vera Concilia recensita. Tertiò, sicut senum castissimam Susanham accusantium impietas contradicentibus sibi utriusque testimoniis revicta est; sic nec Hincmaro, nec Fausto credendum, quorum ille Concilium Arelatense sub Cœlestino Papa celebratum esse ait, Faustus verò longè postea coactum affirmat. Accedit, incredibilem esse Authorum de tempore celebrationis Arelatensis Concilii istius varietatem; nam Hincmaro jussu Cœlestini coactum fuisse post annum 432. placet, Fausto & aliis sub Leontio circa annum 475. celebratum visum est. Baronio circa annum 490. Bino anno 524. Haberto sub Auxanio non ante annum 545. Tertiò: Nulla unquam Catholica Concilia fuerunt, neque esse potuerunt, in quibus hæretica Fausti doctrina probata sit; Concilia enim in Spiritu sancto Congregata, ab Ecclesia præsertim recepta, manifestos errores firmare nunquam solent, nunquam possunt. Testatur autem Faustus de seipso testimonium perhibens, nec timens laudem propriam proprio in ore sordescere, opera sua ab Arelatensi Synodo

Synodo probata, jussu Concilii Lugdunensis ad comprimendos novos emergentes errores esse adaucta, imò & sibi de prædestinatione & gratiæ disputandi & scribendi à Concilio commissam esse provinciam vanissimè effutit. Quartò Pseudo-Arelatense Concilium epistolam Faustii ad Lucidum purum putum Semipelagianismum spirantem, & omnes adversus Augustinum, ejusque discipulos recantatas querelas hominum importunissimi & perfectæ gratiæ defensoribus infensissimi occinit. Ibidem etiam dicitur Lucidi ad Faustum Patrum calculo probata epistola, ubi & Faustii doctrinam nefariam adorat, & de mysteriis prædestinationis & gratiæ, à Catholicis absone, ad Semipelagianos consonè edisserit; imò ibi appertè ait: *Damno illum qui dicit ab Adam usque ad Christum nullos ex gentibus per primam Dei gratiam, id est per legem naturæ, in adventum Christi fuisse salvatos.* Quæ propositio merum Pelagianismum etiam in primo hæresis statu exprimit. Cum ergo a sacrosancta Romana Ecclesia, clavo navis Petri astante Gelasio, Faustii opera proscripta sint, vel nunquam hujusmodi Concilia extitisse, nisi tantum objectivè in intellectu, sicut entia rationis solent, sine dubitatione credendum; vel conventicula iniquitatis; synagogas sathanæ ex Pelagianorum coactis simul reliquiis sese contra Ecclesiam armantibus constata fuisse, nullus negare potest, orthodoxis. Unde & sapientissimus Baronius Faustii mendaciis non adhibendam esse fidem, ad annum 490. verissimè pronuntiat.

Dices cum P. Sirmondo: Etiam si Faustus Semipelagianus fuerit, non tamen continuò in

re historica fides illi detrectanda est ; nam inter Ecclesiasticæ historiæ Scriptores fidem omnem non abrogamus Eusebio Cæsarensi , nec Socrati , nec Sozomeno , propterea quod ille Arianus fuerit , hi verò Novatiani. Ergo nec Faustus , nec Prædestinati Author propterea in re historica rejiciendi veniunt , quia Semipelagianarum hærescon fuligine tincti sunt.

Respondeo hinc potiùs sententiam nostram roborari. Nam tametsi hæreticis historicis in his , quæ ad ipsorum hæresim non pertinent , fides aliqua haberi possit , in his tamen quæ hæresim , quam sectati sunt , quoquo modo concernunt , fidem omnem abrogamus. Et ut in exemplis à Patre Sirmondo memoratis insistamus , quis nescit Eusebio in his , quæ ad Arianos spectant , Ecclesiam nullatenus assentiri ? qua de causa historia Eusebii à Gelasio Papà in Concilio Romano inter apocrypha numerata est , ut refertur Canone *Sancta Romana* , dist. 15. Eandem ob rationem historiam Sozomeni , teste Magno Gregorio libro 7. regi . epist. 31. Ecclesia Romana nunquam recepit , *Ipsam à Sozomeni*) historiam , inquit , *Sedes Apolioli à recipere recusat* , quoniam multa mentitur . Et Theodorum Mopsuestanum laudat , atque usque ad diem obitus sui magnam Doctorem Ecclesia fuisse perhibet . Restat ergo , ut si quis illam historiam recipit , Synodo , quæ pie memoria Justiniani temporibus de tribus capitulis facta est , contradicat ; qui verò contradicere non valet , necesse est ut repellat . Multoties etiam observavit Baronius Hæreticorum in his quæ sectæ suæ opitulantur , fidem esse suspectam. Videbis *tomo 5. ad an. 439.*

Illud etiam à nonnullis eruditè observatum est, quod sicut veritas Religioni Catholicæ eximia est, & veluti ejusdem tessera : sic hæretica perfidia ex patre mendacii diabolo, qui fuit mendax ab initio, enata uni veritati, uni dolo innixa est. Sed inter hæreses, quibus hætenus afflictata Ecclesia est, nullam Pelagiana & Semi-pelagiana mendaciorum præsidia quæsisse magis, avidius arripuisse constantissimum est. Cum enim gratia & veritas per Jesum Christum facta sit, inimici gratiæ continui sunt veritatis hostes. Hinc Pelagium sub mendacii, & æquivocationum latebris latuisse diu, & Patrum sententias declinasse, alibi ostensum fuit. Hinc Augustinus versutas Celestii & Juliani fraudes sæpe deplorat. Hinc Pelagianorum sequaces non paucos Pelagianorum authorum libros Gregorii Nysseni, Ambrosii, Hieronymi, & Augustini operibus, quò nefandarum hæreseon venenum insciis propinaretur, tacitis nominibus inseruisse libro de Scriptoribus Ecclesiasticis Cardinalis Bellarminus admonuit. Hinc tria volumina Pelagianis hæresibus scatentia Sixto Papæ Pelagianorum hosti professo asseruisse, Baronius *tom. 5. ad annum 440.* observavit. Hinc notas in epistolas Pauli Pelagianis doctrinis depravatas, Gelasio Pontifici Pelagianorum, & Semi-pelagianorum acerrimo hosti, ut tam glorioso nomine errores obtruderent suos, attribuisse Cassiodorum *lib. de divinis lectionibus, cap. 8.* commemorat. Hinc acta Concilii Ephesini, quibus Nestoriana cum Pelagiana hydra rescissa est, corrupisse Pelagianos, Magnus Gregorius *lib. 5. Regist. epist. 14. & lib. 6. epist. 31. & lib. 7. epist. 48.* lamentatur. Hinc Cassianus Pelagianis

lagianis erroribus innutritus, Pelagianæ consequutione vel more doctrinæ, quandoque licitum esse mentiri, quandoque mendacium fieri salubre, quosdam etiam per mendacium justificari, & alios per veritatis assertionem peccatum perpetua mortis incurrere, collat. 17. c. 17. scribere non erubuit. Hinc denique Faustus Semipelagianorum primicerius, Deo ipsi, id est veritati per essentiam, pius ausus est ascribere mendacium lib. 2. de lib. arbitr. cap. ultimo, his spurciloquiis: *Optat iudex misericors cælestis decreta consilii pio immutare mendacio, si reus medicinam festinet adhibere peccato.* Quid ergo mirum, si hanc doctrinam ad praxim deduxerint pro domo sua, quò labantem hæreseos suæ causam his artibus sua ethica justificatis juvarent? Quid à mendacii defensoribus sperari potest, aut debet, nisi mendacium? Unde Prosper in præfatione responsionis ad capitula Gallo- rum, & ad objectiones Vincentianas, refert Semipelagianos opera sua opplevisse commentis, contexuisse etiam eos ineptissimarum quarundam blasphemiarum prodigiosa mendacia, eaque ostendenda, & ingerenda multis publicè, privatimque circumtulisse. His erpo consuetis similis nequitix malis artibus, gratuitæ post Augustinum prædestinationis assertores Prædestinatos, vel Prædestinatianos appellarunt; perfectæ gratiæ intrepidos defensores, tanquam facti in vectores, traduxerunt, fictas Synodos fabricati sunt, fictas prædestinatianæ hæreseos à Pontificibus latas censuras comminisci tutum, ex probabili sibi sententia mendacio veniam dante arbitrari sunt.

§. 3.

Prædestinatio hæresis nequam fuit in Gallia per Gotteschalcum renovata.

TRecentis amplius annis, inquit P. Sirmondus, contiguerat in Gallia Prædestinatorum hæresis, cum iterum Caroli Calvi sæculo excitata est à Gotteschalco Monacho & presbytero, binis à Rabano epistolis confutato, unâ ad Nothingum Veronensem Episcopum, alterâ ad Everardum ejusdem oræ Comitem; ab Episcopis deinde Germaniæ in Concilio Moguntino anno 848. ubi ad Hincmarum Rhemensem Archiepiscopum remissus est, proscripto; & in Synodo apud Carisiacum postea à 12. Episcopis habita iterum audito & damnato, ubi & Gotteschalco silentium impositum est, quia sui veneni poculo non paucos inebriaverat, & in erroris insaniam, ut ait Rabanus *epist. ad Hincmarum*, verterat. Errores autem Gotteschalci duo erant præcipuè, quorum alter prædestinationem ipsam spectabat, alter arbitrii libertatem: prædestinatos quippe ad interitum reprobos Gotteschalcus, & necessitatem malè agendi impiis impositam asserbat, quia postquam primus homo libero arbitrio cecidit, neminem nostrum ad bonè agendum, sed tantum ad malè agendum libero posse uti arbitrio affirmabat. Atqui hæc mera est Prædestinatio hæresis. Ergo Prædestinatio hæresim Gotteschalcus instauravit.

Ut

Ut validè hæc obiectio confutetur, ex eaque potius nostra sententia confirmetur, nonnihil de Gottschalcana historia omninò præmittendum est. Gottschalcus natione Germanus, professione Monachus fuit Ordinis S. Benedicti in cœnobio Orbacensi, diœcesis Sueffionensis. Ibi sacris literis operam non impigram dedit, libros sanctorum Patrum, Augustini potissimum opera, teste Vvalafrido Strabone *carmine ad Gottschalcum*, & Lupo Ferrariensi *epist.* 30. sedula lectione revolvit. Ad sacrum deinde Presbyteratus Ordinem à Rigboldo Rhemorum Chorepiscopo quadragenarius promotus est, & circa annum 847. Romam Principum Apostolorum liminum, pietate tunc temporis frequenti, visitandorum gratiâ profectus est. Peractis religiosæ peregrinationis votis, in Galliam revertitur, sed apud Comitem Everardum ob spectabilem pietatis & eruditionis famam diutiùs commorari compulsus est. Inter has moras cum Nothingo Veronensi (vel ut aliis placet, Vercellensi vel Brixienti) Episcopo operosè de prædestinatione juxta mentem Augustini disputavit. Gottschalci doctrinam improbens Nothingus, eum apud Rabanum Archiepiscopum Moguntinum literis accusavit, quem unâ rogavit, ut aliquo opusculo Gottschalcanam sententiam confutaret. Nothingo morem gessit Rabanus; nam & Gottschalcum in epistola ad Nothingum refellere conatus est, & Everardum aliis literis monuit, ut Gottschalcum domo sua expellat, ni eum ab errore revocaret. Consilium porrò Rabani improbavit Ecclesia Lugdunensis *libro de tribus epistolis*, ad tertiam, quia assumpserat non necessariam, nec ullatenus ad rem,

Porro in illis duodecim Episcoporum pro civilibus Regis negotiis coactorum comitiis Gottschalcus damnatus est, tum quod sacrosanctum Sacerdotalis ministerii officium irregulariter à Chorepiscopo usurpasset; tum quod eo officio in cunctis moribus, ac pravis actibus, atque perversis doctrinis abusus fuisset; tum quod & Ecclesiastica, & civilia negotia contra propositum & nomen Monachi conturbare contemnens, jura Ecclesiastica præsumpsisset. Propter quæ capita exauthoratus, ac penitus interdictus, & durissimis verberibus castigatus, & in carcerem Altumvillarensis Rhemensis diœcesis reclusus est. Hanc sententiam, sententiæque executionem *inauditum irreligiositatis & crudelitatis exemplum*, Ecclesia Lugnunensis libro de tribus epist. ad primam, appellavit. De illa etiam tyrannica in carcere detentione sic eadem Ecclesia loquuta est: *Illæ ejusmodi miserandæ hominis tam longa & inhumana in ergastulum per tot annos damnatio, aliqua, ut credimus, compassionis benignitate, & consolatione fuerat temperanda, vel etiam removenda.*

Iniquitas autem sententiæ clarè innotescit; tum quia morum pravitas, & nimix civilium negotiorum curæ, vel ministerii sui abusus nunquam à suis Superioribus, nunquam à proprio Episcopo accusatus est. Et certè cum Rotaldus Sueffionum Episcopus, & legitimus Gottschalci pastor ejusdem ordinationem à Chorepiscopo more illius temporis factam ratam haberet, non potuerunt alii ipse absente irritam facere. Tum quia oppresso Gottschalco accurrerunt viri Catholici. Ratramnus enim Corbeienſis Monachus epistolâ ad amicum misit

Starum provinciarum Episcopis constans, ubi Synodi Valentinae decreta firmata sunt. Quæ duo Concilia Ecclesia ut vera, legitima, & in Spiritu sancto congregata semper agnovit, utpote à Nicolao Romano Pontifice approbata, ut in Annalibus Bertinianis his verbis habetur: *Nicolaus Pontifex Romanus de gratia Dei & libero arbitrio, de veritate gemina prædestinationis, & sanguine Christi, ut pro omnibus credentibus fusus sit, fideliter confirmat, & catholicè decernit.* Qui Summus Pontifex Hincmarum ad se semel & iterum adversùs Gotteschalcum scribentem contempsit, sed jussit Gotteschalci causam à Legatis suis judicari.

Noverat enim oculatissimus Christi Vicarius, non alia Gotteschalco opponi, quàm quæ dudum intrepidis Augustini discipulis, gratuitæ prædestinationis, & perfectæ gratiæ defensoribus, à Pelagianorum reliquiis per calumniam, & inanes consequutiones objecta fuerant; ejusque doctrinam in proprio authoris sensu, & ab Hincmari calumniis vindicatam, fuisse sæpe & sacrorum Conciliorum canonibus, & Apostolicæ Sedis diplomatis adstructam. Noverat ex utraque Gotteschalci fidei professione, docuisse eum, non uti imponebat Hincmarus, Deum impios prædestinasse ad culpam (nullus enim id dixerat, nec dixisse invenitur, ut ait Ecclesia Lugdunensis memorata;) sed Deum æterno suo, justoque judicio prædestinasse, seu decrevisse eos inferni supplicio puniendos, quos veraciter omninò proprio vitio impios, & iniquos futuros, & in suis impietatibus, atque iniquitatibus perseveraturos præscivit. Quod & Hincmarus veritate coactus *lib. de Prædest. cap. 15,*

agnovit his verbis : *Dicunt Gotteschalcus , & ejus affines, Prædestinavit Deus reprobos ad interitum, non ad peccatum.* Noverat non negasse Gotteschalcum , Deum velle omnium salutem, & Christum pro omnibus mortuum esse ; sed id juxta expositiones Augustini fuisse interpretatum, solumque contendisse, Deum speciali dilectione electos prosequi, speciali ratione eorum salutem velle, nec esse æqualem, vagam & indifferentem, uti Semipelagiani docebant, omnium peræquè salvandorum voluntatem. Noverat Hincmarum , & sequaces non amore veritatis, sed triceis, & cavillis Gotteschalcum impetivisse; cùm & in illo propositionem hanc Catholicam, *Te Trina Deitas*, ab Ecclesia Romana in solennibus officiis receptam carperent. Noverat non dixisse, nec unquam voluisse eum dicere, liberum arbitrium ad malum, uti calumniabatur Hincmarus, necessitari, sed hominem sine gratia boni nihil posse. Testatur enim Ecclesia Lugdunensis laudata *libr. de trib. epist. ad primam*, hoc genus erroris (scilicet hominem non posse uti libero arbitrio nisi ad malum) *nec apud hæreticos, nec apud quemquam Catholicorum se cognovisse, vel audivisse : ita ut etiam de isto (Gotteschalco) nobis hoc incredibile videatur.* Unde libro de veritate Scripturæ sic concludit : *Videtur nobis sine dubio, quod illa quæ de divina prædestinatione dixit, juxta regulam catholica fidei vera sint, & à veridicis Patribus manifestissimè confirmata, nec ab ullo penitus nostrum, qui Catholicus haberi vult, respicienda, sive damnanda.* Et ideo in hac re dolemus, non hunc miserabilem (Gotteschalcum,) sed Ecclesiasticam veritatem esse damnatam. Unde passim
cadem

eadem Ecclesia ait, in omnibus Gottschalci sensibus & veram omninò, & salubrem intelligentiam esse: eum Beatissimi Augustini ab omni semper Ecclesia venerabiliter recepti, & usque in finem sæculi recipiendi sensum fuisse sequutum. Cujus veridicum sensum non oportuit sub persona alicujus hominis à Catholicis Dei Sacerdotibus condemnari, ne jam non iste, qui errare putatur, sed ille potiùs, cujus auctoritatem sequitur, hæreticus esse judicetur. Ex quibus omnibus liquidò constat, Gottschalcum non Prædestinarianæ hæreseos instauratorem, & multò minùs fatorem, sed Augustinianæ, Catholicæque doctrinæ strenuissimum defensorem, pro justitia, pro veritate, pro gratia persecutionem passum, & patièdo immortuum.

R E F L E X I O.

Ex his, quæ tota hac appendice demonstravimus, gemina ad componendos mores confectaria derivare est. Primum: Si tot, & tanta hæreseon portenta non solùm Gottschalco ab Hincmaro, sed etiam veris Augustini discipulis à Fausto, & ipsi quoque Augustino à Semipelagianis, nihil tamen probationis præter manifestas calumnias afferentibus, collata sunt, vide quàm periculosum sit temerè de aliis judicare, malè de aliis loqui, illumque nocentem, vel hæreticum asserere, nisi quem nocentem, quemve hæreticum certò perspexerimus. Vide quo in salutis discrimine & illi versentur, qui tam faciles mendaciis, & calumniis aures præbent. Vide tandem quàm luxurians, quàm serpens sit maledicentiæ crimen, quàmve singularis sit con-

tagio sceleris hujus ab uno profecti, latissimè manantis, quod & viventibus, & mortuis officit, & non solum maledicum, sed & audientem, & omnes ad quos pervenerit, interimit. *Ferit charitatem in omnibus, qui se audiunt lingua maledica*, inquit Bernardus serm. 24. in Cant. & *quantum in se est, necat funditus, & exinguit. Non solum autem, sed & in absentibus universis, ad quos volans verbum, per eos qui praesentes sunt, venire contigerit, ut brevi ingentem multitudinem animarum velociter currens sermo tabe malitia hujus inficere possit.*

Secundum, nec minoris momenti confectarium est, cavendum omnino à viris, etiam pietatis speciem habentibus, dum ad stabiliendam hæresim, quam sectantur, viris Catholicis hæresis notam recriminando inurunt. Nam & Semipelagiani tam spectabili doctrina, tam præstanti in speciem pietate præditi erant, ut de illis in sua ad Augustinum epistola hæc Prosper literis commendavit: *Ad auctoritatem talia sentientium non sumus pares, quia multum nos & meritis antecellunt, & aliqui eorum adepto nuper summo Sacerdotii honore supereminent: nec facile quisquam præter paucos perfecta gratia intrepidus amatores, tantis superiorum disputationibus ausus est contraire: ex quo non solum his, qui eos audiunt, verum etiam ipsis, qui audiuntur, cum dignitatibus crevit periculum, dum & multos reverentia eorum an: inutiles cohibet silentio, aut incuriosos ducit assensu: & saluberrimum ipsis videtur, quod penè nullius contradictione reprehenditur.*

Gravius veritati ab speciosis piis, quam ab apertis impiis dispendium imminet. Unde in

iis audiendis, in eorumque libris lectitandis, teste Gelasio *lib. de vinculo anathematis*, illud Apostolicum 1. *Thessal. 5.* servandum est: *Omnia probate; quod bonum est, tenete.* Claret id exemplo Fausti Rhegiensis, magna sanctimonie specie illustris, qui ex Abbate in Episcopum assumptus, nihil de antiqua Monasterii austeritate remisit; & teste Sidonio Appollinari *lib. 9. epist. 7. nihil ab Abbate mutatus, cum nova dignitatis obtentu rigorem veteris disciplina non relaxavit.* Justo judicio accidere multis in libris docet Augustinus, viros insignes, dum sibi hoc ipsum, quod in se eminere cernunt, Deo ingrati non tribuunt, à regia veritatis via declinare. Quo superbie vitio à divinæ stabilitate substantiæ repulsi *magni quidam viri ad idololatriæ dedecus defluerunt,* inquit *lib. de spir. & lit. cap. 11.* Et libro 5. *cont. Julian. cap. 3.* ait: *Quando sibi homo multum placeat, & de sua virtute confidit, si traditur in desideria superbiæ suæ, tanto amplius augetur hoc malum. quanto magis ei cupiditates ceteræ cesserint.* Et *serm. 13. de verb. Apost. cap. 9. & 10.* ait: *Ergone ad carnis actiones mortificandas de spiritu tuo presumas, & superbiâ pereas; & tibi superbo resistatur, non humill gratia concedatur? Deus enim superbis resistit, humilibus autem dat gratiam. :: Di-*

cturus eras: Hoc potest voluntas mea, hoc potest liberum arbitrium meum. Quæ voluntas? Quod liberum arbitrium? Nisi ille regat, cadis; nisi erigat, jaces. Quomodo ergo spiritu tu, cum audias Apostolum dicentem: Quotquot enim spiritu Deo aguntur, hi filii sunt Dei: tu te vis agere, à teipso vis agi ad actiones carnis mortificandas? Quid tibi prodest, quia non eris Epicureus, &

eris Stoïcus ? Sive Epicureus eris, sive Stoïcus eris, inter filios Dei non eris. Idem ipsum præclaris versibus tradit Prosper carmine de ingratiss, cap. 37. Quos suprà in hoc tractatu retulimus.

Id ipsum innumeris aliis exemplis confirmari, illustrarique potest. Quis nescit sanctissimis Monachis Ægyptiis, ipsique totius sanctitatis archetypo, & eloquentiâ nulli secundo Chrysostomo, specioso fidei umbone à Theophilo Alexandrino innumeras clades obtigisse? Videtis recentem Chrysostomi vitam Gallico idiomate editam, omnium manibus exceptam, omnium ore laudatam, ubi stylus respondet argumento, id est vir aureus elegantia, eloquentia, & pietate super aurum & topazion pretiosa depingitur. Quia nimirum, ut benè in suo Commonitorio scripsit Vincentius Lyrinensis, *in Ecclesia Dei tentatio est populi error Magistri, & tanto major tentatio, quanto ipse est doctior qui errat.* Quod confirmat exemplo Origenis & Tertulliani. Nemo enim penè est, qui Origenis tentationi valeat comparari, in quo plura adeò præclara, adeo singularia, adeo mira extiterunt, ut inter initia habendam cunctis assertionibus ejus fidem quivis facilè judicaverit. Nam si vita facit auctoritatem, magna illi industria, magna pudicitia, patientia, tolerantia: si genus, vel eruditio, quid eo nobilius, qui primùm in ea domo natus est, quæ est illustrata martyrio? Deinde pro Christo non solum patre, sed omni quoque facultate privatus, tantùm inter sanctæ paupertatis profecit angustias, ut pro nomine dominicæ confessionis sæpius afflictus sit. Neque verò hæc in illo sola erant, quæ cuncta postea

postea tentationi forent , sed tanta etiam vis ingenii tam profundi, tam acris, tam elegantis, ut omnes multum , longèque superaret ; tanta doctrinæ ac totius eruditionis magnifica copia, ut pauca forent divinæ , penè fortasse nulla humanæ Philosophiæ , quæ non penitus assequeretur. Eloquentia porro ejus tam amœna fuit, tam læta , tam dulcis oratio , ut ex ore ipsius non tam verba, quàm mella fluxisse viderentur, quibus & persuasum difficilia disputandi viribus elimpidabat ; & factu ardua , ut facillima viderentur , efficiebat : nec argumentorum tantummodò nexibus assertiones texebat suas, sed nemo unquam Doctorum fuit , qui pluribus divinæ legis exemplis uteretur. Tantæ doctrinæ plenitudini insignium discipulorum felicitas respondebat ; innumeri enim ex sinu ejus Doctores , Sacerdotes , Confessores , & Martyres exierunt. Unde tanta illius apud omnes admiratio, tanta gloria , tanta gratia fuit, ut ad eum ex ultimis mundi partibus viri religiosissimi advolarent, quem ut Magistrum , & penè ut Prophetam venerabantur, illaque utebantur, teste præfato Vincentio , sententiâ , se cum Origene errare malle , quàm cum aliis vera sentire. Et tamen ille idem Origenes tantus , ac talis , qui tot unus scripsit , quot vix multi legendis libris sufficiant ; tam capax , ut septem amanuensibus scripta dictaret ; tam promptus, ut anno decimo octavo Scripturas interpretatus , orbi docendo tunc esset idoneus , cùm alii manuum ferulæ nondum subducere potuerunt : ille, inquam, qui inter prima Christianæ Religionis decora reponeretur, nisi magnas dotes majoribus sordibus conspurcasset , dum suo ingenio plus iusto im-


dulsiſſet, dum ſe cunctis plus ſapere præſumpſit, conſiliis quidem divinis ipſe ſervivit, multa, multoſque docens; ſed tamen æquiſſimis Dei, Eccleſiæque judiciis proſcriptus eſt malè ſcribens, quia Deus bonorum noſtrorum non indigens, more pædagogi, qui virgis utitur, quas deinde poſt emendatum, eruditumque diſcipulum in ignem mittit, viros præſtantes in electorum bonum cooperantes adhibet, ſed collatis donis abundantes floccifacit, & in tenebras projicit exteriores.

Idem in Tertulliano Latinorum facilè Principe claruit. Eo nullus doctior, nullus in divinis, atque humanis exercitior exitit. Hujus oratio tanta rationum denſitate conſerta, tanto pondere firmata eſt, ut ad conſenſum ſui quos ſuadere non poteſt, compellat: hujus quot penè verba, tot ſententiæ; quot ſententiæ, tot victoriæ. Sed heu! Ille idem Tertullianus, poſt debellatos Appelles, Praxeas, Hermogenes; poſt devictos Judæos, Gentiles, Gnoſticos; poſt infidelium blaſphemias multis ac magnis voluminum ſuorum molibus velut quibuſdam fulminibus everſas, quia catholici dogmatis, id eſt univerſalis, ac vetuſtæ fidei parum tenax fuit, quia Eccleſiæ Chriſti, quam initio defenderat, indivulſè non adhæſit; quia exſurgentes in Eccleſiam novellas Montani furias, & inſana fanaticarum mulierum novitii dogmatis ſomnia veras eſſe prophetias aſſeveravit, fecit ad extremum, ut B. Hilarius in cap. 3. *Matth.* ſcripſit, ut ſequenti errore dextraverit ſcriptis probabilibus auctoritatem.

Non me latet pro Origene & Tertulliano multos apologias edidiſſe, nihil varia Eccleſiæ

in personas lata judicia veritos, quia in quæstionibus facti errare Ecclesiam posse nemo eruditus ignorat. Attamen etsi suam illis apologiis in mortuos charitatem demonstrarint, ambiguum tamen eorum fidem, incertamque proinde salutem liquerunt. Ex incerta porro eorum salute certum hunc fructum eliciamus, magnos, speciosæ famæ, & singularis doctrinæ viros yix sibi peccare solis, sed alios ad se errando pertrahere, eoque periculosius, quo ipsi meliores habentur, ut solet ex optimo pessima esse corruptio. Facile enim ipsis vel sagacissimis error placere incipit, cum errori affectata, vel existimata errantis sanctimonia pretium addit.





DISSERTATIO IV.

*De gratia habituali animam sanctificante, & justam reddente ;
& de merito Iustorum.*

PRÆCIPUUM divinæ gratiæ opus est justificatio impii, & animæ sanctificatio. Neque enim, ut ait Augustinus epist. 107. gratia Dei justitiam in alicujus corde invenit, sed facit. Et certè justitiam & sanctitatem nec sibi asciscere valet, nec perditam ex seipso recuperare infirmus homo potest. Crearis, sanaris, salvaris, inquit lib. de grat. & lib. arb. Doctor Mellissus: quid horum tibi ex te, homo? Quid horum non impossibile libero arbitrio? Nec creare, qui non eras; nec justificare peccator, nec mortuus poteris teipsum resuscitare. Quid enim? Agnoscis creantis potentiam, salvantis gratiam, & sanantis ignoras justitiam? Propter hoc & David ingeminans: Non nobis, inquit, Domine non nobis, sed nomini tuo da gloriam; quid utramque à Deo stolam, & justitiā scilicet expectaret, & gloria.

Et ratio est aperta. Etenim ut profundè de more argumentatur S. Thomas 1.2. q. 88. art. 1.
pecca

peccatum mortale tollit principium vitæ moralis, sicut mors tollit principium vitæ animalis; principium enim vitæ moralis est finis animalis, unde voluntas se movet ad media. Ergo remoto ordine ad finem, non remanet principium intrinsecum, quo reparetur ordinatio circa ea quæ sunt ad finem. At per peccatum mortale miser homo suicida extinguit ordinem ad finem ultimum verum, Deum scilicet: ergo post peccatum non potest à peccato resurgere, nec sibi mortuo vitam dare, sed potius à vitiis in vitia ruet, nisi peccata citâ deleat pœnitentiâ. Vix ergo, ac ne vix quidem de gratia sanctificante agere possumus, quin de justificatione unâ disputemus.

C A P U T I.

Gratia sanctificantis, & justificantis essentia, proprietates, & lepôres.

INumeræ à Theologis de gratia & justificatione controversiæ excitantur, quibus splendidissima totius Theologiæ materies, & Christianismi gloria ac character infuscat magis quàm illustretur. Nullas Theologo dignas, Deo annuente, prætermitemus; sed omnes ex ipsa gratiæ notione facili negotio deducemus, & penetratâ hujus divinæ qualitatæ essentiâ, cæteras de sanctificatione, & justificatione quæstio

quæstiones sponte sua fluxuras esse spondeo.

S P E C U L A T I O I.

Gratia sanctificans est qualitas divinitus infusa substantiam animæ immediate afficiens, & formaliter exprimens naturam divinam, ut natura est, non verò ut est actus purus, & ens per essentiam.

HUic asserto confirmando innumera proferri possent sacrarum literarum, Patrumque testimonia; sed ea inter explicandam unamquamque partem, atque in sequentibus speculationibus referemus.

Explicantur itaque, & probantur singulæ partes. In primis ergo gratia sanctificans dicitur qualitas, realis scilicet & physica. Non enim audiendi sunt hujus temporis hæretici, qui putant peccata hominum nullâ internâ gratiæ infusione, sed unâ justitiæ Christi imputatione deleri, hominemque justum evadere, non quâ interiùs renovetur justitiâ, sed externâ Christi sanctitate, quâ veluti tegitur, & vestitur.

Verùm hunc errorem proscripsit sacra Tridentina Synodus sess. 6. de justif. cap. 7. ubi declarat unicam formalem causam justificationis
homī

hominum esse justitiam Dei, non quâ ipse justus est, sed quâ nos justos facit; *quæ videlicet ab eis donati renovamur spi ita mentis nostra, & non solum reputamur, sed verè justî nominamur, & sumus, justitiam in nobis recipientes.* Hac de causa *can. 11.* anathemate percutit dicentes, *hom nes justificari solâ imputatione justitiæ Christi, exclusâ gratiâ, & charitate, quæ in cordibus eorum per Spiritum sanctum diffunditur, atque illis inhaeret; aut etiam gratiam, quâ justificamur, esse tantum favorem Dei.* Eandem etiam ob causam patris anathematis fulmine percellit eos, qui ex eodem negatæ gratiæ interioris, & permanētis principio arbitrati sunt, peccata eorum, qui justificantur, nullâ verâ & physicâ mutatione deleri, sed solâ Christi justitiâ veluti amictu occultati. Si quis dixerit, inquit Concilium sess. 5. *can. 5. peccatum originale non verè tolli per gratiam Christi, sed tantum radi, & non amplius imputari, anathema sit.*

Id ipsum satis apertè tradunt Scriptura & Patres iis omnibus locis, quibus tradunt gratiam, charitatem, & virtutes infusas esse *pretiosa dona, 2. Petr. 1. Diffundi in cordibus nostris per Spiritum sanctum qui datus est nobis, Rom. 5. Esse id quo mundantur peccata, & si fuerint sicut co-cinum, quasi nix deâ'bantur. Psalm. 50. Ezechielis 36. & Isaie 1. Quæ omnia probant gratiam justificantem esse aliquam entitatem, seu qualitatem realem, & non externam duntaxat denominationem, quæ non diffunditur in corde, nec causare potest effectus reales munditiei interioris. Maximè quia, ut ait Discipulus amoris, per gratiam & charitatem non solum denominamur, sed reapse sumus filii Dei.*

Dei. *Videte*, inquit epist. 1. cap. 3. *qualem charitatem dedit nobis Pater, ut filii Dei nominemur & simus*. Idem etiam convincunt illa omnia testimonia, quibus dicitur, per gratiam *eorum mundum creari in nobis*. Psalm. 50. *justos creari in Christo Iesu*. Ephes. 2. *esse novas creaturas*. 2. Cor. 5. & Gal. 6. *& abundantiam gratiae, & donationis, & iustitiae accipere*. Rom. 5. Si autem per gratiam nihil in anima efficiatur, nova illa creatura erit ens rationis; licet enim gratia secundum probabiliorem sententiam, è nihilo subjecti non producat, dicuntur tamen per eam homines spirituales creari, quia in novo esse constituuntur ex nihilo, id est nullis praecedentibus meritis. Et certe nihil mirum, si Calvinistae nostri totum gratiae statum, quo Christianismus constat, ad denominationes, nihilumque redegerint, postquam divinissimum Eucharistiae sacramentum contra apertissima veritatis verba ad inanes figuras, ad tropos, & ut novissime addit Minister Claudius satis notus, & alibi confutandus, ad mysticas inundationes, id est ad nugas, fabulas, & mera exerantantis imaginationis deliramenta revocent. Quid est hoc, quaeso? quid est hoc, nisi Religionem, quam foris destructis omnibus caeremoniis vastarunt, delere intus, & exinanire usque ad fundamentum in ea? Sed sinamus gentem illam mentem suam pascere chimæris, nos ad solida progrediamur, solida quaeramus, & cum Augustino lib. de spirit. & lit. cap. 37. dicamus: *Charitas diffunditur in cordibus nostris, non quâ nos ipse diligit, sed quâ nos facit dilectores suos; sicut iustitia Dei ita dicta est, quâ iusti ejus munere efficimur*. Et lib. 1. contra

duas

duas epist. Pelagian. cap. 13. *Dicimus*, inquit, *baptisma omnium dare indulgentiam peccatorum, & auferre crimina, non radere, neque radices peccatorum in mala parte teneri, quasi rasorum in capite capillorum, unde crescant iterum refecanda peccata.*

Ratio verò est, quia per gratiam justifican-tem homo fit objectum divinæ dilectionis, cum ut nomen ipsum sonat, per ipsam sit Deo gratus: per illam etiam evahitur homo ad ordinem supernaturalem, in quo possit divina agere, & pati; ideo namque dicitur homo per gratiam novæ legis in Baptismo regenerati, quia novum esse sortitur, & in novitate vitæ ambulare tenetur, id est supernaturales actiones elicere, quibus beatam visionem omnes naturæ creatæ, aut possibilis vires excedentem consequatur. Atqui dum homo fit objectum divinæ dilectionis, necessariò alicujus realis doni infusione mutatur; neque enim sterilis est divina dilectio, vel objectum amoris sui in subiecto, sicut creatus amor supponit, sed facit, infundens, ut loquitur S. Thomas, & creans bonitatem in rebus. Principium etiam operum supernaturalium non minus reale esse debet, quàm principium operationum naturalium; nec minus permanens, ut in hoc ordine homo connaturaliter; suaviter, & expeditè valeat operari; non enim deterioris debet esse conditionis ordo gratiæ, quàm naturæ. Ergo gratia est aliquid reale in animam infusum, quo & speciale divinæ dilectionis objectum evadimus, & ad implenda supernaturalia vitæ christianæ officia instrui-mur; quòve filii Dei adoptivi, non ex sanguinibus, neque ex voluntate carnis, sed ex Deo
nati

nati, divinæ filiationis signatam similitudinem recipiunt. *Hoc enim plus habet, ut docet S.Thomas 3. p.q.23. art.1. adoptatio divina, quàm humana, quia Deus hominem, quem adoptat, idoneum facit per gratia munus ad hereditatem cœlestem percipiendam; homo autem non facit idoneum eum, quem adoptat, sed potius eum jam idoneum eligit adoptando.*

Confirmatur, & illustratur: Deus per gratiam est speciali modo in anima iusti, tanquam objectum, quo anima casta interiùs fruitur & pascitur, juxta illud à Veritate prolatum oraculum: *Si quis diligit me, sermonem meum servabit, & Pater meus diliget eum, & ad eum veniemus, & mansionem apud eum faciemus.* Ita ut si per impossibile Deus non esset immensus, & in Empyreo duntaxat commoraretur, sedem sibi solitam, quàmlibet sibi gratam, desereret, ut ad justum sibi gratiorem transmigraret, ut alibi dum de divinis missionibus, demonstravimus. At Deus, sicut ibi non est ubi nihil producit, quàm de causâ testantur Patres aliàs producti, Deum ante orbem conditum fuisse sibi mundum, locum, & omnia, in se solo habitasse, quia præter ipsum nihil erat; ita Deus non est speciali modo præsens, nisi ut aliquod speciale donum secum invehat; Deus namque, utpote à rebus omnibus absolutus & independens, non adest rebus, nisi quatenus illas à se dependentes facit, sibi unit, & omnia portat verbo virtutis suæ. Ergo sicut ideo Deus dicitur præsens singulari modo in Christo, quia subsistentiam Verbi sacræ humanitati verè, realiter, & ut loquitur Apostolus, corporaliter communicat; sicut Deus est speciali ratione. in
Beatis,

Beatīs, quia illos lumine gloriæ realiter perfundit, quo Deum ut in se est, intuentur; sicut est in omnibus rebus generali præsentia, quia ab ipso omnia recipiunt esse, & operationem: ita non est speciali modo Deus Sanctis illapsus, nisi quia aliquod supernaturale donum illis largitur, quod gratiam dicimus sanctificantem. Quæ omnia illi fundatissimo principio innituntur: Deus rebus præsens non est, eas nisi ut perficiat; subindeque cum sit quadruplex perficiendi genus, nempe quo creat & conservat, quo sanctificat justum, quo beat comprehensorem, quo sacram humanitatem ad esse personale evehit; hinc planè colligitur, totam mundi universitatem quadruplici ordine constare, naturæ, gratiæ, gloriæ, & unionis hypostaticæ, quadruplici Dei præsentiæ rerum omnium operatrici correspondente.

Argumenta Calvinistarum è detortis quibusdam Scripturæ locis deprompta nullius momenti sunt. Quod enim sacræ literæ beatos illos dicant, quorum tecta sunt peccata, quibus non imputantur scelera, & operiuntur omnia peccata eorum, dissimulanturque propter pœnitentiam, non propterea peccata manere volunt externè duntaxat indulgentiâ tecta; & veluti inducta. Nam in iisdem locis non solum peccata tegi, sed reapse remitti expressissimè dicitur: *Beati quorum emisse sunt iniquitates*, inquit Psalmographus Psalm. 31. *& quorum tecta sunt peccata. Remissi iniquitatem plebis tue*, addit Psalm. 84. *operuisti omnia peccata eorum*. Ubi & peccata tegi simul, & remitti dicuntur, quia ut rectè ibidem exponit Augustinus, non eatenus in justificato cooperiuntur peccata, quasi
ibi

ibi sint , & vivant ; cœlestis enim medicus tegit & curat. Itaque sicut lumen dicitur tegere tenebras aëris , quas suâ præsentia fugat ; sicut cataplasma à perito medico vulnere adhibitum pus simul tegit , & exprimit , plagamque persanat ; sic divinæ gratiæ lumen peccatorum caliginem operire dicitur , dum animam cœlesti claritate illustrat , & pharmacum divini medici non solum infirmitates tegit , sed sanat ; quia non venit tegere quod patebat , sed sanare quod perierat.

Nec hæc nostra doctrina eminentiæ justitiæ , & plenitudini satisfactionis , & sanctitatis Christi derogare credenda est , ut hæretici garriunt. Nonne enim justitiæ & meritis Christi gloriosius & honorificentius est , si virtute illorum non solum manentia peccata velentur , sed prorsus deleantur , ita ut teste Isaia cap.1.*Si fuerint rubra veluti vermiculus , quasi lana alba erunt ?* Quid ad gloriam vulnere Christi defendendam , evolvendamque splendidius , vel magnificentius dici potest , quàm ex illis pretiosa illa dona affluenter derivari , quibus filii Dei & nominamur , & sumus , consortesque divinæ naturæ evadimus ?

Est ergo Christus justitia nostra , virtus nostra , sanctificatio nostra , quin spes , gloria , amor , vita , & resurrectio nostra ; sed quid inde , vel quid tum ? Si Apostolus omnibus omnia factus est , quia in omnium sese fundebat affectus , quidni Christus erit nobis omnia , à quo , per quem , & in quo habemus omnia ? Ipse ergo justitia nostra est , qui pro nobis satisfecit , vimque satisfaciendi bonis nostris operibus suâ gratiâ impertit. Nostra est justitia Christi eo modo,

modo, quo lux solis nostra est, nempe ut causa universalis, cujus vis major, minorve recipitur pro eo ut subjectum magis, minusve disponitur, pro eoque ut causæ adjuvantes majus, minusve opis ferunt ad effectum. Sicut enim in natura causa prima secundas non excludit, sed eas in consortium suæ operationis vocat; ita in his quæ supra naturam sunt, Christo ita vim principalem tribuimus, ut causas adjuvantes, & proximas Christo cooperantes non negemus. Eo enim vis & potestas Salvatoris præclariùs eminet, quo hominem sibi magis similem efficit, illique largitur non modò ut sit, sed ut causa etiam sit per gratiam suam, cujus continenti influxu semper eget.

Gratia divinitus infunditur.

Secunda speculationis pars causam gratiæ effectricem tradit, & usque adeò veram esse contendunt post Angelicum Doctorem nostri Thomistæ, ut credant implicare contradictionem, dari ullam aliam à Deo causam, quæ possit gratiam per modum causæ principalis producere. Et rationum momenta ad hunc discursum compendiosè revocantur. Gratia habitualis, ut postea dicemus, est formalis naturæ divinæ participatio, quâ sancti constituuntur filii Dei, evaduntque objectum Deo gratum, & dilectum; quâ ad illos mittitur Spiritus sanctus, totaque ipsa Trinitas animæ sanctæ illabitur. Unde tam frequenter Scriptura monet, quod gratia est *semen Dei*, 1. Joan. 3. & quod *voluntate genuit nos verbo veritatis, ut simus initium aliquod creatura ejus*, ut dicitur Jacob. 1. Quæ genera-
tio

tio spiritualis , quâ fit nova creatura , à divina, eademque gratuita voluntate proficiscitur ; unde & attribuitur Spiritui sancto , qui per voluntatem intra Deum procedit, juxta illud : *Charitas Dei diffusa est in cordibus nostris per Spiritum sanctum , qui datus est nobis.* Atqui repugnat participationem divinæ naturæ , quæ omnem aliam excedit , produci nisi ab habente talem naturam , cùm nullum agens principaliter producere possit , nisi solam naturam propriam , in qua sibi assimilare effectum conatur ; repugnat aliquid fieri Deo gratum & dilectum , nisi per Dei voluntatem & dilectionem ; repugnat aliquem fieri filium Dei , nisi Deo adoptante , & volente spiritalem hominem generare , in illumque semen spiritale , quod est gratia , emittere : sicut semen naturale non potest ab alio semine semel producto derivari , & propagari , sed necessario debet à causa principali effluere , cui terminus productus assimilatur ; repugnat Spiritum sanctum ab ulla creatura posse mitti , solus namque Deus potest personam divinam mittere , juxta illud Augustini lib. 15. de Trinit. cap. 10. *Quomodo Deus non est , qui dat Spiritum sanctum ?* Denique repugnat Sanctissimam Trinitatem ab ulla posse creatura donari , & in cor humanum speciali præsentia transfundi. Ergo gratiam sanctificantem ab ulla creatura principaliter produci impossibile est , & ut ait S. Thomas lib. 4. cont. Gent. cap. 17. *Adoptare in filios Dei non potest esse opus alterius , nisi Dei.* Verè ergo diximus , gratiam esse qualitatem divinitus infusam. Quod & Scripturæ attestantur , Rom. 15. *Charitas Dei diffusa est in cordibus nostris , per Spiritum sanctum.* Psalm. 83. *Gratiam , & gloriam*

gloriam dabit Dominus. Job 14. Quis potest facere mundum de immundo conceptum semine? Nonne tu qui solus es? Unde Trident. sess. 6. cap. 7. docet causam justificationis efficientem esse Deum misericordem; meritoriam autem, dilectissimum unigenitum suum Dominum nostrum Iesum Christum.

Dices: Homo iustus quotidie producit actus supernaturales fidei, spei, charitatis; quidni ergo gratiam sanctificantem producere poterit, gratiâ præsertim abundantiori ornatus? Cur potius unum effectum supernaturalem, quàm alium efficere potest? Quæ disparitas?

Respondeo hominem gratiâ habituali instructum, vel auxilio actuali roboratum, posse in actus supernaturales prorumpere, illosque per modum causæ principalis producere; quia supposito principio supernaturali, potentiam habet quadantenus connaturalem ad eliciendos actus; qui cum sint vitales, non possunt ab intellectu, & voluntate non procedere per modum agentis præcipui. At verò gratia habitualis nullam in subjecto potentiam connaturalem supponit, sed solam obedientialem, quæ nulli agenti creato, sed soli Deo subicitur. Potest ergo homo habens gratiam elicere actus supernaturales, quorum habet in se connaturale principium; sed nequit gratiam in aliud subjectum propagare, quia non potest nisi in potentiam naturalem illius operari. *Gratia*, inquit profundè de more Angelicus Præceptor quæst. 27. de verit. art. 3. *est quoddam perfectio elevans animam ad quoddam esse supernaturale; nullus autem effectus supernaturalis potest esse ab aliqua creatura, duplici ratione. Primò quidem, quia ejus solius est*

est rem ultra statum naturæ promoverè, cuius est gradus naturæ statuere & limitare; quod solius Dei constat esse. Secundò, quia nulla virtus creata agit, nisi præsuppositâ potentiâ materiæ: potentia autem naturalis creatura non se extendit ultra perfectiones naturales; unde nullam supernaturalem operationem aliqua creatura efficere potest (id est quæ in subiecto nullum habet principium connaturale; nam operationes supernaturales iustus elicit, supposito habitu supernaturali;) & inde est, quod miracula solâ virtute divinâ agente fiunt, quanvis ad miraculi operationem aliqua creatura cooperetur, vel orando, vel qualitercumque aliter ministerium adhibendo: & propter hoc nulla creatura effectivè gratiam causare potest. Quomodo autem Christus Dominus sit causa gratiæ, in materia de Incarnatione operosiùs exponemus.

Gratia est formalis naturæ divinæ participatio, & quomodo?

Hæc tertia pars eo accuratiùs explicanda est quo veritatem continet, quæ totius Christianismi medulla est & gloria, ac fermè infinitam declarat Christiani dignitatem, quâ nedum animalibus, sed & Angelis in ordine naturali constitutis immensum antecellimus; quâ filiorum Dei iuribus donamur; quâ ad sanctitatem Protoparentis peccato amissam reditum obtinemus post repulsam Angelorum; quâ à iugo legis in libertatem filiorum Dei asserimur, ab exilio ad patriam revocamur, ab umbra figurarum ad lucem rerum migramus, & post
speciem

spem bonorum, eorum usurâ, & beatissimâ copiâ porimur.

Hanc autem veritatem, quia summi momenti est, eamque continenter noctu, & interdiu animo versare debet Christianus, clarissimè, & significantissimè Scriptura tradidit: *Per quem* (inquit Princeps Apostolorum loquens cap. 1. suæ epist. 2. de Deo nostro, & Salvatore JESU CHRISTO,) *maxima & pretiosa nobis promissa donavit, ut per hac efficiamini divina consortes naturæ.* Ergo per gratiam nobis promissam, & per Christum donatam consortes efficiamur divinæ naturæ. Nec majori ponderatione indiget locus tam luculentus. Eandem veritatem ubique sonant creberrima illa testimonia, quibus dicitur justos per gratiam generari, renasci, & filios Dei revera constitui; cum enim generatio sit naturæ communicatio, cum nativitas sit naturæ receptio, cum filius ille solus dicendus sit, qui naturam parentis exprimit & propagat, procul dubio justos divinæ naturæ participatione gaudere credendum est, quos semel creatos sacræ literæ, & à Deo iterum gigni, & ex Deo natos, & filios Dei tam asseveranter, & juxtâ frequenter tradunt. *Voluntariè enim genuit nos*, inquit Jacobus cap. 1. *verbo veritatis, ut simus initium aliquod creatura ejus:* id est, gratuitâ suâ dilectione sanctos spiritualiter genuit verâ naturæ suæ communicatione; verbum quippe veritatis fictam similitudinem non imprimit, ut sint primitiæ creaturarum, vel ut habeant in se initium operum supernaturalium, quæ debet elicere nova creatura, in qua ratione principii operum supernaturalium, & divinorum consistit naturæ divinæ participatio.

ut postea clarebit. *Renati non ex semine corruptibili, sed incorruptibili per verbum Dei vivi, & permanentis in aeternum*, inquit D. Petrus cap. 1. suæ primæ. *Joan. 1. Dedit eis potestatem filios Dei fieri, qui non ex sanguinibus, neque ex voluntate carnis, sed ex Deo nati sunt.* Illud idem eleganter exprimit dialogus ille eximius Christum inter & Nicodemum initus, *Joan. 3. Amen, amen dico tibi*, inquit Veritas Nicodemo magisterio Christi applaudenti, *nisi quis renatus fuerit denuò, non potest videre regnum Dei.* Ecce mysterium novæ in Christo per gratiam nativitatis, quâ jus regni Dei videndi adipiscimur; cum enim hac iterata nativitate filii Dei constituamur, utique & hæredes regni evadimus. Obstupefcens ad tam reconditum arcanum Nicodemus: *Quomodo*, inquit, *potest homo nasci, cum sit senex?* Nunquid potest introire in ventrem matris suæ iteratò introire, & renasci? Spiritalem generationem carnaliter intelligebat vir Iudaicis ritibus innutritus, cujus falsum intellectum remove volens Salvator respondit: *Amen, amen dico tibi, nisi quis renatus fuerit ex aqua, & Spiritu sancto, non potest introire in regnum Dei.* Quibus verbis non solum secundæ istius generationis necessitatem inculcat, sed etiam Sacramentum, quo spiritualiter gignimur, exponit; in Baptismate enim spiritalem illam nativitatem tota Trinitas operatur. Deinde verò Salvator explicaturus interioris hominis generationem opus esse Spiritus sancti, & spiritualitatem divinam, in qua consistit natura divina, Sanctis hac nativitate communicari, subdit: *Quod natum est ex carne, caro est; & quod natum est ex spiritu, spiritus est.* Non mireris,

quia

quia dixi tibi: Oportet vos nasci denuò: Spiritus ubi vult spirat, & vocem ejus audis; sed nescis unde veniat, aut quò vadat: sic est omnis, qui natus est ex spiritu. Quasi diceret: Si vis intelligere mysterium hujus per gratiam nativitatis, attende principium ejus; sicut enim generans carnaliter carnem producit, quia naturæ suæ similitudinem imprimit & profundit quantum potest: ita Spiritus, qui est hujus generationis parens, spiritualitatem novis suis creaturis impertit, & eatenus filios procreat, quatenus infusione gratiæ homines efficit spirituales, spiritualitatem divinam non quidem ex æquo, sed participativè exscribentes. Nec scrutari decet hæc inscrutabilia mysteria, quæ intus magis sentiuntur dum vocem ejus audimus, quàm verbis sensibilibus explicentur. In quibus autem, & quomodo hæc operetur Spiritus sanctus, noli examinare, si non vis errare; quia Spiritus ubi vult spirat, & operatur omnia, & singula prout vult. Denique per gratiam justos verè filios Dei fieri, tam clarum est in sacris paginis, quàm quod clarissimum. 1. Joan. 3. *Videte qualem charitatem dedit nobis Pater, ut filii Dei nominemur, & simus.* Rom. 8. *Ipse Spiritus testimonium reddit spiritui nostro, quòd filii Dei sumus.*

A Patribus recensendis supersedeo, quid enim apud illos frequentius, inculcatius, & elegantius exprimitur divinâ illâ per gratiam generatione, quâ nos divinam similitudinem exprimere aiunt? Sed circa hæc inter explicandos cœlestes gratiæ lepôres plura è Patribus referimus. Non possum tamen illud Cyrilli lib. 2. *Theauri, cap. 2.* missum facere: *Eandem ope-*

rationem connaturaliter habentes, necesse est esse ejusdem natura. Plura in sequentibus dicturi sumus.

Ratio verò hujus tertiæ partis ad hanc formam reducitur. Per naturam divinam illam perfectionem primitivam, & fontalem intelligimus, quæ est nostro concipiendi modo radix divinorum attributorum, & principium divinarum operationum; per naturam quippe rerum nihil unquam hætenus Philosophi intellexerunt, quàm gradum illum uniuscuiusque rei, unde proprietates manant, & operationes fluunt: unde trita est illa Philosophi definitio: *Natura est principium motus & quietis ejus in quo est, &c.* Atqui gratia sanctificans perfectionem illam primitivam, & fontalem, quæ in Deo cum fundamento concipitur, imitatur; sicut enim Deus per suam naturam, seu spiritualitatem est radix divinorum attributorum, habetque inclinationem (quæ tamen in Deo Deus est) ad seipsum intuitivè videndum, seipsum amore beatifico amandum, omniâque extra se propter seipsum operandum: ita homo spiritualis per gratiam sanctificantem regeneratus propendit in Deum intuitivè videndum, in ipsum amore beato diligendum, omnia propter unum Deum operandum; est etiam radix charitatis, virtutumque infusarum, quæ sunt divinarum perfectionum imagines, gratiam per modum proprietatis consequentes. Ergo gratia sanctificans est participatio divinæ naturæ, quæ natura est, seu per modum virtutis tendentis in Deum, ut in se est.

Confirmatur profundius, & explicatur limpidius. Varios effectus gratiæ sanctificantis
Patres,

Patres, & Theologi asserunt; gratia namque primò mundat à peccato: 2. Deo gratum hominem efficit, & objectum specialis dilectionis: 3. hominem interiùs rectificat, renovat, & instaurat oblitteratam ab Adami culpa similitudinem menti insculptam: 4. hominem Dei dilectorem sin actu, certè potestate & inclinatione reddit: 5. actus supernaturales fidei, spei, dilectionis, aliarumque infusarum virtutum à justo elici exigit: 6. Dei filium adoptivum constituit: 7. jus ad hæreditatem cœlestem eidem filio adoptivo largitur: 8. totam Trinitatem animæ sanctæ illapsam, & intimè præsentem facit: denique hominem supra puram naturam creatam & creabilem evchit. Quæ omnia possemus iis egregiis Scripturarum, Patrumque testimoniis illustrare, quibus integra concio locupletari posset, sed facilè & ferè ad manum occurrent Lectori exercitato. Atqui omnes illi effectus sunt veluti appendices, & corollaria participationis divinæ naturæ; ideo namque gratia cor mundat, gratum Deo reddit, rectificat, quia est naturæ divinæ participatio & similitudo, quæ peccatorum sordes non compatitur, & divinam dilectionem conciliat; ideo gratia in Deum, ut in se est, tendit, adusque supernaturales exigit, quia est participatio naturæ divinæ; actus enim divini, & propensiones divinæ, non nisi à natura divina saltem participata profiscuntur; cùm operari sequatur esse, & inclinatio naturæ respondeat. Ergo essentia gratiæ sanctificantis in hoc sita est, quod sit formalis naturæ divinæ participatio.

Dices: Quomodo gratia formaliter expri-

mere potest naturam divinam prorsus inimitabilem, & omnia creata & creabilia immensum excedentem? Quomodo quod est Deo proprium, potest justis communicari? quid tam Deo proprium, quam natura ipsius?

Respondeo, triplicem posse in Deo distingui perfectionum veluti gradum, quo constat quidquid ad Dei essentiam & attributa pertinet. Nam cum fundamento in re concipimus primò perfectiones Deo & creaturis communes; sicut enim Deus subsistit, vivit, & intelligit, ita creaturæ secundum suæ naturæ conditionem competit subsistere, vivere, & intelligere. Secundò concipimus in Deo perfectiones ita ipsi proprias, ut sint divinitatis characteres, putà esse Deum, esse ens à se, actum purum, esse Patrem, Filium, & Spiritum sanctum; quæ cum Deum ab aliis distinguant, prorsus implicat aliis communicari. Tertiò quædam perfectiones in Deo sunt Deo quidem propriæ, sed tamen per gratiam communicabiles beneficio gratuito & indebito, quales sunt esse principium operationum divinarum, habere inclinationem ad Deum videndum, ipsum amare, propter ipsum operari, omni genere officiorum, & virtutum actibus Deum promoreri, & tandem fruitione possidere: sicut ergo justus imitatur operationes divinas, ita exigit virtutes divinas; virtutes autem divinæ supponunt essentiam, saltem participativè divinam, cum proprietates conditionem essentiæ sapiant, & veluti sugant. Ergo natura, & perfectiones divinæ per gratiam & virtutes participantur. Ratio autem, cur hujus tertii generis perfectiones sint inimitabiles, est quia conveniunt Deo ut enti spiritali, & intelligenti,

ti, cui quā tali convenit naturaliter se videre, se amare, & sui fruitionē beari. Quod autem convenit naturaliter Deo quā spiritali & intelligenti, competere per gratiam potest. naturæ intelligenti creatæ, quæ ratione intellectus habet amplitudinem quadantenus infinitam, ratione cuius est Dei amandi, videndique capax, imò solo Deo beari potest; ad imaginem quippe Dei facta, cæteris occupari, fatigarique potest, impleri non potest. Ut ergo cor humanum ad Deum factum, quodve inquietum est donec in ipso quiescat, Deum castè amet, Deum videat, & archetypo suo uniatur, iis virtutibus indiget, quibus divinas operationes eliciat, divinas virtutes exprimat, divinam consequenter naturam imitetur. Licet enim naturam divinam secundum rationes Deo proprias, & Deo essentielles imitari impossibile sit, illam tamen modo dicto exprimere non modò impossibile non est, sed planè conveniens naturæ intellectuali creatæ, & bonitati divinæ consentaneum.

Ex quibus dilucidè ni fallor, intelliges quā verè in ultima speculationis parte dixerimus, gratiam esse quidē divinæ naturæ, ut natura est, participationem, secus ut est actus purus, & ens per essentiam. Cū enim ratio actus puri & entis per essentiam sit ipsius divinitatis character, & propria veluti differentia, Deoque conveniat prout à creaturis etiam supernaturalibus distinguitur, procul dubio imparticipabilis est. Imitatur quidem gratia naturam, quæ est actus purus, & ens per essentiam; sed naturæ illius puritatem, & essendi plenitudinem formaliter exprimere non potest.

Nec valet quorundam recentiorum evasio

aientium, quod cùm participare sit partim acci-
 pere, & partim relinquere; sufficit, inquiunt,
 ut gratia naturam divinam, quâ actus purus est,
 participet, quod rationem inclinationis & ten-
 dentiae in Deum exprimat, tametsi actus purita-
 tem non imiteretur. Verùm enim verò hæc sub-
 tilitas sponte abit in fumum, & merâ nominis
 æquivocatione laborat: si enim gratia id par-
 ticipat, quod relinquit, modò aliquid assumat,
 profectò omnia quæ in Deo sunt, participat;
 quia aliquid Dei exprimit, cætera dum relin-
 quit. Ad formalem quippe participationem, seu
 imitationem, & expressionem formalis conve-
 nientia, & veluti exscriptio, saltem analogâ, quâ
 participans participati dotes delineet, desidera-
 tur: hac de causa sapientia, justitia, misericor-
 dia, amor, cæteræque perfectiones simpliciter
 simplices, licet sint in Deo actus puri, & infi-
 niti, participari tamen formaliter possunt, quia
 conceptum earum formalem Deus in creaturas
 effundit, retentâ sibi actus puritate, & infinita-
 te. At conceptum formalem actus puri Deus
 non communicat, sed totum servat sibi; unde
 tam repugnat rationem actus puri à gratia for-
 maliter participari, quàm repugnet ens ab alio
 fieri ens à se, & creaturam evadere creatorem.
 In summa, id gratia non exprimit, quod relin-
 quit; id solum exprimit, quod repræsentat,
 quodve in se relucet. Rationem actus puri re-
 linquit, solam rationem inclinationis superna-
 turalis, & principii radicalis operationum divi-
 narum repræsentat. Ergo naturam divinam quâ
 natura est, non verò ut est actus purus & ens per
 essentiam, imitatur & exprimit: per participa-
 tionem autem nihil aliud intelligimus, quàm
 expres

expressionem, & imitationem, nisi velimus de nomine cavillari, & sophismatis chartas implere.

Ex his etiam intelliges, quare repugnet dari speciem divinam essentiam quidditativè, ut aiunt, repræsentantem, & intellectum beatum informantem, quæ Deum ut in se est, videat; tamen si non repugnet, sed reapse detur gratia divinam naturam formaliter exprimens. Ratio namque discriminis, unde variis difficultatum instantiis occurrens, hæc est; quia species quidditativa Deum intuitivè, & sicuti est, videntum exhibens, essentiam Dei, actus puritatem, essendi plenitudinem, infinitatem, cæteraque Deo propria deberet exprimere, ut ea visenda posset objicere; quin ipsa actus purus, ipsa ens à se, ipsa infinita, & ipsa infinitas in esse intelligibili esse deberet, cum species sit ipsummet objectum in ordine intelligibili, & veluti intelligibilitas illius. At enim quid repugnantius, quam dari intelligibilitatem, quæ sit actus purus, & infinitus, ipsa que infinitas, ipsa independentia, ipsa omnipotentia; dari, inquam, extra Deum, & non sit Deus? At verò gratia sanctificans eatenus est formalis Dei participatio, quatenus virtus est, hominem ad Deum evchens, ad operanda, patiendaque divina attollens, & ad fruendum Deo inclinans.

Dices iterum: Nisi gratia esset participatio divinæ naturæ, non solum ut natura est, sed etiam ut est actus purus infinitus, non foret entitativè supernaturalis: etenim supernaturalitas creata est imitatio divinæ; divina autem supernaturalitas in hoc consistit, quod excedat omnem naturam creatam & creabilem; excedit

verò illam, non in hoc, quod existat, vivat, aut intelligat, cum eas dotes in creaturas effuderit; sed in modo habendi illas, qui modus est actus puritas, & infinitas omnem eliminans imperfectionis umbram. Unde Deum esse ens supernaturalis, est esse ens à se, actum purum, infinitum, quod nulli unquam creaturæ communicari potest: ergo ut gratia verè supernaturalis sit, verèque dicatur, infinitatem illam, puritatem illam, illimitationem illam debet exscribere, vel saltem adumbrare, ut sit imaginem inter & archetypum iusta consonantia.

Respondeo Deum esse quidem supernaturalem quia actus purus, infinitus, & illimitatus est; sed hæc supernaturalitas, cum sit distinctivus divinitatis character, quo à creaturis etiam supernaturalibus discernitur, nullâ potest in creaturas ratione transfundi, & ab eis exprimi, vel exscribi. Verum enim verò, ut suprâ monuimus, habet Deus alias dotes supernaturales sibi simpliciter proprias, & attentis præcis creaturæ cuiusvis juribus incommunicabiles; sed tamen ex gratuita Dei misericordia communicari natas, quales sunt ratio principii operationum divinarum, radix virtutum infusarum, in quibus divina attributa resplendeant, inclinatio proxima & connaturalis ad Deum castè amandum, clarèque videndum.

Ex quibus sine negotio intelliges id, quod ipsos tantoperè torquent, marcerantque animos Theologi non pauci, in quo nimirum supernaturalitas sita sit, cum divina, tum humana: facile enim responderi quit, supernaturalitatem divinam esse divinarum perfectionum eminentiam, quæ vel omnimodis incommunicabilis est.

est, vel certè non nisi speciali præcipuæ & indubitæ dilectionis effusione communicabilis; supernaturalitatem verò creatam esse expressiorem divinæ perfectionis gratuitâ duntaxat voluntate communicabilis. Et quia perfectionem illam creatura ulla exprimere nequit, nisi quatenus esse potest radix divinarum virtutum & operationum, in Deumque casto amore & clara visione possidendum tendit; ideo non pauci Thomistæ supernaturalitatem creatam in habitudine ad Deum, tanquam in finem, objectumque connaturale collocarunt. Verùm si res penitiùs introspeciat, citò, ni meus me fallat animus, apparebit, habitudinem illam in Deum expressionem præfatam supponere, in eaque fundari. Ideo namque gratia est virtutum infusarum radix, operationum cœlestium principium & fons aquæ salientis in vitam æternam, quia naturam divinam, ut natura est, imitatur: sicut ideo fides primæ veritati, & veracitati immobiliter adhæret, quia divinæ certitudinis radius est; ideo spes in Deum videndum anhelat, ideo charitas in Deum propter se diligendum propendet, quia divinæ sunt voluntatis imitationes, & specula: ergo expressio naturæ divinæ gratiæ supernaturalitatem, primitus constituit, tametsi infinitatem, actus puritatem, & illimitationem entis à se non imitetur.

Sed inquires: Multæ sunt virtutes supernaturales & infusæ, quæ nihil divinum formaliter exprimunt; quid enim humilitas, quid modestia, quid sacer timor, quid eutrapelia ex Deo exscribunt? Ergo in illa divinæ perfectionis expressione supernaturalitas creata nequaquam consistit.

Respon

Respondeo virtutes infusas esse divinæ virtutis, divinæque operationis imitationes. Etenim quanvis eæ quæ morales dicuntur, circa objecta humana negotientur, modo tamen divino circa illa occupantur: ut enim aliàs dum de virtutibus infusis diximus, aliter comedit homo civilis, aliter Christianus, aliter quoque uterque abstinet; alia sunt christianæ humilitatis & modestiæ documenta, alia philosophica de iisdem virtutibus instituta; aliter miles pugnat sub Rege, aliter martyr pro Christo; aliter ludis indulget homo urbanus, aliter civis Sanctorum & domesticus fidei. Et in hoc divinam virtutem, & operationem æmulatur nova creatura, quæ more Dei licet multa in humanis peragat, omnia tamen juxta præscriptas ab Evangelio arctæ vitæ semitas, in Deum refundit, nec solum quæ facta sunt, vel quomodo facta sunt, sed propter quid facta sunt, juxta consilium Bernardi, omnia transiens attendit. Certè eo ipso, quod virtutes morales infusæ charitati per se annexæ, per se subordinatæ sunt, continenti reginæ suæ motu in eum feruntur, propter quem in exterioribus circa plurima sollicitæ occupantur. Uni quidem necessario, scilicet Deo, nec continenter, nec immediate adhærent, ut theologicæ virtutes; sed nihilominus Deum in omnibus quærun tamen, quia charitati ancillantes, fini charitati proinde serviunt. Divinæ ergo operationis modum imitantur, quia dum Deo serviunt in hominibus, illi morem gerunt, qui omnia in suam gloriam refert; omnia enim propter semetipsum operatus est Dominus.

Inlabis: Ex gratia oritur inclinatio in Deum
ut

ut infinitum, & ut est ens per essentiam, habetque essendi plenitudinem: atqui quod habet inclinationem in aliquam naturam, præhabere illam debet, & eo modo præhabere, quo in illam inclinatur. Ergo gratia Deum ut est actus purus, & ens à se, imitatur. Confirmat id ipsum P. Gonet oppositum sentiens, quia operationes connaturales non competunt connaturaliter nisi habenti naturam, quæ est radix hujusmodi inclinationum: sed visio beata est operatio conveniens Deo, ut est infinitus, & ens per essentiam. Ergo gratia non potest habere inclinationem in illam visionem, nisi sit participatio naturæ divinæ, quæ est actus purus & infinitus. Certè gratiæ non deberetur connaturaliter species infinita, scilicet essentia divina, nisi esset ens infinitum participatum.

Respondeo, hæc argumenta nimis probare; si enim gratia sit expressio actus puri, quia propendet in actum purum videndum, frustra dicunt puritatem actus, & infinitatem in sua participatione relinquere, sed potius tenentur adversarii dicere eam exprimere; quod tamen est à veritate, & ab adversariorum sententia prorsus alienum. Itaque eadem solutione omnibus illis argumentis & aliis innumeris fit satis, dicendo gratiam habere inclinationem in Deum ens infinitum, sed finito modo participandum, finitoque modo videndum; licet autem visio infinita & comprehensiva sit operatio naturæ infinitæ, non tamen visio intuitiva finita: unde sequitur quidem gratiam esse participationem naturæ infinitæ, sed ut natura est, non prout infinita. Sicut charitas, quæ potest augeri in
inf

infinitum, est participatio charitatis quæ est infinita, sed non infinitatis ejus; cujus signum est, quod potest gratia & charitas major esse, & major in infinitum.

REFLEXIO.

Agnosce, ô Christiane, dignitatem tuam, & divina consors factus natura, noli in veterem vilitatem degeneri conversatione redire. Reminiscere, quod erutus de potestate tenebrarum, translatus es in Dei lumen & regnum, inquit opportunè Magnus Leo serm. i. de nativitat. Quæ sint officia tua, quàmve personam tibi imposuerit, Lector Christiane, gratia quâ salvaris, si menti tuæ jugiter obversetur, citò perspicies quâ tibi vitâ vivendum sit, qui tibi per gratiam tantum antecellis, quantum brutis præstas per naturam. Nosce teipsum, inquebant Philosophi, ut semper hominem agas, semper ratione ducaris, semper ex regulis prudentiæ operere. Nosce teipsum, addit Religio, ut semper Christianum agas, id est hominem jam divinum, in cœlis conversantem, ex fide viventem, quæ sursum sunt sapientem, quæ sursum sunt quærentem, non quæ super terram. Illud præ oculis semper, & præ manibus habeto, quid fides jubeat, quid præcipiat Evangelium, quid à te exigat Christiani nominis dignitas? O deplorandam Christianorum Christianismi ignorantiam! ô facinus animadvertendum. Hoc incredibile est, aut memorabile, tanta vecordia hujus ævi Christianis ut sit, ut ad bona dormitent propria, atque ex immensis Christianismi commodis sua ut comparent incommoda, & augeant crimina?

crimina? Tantam rem tam negligentem inspicere, quis non indignè ferat, ubi nihil est loci segnitiei, neque socordiae? Quid est, si non hoc sacrilegium est? Natura quantumcunque conetur, quàmlibet vires exerat, nunquam tamen servitutis ei gradum prætergredi fas erit, nunquam ad amicitiam Dei transmittet: & quod naturæ impossibile factum est, hoc homini immerito, indigno, ingrato, supra merita & vota largitur gratia, quæ facit filios Deo charos, Deoque plenos, quos familiari amore prosequitur, singulari providentia tutatur, amoris legibus regit, intimiori dignatur præsentia; & hæc nemo recogitat corde. Sed si tanta tibi contulit Deus, putasne minora à te exacturum, ut reddas? Credisne tua non esse graviora peccata.

SPECULATIO II.

Corollaria derivantur, quibus natura gratia sanctificantis magis clarescit.

PRæjactis superiori speculatione fundamentis astruere sine negotio possumus, & immolari quidquid ad sanctificationis, & justificationis œconomiam explicandam, illustrandamque Theologi conferunt.

COROLLARIUM I.

Perfectio gratiæ.

SEquitur ergo primò, gratiam esse omni ente merè naturali, creato & creabili, etiam quavis substantiâ perfectiorem. Quia perfectiōnis creatæ mensura una Deus est, cujus bonitatis pelagus immensum creaturæ imitantur; & quo magis, minusve ad eum accedunt, eo perfectiores, vel imperfectiores censentur. Nulla autem creatura possibilis intra limites merè naturales occlusa tantum accedit ad Deum, quantum gratia, quæ ejus naturam formaliter exprimit. Gratia igitur creaturis omnibus, etiam substantiis dignitate antecellit. Unde D. Thomas 2. 2. q. 1. art. 3. ad 3. ait: *Accidens quod causatur ex participatione alicujus superioris nature, est dignius subiecto, in quantum est similitudo superioris nature, sicut lux diaphano.* Ad quorum pleniorē claritatem considerandum est, gratiam dupliciter spectari posse: primò ut est quoddam accidens creatum, & qualitas afficiens animam; secundò secundum suam specificam rationem, prout est participatio divinæ naturæ, hominem ad supernaturalem ordinem, & divinum evehens, in Deumque prout in se est, attingendum propendens. Gratia priori modo spectata utique est substantiâ quantum ad modum essendi imperfectior; perfectius siquidem est in se, & per se subsistere, quàm in alio existere. At posteriori modo considerata, tanto substantiâ præstat, quanto ordo supernaturalis naturali antecellit

recellit. Et quia quantitas perfectionis rei non ex accidentario essendi modo, sed ex ipsa rei natura & specie venanda est, planum est, gratiam quidem esse secundum quid substantiâ imperfectiorem; simpliciter tamen perfectiorem esse, indubitatum est. Et hoc est, quod intendit D. Thomas in 1. dist. 17. q. 1. art. 2. ad 3. ubi scripsit, quod *simpliciter anima est melior charitate, & quodlibet subiectum suo accidente; sed secundum quid est è converso*. Quod idem S. Doctor 2. 2. citata ad 3. sui interpretes exponit, dicens id esse verum, non quoad essentiam & secundum rationem speciei, sed secundum modum essendi. Unde S. Præceptor q. 11. art. 9. ad 2. ait: *Bonum gratia unius majus est quàm bonum natura totius universi*. Unde infert, justificationem esse maximum Dei opus ex parte rei factæ, tamen creatio sit opus ex modo faciendi majus, quia è nihilo res educit.

Nec obest si objicias cum Marco Serra oppositum sentiente, quodlibet contentum sub genere essentialiter perfectiori esse essentialiter perfectius contento sub genere imperfectiori: genus autem substantiæ esse essentialiter perfectius genere accidentis, sub quo continentur qualitates supernaturales. Non, inquam, obest; tum quia cum genus sit quoddam ens potentiale, ut aiunt, non continet actu, sed potentiâ differentias suas; unde non est inconveniens, quod unum genus perfectius determinetur per speciem imperfectiorem illâ, quæ contrahit genus imperfectius; sicut materia (cui genus comparari solet) potest formâ perfectiori adornari, tamen si ipsa materia longè imperfectior existat, ut patet in materia sublunari, quæ à cœlesti

perfe

perfectiōne tantum distat , quantum cœlum à terra ; & tamen sublunaris innumerarum formarum viventium varietate , ipsa etiam anima rationali perficitur , viventium porrò minima formâ cœlesti , utpote inanimatâ , immensum præstat. Tum quia licet Maxima illa , *Contentum sub genere perfectiori simpliciter perfectius est contento sub genere imperfectiori*, vera foret in his , quæ sunt ejusdem ordinis ; fallit tamen in his , quæ ratione differentię ordine distant : & quia gratia sanctificans ratione differentię est ordinis divini , cui nullus alius conferri quit , nihil mirum si gratia substantiam naturalem ordine inferiorem , dignitate & perfectiōne vincat.

Nec obest , si iterum objicias , rationibus nostris probatum iri , Deum ut authorem naturalem , qualis ratione cognoscitur , esse gratiâ , virtutibusque supernaturalibus imperfectiorem , cum sub hac ratione sit ordinis naturalis. Et tamen id per se videtur absurdum , cum Deus etiam ut author naturalis sit actus purus , ens infinitum , nullisque perfectiōnis limitibus clausum. Ergo rationes nostræ æquivocatione laborant. Non , inquam , id etiam obest ; quia licet lumine naturali ens supernaturale in particulari minimè cognoscamus , illud tamen veluti tacitè , & implicitè cognoscimus , Deoque asserimus , quatenus scimus ipsum omnem perfectiōnem creatam & creabilem infinitis , nobisque ignotis intervallis superare ; id autem hoc ipso scimus , quo agnoscimus ipsum esse talem , quo nihil majus esse , vel excogitari potest.

COROLLARIUM II.

Gratia sanctificans per se ita peccatum expellit, ut repugnet utrumque in eodem subiecto sociari.

Prima pars perspicua est; cum enim gratia sit participatio divinæ naturæ, subindeque rectitudinis, puritatis, & sanctitatis divinæ, personam reddens Deo gratam & acceptam, justum Dei amicum & filium constituens, Deumque illabi, & animam præsentiam intimiori, & familiariori cohonestare quadantenus compellens, apertè consequitur gratiâ expelli peccatum, quod est privatio gratiæ, quòve homo Deo exosus, Dei inimicus, diaboli filius, à Deo dissitus efficitur. Ergo gratia per se expellit peccatum, juxta illud 2. Cor. 6. *Quæ participatio justitia cum iniquitate? Aut quæ societas luci ad tenebras?* Illud etiam Tridentini sess. 5. can. 5. *Si quis per JESU CHRISTI Domini nostri gratiam, quæ in baptismo confertur, reatum originalis peccati remitti neget, aut etiam asserat non tolli totum id, quod veram & propriam peccati rationem habet, anathema sit.*

Dices: Ad delendam, remittendumque peccatum, præter gratiæ infusionem requiritur favor, amorque divinus condonans injuriam: ergo si infusâ gratiâ favor ille, amor ille denegetur, nondum remissa erit offensæ.

Respondeo implicare in terminis, Deum alicui infundere gratiam, & non simul condonare injuriam; cum enim gratia sit divinæ dilectionis

nis effectus , non potest non à Deo pacato & amico procedere : quid namque magis impossibile . quàm Deum præcipuum favoris sui pignus impartiri , & favorem suum unà denegare? Non inficior , ad remittenda peccata favorem divinum desiderari , sed favorem illum à gratiæ infusione posse divelli , tam inintelligibile est, quàm esse effectum causæ sine influxu causæ , & lucem à Sole fluere sine illuminatione Solis. In ipsa ergo infusione gratiæ peccati remittendi voluntas includitur, ad idque Deus necessitatur, ex suppositione tamen suæ gratitiæ voluntatis.

Hæ rationes benè penetratæ convincunt etiam secundam partem corollarii contra Suarem : nullâ enim potestate fieri quit hominem simul esse à Deo aversum , & conversum ad Deum ; amicum, & inimicum ; à Deo dilectum, & simul odio habitum. Sed per quodvis peccatum mortale homo est aversus à Deo , inimicus Dei, ab eoque odio habitus: *Odisti enim omnes , qui operantur iniquitatem ; & odio est Deo impius & impietas ejus* : per gratiam verò homo est ad Deum conversus , amicus Dei , ab eoque dilectus , in hoc enim consistit primarius gratiæ effectus , ut nomen ipsum sonat. Ergo repugnat in eodem subjecto gratiam cum peccato sociari, non minùs quàm repugnet lumen & tenebras aërem simul afficere : est enim macula peccati, *privatio conjunctionis ad divinum lumen* , ut ait D. Thomas 1. 2. *quest. 86. art. 2. ad 1.* & in materia de peccatis ostendimus. Cui consonat Augustinus lib. 8. de Genesi ad lit. cap. 12. *Homo Deo sibi presente illuminatur, absente autem continuo tenebratur , à quo non*
loco

locorum intervallis, sed voluntatis aversione disceditur.

Hæc rationum momenta non obscure insinuant Scriptura & Patres. Cùm enim dicitur 1. Joàn. 3. *Omnis qui in eo manet, non peccat. Omnis qui natus est ex Deo, peccatum non facit, quia semen ipsius in eo manet, & non potest peccare, quoniam ex Deo natus est; in hoc manifesti sunt filii Dei, & filii diaboli.* Cùm, inquam, hoc dicitur, quid aliud S. Apostolus intendit, quàm tandiu hominem nec peccare actu, nec peccare posse, nec peccato infici ullo possibile esse, quandiu semen illud divinum, quod est gratia, quâ spiritaliter renascitur, in eo manet. Idem etiam sibi volunt Patres, dum docent, peccatum esse mortem animæ, vitæque spiritalis interitum, ut videre est apud Aug. in *Psal. 9.* & Nazianzenum *erat. 19.* Sicut enim repugnat vitam & mortem in eodem simul subjecto inveniri; ita hominem eundem gratiam unâ & peccatum in se unita, æternæque mortis reum, & simul æternâ vitâ dignum existere, prorsus contradictionem implicat.

Nec potest tolli tam manifesta, tamque oculis sese ingerens contradictio recurrendo ad varios effectus gratiæ & peccati, quos Suares pro suo arbitrato fabricatur, aliosque erigit in primarios, alios instituit secundarios, ut per miraculum gratia cum peccato societur. Non potest, inquam, tolli his subterfugiorum tricis ultro occurrens contradictio, facileque omnes distinctiones Suaris occupabis & dissipabis hoc argumento: Effectus primarius peccati est avertere hominem a Deo, vel ut vult Suares, facere hominem Deo inimicum; effectus verò primarius

rius gratiæ sanctificantis est reddere hominem Deo gratum per participationem naturæ divinæ, quam importat, & facere Deo amicum, tum ratione sui, est enim gratia congruum divinæ dilectionis objectum; tum ratione charitatis, à qua vel non distinguitur, vel quam essentialiter exigit. At illi effectus sunt magis repugnantes, quàm dies & nox, mors & vita, cæcitas & visus. Ergo formæ unde effectus illi proveniunt, sociari nequaquam possunt. Accedit, quod licet non negaverim, effectuum gratiæ & peccati alios primarios, alios secundarios existere; illos etiam licet ad libitum Suaris disposuerim, nihil inde tamen efficitur, quia effectus illi secundarii sunt proprietates inseparabiles, & ut aiunt convertibiles, & similes proprietatibus entis: implicat enim consortem naturæ divinæ non esse Deo gratum, illi amicum, & non habere internum jus ad gloriam hoc ipso, quod est filius: implicat etiam peccato morali (quodcumque illud sit) sordescentem non esse à Deo aversum, Deo ingratum & exosum, & non habere reatum pœnæ æternæ. Quare ne putet Suares adulari omnipotentiae Dei, & potestati miraculorum ejus, dum ei gratiam cum peccato sociandi affert potestatem. Potentiam suam parcendo, miserando, peccati per gratiam delendo, non peccatum cum gratia conjungendo manifestat. Absit, & procul absit potestas illa amica sordium, quæ scelera in justo conservet. Alianc non suppetunt media, quibus Omnipotentis virtus infinita clareat. Absurdum est, & planè indignum. Cùm enim etiam secundum adversarios gratia naturâ suâ peccati maculam depellat & discutiat, hunc ejus effectum impeliet

Deus,

Deus, conservabitque miraculo peccatum, ut author specialis, in quem proinde iniquitas refundetur non solum ut permittentem, sed efficaciter volentem & causantem; quod indignum est, & falsum: cum enim voluntas creata non habeat vim conservandi, conjungendique cum gratia peccati, nihil faciet divina promissio, nisi adsit efficax, imò & miraculosa divinæ voluntatis operatio.

Dices: Consilia & Patres non semel affirmant, peccatum antecedere gratiæ subtractionem, attestante Tridentino *sess. 6. cap. 11.* Deum suâ gratiâ semel justificados non deferere, nisi ab eis prius deferatur; & Basilio hom. 21. de diversis, *peccatum precedere gratia carentiam*. Et ratio est, tum quia gratia per peccatum ab anima pellitur, tanquam per obstaculum divini luminis influxui positum: ergo prius contingit peccatum, quàm gratia subtrahatur; sicut prius Soli illuminanti ponitur obex, quàm Sol radios emittere, & emissos conservare desinat. Tum quia gratia per peccatum demeritoriè expellitur, id est peccatum unum motivum est, quo divina impulsâ justitia talem pœnam de peccatore sumit, gratiæ nimirum subtractionem: unde prius videt culpæ consummationem, quàm gratiam subtrahat, cum pœnam ante culpam non infligat. His positis sic subsumentur: Non tenetur Deus propter obstaculum peccati subtrahere lumen gratiæ, quod liberè influi, liberèque conservat; non tenetur etiam Deus pœnam infligere merenti, sed pro sua indulgentia potest illi condonare: ergo etsi peccatum gratiæ naturâ suâ opponatur, etsi subtractionem illius promeretur, divinitus poterit
pecca

peccatum cum gratia in eodem subiecto sociari.

Respondeo actum peccati præcedere naturâ gratiæ subtractionem, eam tamen eodem temporis instanti inferre, quia & hominem à Deo averrit, & animam contempnat, & mortem animæ consciscit. Supposito ergo, quod Deus permittat hominem in peccatum prolabi, in eoque permanere, vult etiam gratiam subtrahere; quia velle nequit eodem instanti vivere hominem, & mori; à se recedere, & sibi uniri; mundum esse, & simul inquinatum. Liberè ergo gratiam influit, liberè peccare homines finit; sed si alterum vult, alterum non vult, nec velle potest, quia nequit pugnantia velle. Similiter pœnam Deus liberè infligit; sed si pœnam subtractionis gratiæ non imponit, & gratiam potius in subiecto conservet, peccati maculam subintrare non sinet, vel præexistentem expellet. Porro si peccator in peccandi voluntate permaneat, pœnam subtractionis necessariò imponet Deus; implicat enim, Deum amicum suum illum efficere, qui constanter vult ejus esse inimicus, quia gratiam invitis non dat, sed volentes ex invitis reddit. Nec propterea absoluta Deo imponitur necessitas, sed conditionalis à propria voluntate proficiscens; non enim gratiam subtrahit, nisi postquam lapsum in peccatum libera voluntate permisit.

Instabis: Actus non expellit necessariò habitum oppositum; actus unus intemperantiæ, v.g. acquisitum multo labore temperantiæ habitum non corrumpit: ergo nec actus peccati gratiam momento expellere necessariò debet, præsertim quia actus peccati est in voluntate, gratia in substantia animæ; nec maliti. actus
in

in privatione gratiæ, sed in carentia rectitudinis sibi debitæ sita est.

Respondeo actus, & habitus oppositi tunc impossibilem esse societatem, quando ex ea prædicata contradictoria consequuntur, qualia ex simultanea gratiæ, & peccati existentia contingere demonstratum est; quid enim magis implicantiùs, quàm esse objectum dilectionis, & simul odii divini; habere jus ad hæreditatem patriæ, & reatum æterni supplicii; Deo servire, & mammonæ; filium esse Dei, & diaboli? Qui effectus æquè proficiscuntur à gratia habituali & actu peccati, quàm ab eadem gratiâ & habitu perverso actibus peccandi generato. Quorum omnium ratio est, quia esse inimicum Dei non sequitur actum, vel habitum, quia actus, vel habitus est, sed quia est culpa mortalis, mortem spiritalem animæ inferens, subindeque Deo, ejusque gratiâ essentialiter privans; in hoc quippe lethiferi peccati malicia, & gravitas sita est.

Addunt aliqui, nec ineruditè, habitus, & virtutes naturales, vel acquisitos, à natura fluentes, vel actibus partos, uno actu contrario haud necessario pelli; nam & habitus temperantiæ actum intemperantiæ compatitur, & gravitas lapidis motum sursum, seu actum levitatis vñ sibi impressum sine sui destructione recipit. Cæterùm habitus infusus continenti Dei influxui indigens, actu opposito divino influxui obicem ponente illico corrumpitur, non secus ac solis illuminatio posito opaci corporis objectaculo continuò cessat. Porro ut hæc secunda responsio solida sit & inconcussa, priorem omninò supponit; non enim quivis actus habitui

infuso oppositus habitum evellit, quia peccati venialis actus, quâlibet iterati, gratiam, habitusque infusos non extirpant: quare sacrorum habituum vastatio, & funesta strages in culpam mortalem, quia mortalis est, singulariter, præciseque refunditur. Qua observatione innumeris objectionum instantiis, quas missas facio, occurre. Duo etiam additamenta instantiæ præfenti subnexa inde labascunt; quantumcunque enim actus in voluntate, gratia in substantia animæ insint, quantumvis malitia actus in privatione rectitudinis sita sit; quia tamen ex illo quâ mortale peccatum est, sequitur mors animæ, odium Dei, reatus æternæ miseriæ, extinctio juris ad gloriam, gratiam convellat necesse est, unde contradictoriè oppositi effectus proficiuntur.

COROLLARIUM III.

Vna justificationis forma gratia sanctificans est, nec alia esse in illo statu potest.

HOc confectarium apertè docet Angelicus Doctor in præfenti articulo 2. ubi ait: *Non posset intelligi remissio culpæ, si non adesset infusio gratiæ.* Loquî autem S. Doctorem de gratiâ habituali, ex contextu pater, cùm sermonem habeat de gratiâ, quâ homo fit dignus vitâ æternâ. Effectus, inquit, divina dilectionis, qui per peccatum tollitur, est gratia, quâ homo fit dignus vitâ æternâ. Quod & repetit q. 28. de verit. art. 2. in corpore: *Nullo modo,* inquit, *remissio*
pecca

peccatorum sine gratia gratum faciente esse potest. Nec debet restringi tam ampla & universalis doctrina ad statum quem degimus, ut credit noster Gonetus, arbitratus hominem quidem ad finem supernaturalem ordinatum non posse sine gratia justificari; hominem tamen in statu naturæ puræ constitutum sine gratiæ supernaturalis dono justificationem obtinere solo Dei favore posse. Non debet, inquam, ita arctari doctrina S. Thomæ, cum ipsemet S. Præceptor hujusmodi limitationem occuparit, & his verbis jingularit: *Si à solo statu natura decidisset homo,* inquit q. 28. de verit. art. 2. ad 5. *nihilominus tamen ad expiationem infinita offensa donum divina gratia requireretur.* Dicere verò S. Thomam per donum divinæ gratiæ non intelligere gratiam, sed auxilium ordinis naturalis, tanto Doctori injurium est, & textui ipsi repugnans: injurium quidem, quia tam accurato Doctori non deerant verba, quibus auxilium ordinis naturalis exprimeret, quin illud sub dono divinæ gratiæ confunderet: textui etiam repugnans, quod enim ad expiationem infinitæ offensæ requiratur donum divinæ gratiæ, probat eandem in omni omnino statu gratiam per æquè requiri.

Ratio corollarii habetur ex dictis, & sic breviter formatur: Tunc homo justificatur, cum fit Deo gratus, Dei filius, Dei amicus: quod bonum dum illi advenit, purgantur peccata, delentur maculæ, & offusæ discutiuntur culparum tenebræ. Atqui homo non fit Deo gratus, nec Dei filius constituitur, nec Dei amicus evadit, nisi solo gratiæ sanctificantis dono; effectus namque formalis sine forma haberi nequit, cum

fit ipsamet forma communicata ; sicut quis absente albedine albus esse , vel dici nequaquam potest. Ergo gratia una est justificationis forma , & ita una , ut alia esse nequeat : unde tam repugnat Deum sine gratia justificare , quàm parietem sine albedine dealbare , cadaver mortuum sine anima vivificare , miserum sine felicitate beare , aërem sine luce illuminare : uno verbo effectus formales sine formis , seu quod idem est , formas sine formis donare.

Dices primò cum Scoto & Suarez : Nunquid potest Deus peccatum favore suo plenariâ indulgentiâ condonare , obligationem ad pœnam æternam relaxare , peccatorum non recordari , injuriis veniam dare , jus morale ad gloriam moraliter , id est sine doni physici impressione impertire , maculam etiam delere , hominem ad statum supernaturalem evehum ad statum naturæ puræ dejiciendo , vel transfereundo , seu etiam à lege dispensando Quidni poterit Deus quod potest homo liberalis , qui fit hostis sine istius physica mutatione pacatus ?

Respondeo hæc omnia , & multò grandiora miracula quidem posse præstare Deum , & quotidie in justificatione impiorum præstare ; sed tam præclari , tamque magnifici effectus , præcipuæ dilectionis Dei effectus sunt ; dilectionis , inquam , non affectivæ , sed effectivæ ; non sterilis , sed fecundæ , non otiosæ , sed efficacis ; non supponentis , sed infundentis & creantis in objecto dilecto bonitatem. Neque enim mutatur voluntas divina mutatione sui , sed mutatione creaturæ ; nec hominem de novo diligere solet , aut potest , nisi congruum ipsi imper-
tiat

tiat suæ dilectionis pignus, quo specialis amoris objectum evadat. Perperam ergo voluntas hominis condonantis Dei justificantis voluntati comparatur, mutabilis immutabili, sterili efficaci, supponentis objecti amabilitatem creanti illam. Porro translatio illa, vel potius dejectio hominis ad statum naturæ puræ, ut homini condonetur injuria, lepida imaginatio est; quasi verò aptum levandæ peccati miseriæ remedium sit novæ miseriæ adjectio; quasi homo sic è gradu dimotus possit antea factum facere infectum, id est efficere, ut contra authorem supernaturalem non peccarit, subindeque ea macula non sordescat, quæ sit privatio gratiæ. Sed quid multis moror? cum homo in nullo statu sine gratia justificari possit, etiam in statu naturæ puræ, in quo non nisi de potentia extraordinaria creari potest. *Licet homo antequam peccet, inquit S. Doctor hîc art. 2. ad 1. potuerit esse sine gratia, & sine culpa; tamen post tantum non potest esse sine culpa, nisi gratiam habeat.*

Dices 2. cum Vasquez: Homo sine gratia per actum contritionis vel amoris justificatur; nam teste Augustino lib. 2. contra Cresconium, *à peccatis mundamur sacrificio cordis contriti.* Et Veritas ipsa apertè id significavit, dum de muliere peccatrice & poenitente pronuntiavit, Lucæ 7. *Remittuntur ei peccata multa, quoniam dilexit multum.* Ergo gratia non est sola justificationis forma.

Respondeo, quod cum macula peccati sit privatio gratiæ habitualis voluntariè inducta, exigit quidem necessariò actum contritionis, quo voluntarium illud inquinamentum retrahatur.

ctetur ; sed insuper indispensabiliter exigitur gratia, ut privatio illa expellatur. Quare contritio , cæterique pii motus sunt quidem dispositiones ad justificationem necessariò desideratæ, sed non sunt ipsa justificationis forma; impetrant veniam & remissionem, sed non sunt ipsa remissio peccatorum ; promittitur illis indulgentia, quia cor contritum & humiliatum Deus non despiciet, sed non sunt ipsa indulgentia. Gratia ergo est formaliter justificare , & gratia solius; imò justificatio non potest esse opus gratia sanctificantis, nisi sit opus solius, quia idem effectus formalis non potest à duplici forma proficisci; effectus enim formalis forma est ut communicata subiecto, unde nequit esse idem effectus, si non sit eadem forma. Porro Scripturæ & Patres amoris , & pœnitentiæ justificandi vim , tanquam dispositionibus asserunt , non tanquam justificationis formis.

Dices 3. cum Marco Serra : Licet juxta vim ordinariam sola gratia habitualis sit una justificationis forma, attamen per absolutam Dei potentiam actus contritionis & dilectionis posse esse formalem justificationis causam ; quia elicitò ab homine actu contritionis, & dilectionis, nulla necessitate propellitur Deus , ut gratiam habitualement infundat, sed ab ea potest infundenda abstinere. At tunc homo justificaretur , fieretque Deo gratus ; nam *omnis qui diligit , ex Deo est*, 1. Joan. 4. Et *qui diligit me, diligetur à Patre meo*, Joan. 14. Et certè incredibile , & fermè inintelligibile est , hominem toto corde Deum sincerè diligere , & simul in peccato mortali Deo infensum permanere ; Deo , inquam, qui diligentes se diligere , & sola se esse
cordis

cordis casti dilectione contentum, tam crebro
asseverat.

Respondeo in causis formalibus non habere
locum distinctionem potentiae ordinariae, &
extraordinariae; quia cum effectus suos per so-
lam sui communicationem praestent, non pos-
sunt supernaturaliter efficere quod nequeunt
naturaliter operari; omne quippe adventitium
si mutet entitatem, jam non erit eadem forma;
si non mutet, immutatus erit etiam effectus,
cum effectus sit ipsa forma, & praeterea nihil.
Ergo si actus contritionis non sit naturaliter
idonea justificationis forma, neque id vi ulla
supernaturali consequetur. Et quia naturaliter,
& essentialiter solam disponendi ad justificatio-
nem virtutem habet, quidquid illi divinitus ad-
jiciatur, nunquam tamen forma justificationis
evadet; maxime quia peccatum habituale est
privatio gratiae habitualis. Quandiu ergo ista
aberit, tandiu illa aderit, donec adveniat gratia
vel accidentalis, quae est gratia sanctificans; vel
substantialis, quae est unio hypostatica. In casu
ergo illo metaphysico & suavi Dei providen-
tiae repugnanti, quo Deus diligenti gratiam non
infunderet, nondum justificaretur, sicut nondum
igniret lignum calidum ut octo, cui divinitus
forma ignis denegaretur: diligeretur quidem à
Deo dilectione disponente ad justificationem,
sed non dilectione amicitiae, quae naturae com-
munionem vel supponit, vel certe infundit.
Porro cum Scriptura ait, omnem qui diligit,
ex Deo esse, loquitur de solito agendi cursu,
quo dilectio à gratia indivulsa est; vel significat
dilectionem à Dei auxilio specialiter permo-
vente proficisci. De casu autem metaphysico,

qui nunquam contigit, nunquam contingit,
nunquam contingeret, sermonem non ha-
bet.

Dices 4.cum Baptista Gonet existimante ho-
minem in statu naturæ puræ constitutum, & ad
ordinem supernaturalem nequaquam evectum,
posse sine intrinseco gratiæ habitualis dono ju-
stificari, postquam in peccatum mortale prolap-
sus est. Peccatum habituale hominis in natura
pura constituti non est privatio gratiæ habitua-
lis, sed solius rectitudinis naturalis & conversio-
nis ad Deum, ut naturæ authorem: ergo non
esset in illo statu opus gratia, sed unus sufficeret
dilectionis, & contritionis naturalis actus, ad-
iuncto extrinseco Dei favore rationem offensæ
condonantis. Adde quod si ad remittenda status
illius delicta, necessaria foret gratiæ habitualis
infusio, permanente illo statu, impossibilis esset
remissio peccatorum, quæ solâ gratiâ secundum
nos haberi potest; gratia verò statum naturæ
puræ statim evehit, & unâ extinguit: consequens
autem non videtur verum, alioquin homo in
illo statu permanens semper miser sine remedio,
sine resurgendi spe, sine beatitudinis acquirendæ
potestate existeret; ex quo ulterius sequeretur,
statum illum esse impossibilem, cum suavitati
divinæ providentiæ repugnet hominem in statu
illo condere, in quo irreparandæ miseriæ adiga-
tur. Ergo sine gratia habituali solus contritio-
nis naturalis actus peccato miseriæ in statu illo
mederetur.

Respondeo, unam Dei gratiam unum esse
peccati remedium, ne Christus gratis mortuus
esse credatur, evacueturque crux Redemptoris,
sin natura conveniens possit inveniri peccati
medi

medicina. Certè nihil opportunius, nihil auspicius, nihil acceptius audient Pelagiani, quam si ipsis dicatur, in naturæ thesauris consentaneum inveniri posse peccati remedium, & idoneam consequendæ beatitudinis viam. Cum enim ipsi contenderent, hominem in statu naturæ puræ conditum esse, ad adjuvandam, roborandamque causam suam, principium illud læti arripient, aientque gratiam omnem supernaturalem, & habitualement, & actualem ad melius duntaxat desiderari, cum possit homo naturalibus morbis naturali medicamine subvenire. Labascet ergo, & ab imis fundamentis subruetur tota Augustinianæ doctrinæ moles, uni illi fulcro innixa, uni principio superstructa: *Gratia liberatoris una est lapsis reparandis medicina.*

Instantiis porrò in contrarium non solum responsione, sed etiam manifesta confutatione occurrit dudum ex Augustino S. Thomas. Etenim in omni statu (& sic priori argumento sit satis) macula peccati est essentialiter privatio gratiæ. Quia licet in statu illo non esset gratia debita (sicut nunquam debita esse potest, ne gratia esse desinat;) natura tamen rationalis esset illius capax: quam sanè capacitatem peccati cujuscvis mortalis macula enecat, & absumit, quandiu ipsum peccatum manet, cum nullâ potentiâ peccatum valeat cum gratia sociari: sufficit autem ad rationem privationis, ut sit carentia formæ in subjecto ad illam recipiendam apto. Ergo cum per quodlibet peccatum mortale aptitudinem illam sibi homo adimat, planum est, peccatum in omni statu esse gratiæ privationem, cum formam expellat, non quam jure homo exigit, sed cujus aptus sit. Ergo licet ho-

mo antequam peccet, potuerit esse sine gratia, & sine culpa (verba sunt S.Thomæ supra laudati, & sermonem habentis de statu naturæ puræ; nam in hoc naturæ lapsæ statu non potest homo esse sine culpa, & simul sine gratia, sed alterutrum necessariò afficitur;) tamen post peccatum non potest esse sine culpa, nisi gratiam habeat.

Ad additamentum alibi, dum de peccatis, & de statu naturæ puræ disputabamus, satis superque respondimus, illudque ultrò libentesque admisimus, quod pro inconvenienti subinfertur; nimirum hominem in illo statu per se misero semel lapsum citra omnem remedii reparantis spem labi, tandiuque casum illum desperatum esse, & insanabilem, quandiu non eveheretur ad statum gratiæ, quâ solâ sarciri peccati damna, solâ peccatum ipsum deleri potest. Unde etiam intulimus, statum illum esse de potentia ordinaria impossibilem, & suavitati divinæ providentiæ repugnare; nec alio modo esse possibilem, quàm eo ferè, quo potest Deus habenti gratiam, charitatem auferre, habenti animam intellectum, aliasve vires potest adimere, videnti Deum concursum ad amorem potest negare; qui casus prorsus nec contingere unquam, nec contingunt, nec contingent aliquando.

Nec desunt momenta rationum, quibus hæc certissima veritas stabiliatur. Tum quia non est efficacior actus dilectionis & contritionis merè naturalis in statu naturæ puræ, quàm actus dilectionis & contritionis supernaturalis in statu naturæ lapsæ. Ergo si iste in statu naturæ lapsæ nequeat esse justificationis forma, nec ille in statu naturæ puræ. Tum quia quod est essentialiter dispositio ad effectum formalem alicujus formæ

formæ, nunquam, vel nusquam potest esse forma, ad cuius effectum disponit, sicut calor ad ignem in nullo statu potest esse forma ignis: sed actus contritionis ex sua essentiali ratione habet duntaxat esse dispositionem ad formam justificationis, cū ex sua natura sit essentialiter fluens & transiens; forma verò justificans habeat esse ratum & permanens in subiecto. Ergo impossibile est, actum contritionis esse in aliquo statu justificationis formam. Denique non potest homo justificari sine speciali Dei singulariter diligentis favore peccatum condonante, & injuriā remittente, quo Deus fiat offendentī pacatus; nondum enim remittitur injuria, quandiu offensi animus offendentī infensus est. Atqui singularis ille, & præcipuus Dei diligentis favor effectum permanentem peccatori imprimit, ratione cuius congruum evadat divinæ dilectionis objectum; cū amor divinus à nullo bono creato inescetur, nullam bonitatem supponat, sed amando creet & infundat, ut tam frequenter Angelicus Doctor inculcat: illud verò permanens, quod Deus specialiter amando infundit, nec aliud esse, nec intelligi potest, quàm gratia, ut idem S. Præceptor suprà dicebat. Ergo una gratia in omni statu una est justificationis forma, nec alia esse potest. Nec satisfacit Gonet, dum ait, actum contritionis esse effectum sufficientem amoris Dei specialis in statu naturæ puræ. Non, inquam, satisfacit; tum quia actus nequit esse permanens divinæ dilectionis objectum, cū sit essentialiter aliquid transiens. Tum quia simili modo dicent Vasques & Serra, actum contritionis supernaturalis esse sufficientem Dei supernaturaliter amantis effectum, cor-

ruentque

ruentque illa omnia argumenta, quibus ipse Auctores illos impugnat, ut. consideranti perspicuum est. Alias hujus assertionis rationes producit noster Joannes à S. Thoma *disp.27.art.2.* ubi nostræ sententiæ astipulatur, sed adductæ ex principiis S.Thomæ depromptæ, & ex ipsis adversariorum fundamentis erutæ planè sufficiunt.

COROLLARIUM IV.

Præclarus ad gratiam dispositionum apparatus exigitur, quæ quidem dispositiones etiam ultimæ, non à gratia habituali, sed ab auxilio actuali proficiscuntur.

Explicantur, & probantur singula. In primis requiri dispositiones ad gratiam recipiendam, pios nimirum voluntatis motus à Deo per Christum præveniente gratiâ excitatos, de fide est. Disponuntur enim, ut docet Tridentinum *sess.6.cap.5.& 6.* qui per peccatum à Deo averfi erant, per ejus excitantem, atque adjuvantem gratiam ad convertendum se, ad suam ipsorum justificationem eidem gratiæ liberè assentiendo, & cooperando. Disponuntur autem, addit, ad ipsam justitiam, dum excitati divinâ gratiâ, & adjuvi, & fidem ex auditu concipientes, liberè moventur in Deum, credentes vera esse quæ divinitus revelata, & promissa sunt. :: Et dum peccatores se esse intelligentes, à divina justitia timore, quo niliter contentiuntur, ad considerandam Dei
mise

miser cordam se convertendo in spem eriguntur, fidentes Deum sibi propter Christum propitium fore, illumque tanquam omnem iustitiæ fontem diligere incipiunt, ac propterea moventur adversus peccata per odium aliquod, & detestationem.

Ratio generalis est, quia sicut per gratiam habetur participatio divinæ naturæ, quâ homo amicus Dei constituitur, ita per peccatum homo fit voluntarius Dei hostis, participationem divinæ naturæ in se extinguens. Ergo ut homo iustificetur, utque gratia infundatur, prius naturâ exigitur, ut voluntariam gratiæ jacturam homo piis actibus voluntariè retractet; quid enim iustius, quàm ut qui per inordinatos corruptæ voluntatis motus gratiam amisit, fontem vitæ dereliquit, foditque sibi cisternas dissipatas, per motum rursus actualem ad Deum se convertat, ad Deumque redeat, cui non loco, sed affectu proximi sumus, ut gratiam consequatur. Certè quandiu non erit huiusmodi retractatio, semper indispositum erit cor, semper imparatum, semper gratiæ adventui clausum; quia sicut nulla forma potest esse nisi in materia disposita, & multò minùs in indisposita recipi nequit; ita justificationis forma nunquam animam sanctificabit, nisi voluntariè positus peccati obex voluntariè auferatur. Atqui motus illi fidei, spei, dilectionis Dei, contritionis, detestationis peccati, ad infusionem gratiæ prærequisiti habent rationem veræ dispositionis ad gratiam, tum quia animam ad gratiam coaptant, tum quia sunt ordinis supernaturalis, tum quia ut sunt ab efficaci Dei moventis auxilio, infallibilem habent cum gratia connexionem. Ergo pii illi motus ad justificationem prærequisiti habent quidquid
ad

ad rationem veræ dispositionis desiderari solet.

Confirmatur id ipsum, & explicatur amplius. Licet non possit homo propriis naturæ viribus se ad gratiam præparare, cum dispositio debeat esse ejusdem ordinis cum forma, & quidquid homo ex viribus naturæ conetur, sit ordinis naturalis, gratia verò sit ordinis supernaturalis, unde & in Scripturis dicitur: *Præparatur voluntas à Domino.* Et iterum: *Nemo potest venire ad me, nisi Pater, qui misit me, traxerit eum.* Attamen homo supernaturali Dei auxilio adjutus potest sese ad gratiam præparare, & in hoc sensu verum est illud Proverb. 16. *Hominis est animam præparare.* Illud itidem Matth. 25. *Dedit unicuique secundum propriam virtutem,* id est, juxta conatum liberi arbitrii à Deo moti, & excitati. Et sanè illud pueros inter & adultos interest, quod in pueris gratia nullum exigit dispositionis apparatus, quia cum non propria, sed capitis, id est Adami voluntate peccarint, ut gratiam recuperent in baptismo, sola sufficit secundi Adami, id est Salvatoris Christi Domini voluntas, ob cujus merita gratiâ donantur, quâ fuerant alterius voluntate privati; & quidquid nonnulli veteres, quidquid nonnulli moderni excogitent, quo volunt animam pueri ad gratiam apparari, merum commentum est, cum gratia è potentia obedientiali animæ pueri educatur, quæ solâ agentis omnipotentis virtute paratur. Nec magis gratia exigit dispositionem in puero, quàm exigat id quod pro dispositione confingitur. At verò adulti propriis actibus gratiam amittunt, voluntariè à bono incommutabili ad commutabilia

convertuntur, & stercore amplexati utendis fruuntur, fruendis utuntur, vel potius cordis perversitate abutuntur. Ut ergo in gratiam cum Deo redeant, ad ipsum debent propria cordis contriti & humiliari voluntate converti, qui ab ipso fuerant propria luxuriantis, & elati cordis voluntate averfi. Neque id solum in pœnitentibus necessarium est, sed etiam in adultis, qui nullo præcedente peccato justificantur, ut in Angelis, & Adamo contigit; quia Deus nunquam dat gratiam suam nisi volentibus, nec diligit nisi diligentes se: ut ergo homines congruum reddat suæ specialis dilectionis objectum, prius illos gratiâ suâ actuali reddit sui dilectores, facitque eos sitire justitiam prius naturâ, quàm ut eam illis impertiatur. Sed de illis magis dum de pœnitentia.

Dices: Si hominis pœnitentis motus ad gratiam ex natura rei disponerent, homo esset causa efficiens principalis gratiæ; causa quippe ultimæ dispositionis physiciæ ad formam est etiam causa formæ & compositi; sicut quia homo generans est causa principalis dispositionis ad animam rationalem, est etiam causa hominis generati, tamen si anima rationalis à solo Deo creetur. Atqui nulla dari potest causa principalis gratiæ, ut supra ostensum est. Ergo nulla quit dari physica ad gratiam dispositio.

Respondeo tunc solum causam principalem dispositionum ad formam esse causam formæ, quando forma educitur de potentia naturali subjecti; si verò è potentia obedienciali educatur, vel è nihilo creetur, tunc agens creatum produciens dispositiones, nequaquam producit formam, sed ab alio producendam exigit; quia
agens

agens creatum in potentiam obedientialem soli Deo subditum agere nequit, & multò minùs creare. Idque exemplo in objectione allato claret; homo enim producens physicas ad introducendam animam rationalem dispositiones, non propterea animæ rationalis est causa præcipua; est tamen hominis geniti causa principalis, quia anima creata ex vi positarum à generante dispositionum materiæ præparatæ unitur. Gratia autem sanctificans, etsi non creetur nisi lato modo, quia ex nihilo meritorum infunditur (quo sensu intelliguntur Scripturæ aientes cor mundum creari, justos creari in Christo Jesu, esse novas creaturas, ut patet *Psalms. 50. Ephes. 2. & Gal. 6.* Attamen non nisi de obedientiali animæ potentia educitur generatione spiritali, quâ filii Dei sumus, & ex Deo nascimur.

His adde primò, pios voluntatis sese convertentis motus non esse physicas ad gratiam dispositiones, nisi prout ab auxilio supernaturali procedunt; unde licet homo sub adjutorio gratiæ sit motuum illorum causa præcipua, non tamen est causa gratiæ justificantis, quæ ab eo solo producitur, à quo adjutoria gratiæ actualis proficiscuntur. Ita clarè indicat D. Thomas hîc q. 112. art. 3. *Præparatio ad gratiam alio modo potest considerari secundum quod est à Deo movente, & tunc habet necessitatem ad id, ad quod ordinatur à Deo, non quidem coactionis, sed infallibilitatis: quia intentio Dei deficere non potest, secundum quod August. dicit in lib. de prædest. Sanct. quod per beneficia Dei certissimè liberantur quicumque liberantur. Vnde si ex intentione Dei moventis est quod homo, cu-*
jus

*ius cor movet, gratiā consequatur, infallibiliter illam consequitur, secundum illud Ioan. 6. Omnis qui audit à Patre, & didicit, venit ad me. Adde secundò, causam introducentem phycas dispositiones, esse etiam causam principalem formæ, quando ad introductionem istius nulla exigitur conditio ab alio agente pendens; at præter positas à pœnitente dispositiones opus est præterea Dei dignantis, & miserantis favore & benevolentia dispositiones acceptante. Nam ut dicitur Rom. 9. *Non est volentis, neque currentis, sed miserētis Dei.* Tit. 3. *Non ex operibus iustitia, quæ fecimus nos, sed secundum suam misericordiam salvos nos fecit.* Unde absolute Rom. 3. dicimur *iustificati gratis per gratiam ipsius.* Quibus verbis non excluditur cooperatio, & concursus liberi arbitrii ab auxilio divino præmoti, sed significatur solùm & auxilia divinâ misericordiâ dari, & etiam iis datis primam gratiam hominem non promereri. *Quia nihil eorum, quæ iustificationem præcedunt (ut sacrum Tridentinum Concilium sess. 6. cap. 8. docet) si ve fides, si ve opera, ipsam iustificationis formam promeretur.**

De dispositionibus sigillatim.

Sed de dispositionibus illis in speciali paucis agendum est. In primis requiritur fides; nam *sine fide impossibile est placere Deo*, ut dicitur Hebr. 10. Fide etiam ad Deum accedimus, juxta illud Hebr. 11. *Accedentem ad Deum oportet credere, quia est, &c.* Fide credimus vera esse quæ divinitus revelata & promissa sunt. Fide domus Dei fundatur, sicut spe erigitur, perficienda

chari

charitatis amore. Fide voluntas illustratur, eique finis supernaturalis ostenditur, ad quem si justificari avet, converti tenetur.

Sed ad justificationem sola, & otiosa fides non sufficit, quæ teste Beato Jacobo cap. 2. suæ epist. *sine operibus mortua est*. Nec obest, quod in Scripturis non semel dicatur, hominem justificari per fidem, justum ex fide vivere, qui crediderit, & baptizatus fuerit, salvandum esse: non obest itaque; ea enim verba, ut Trident. *sess. 6. cap. 8.* docet, in eo sensu intelligenda sunt, quem perpetuus Ecclesiæ Catholicæ consensus tenuit, & expressit: ut scilicet per fidem idèò justificari dicamur, quia fides est humanæ salutis initium, fundamentum, & radix omnis justificationis, sine qua impossibile est placere Deo, & ad filiorum ejus consortium pervenire.

Observant etiam Interpretes eruditi, Apostolum commendando fidem non excludere opera sanctitatis, quæ tam crebrò, tam seriò in omnibus epistolis tanquam omninè necessaria inculcat vir divinus; sed opera duntaxat legalia, seu legis Judaicæ cæremonias morte Christi abrogatas. Unde signanter Rom. 3. ait: *Arbitrabamur justificari hominem per fidem sine operibus legis*, non Decalogi, quæ naturalis est & indispensabilis; sed cæremonialis, & merè Judaicæ. Unde Hieronymus locum Apostolicum interpretatus, & confidentiam nostri temporis Calvinistarum, totam justificationem uni fidei justitiam Christi sibi etiam post infinita scelera sine ulla satisfactione applicanti, asserentium prænoscingens, sic nefarium errorem & omnium vitiorum caput jugulat: *Abutuntur quid in hoc loco ad destructionem operum justitiæ, solam fidem posse sufficere affirmantes*

mantes, cum tamen alibi dicat Apostolus: Si habuero omnem fidem, ita ut montes transferam, charitatem autem non habuero, nihil mihi prodest. Id ipsum docent alii Patres alibi laudati. Tritum est illud August. serm. 237. Attende ad ipsum fidei nomen; fides enim appellata est, quia fit quod dicitur: fac quod dicis, & fides est Succinit Bernardus: Qui fidem tuam, inquit, ab actu dividis, fidem perimis tuam; fides enim sine operibus mortua est. Munus mortuum offers. Quæ hostia pacifica, ubi discordia? Non Deum placas, sed offendis discors tibi.

Deinde igitur præter fidem desideratur motus spei; nemo enim, ut Ambrosius ait, potest agere poenitentiam, nisi qui speraverit indulgentiam. Unde motum illum requirebat Salvator Marc. 10. Confide fili, remittuntur tibi peccata tua. Requirebat & Apostolus Rom. 8. Spe salvi facti sumus. Requirit & ratio; nam tantum justificationis bonum nemo adultus habet, nisi qui petit; nec petit, nisi qui obtinere à Deo per Christum confidit. Opus est etiam dilectione, quia universa delicta operit charitas, & Magdalene dimissa sunt peccata multa, quia multum dilexit. Converti etiam ad se homines in toto corde postulat; quæ cordis conversio, & totalis conversio sine amore Dei nec esse, nec intelligi potest. Certè justificatio sine iustitia hominis esse nequit, ut nomen ipsum indicat: at iustitia sine charitate nulla est, quia prima iustitiæ regula est Deo amorem reddere, quem debemus, tandiuque homo injustus est, quandiu tributum tam iustum non persolvit. *Charitas inchoata, inquit August. lib. de nat. & grat. cap. ult. inchoata iustitia est; charitas provec̃ta; provec̃ta iustitia est; charitas perfecta, perfecta*

perfecta justitia est. Certè si, teste Apostolo, qui charitatem non habet, nihil est, quomodo qui charitatem non habet, justus esse potest? Nam qui justus est, utique aliquid est, non nihil. Unde etiam infert Bernardus serm. 27. in Cant. *Quantitas cujuscunque anime aestimetur de mensura charitatis, quam habet, ut verbi gratia, quæ multum habet charitatis, magna sit; quæ parum, parva; quæ verò nihil, nihil, iuxta Apostolo, Si charitatem non habuerò nihil sum.* Denique exigitur, ut justificandus post peccata actus contritionis, seu doloris ab amore Dei imperatos eliciat, quibus peccatum detestetur; pœnitere enim eum injuriæ Deo illatæ, & juris divini læsi oportet. Quomodo autem de Deo offenso dolebit, nisi ejus honorem amet? Quomodo injurias divinas lamentans planget, nisi bonum divinum diligat, quod tam audaci scelere attentavit? Quomodo rationem ultimi finis à Deo, quantum in ipso fuit, ablatam restituet, nisi illam amore reddat, ad illumque accedat affectu, qui solum sibi cor præberi concupiscit. Sed de his Deo benè vertente operosius in tractatu de pœnitentia differemus, ubi etiam demonstrabimus, implicare contradictionem, posse adultum sine ullo liberi arbitrii motu justificari.

Pii voluntatis motus, justificationi prævi, nullatenus à gratia habituali, sed ab uno Dei moventis auxilio proficiuntur.

Hanc ultimam speculationis partem subtiliorem magis quàm necessariam breviter cum
 Joanne

Joanne à S. Thoma, Araujo, aliisque adversus nonnullos Thomistas, quibus subscribit novissimè Baptista Gonetus, uti probabiliorē, & juxtā intelligibiliorem paucis defendimus, ut ad utiliora, minusve spinosa festinemus.

Hanc autem nostrā sententiā ita disertè, ita luculenter tradunt Concilia, Patres, & post illos Angelicus Doctor, ut de eorum mente hac in parte dubitare sit tenebras in splendentis solis meridie comminisci. Quid enim apud Concilia & Patres inculcatius, quā omnes pietatis motus justificationi prævios à preveniente & excitante Dei moventis auxilio proficisci, gratiāque secundū liberi arbitrii à Deo moti dispositionem infundi? Cerrè Tridentinum *sess. 6. cap. 5. & can. 3. 4. & cap. 7.* omnem ad justificationem dispositionem in prævientis gratiæ motionem refundit, & gratiæ habitualis in justificatione infusæ gradum libertatis conatui ab auxilio Dei prēmoto respondere docet. *Ut qui per peccatum à Deo aversi erant, inquit cap. 5. per ejus excitantem, atque adjuvantem gratiam ad convertendum se, ad suam ipsorum justificationem eidem gratiæ liberè assentiendo, & cooperando disponantur.* D. etiam Augustinus dispositionem ad justitiā, non justitiæ infusæ, sed adjutorio Christi cor tangenti asserit, *Ideo quippe scriptum est, hominis est preparare cor, inquit lib. 2. cont. duas epist. Pelagian. cap. 8. quia homo preparat cor, non tamen sine adjutorio Dei, qui tangit cor.* Adjutorium autem quo Deus hominis se præparaturi tangit cor, est gratia actualis, non habitualis.

Perpetuus etiam est in hac doctrina S. Thomas. *Conversio est, inquit 1. p. q. 62. art. 2. ad 3. per quam aliquis preparat se ad gratiam habendum,*
&

Et ad hanc non exigitur aliqua habitualis gratia, sed operatio Dei ad se animam convertenti. Si ad præparationem non exigitur gratia habitualis, profectò à gratia habituali non procedit præparatio; id enim maximè exigitur, sine quo res non fit. Ad hoc quod præparet se homo ad usceptionem dñi gratia habitualis, non oportet præsupponere aliquod aliud donum habituale in anima, quia sic procederetur in infinitum: sed oportet præsupponi aliquod auxilium gratuitum Dei interiùs animam moventis, sive inspirantis bonum propositum, inquit lib.2.q.109. art. 6. Ergo dicere ultimam ad gratiam dispositionem ab auxilio Dei moventis non fluere, est manifestè S. Thomæ contradicere. Quæcumque præparatio in homine esse potest, ait q.112. art.2. est ex auxilio Dei moventis animam ad bonum. Si quæcumque præparatio possibilis in homine est ex auxilio Dei moventis: ergo & ultima dispositio ad gratiam justificantem. Sed si dubitas, ne S. Præceptor sub cujuscumque præparationis nomine ultimã dispositionẽ non intellexerit, euge ad id quod ait 3. p.q.89.art.1. ad 2. Actus primus pœnitentis se habet ut ultima dispositio ad gratiam consequendam, alii verò sequentes actus pœnitentie procedunt jam ex gratia & virtutibus. Vides S.Doctorem ibi discrimen illud inter actus ad justificationem disponentes, & justificationem consequentes statuere, quòd posteriores ex gratia habituali procedunt: ergo priores ex solo Dei moventis auxilio proficiuntur.

Id ipsum apertè deducit Joannes à S.Thoma Angelicæ D.Thomæ doctrinæ callentiã & penetratione nulli secundus, ex 1. 28. de verit.

art. 8. ubi S. Doctor ex professo impugnatur sententiam affirmantem gratiam habitualem mediâ contritione causare remissionem peccatorum, quia gratia habitualis contritionem causalitate præcedit; hanc, inquam, sententiam sic impugnatur: *Si gratia per actum contritionis & fidei formata causat remissionem culpe, causabit eam per modum cause efficientis, quod esse non potest. Nam causa effectivè destruens aliquid, prius ponitur in esse, quàm id quod destruit, sit in non esse; non enim ageret in ejus destructionem, quod jam non est: unde sequeretur quod gratia prius esset in anima, quàm culpa esset remissa, quod est impossibile: unde patet quod gratia non per aliquam operationem est causa remissionis culpe, sed per informationem subjecti.* Vides manifestam adversaræ sententiæ jugulationem. Nam oppositi Authores docent, peccatum à gratia habituali remitti mediis actibus pœnitentiæ à gratia habituali, non ab auxilio actuali profectis. Ratio etiam D. Thomæ in illo testimonio argumentoso inclusa peræquè adversariorum sententiam explodit, ac veterum Theologorum placitum, quod ibi S. Thomas confutat. Etenim si ideo non potest gratia efficienter destruere peccatum per contritionem, quia deberet prius existere quàm peccatum remitteretur, profectò non minùs repugnat gratiam habitualem in suam ultimam dispositionem efficienter influere, cum non minùs deberet existere ut dispositionem produceret, quàm ut peccatum aboleret.

Obscurant præclarissima testimonia adversarii distinctionibus inconditis, extortis, nec solum inintelligibilibus, sed etiam solitæ S. Thomæ

mæ loquendi claritati injuriis. Quid enim in do-
 ctina D. Thomæ peregrinum magis, quid ad
 dicendum obscurus, quid ad audiendum ingra-
 tius, quàm gratiam habitualement considerari pos-
 se, & in infundi, & ut infusam; & in fieri, & in
 facto esse; & ut habet esse fluens, & ut habet esse
 ratum, seu & ut emanat à Deo, & ut stat; priori
 ratione dispositiones efficere, posteriori eas se-
 qui; sub primo munere præviā esse, sub secun-
 do pedissequam; in primo rationis puncto com-
 municari, in secundo recipi; primo modo habe-
 re rationem auxilii moventis, secundo rationem
 formæ stantis. Qui potest capere capiat, qui ha-
 bet aures audiendi audiat. Verùm in hujusmodi
 tricis suā satis implicatione ingratiss explican-
 dis, extricandisque non immorabor. Tum quia
 nedum gratia in facto esse, sed etiam in fieri con-
 siderata dispositionum præviarum apparatus
 exigit; non enim à Deo infunditur, nisi in subje-
 ctum præparatum: ergo non minùs repugnat
 dispositiones ad gratiam justificantem præparan-
 tes esse effectivè à gratia habituali ut est in fieri,
 quàm esse ab eadem ut est in facto esse; sicut
 enim gratia habitualis subjectum dispositum exi-
 git ut fiet, ita & ut fiat. Tum quia hac distinc-
 tione incredibilis confusio, & æquivocatio asseri-
 tur D. Thomæ Doctorum omnium limpidissimo
 & accuratissimo. Cùm enim infinitis in locis di-
 cat præparationem ad gratiam habitualement esse
 ab auxilio Dei moventis, si per auxilium Dei
 moventis gratiam habitualement in fieri intellexit,
 gratiam actualem cum habituali millies confu-
 dit; quas tamen tam studiosè distinguere solet.
 Certe si vera est adversariorum sententia, vix ac
 ne vix quidem refutari poterit illius recentioris
 confutata

confutata alibi sententia, qui unam gratiam habitua-
lem ab Augustino propugnata[m] contendit,
unam ab Aquinate intentam; omnia enim, quæ
de vi, impulsu, & impressione divinorum auxi-
liorum SS. Augustinus & Thomas edisserunt,
facile ille de gratia habituali ut in fieri interpre-
tabitur, vel alias nihilo meliores distinctiones
comminiscetur, si prout libet distinctiones con-
fingere, & clarissima testimonia subterfugiis elu-
dere liceat.

Ratio fundamentalis est, quia gratia habitua-
lis necessario supponit dispositiones effectas &
productas, cum non detur nisi subjecto disposi-
to, & quia per actus illos dispositum est. Sed
quod supponit dispositiones effectas & produ-
ctas, eas non efficit, nec producit, alioquin actum
ageret, & prius esset res paranda, quam præpa-
ratio; quod est inintelligibile. Non supponit au-
tem eas productas ex viribus naturalibus liberi
arbitrii: Ergo supponit eas productas ab homi-
ne auxilio Dei moventis adjuto, & prævento.
Neque id solum verum est de gratia in facto es-
se, sed etiam de illa ut est in fieri, ut solitus ad-
versariorum cavillus elidatur; quia non solum
gratia facta, & permanens exigit subjectum dis-
positum, sed etiam gratia non fit, nec infunditur,
nisi quia subjectum dispositum est: gratia enim
non fit in aëre, vel in concavo lunæ, vel suspensa
est ad ostium animæ, sed fit in subjecto, & sub-
jecto disposito per pios actus ab auxilio divino
inseminatos. Certè non est munus formæ præ-
parare sibi materiam, vel subjectum disponere;
sed subjectum ab agente dispositum afficere, &
præparatum informare. Ergo gratia non dispo-
sitiones efficit, sed effectas supponit, ut ipsa

dispositionis nomenclatura per se indicat. Dispositio enim ad formam recipiendam prius naturâ effecta est, quàm forma recipiatur: quod si procedit effectivè à forma, formam existentem utique præsupponit; forma autem accidentalis non præsupponitur existens, nisi in subiecto recepta, cum ejus esse sit inesse: forma autem recepta dispositione non eget ut recipiatur, ut patet.

Objicies primò authoritatem S. Thomæ in 4. dist. 17. q. 1. art. 4. q. 2. ubi sermonem habens de piis illis motibus, qui ad justificationem disponunt, sic habet: *Cum isti motus, qui sunt in ipsa justificatione impii, sint quasi dispositio ultima ad gratia susceptionem, suo modo procedunt quidem in via causa materialis, sed sequuntur in via causa formalis.* Et 1. 2. q. 113. art. 8. ad 2. ait: *Dispositio subiecti præcedit susceptionem forme ordine natura, sequitur tamen actionem agentis, per quam etiam ipsum subiectum disponitur; & idè motus liberi natura ordine præcedunt consequutionem gratia, sequuntur autem gratia infusionem.* Denique S. Doctor ad justificationem nullum præter gratiam habitualement auxilium videtur admittere. *Tota justificatio impii, inquit art. 7. originaliter consistit in gratia infusione; per eam enim & liberum arbitrium movetur, & culpa remittitur.* Ubi S. Doctor non loquitur de auxilio actuali, cum per illud peccatum non remittatur.

Respondeo, his testimoniis nihil effici. Primum quidem nihil concludit; verum siquidem est, pios motus præcedere gratiam in genere causæ materialis (dispositio enim reducitur ad causam materialem, quia materia non causat
nisi

nisi ut disposita) & sequi gratiam in genere causæ formalis; nam gratia adveniens eas informat, perficit, & meritum ipsis confert. Quod verò dispositiones gratiam in genere causæ efficientis sequantur, nunquam, & nusquam dixit. Secundum testimonium nihilo magis urget; non enim dixit D. Thomas, dispositionem quæ præcedit susceptionem formæ, sequi actionem formæ, sed sequi actionem agētis, quo quidem nihil verius, sed nihil contra nos infirmius: unde rectè infert S. Doctor, quod motus liberi arbitrii præcedit naturæ ordine gratiæ habitualis consecutionem, sequitur autem gratiæ actualis infusionem. Tertium denique testimonium non est fortius; ibi enim loquitur S. Doctor de gratia actuali, & ciente ad pios motus: unde formaliter, & accuratè de more loquens, non dixit, in ea consistere formaliter & essentialiter justificationem, & culpæ remissionem, sed *originaliter*; quia origo & initium justificationis in auxilio prævenientis gratiæ positum est.

Objicies secundò: De ratione actus vitalis est ut procedat à principio proximo vitæ, ut conjuncto principio radicali, ut patet in omnibus actibus vitalibus, tam corporeis, quàm spiritalibus, qui procedunt à potentia conjuncta animæ: sed actus contritionis & charitatis sunt vitales vita supernaturali, nam justus ex fide per dilectionem operante vivit. Ergo procedunt ab habitibus charitatis & pœnitentiæ, ut conjunctis gratiæ sanctificanti.

Respondeo hoc argumentum, cui multum confidit Gonet, manifestè Thomistarum doctrinâ confutari, qui una voce dicunt, habituum supernaturalium influxum auxilii actualis su-

pernaturalis influxu posse suppleri. Sic Paulus Dei visionem elicit, non per habitum luminis gloriæ, sed impressione luminis transeunter communicati. Et certè non minoris virtutis est auxilium supernaturale Dei moventis, quàm præmotio physica ordinis naturalis. Ergo sicut ista ad naturales actus ciet, quia etsi non sit vitalis ut quod, ut aiunt, est tamen vitalis ut quod; ita illa ad actus supernaturales vitales poterit pariter permovere, quia nimirum divinæ omnipotentia & actionis imago est, & radius; quæ proinde omnium quæ in actu sunt, & substantiam, & modum, & vitalitatem attingere valet; quia per se primò attingit rationem entis, & consequenter omnes rationes & differentias entis pervadit, ut profundè alicubi docet D. Thomas. Itaque actus vitalis exigit quidem pro fundamento & principio radicali & proximo naturales facultates in essentia radicatæ, putà animam & voluntatem; non tamen necessariò exigit habitum supernaturalem, sed autùm ad meliùs & connaturaliùs operandum. Et ratio horum omnium est, quia nisi supponatur in homine principium radicale & proximum vitæ naturalis, non se movebit homo ad actus suos, quia non habebit internum operationum principium; ut verò eliciat actus supernaturales, exigit duntaxat vim supernaturalem, quâ elevetur ut supernaturaliter efficiat; quod autem vis illa supernaturalis sit habitus, vel motio, perinde est ad supernaturalitatem, quia per alterutram sufficienter elevarur, ut supernaturaliter agat, tametsi habitus desideretur, ut permanenter, & iungatur, & veluti connaturaliter operetur.

Instat Gonetius: Deus non potest supplere vi-
ces

ces principii vitalis; unde si moveret corpus mortuum, motus ille non esset vitalis, quia abesset anima, quæ est principium motus. Hinc etiam fit, Angelos assumentes corpora non vitaliter operari, loqui, comedere, ambulare, quia deest anima, desunt & facultates naturales motuum illorum operatrices. Hinc actus fidei, & spei informis non sunt vitales (fides enim sine operibus mortua est, & qui non diligit, manet in morte:) quia licet procedant ab auxilio Dei moventis, abest tamen gratia, quæ mediis habitibus est principium radicale vitæ supernaturalis. Ergo necessarius, & indispensabilis est gratiæ habitualis influxus.

Respondeo, Deum non posse supplere vices principii vitalis naturalis, quia absente principio naturali vitæ, non erit principium se movens, quia non erit quod se moveat ab intrinseco; potest tamen habitus suppleri per auxilia, quia in ordine ad operandum id faciunt transeunter auxilia, quod præstant habitus permanenter. Quorum rationem fundamentalem paulò superius exposuimus. Ex quibus patet responsio ad duo priora exempla de corpore mortuo, & de corpore ab Angelis assumpto. Exemplum verò fidei & spei informis plus nobis prodest quàm, obsit. Etsi enim actus illi non sint perfectè vitales, quia à gratia non proficiuntur; nec sint meritorii vitæ æternæ, quia abest principium meriti, ideoque dicuntur mortui, quia nihil conferunt ad salutem; attamen reapse vitales sunt, reapse supernaturales: vitales, quia in ipsis eliciendis homo se movet, nec merè passivè se habet supernaturales etiam, quia & objectum supernaturale sub motivo supernatu-

rali respiciunt, & omnes naturæ possibiles vires ac conatus excedunt. Ergo vitalitas supernaturalis nec necessariò, nec indispensabiliter principium radicale remotum, scilicet gratiam; vel proximum, scilicet habitus supponit. Ergo sicut actus fidei non exigit necessariò habitum fidei, ita nec actus contritionis habitum contritionis, seu pœnitentiæ; neque enim vis Dei moventis ad pœnitendum infirmior est vi, & auxilio ciente ad credendum.

Objicies tertiò: Actus contritionis, & dilectionis perfectæ ad justificationem ultimùm disponentes sunt inclinatio actualis ad bonum divinum, ut in se est: Atqui inclinatio ad bonum alicujus naturæ supponit naturam illam, saltem participatam, ut ab ea procedat. Ergo actus contritionis & dilectionis perfectæ gratiæ habituales influxum præsupponunt.

Respondeo inclinationem actualem in bonum alicujus naturæ naturam illam præsupponere, quando permanenter, & connaturaliter fuit, secus si solum transeunter per modum impetus eliciatur; tunc enim sat est, quod ab auxilio fluente divinitus impresso, & habitus vices supplente proficiscatur, ut exemplo visionis Pauli, fidei informis, & aliorum piorum motuum claret. Adde inclinationem ad bonum alicujus naturæ vel supponere naturam, saltem participatam, vel certè ad eam habendam efficaciter conari: sicut calor ad ignem in lignum introductus non supponit naturam ignis in ligno, sed ad eam materiæ ligni asciscendam efficaciter confert. Itaque pii motus ad gratiam justificantem non habitam suspirant, habitam per modum proprietatis consequuntur, non eandem quidem numero

numero, sed specie; sicut calor ad ignem disponens non idem numero procedit à forma ignis (nam eâ adveniente in sententia Aristotelis pereunt omnes funditus dispositiones, daturque resolutio usque ad materiam primam,) sed idem specie.

Objicies quattò: Actus meritorii vitæ æternæ supponunt gratiam habitualem, & ab ea effectivè procedunt; sola enim gratia est principium meriti, quia sola personam reddit acceptam. Atqui actus contritionis & charitatis ultimùm ad justificationem disponentes sunt meritorii vitæ æternæ, *non gratia qua iam habetur, sed gloria qua nondum habetur.* Et ratio esse potest, quia alioquin adultus extra Sacramentum justificatus, & statim post adeptam gratiam ante novos actus pietatis à gratia habituali profectos moriens gloriam sine meritis propriis obtineret; siquidem nullum actum à gratia habituali ortum in illa suppositione eliceret, quod est contra Ecclesiæ sensum gloriam parvulis titulo hæreditatis, adultis verò titulo mercedis merita compensantis asserentem. Ergo dispositiones ad gratiam habitualement ab eadem effectivè fluunt.

Respondeo hoc argumento magis oppositam sententiam premi, quàm nostram. Etenim si pii motus ultimùm ad gratiam disponentes à gratia habituali effectivè procedunt, erunt meritorii primæ gratiæ, cum illi nihil deesse possit ad meritum gratiæ, sicut nec ad meritum gloriæ; maximè quia cum secundùm adversarios illi actus sequantur gratiam in fieri, præcedant verò illam ut in facto esse, factum esse gratiæ utique merebuntur. Nec possunt adversarii ullam disparitatis rationem asserre, cur actus illi proceden-

tes à gratia habituali, & eam ut in facto esse præcedentes, non mereantur factum esse gratiæ, sicut merentur gloriæ remunerationem. Nec possunt dicere, idcirco actus illos gratiam non mereri, quia gratia est in subiecto in eodem instanti reali; non, inquam, id potest dici, quia per bona opera iusti merentur augmentum gratiæ, tametsi istud in eodem instanti consequantur. At repugnat, hominem posse mereri primam gratiam, cum principium meriti non possit cadere sub meritum: unde iusti Rom. 3. dicuntur *iustificati gratis*; quia, ut ait Trid. sess. 6. c. 8. *Nihil eorum qua justificationem præcedunt, siue fides, siue opera, ipsam justificationis gratiam promerentur.* Ergo si dispositiones ad gratiam habitualement præparantes, à gratia habituali prout in fieri procedant, eandem prout in facto esse merebuntur.

In forma ergo directè respondetur, actus ultimò ad justificationem disponentes mereri gloriam æternam, quia etsi à gratia habituali non proficiantur, ab eadem tamen informantur, perficiuntur, & grati Deo redduntur; neque enim gratiæ productionem aliquo instanti reali anteverunt, sed solo naturæ & rationis instanti. Deus porrò, qui non juxta nostras distinctionum & prioritatum naturæ tricās opera iudicabit, sed quæcumque prout reapse sunt, appendet, opera & actus ab homine grato propter se castè elicita sicut non amare non potest, ita non remunerare nequit. Nec propterea ex nostra sententia sequitur, omnes hominis iusti actus, siue naturales, siue supernaturales, esse viæ æternæ meritorios, utpote cum gratia coniunctos. Non sequitur, inquam, quia ut actus
sunt

sint meritorii præmii essentialis, debent vel à gratia habituali procedere, vel ab eadem speciali ratione informari, & si barbarè loqui licet, dignificari: actus autem merè naturales, vel super-naturales, à justo sine imperio charitatis elicit, à gratia nullam hauriunt dignitatem, sed merè concomitanter se habent, sicut manducatio non est dignior in Rege quàm in plebeio; quia actio illa nullam ordinem, nullam relationem habet ad personam regiam quàm regiam. At verò actus pii ad gratiam præparantes, cùm habeant rationem causæ materialis ad gratiam (id enim omnibus dispositionibus cõmune est ex parte materiæ se tenere) à gratia sanctificante speciali modo informantur, perficiuntur, adornantur, ad illamque specialem ordinem, habitudinem, & relationem important: quid ergo mirum, si actus illi, tametsi gratiæ habitualis prævii, eam tamen tam intimè uniti dignitatem à gratia hauriant, eique conjuncti homini in suppositione facta mortem obeunti gloriam sempiternam comparent.

Insistes: Id ipsum contra nos urget, quod contra adversarios retorsimus argumentum. Nam si pii actus ad justificationem disponentes mereantur gloriam, quæ est gratia consummata, quidni merebuntur gratiam habitua-lem?

Respondeo esse disparitatem toto cœlo; pii namque motus ad justificationem præparantes non merentur gloriam, nisi prout informantur à gratia; unde in instanti rationis, in quo nondum intelligitur gratia habitualis, eam non merentur, tametsi ad eam sub auxilio Dei dispo-nant. At verò dum merentur gloriam, à gratia

informantur, quæ est unum totius meriti principium. Alia argumenta rière philosophica congerunt adversarii, quibus nostram sententiam impediunt magis quàm enervent: sed his ambagibus animum tuum, mi Theologe, satis jam, superque fatigatum non gravabo magis; facilè enim inficiari est, quod adversarii pro principiis assumunt. Et omissis tot rationum instantium cavillis, ad justificationis gratiam suspiremus, quæ uno reali instanti ab omnipotenti Deo fit, qui nec eget tempore, nec tarda molimina scit, nec causis anceps suspenditur ullis. Sed gratiam actualem, quâ ad tantum beneficium disponimur, jugiter postulemus. Hæc est, quæ mentem radiis illustrat, cor divini amoris igne inflammat, affectus immutat, dura emollit, rigida inflectit, aspera mitigat, frigida accendit, debilia roborat, vaga stabilis, stabilia confirmat.

Multa alia ex principio superiori speculatione stabilita inferri possent consecraria, quæ alibi in decursu Theologiæ pertractantur. Nonnulla etiam sponte fluentia operosè non agitavimus, quia per se patent. Exempli gratiâ, plenum est à gratia per modum proprietatis virtutes supernaturales manare; cum enim gratia hoc ipso, quod sit participatio divinæ naturæ, habeat rationem, & gerat vices naturæ in ordine supernaturali, ei procul dubio titulo connaturalitatis virtutes debentur, quæ sint veluti illius facultates. Hinc etiam sequitur, gratiam à charitate distingui, quia inclinatio & virtus operativa naturæ à natura distinguitur, alioquin similiter dicam, virtutes omnes infusas cum gratia identificari: igitur cum gratia deesse su-
perna

per naturale, virtutes verò ad operandum sint instituta, eas distingui fatendum est: sicut enim essentiam & virtutes in ordine naturali distinguì Philosophia docet, ita gratiam à virtutibus distinguit solidior Theologia, quæ supernaturalia & naturalia perficere, non destruere docet. Sequitur demùm gratiam in essentia animæ recipi, quia ut ait D. Thomas, per gratiam regeneramur in filios Dei, cum per eam natura divinæ participetur. Generatio autem prius terminatur ad essentiam, quàm ad potentias: ergo prius naturâ in essentia animæ recipitur gratia, quàm potentiis insint virtutes infusæ. De certitudine divinæ gratiæ agemus in fine.

R E F L E X I O.

Hanc divinæ naturæ participationem, ex qua tot bona nobis patentia, & infinita nos latentia jugiter fluunt, jugiter animo versemus. Miremur quomodo creaturam tantoperè magnificet Deus, quomodo erga hominem apponat cor suum. *O pater misericordiarum*, exclamat Doctor Mellissus serm. 5. in dedic. Eccl. *quid apponis erga nos cor tuum?* Scio, scio: *ubi est thesaurus tuus, ibi est & cor tuum.* Quomodo ergo nihil sumus, si thesaurus tuus sumus? Tantum profectò est generationis spiritalis beneficium, ut non solum merita excedat & vota, sed etiam de ea ferè, ac de æterna dicere valeamus: *Generationem ejus quis enarrabit?* Fidem tamen tam plenæ solatii veritati ne detrectes. *Mente consurge*, inquit Magnus Chrysostomus hom. 2. in Matth. *nihilque humile suspicaris.* Filius sempiterni Dei etiam David esse dignatus est,

ut tibi servus patrem faceret ipsum Deum. Quod si ambigis de his quæ ad tuum spectant honorem, ab iis quæ illius sunt, etiam tua discere credere. Quantum consequi potest humana ratio, multò est difficiliùs Deum hominem fieri, quàm hominem Dei filium consecrari. Cùm ergo audieris, quia filius Dei filius sit & David, & Abrahæ; dubitare jam desine, quod & tu, qui filius es Adæ, futurus sis filius Dei. Non enim ita se humiliasset, nisi nos esset exaltaturus. Natus est enim secundùm carnem, ut tu nascerere spiritu: natus est ex muliere, ut tu desineres filius esse mulieris. O Christianismi insperatam, inauditamque dignitatem, quâ servus Dominum patrem vocare audet, judicem suum reus nuncupat genitorem! Sed audemus, inquit Chrysolog. serm. 70. quia præsumptio dicentis non est, ubi auctoritas est jubentis: ipse enim nos hodie dicere sic voluit, qui nos docuit sic orare. Et quid mirum si homines Dei consecravit in filios, quando se hominis dedit, & adoptavit in filium? Proh scelus incuriosi generis humani Hominis Dei sanguine redempti, tantam ad quam vocatur dignationem non attendentis, nec cogitantis in lege gratiæ illud ad literam Davidicum adimpleri, quod Psal. 81. scripsit: Ego dixi, Dii estis. Ubi Augustinus: Manifestum est, inquit, quia homines dicit Deos ex gratia sua deificatos, non de substantia sua natos; ille enim justificat, qui per semetipsum, non ex alio justus est; & ille deificat, qui per seipsum, non alterius participatione Deus est. Qui autem justificat, ipse deificat, quia justificando filios Dei facit; dedit enim potestatem filios Dei fieri. Nam illud beneficium tam ingens, tamque, ut ita dicam,

dicam, opprimens est, ut aliud nec cogitare liceat, nec eloqui.

SPECULATIO I.

Gratie sanctificantis lepores à Patribus delineati representantur.

UT autem illius gratiæ pulchritudine illuciatur, inesceturque animus Christianus, placet præclaram à Patribus ductam picturam, variaque ipsius elogia ob oculos ponere, illamque rudi penicillo describere, quæ omni laude superior nunquam satis commendari potest.

Gratia sanctificans simpliciter & anonomastice gratia dicitur, quia cæteræ quæque vel dispositiones ad illam sunt, vel fructus, vel illius ancillæ, vel certè tutelæ. Illâ filii Dei, fratres Christi, membra corporis ejus, organa Spiritus sancti, Tempa Trinitatis, cives Sanctorum, Domestici Dei, amici & familiares ejus, novæ creaturæ efficiuntur. Hæc est novi gratia Testamenti, quam prædixerunt Prophetæ, ad quam suspirarunt Patriarchæ, quam sanguine suo Redemptor obtinuit. Illâ è captivis liberi, è servis filii, è terrenis cœlestes reddimur. Per illam Christum induimus, in Christo vivimus, in Christo morimur, sepelimur, resurgimus, & in cœlestibus habitamus. Illa ignis est ille divinus, quem Christus venit mittere in terram, quæve eam voluit vehementer accendi: ignis, inquam, non comburens, sed illuminans, sed sanans, sed roborans.

Hac gratiâ vivit animus peccato mortuus. Mors corporis est à spiritu deferri, mors animæ à Deo deferri: per gratiam autem ad animum redit Deus, qui vivificat mortuum dum justificat impium. Ad peccatum valet mors animæ, quam deferuit vita sua, hoc est Deus suus, quæ necesse est opera mortua faciat, donec Christi gratiâ reviviscat. *Sicut ut caro vivat*, inquit Fulgentius lib. de Incarn. & grat. c. 24. *soliis opus est anima; ita quoque ut homo credat, soliis opus est gratia. Et sicut caro nihil operari potest, si eam vivificare anima desinat, sic homo nihil benè velle potest, si ab eo gratia juvamen abscedat. Ut ergo caro vivere possit & operari, presentis anima vivificatione fulcitur: homo quoque ut bonum velit, aut faciat, gratia vivificantis subsidio jugiter adjuvatur.*

Per hanc gratiam suavis benè operandi facilitas infunditur, incipitque justus gravia Dei non esse sentire præcepta: perfecta enim charitas foras mittens timorem, facit præcepti sarcinam levem, non solum non prementem onere ponderum, verum etiam sublevantem vice penarum. Tunc & ignorantix cæcitas pellitur, & injuriæ torpor excutitur, & difficultatis cruciatus temperatur. Tunc justus in spe filiorum Dei glorians non sub lege vivit, sed in lege Domini voluntas ejus; nec est ei lex posita, qui justitiam diligit æquitatis solius illicitis inescatus. Ut enim divinè in epist. ad Galat. scripsit August. *In lege potius est justus quàm sub lege, quia non suâ vitâ vivit, cui coercenda lex imponitur. Ut enim sic dicam, ipsam quodammodo legem vivit, qui cum dilectione justitia justè vivit. Ided Paulo non erat lex imponenda, qui*
diciti

dicat: Vivo autem jam non ego, vivit verò in me Christus. Quis ergo audeat Christo legem imponere, qui vivit in Paulo.

Hinc nascitur optanda animi libertas, ad justè namque faciendum liber non est, nisi qui à peccato liberatus justitiæ cœperit esse servus. Libero quidem arbitrio malè utens homo, & illud perdidit, & seipsum: sed ubi per gratiam Spiritus Dei advenerit, continuò libertas redditur, quia ubi Spiritus Domini, ibi libertas. Perversis actibus, pravâ potissimùm consuetudine ita implicatur animus, ita constringitur, non ferro alieno, sed ferrea voluntate, ut in peccandi necessitatem præcipites agantur, qui perniciofa criminis dulcedine tenti, funes nequeunt rumpere, quos sibi peccando fabricati sunt. At postquam nos Filius hominis gratiâ liberavit, inde factus liberator unde Salvator, libertate agimus, sed libertate redempta, cui Deus est rector; non violatâ necessitate, sed infusâ suavitatē, quâ per donum Spiritus Sancti justitiâ delectati pœnam literæ minantis evadimus, plusque placet quod præcipitur, quàm delectet quod prohibetur. Hic velut artha gratuiti muneris inardescit homo inhærere Creatori, incipitque condelectari legi Dei secundum interiorem hominem, etiam si alia lex in membris legi mentis adversetur. Felix libertas tota in suavitate sita, quâ jejunia, vigiliæ, & quæ laboriosa videntur, in delicias spirituales vertuntur! Nullo modo enim, inquit August. lib. de bon. viduit. c. 21. *sunt onerosi labores amantium, sed etiam ipsi delectant, sicut venantium, aucupantium, vindemiantium, piscantium, negotiantium, ludo aliquo sese oblectantium. Intereſt ergo quia ametur; nam in eo quod*

522 *Lib. VIII. Dissert. IV. Cap. I.*
quod amatur, aut non laboratur; aut si laboratur,
& labor amatur.

Hæc gratia vel una virtus est, vel virtutes omnes habet à se indivulsas: nam gratiam comitatur flagrantissima, & luminosissima charitas: definitio autem brevis & vera virtutis ordo est amoris, & *virtus donatur vera per gratiam*, ait August. *lib. 4. cont. Iul. cap. 3.* Absit enim ut sit in aliquo vera virtus, nisi fuerit justus: absit autem ut sit justus verè, nisi vivat ex fide. Cui consonè S. Thomas *in disput. q. 14 art. 5. ad 5.* docet virtutes sine gratia & charitate posse dici *virtutes secundum Philosophum, non secundum Theologum.* Hinc nascitur fortitudo tolerans omnia propter eum qui amatur; hinc temperantia integrum præbens hominem ei qui amatur; hinc justitia soli amato serviens, & propterea unicuique quod suum est tribuens; hinc prudentia, ea quibus ad amandum Deum adjuvatur, ab eis, quibus impeditur, sagaciter seligens. Hæ virtutes, vel si mavis, una virtus, cujus primitias nunc habemus, unde jam filii Dei ipsa facti sumus, tunc consummabuntur quando Dominum virtutum facie ad faciem videntes, illum sine fine diligemus, magnâque per Spiritum sanctum collatâ abundantia charitatis cadere ulterius omnino non poterimus. *Vna ibi*, inquit August. *de agon. Christ. cap. 9.* & *tota virtus est amare quod videas; & summa felicitas habere quod amas. Ibi enim beata vita in fonte suo bibitur, unde aspergitur aliquid huic humana vita, ut in tentationibus hujus s. culi temperanter, fortiter, justè, prudenterque vivatur.*

Hinc etiam animi vigor intrepidus proficiscitur

citur. Per gratiam enim infirma, & angusta mens. acceptâ gratiæ largioris abundantiam, illud facile sentit & suave, quod antea rebatur impossibile. Sic Apostoli pusilli antè & timidi, misso ad se promisso Spiritu sancto, augeri sibi gratiâ constantiam perceperunt, quæ omnem formidinem foras mitteret, & furorem persequentium non timeret. Tunc cœperunt ardentius velle ac efficacius posse, & proficientes à præceptorum scientia ad tolerantiam passionum, sub nulla jam tempestate trepidantes, fluctus sæculi, & elationes mundi fide supergrediente calcarunt, & morte ipsâ contemptâ, gentibus Evangelium veritatis intulerunt. Quia nimirum informati gratiâ, virtute ex alto induti sunt; Christum ipsum Dei virtutem induerunt, id est divinas Christi virtutes perceperunt, qui humanas in se susceperat infirmitates, ut præclare exponit D. Thomas expendens illud Apostoli, *Christum induistis*, in epistola ad Gal. cap. 3. lect. 9. his verbis: *Qui induitur aliqua veste, protegitur ac contegitur eâ, & apparet sub colore vestis, colore proprio occultato. Eodem modo & qui induit Christum, protegitur & contegitur à Christo Iesu contra impugnaciones & astus; & in eo nihil aliud apparet, nisi quæ Christi sunt. Et sicut lignum accensum induitur igne & participat ejus virtutem; ita & qui Christi virtutes accipit, induitur Christo.*

Hinc deinde vita spiritualis à Sanctis tantoperè commendata derivatur. Quod enim ait Apostolus: *Scimus quia lex spiritualis est, ego autem carnalis sum*; satis ostendit non posse impleri legem, nisi à spiritualibus, qui non fiunt nisi per gratiam. Fit autem homo spiritualis ju-

dicans

dicans omnia, & à nemine iudicatus, quando intus pater auditur & docet, ut veniatur ad filium, auferens cor lapideum, & dans cor carneum; cor aliud, iuxta propheticum oraculum, & spiritum novum dans eis, id est cor cognoscens, & aures audientes, seu donum obediendi, charitatem nimirum & gratiam, *quâ unâ Deo veraciter, & suaviter obeditur*, ut ait Augustinus. Tunc habet justus circumcisionem carnis, quæ est in spiritu, non litera, puram nimirum ab omni illicita concupiscentia voluntatem. Tunc iterum legem Dei sentit in corde suo scriptam, quia in se experitur renovatum quod non omni modo deletum est per vetustatem. Præclare de more Augustinus de Spirit. & lit. cap. 21. *Distat à veteri Testamentum novum, eo quod per novum scribitur lex Dei in corde fidelium, quæ per vetus in tabulis scripta est. Nec istam inscriptionem, quæ justificatio est, poterat efficere in Iudæis lex in tabulis scripta.* Succinit tanto magistro dignus discipulus Prosper lib. contra Collator. cap. 22. *In cordibus digito suo Deus, id est Spiritu sancto scribit novum Testamentum, ut legis plenitudinem, & opera charitatis naturaliter exequantur, reformatæ scilicet, renovatæque naturæ.* In hac ergo lege interiori consistit vita spiritalis, quando nimirum quod forinsecus terret, delectat intrinsecus, & qui per occidentem literam fuerat prævaricator, per vivificantem spiritum dilector evadit. Cæterum de vita spiritali & commendatione vitæ interioris abundè satis tom. 3. loquuti sumus.

Hinc nascitur sapientiæ cœlestis prudentiæ carnis adversa, quam Deus ineffabili cum suavitate infundit, ita ut non ostendat tantummodo

dò veritatem, verùm etiam impertiat charitatem, simul donans & quid agant scire, & quod sciunt agere. Neque enim est alia, quæ vera sit sapientia, vel intelligentia creaturæ rationalis, nisi dilectio Creatoris; nec libero arbitrio hominis ulla potest gratiæ suffragari cognitio, nisi detur ipsius gratiæ spiritalis infusio. *Habemus*, inquit August., lib. 11. de Civit. c. 27. *interioris hominis sensum, quo iusta & iniusta sentimus. Ibi me & esse, & hoc nosse certus sum, & hoc amo, atque amare me similiter certus sum.* Hoc interiori sensu divina iustos sapere ibidem docet, dum se Deum amare sentiunt: Neque enim, addit, *vir bonus meritiò dicitur, qui scit quod bonum est, sed qui diligit. Cur ergo & in nobis ipsis non & ipsum amorem nos amare sentimus, quo amamus quidquid boni amamus? Est enim & amor quo amatur quod amandum non est, & ipsum amorem odit in se, qui illum diligit quo id amatur, quod amandum est.* Possunt enim ambo esse in uno homine; & hoc bonum est homini, ut illo proficiente, quo benè vivimus, iste deficiat, quo malè vivimus, donec ad perfectum sanetur, & in bonum commutetur omne quo vivimus.

Hinc quoque dimanat amabile illud pondus, quo in Deum jugiter ferimur, & dono Dei accensi sursum vehimur, inardescimus, & imus. Nam ut semel & iterum divinus scripsit Augustinus: *Velut amores corporum momenta sunt ponderum, sive deorsum gravitate, sive sursum levitate nitantur; ita etiam corpus pondere, sicut animus amore fertur quòcumque fertur. Ponderibus suis aguntur omnia, loca sua petunt. Minus ordinata inquieta sunt; ordinantur, & quiescunt. Ponderis mei amor meus, eò feror quòcumque feror: lib. 11.*

tes à gratia habituali, & eam ut in facto esse præcedentes, non mereantur factum esse gratiæ, sicut merentur gloriæ remunerationem. Nec possunt dicere, idcirco actus illos gratiam non mereri, quia gratia est in subiecto in eodem instanti reali; non, inquam, id potest dici, quia per bona opera iusti merentur augmentum gratiæ, tametsi istud in eodem instanti consequantur. At repugnat, hominem posse mereri primam gratiam, cum principium meriti non possit cadere sub meritum: unde iusti *Rom. 3.* dicuntur *justificati gratis*; quia, ut ait *Trid. sess. 6. c. 8.* *Nihil eorum qua justificationem præcedunt, sive fides, sive opera, ipsam justificationis gratiam promerentur.* Ergo si dispositiones ad gratiam habitualement præparantes, à gratia habituali prout in fieri procedant, eandem prout in facto esse merebuntur.

In forma ergo directè respondetur, actus ultimò ad justificationem disponentes mereri gloriam æternam, quia etsi à gratia habituali non proficiantur, ab eadem tamen informantur, perficiuntur, & grati Deo redduntur; neque enim gratiæ productionem aliquo instanti reali anteverunt, sed solo naturæ & rationis instanti. Deus porro, qui non juxta nostras distinctionum & prioritatum naturæ tricas opera judicabit, sed quæcumque prout reapse sunt, appendet, opera & actus ab homine grato propter se castè elicitæ sicut non amare non potest, ita non remunerare nequit. Nec propterea ex nostra sententia sequitur, omnes hominis iusti actus, sive naturales, sive supernaturales, esse viæ æternæ meritorios, utpote cum gratia conjunctos. Non sequitur, inquam, quia ut actus
sunt

sint meritorii præmii essentialis, debent vel à gratia habituali procedere, vel ab eadem speciali ratione informari, & si barbarè loqui licet, dignificari: actus autem merè naturales, vel supernaturales, à justo sine imperio charitatis elicit, à gratia nullam hauriunt dignitatem, sed merè concomitanter se habent, sicut manducatio non est dignior in Rege quàm in plebeio; quia actio illa nullum ordinem, nullam relationem habet ad personam regiam quàm regiam. At verò actus pii ad gratiam præparantes, cùm habeant rationem causæ materialis ad gratiam (id enim omnibus dispositionibus cōmune est ex parte materiæ se tenere) à gratia sanctificante speciali modo informantur, perficiuntur, adornantur, ad illamque specialem ordinem, habitudinem, & relationem important: quid ergo mirum, si actus illi, tametsi gratiæ habitualis prævii, cū tamen tam intimè uniti dignitatem à gratia hauriant, eique conjuncti homini in suppositione facta mortem obeunti gloriam sempiternam comparent.

Insistes: Id ipsum contra nos urget, quod contra adversarios retorsimus argumentum. Nam si pii actus ad justificationem disponentes mereantur gloriam, quæ est gratia consummata, quidni merebuntur gratiam habitua-lem?

Respondeo esse disparitatem toto cœlo; pii namque motus ad justificationem præparantes non merentur gloriam, nisi prout informantur à gratia; unde in instanti rationis, in quo nondum intelligitur gratia habitualis, eam non merentur, tametsi ad eam sub auxilio Dei dispo-
nant. At verò dum merentur gloriam, à gratia

informantur, quæ est unum totius meriti principium. Alia argumenta nierè philosophica congerunt adversarii, quibus nostram sententiam impediunt magis quàm enervent: sed his ambagibus animum tuum, mi Theologe, satis jam, superque fatigatum non gravabo magis; facile enim inficiari est, quod adversarii pro principiis assumunt. Et omissis tot rationum instantium cavillis, ad justificationis gratiam suspiremus, quæ uno reali instanti ab omnipotenti Deo fit, qui nec eget tempore, nec tarda molimina scit, nec causis anceps suspenditur ullis. Sed gratiam actualem, quâ ad tantum beneficium disponimur, jugiter postulemus. Hæc est, quæ mentem radiis illustrat, cor divini amoris igne inflamat, affectus immutat, dura emollit, rigida inflectit, aspera mitigat, frigida accendit, debilia roborat, vaga stabilis, stabilia confirmat.

Multa alia ex principio superiori speculatione stabilita inferri possent consecutaria, quæ alibi in decursu Theologiæ pertractantur. Nonnulla etiam sponte fluentia operosè non agitavimus, quia per se patent. Exempli gratiâ, plenum est à gratia per modum proprietatis virtutes supernaturales manare; cum enim gratia hoc ipso, quod sit participatio divinæ naturæ, habeat rationem, & gerat vices naturæ in ordine supernaturali, ei procul dubio titulo connaturalitatis virtutes debentur, quæ sint veluti illius facultates. Hinc etiam sequitur, gratiam à charitate distingui, quia inclinatio & virtus operativa naturæ à natura distinguitur, alioquin similiter dicam, virtutes omnes infusas cum gratia identificari: igitur cum gratia det esse su-
perna

pernaturale, virtutes verò ad operandum sint institutæ, eas distingui fatendum est: sicut enim essentiam & virtutes in ordine naturali distingui Philosophia docet, ita gratiam à virtutibus distinguit solidior Theologia, quæ supernaturalia & naturalia perficere, non destruere docet. Sequitur demùm gratiam in essentia animæ recipi, quia ut ait D. Thomas, per gratiam regeneramur in filios Dei, cùm per eam natura divina participetur. Generatio autem priùs terminatur ad essentiam, quàm ad potentias: ergo priùs naturâ in essentia animæ recipitur gratia, quàm potentiis insint virtutes infusæ. De certitudine divinæ gratiæ agemus in fine.

R E F L E X I O.

Hanc divinæ naturæ participationem, ex qua tot bona nobis patentia, & infinita nos latentia jugiter fluunt, jugiter animo versemus. Miremur quomodo creaturam tantoperè magnificet Deus, quomodo erga hominem apponat cor suum. *O pater misericordiarum*, exclamat Doctor Mellissius serm. 5. in dedic. Eccl. *quid apponis erga nos cor tuum?* Scio, scio: ubi est thesaurus tuus, ibi est & cor tuum. *Quomodo ergo nihil sumus, si thesaurus tuus sumus?* Tantum profectò est generationis spiritualis beneficium, ut non solum merita excedat & vcta, sed etiam de ea ferè, ac de æterna dicere valeamus: *Generationem ejus quis enarrabit?* Fidem tamen tam plenæ solatii veritati ne detrectes. *Mente consurge*, inquit Magnus Chrysostomus hom. 2. in Matth. *nihilque humile suspicaris. Filius sempiterni Dei etiam filius David esse dignatus est,*

ut tibi servus patrem faceret ipsum Deum. Quod si ambigis de his quæ ad tuum spectant honorem, ab iis quæ illius sunt, etiam tua dicere credere. Quantum consequi potest humana ratio, multo est difficilius Deum hominem fieri, quàm hominem Dei filium consecrari. Cum ergo audieris, quia filius Dei filius sit & David, & Abrahæ; dubitare jam desine, quod & tu, qui filius es Adæ, futurus sis filius Dei. Non enim ita se humiliasset, nisi nos esset exaltaturus. Natus est enim secundum carnem, ut tu nascerere spiritu: natus est ex muliere, ut tu desineres filius esse mulieris. O Christianissimi insperatam, inauditamque dignitatem, quæ servus Dominum patrem vocare audet, judicem suum reus nuncupat genitorem! Sed audemus, inquit Chrysolog. serm. 70. quia præsumptio dicentis non est, ubi auctoritas est jubentis: ipse enim nos hodie dicere sic voluit, qui nos docuit sic orare. Et quid mirum si homines Dei consecravit in filios, quando se hominis dedit, & adoptavit in filium? Proh scelus incuriosi generis humani Hominiis Dei sanguine redempti, tantam ad quam vocatur dignationem non attendentis, nec cogitantis in lege gratiæ illud ad literam Davidicum adimpleri, quod Psal. 81. scripsit: Ego dixi, Dii estis. Ubi Augustinus: Manifestum est, inquit, quia homines dicit Deos ex gratia sua deificatos, non de substantia sua natos; ille enim justificat, qui per semetipsum, non ex alio justus est; & ille deificat, qui per seipsum, non alterius participatione Deus est. Qui autem justificat, ipso deificat, quia justificando filios Dei facit; dedit enim potestatem filios Dei fieri. Nam illud beneficium tam ingens, tamque, ut ita dicam,

dīcam, opprimens est, ut aliud nec cogitare liceat, nec eloqui.

SPECULATIO I.

Gratia sanctificantis lepores à Patribus delineati representantur.

UT autem illius gratiæ pulchritudine illuciatur, inesceturque animus Christianus, placet præclaram à Patribus ductam picturam, variaque ipsius elogia ob oculos ponere, illamque rudi penicillo describere, quæ omni laude superior nunquam satis commendari potest.

Gratia sanctificans simpliciter & antonomastice gratia dicitur, quia cæteræ quæque vel dispositiones ad illam sunt, vel fructus, vel illius ancillæ, vel certè tutelæ. Illâ filii Dei, fratres Christi, membra corporis ejus, organa Spiritus sancti, Tempia Trinitatis, cives Sanctorum, Domestici Dei, amici & familiares ejus, novæ creaturæ efficimur. Hæc est novi gratia Testamenti, quam prædixerunt Prophetæ, ad quam suspirarunt Patriarchæ, quam sanguine suo Redemptor obtinuit. Illâ è captivis liberi, è servis filii, è terrenis cœlestes reddimur. Per illam Christum induimus, in Christo vivimus, in Christo morimur, sepelimur, resurgimus, & in cœlestibus habitamus. Illa ignis est ille divinus, quem Christus venit mittere in terram, quæve eam voluit vehementer accendi: ignis, inquam, non comburens, sed illuminans, sed sanans, sed roborans.

roborans, sed perficiens. Illâ sanantur infirmitates, diriguntur obliquitates, temperantur passionés, informantur inclinationes, complanantur difficultates humanæ, habilitantur impotentia. Hæc est cœlestis habitus, quo decoratur anima; sacra affectio, quâ delectat justitia; sancta passio, quâ in cœlum ferimur; pura radix, unde germinant fructus honoris & honestatis; arbor vitæ, quâ vires reficimus, quâ pascimur, & spiritus pinguedine saginamur. Et quemadmodum cor humanum fons perennis est vitæ, unde calor & spiritus in membra singula derivantur; sic Spiritus sanctus (qui à Sancto Thomæ, *cor Ecclesiæ*, sicut Christus caput dicitur) per gratiam istam inhabitans sacrum ignem, & pios motus in animæ facultates, sanctas nimirum cogitationes, & flammantia desideria continenter effundit.

Hanc gratiam Deus Angelis, & protoparentibus contulerat, simul in eis & condens naturam, & largiens gratiam, ut eum amore casto diligerent, qui solus diligendus est; unde & Angelus divinæ *signaculum similitudinis*, homo *ad imaginem & similitudinem Dei* creatus dicitur. Verùm illam peccato deletam divinitatis similitudinem gratia restaurat, quâ interiore homine renovato justitia scribitur, quam culpa deleverat. Eâ gentes ipsæ ad Christum conversæ naturaliter, id est spontè, suaviter, connaturaliter ea quæ legis sunt faciunt, ipsique sunt sibi lex: hoc enim agit spiritus gratia, ut imaginem Dei, in qua naturaliter facti sumus, instauret in nobis. Vitium quippe contra naturam est, quod utique sanat gratia. Vitio lex Dei est deleta de cordibus; ac per hoc vitio sanato,

nato, cum illic scribitur, sunt quæ legis sunt naturaliter; non quod per naturam negata sit gratia, sed potius per gratiam reparata natura. Eâ Deus nos fingit, id est format, & creat, non ut homines, quod jam fecit; sed ut boni homines simus, ut simus in Christo Jesu nova creatura. Illâ non ex sanguinibus, nec ex voluntate carnis, sed ex Deo nati, bonam voluntatem divinitus adipiscimur, quam nemo habere potest, nisi nullis præcedentibus meritis acceperimus veram, hoc est gratuitam de super gratiam. Semper enim in nobis est voluntas libera, sed non semper est bona: aut enim à justitia libera est, quando servit peccato, & tunc est mala; aut à peccato libera est, quando servit justitiæ, & tunc est bona: gratia verò Dei semper est bona, & per hanc fit ut sit homo bonæ voluntatis, qui prius fuit voluntatis malæ. Per hanc etiam fit, ut ipsa bona voluntas, quæ jam esse cœpit, augeatur, & tam magna fiat, ut possit implere divina mandata quæ voluerit; cum valdè, perfectèque voluerit.

Per hanc gratiam in pristinam restituimus sanitatem, in quantum natura, quæ id quod faciendum est, aut cæcitate non videt, aut infirmitate non implet, sine ulla est omnino infirmitate peccati. Per gratiam enim, ut ait Augustinus, sanatio animæ à vitio peccati, per animæ sanitatem libertas arbitrii, per liberum arbitrium dilectio justitiæ per justitiæ dilectionem legis operatio. Tunc autem erit plena justitia, quando plena sanitas; tunc plena sanitas, quando plena charitas; tunc plena charitas, quando videbimus eum sicuti est.

Hac

Hac gratiâ vivit animus peccato mortuus. Mors corporis est à spiritu deferri, mors animæ à Deo deferri: per gratiam autem ad animum redit Deus, qui vivificat mortuum dum justificat impium. Ad peccatum valet mors animæ, quam deferuit vita sua, hoc est Deus suus, quæ necesse est opera mortua faciat, donec Christi gratiâ reviviscat. *Sicut ut caro vivat, inquit Fulgentius lib. de Incarn. & grat. c. 24. solius opus est anima; ita quoque ut homo credat, solius opus est gratia. Et sicut caro nihil operari potest, si eam vivificare anima desinat, sic homo nihil benè velle potest, si ab eo gratia juvamen abscedat. Ut ergo caro vivere possit & operari, præsentis anima vivificatione fulcitur: homo quoque ut bonum velit, aut faciat, gratia vivificantis subsidio jugiter adjuvatur.*

Per hanc gratiam suavis benè operandi facilitas infunditur, incipitque justus gravia Dei non esse sentire præcepta: perfecta enim charitas foras mittens timorem, facit præcepti sarcinam levem, non solum non prementem onere ponderum, verum etiam sublevantem vice penarum. Tunc & ignorantix cæcitas pellitur, & injuriæ torpor excutitur, & difficultatis cruciatus temperatur. Tunc justus in spe filiorum Dei glorians non sub lege vivit, sed in lege Domini voluntas ejus; nec est ei lex posita, qui justitiam diligit æquitatis solius illicitis inescatus. Ut enim divinè in epist. ad Galat. scripsit August. *In lege potius est justus quam sub lege, quia non suâ vitâ vivit, cui coercenda lex imponitur. Ut enim sic dicam, ipsam quodammodo legem vivit, qui cum dilectione justitia justè vivit. Ideò Paulo non erat lex imponenda, qui*
dicat:

dicat: Vivo autem jam non ego, vivit verò in m: Christus. Quis ergo audeat Christo legem imponere, qui vivit in Paulo.

Hinc nascitur optanda animi libertas, ad justè namque faciendum liber non est, nisi qui à peccato liberatus justitiæ cœperit esse servus. Libero quidem arbitrio malè utens homo, & illud perdidit, & seipsum: sed ubi per gratiam Spiritus Dei advenerit, continuo libertas redditur, quia ubi spiritus Domini, ibi liberris. Perversis actibus, pravâ potissimùm consuetudine ita implicatur animus, ita constringitur, non ferro alieno, sed ferrea voluntate, ut in peccandi necessitatem præcipientes agantur, qui perniciofa criminis dulcedine tenti, funes nequeunt rumpere, quos sibi peccando fabricati sunt. At postquam nos Filius hominis gratiâ liberavit, inde factus liberator unde Salvator, libertate agimus, sed libertate redempta, cui Deus est rector; non violatâ necessitate, sed infusâ suavitate, quâ per donum Spiritus Sancti justitiâ delectati pœnam literæ minantis evadimus, plusque placet quod præcipitur, quàm delectet quod prohibetur. Hæc velut arrha gratuiti muneris inardescit homo inhærere Creatori, incipitque condelectari legi Dei secundum interiorem hominem, etiamsi alia lex in membris legi mentis adversetur. Felix libertas tota in suavitate sita, quâ æjunia, vigiliæ, & quæ laboriosa videntur, in delicias spirituales vertuntur! *Nullo modo enim, inquit August. lib. de bon. viduit. c. 21. sunt onerosi labores amantium, sed etiam ipsi delectant, sicut venantium, aucupantium, vindemiantium, piscantium, negotiantium, ludo aliquo sese oblectantium. Interest ergo quia ametur; nam in eo*
quod

522 *Lib. VIII. Dissert. IV. Cap. I.*
quod amatur, aut non laboratur; aut si laboratur,
& labor amatur.

Hæc gratia vel una virtus est, vel virtutes omnes habet à se indivulsas: nam gratiam committatur flagrantissima, & luminosissima charitas: definitio autem brevis & vera virtutis ordo est amoris, & *virtus donatur vera per gratiam*, ait August. lib. 4. cont. Iul. cap. 3. Absit enim ut sit in aliquo vera virtus, nisi fuerit iustus: absit autem ut sit iustus verè, nisi vivat ex fide. Cui consonè S. Thomas in disput. q. 14 art. 5. ad 5. docet virtutes sine gratia & charitate posse dici *virtutes secundum Philosophum*, non *secundum Theologum*. Hinc nascitur fortitudo tolerans omnia propter eum qui amatur; hinc temperantia integrum præbens hominem ei qui amatur; hinc iustitia soli amato serviens, & propterea unicuique quod suum est tribuens; hinc prudentia, ea quibus ad amandum Deum adjuvatur, ab eis, quibus impeditur, sagaciter feligens. Hæ virtutes, vel si mavis, una virtus, cujus primitias nunc habemus, unde jam filii Dei ipsa facti sumus, tunc consummabuntur quando Dominum virtutum facie ad faciem videntes, illum sine fine diligemus, magnâque per Spiritum sanctum collatâ abundantia claritatis cadere ulterius omninò non poterimus. *Vna ibi*, inquit August. de agon. Christ. cap. 9. *& tota virtus est amare quod videas; & summa felicitas habere quod amas. Ibi enim beata vita in fonte suo bibitur, unde aspergitur aliquid huic humana vita, ut in tentationibus huius s. culi temperanter, fortiter, justè, prudenterque vivatur.*

Hinc etiam animi vigor intrepidus proficiscitur

citur. Per gratiam enim infirma, & angusta mens acceptâ gratiæ largioris abundantia, illud facile sentit & suave, quod antea rebatur impossibile. Sic Apostoli pusilli antè & timidi, missò ad se promisso Spiritu sancto, augeri sibi gratiâ constantiam perceperunt, quæ omnem formidinem foras mitteret, & furorẽ persequentium non timeret. Tunc cœperunt ardentius velle ac efficacius posse, & proficientes à præceptorum scientia ad tolerantiam passionum, sub nulla jam tempestate trepidantes, fluctus sæculi, & elationes mundi fide supergrediente calcarunt, & morte ipsâ contemptâ, gentibus Evangelium veritatis intulerunt. Quia nimirum informati gratiâ, virtute ex alto induti sunt; Christum ipsum Dei virtutem induerunt, id est divinas Christi virtutes perceperunt, qui humanas in se susceperat infirmitates, ut præclarè exponit D. Thomas expendens illud Apostoli, *Christum induistis*, in epistola ad Gal. cap. 3. lect. 9. his verbis: *Qui induitur aliqua veste, protegitur ac contegitur eâ, & apparet sub colore vestis, colore proprio occultato. Eodem modo & qui induit Christum, protegitur & contegitur à Christo Iesu contra impugnationes & æstus; & in eo nihil aliud apparet, nisi quæ Christi sunt. Et sicut lignum accensum induitur igne & participat ejus virtutem; ita & qui Christi virtutes accipit, induitur Christo.*

Hinc deinde vita spiritualis à Sanctis tantoperè commendata derivatur. Quod enim ait Apostolus: *Scimus quia lex spiritualis est, ego autem carnalis sum*; satis ostendit non posse impleri legem, nisi à spiritualibus, qui non fiunt nisi per gratiam. Fit autem homo spiritualis judicans

dicans omnia, & à nemine judicatus, quando intus pater auditur & docet, ut veniatur ad filium, auferens cor lapideum, & dans cor carneum; cor aliud, iuxta propheticum oraculum, & spiritum novum dans eis, id est cor cognoscens, & aures audientes, seu donum obediendi, charitatem nimirum & gratiam, *quâ unâ Deo veraciter, & suaviter obeditur*, ut ait Augustinus. Tunc habet justus circumcisionem carnis, quæ est in spiritu, non litera, puram nimirum ab omni illicita concupiscentia voluntatem. Tunc iterum legem Dei sentit in corde suo scriptam, quia in se experitur renovatum quod non omni modo deletum est per vetustatem. Præclare de more Augustinus de Spirit. & lit. cap. 21. *Distat à veteri Testamentum novum, eo quod per novum scribitur lex Dei in corde fidelium, quæ per vetus in tabulis scripta est. Nec istam inscriptionem, quæ justificatio est, poterat efficere in ludæis lex in tabulis scripta.* Succinit tanto magistro dignus discipulus Prosper lib. contra Collator. cap. 22. *In cordibus digito suo Deus, id est Spiritu sancto scribit novum Testamentum, ut legis plenitudinem, & opera charitatis naturaliter exequantur, reformata scilicet, renovataque naturâ.* In hac ergo lege interiori consistit vita spiritalis, quando nimirum quod forinsecus terret, delectat intrinsecus, & qui per occidentem literam fuerat prævaricator, per vivificantem spiritum dilector evadit. Cæterum de vita spiritali & commendatione vitæ interioris abundè satis *rom. 3.* loquuti sumus.

Hinc nascitur sapientia cœlestis prudentiæ carnis adversa, quam Deus ineffabili cum suavitate infundit, ita ut non ostendat tantummodo

dò veritatem, verum etiam impertiat charitatem, simul donans & quid agant scire, & quod sciunt agere. Neque enim est alia, quæ vera sit sapientia, vel intelligentia creaturæ rationalis, nisi dilectio Creatoris; nec libero arbitrio hominis ulla potest gratiæ suffragari cognitio, nisi detur ipsius gratiæ spiritalis infusio. *Habemus*, inquit August., lib. 11. de Civit. c. 27. *interioris hominis sensum, quo iusta & iniusta sentimus. Ibi me & esse, & hoc nosse certus sum, & hoc amo, atque amare me similiter certus sum.* Hoc interiori sensu divina iustos sapere ibidem docet, dum se Deum amare sentiunt: Neque enim, addit, vir bonus merito dicitur, qui scit quod bonum est, sed qui diligit. Cur ergo & in nobis ipsis non & ipsum amorem nos amare sentimus, quo amamus quidquid boni amamus? Est enim & amor quo amatur quod amandum non est, & ipsum amorem odit in se, qui illum diligit quo id amatur, quod amandum est. Possunt enim ambo esse in uno homine; & hoc bonum est homini, ut illo proficiente, quo bene vivimus, iste deficiat, quo male vivimus, donec ad perfectum sanetur, & in bonum commutetur omne quo vivimus.

Hinc quoque dimanat amabile illud pondus, quo in Deum jugiter ferimur, & dono Dei accensi sursum vehimur, inardescimus, & imus. Nam ut semel & iterum divinus scripsit Augustinus: *Velut amores corporum momenta sunt ponderum, sive deorsum gravitate, sive sursum levitate nitantur; ita etiam corpus pondere, sicut animus amore fertur quocumque fertur. Ponderibus suis aguntur omnia, loca sua petunt. Minus ordinata inquieta sunt; ordinantur, & quiescunt. Ponderis meum amor meus, eò feror quocumque feror.* lib. 11.

de Civit. cap. 28. & lib. 13. confell. cap. 9. Et quia pondere illo non ad ima rapimur, sed ad superna attollimur; ideò pondus illud pennas non semel appellat Augustinus, quibus ad Dominum volat animus, ut illi hæreat, cum quo unus spiritus efficitur. Bonum enim nostrum nihil aliud est, quàm illi coherere, cujus unius anima rationalis incorporeo, si dici potest, complexu, veris impletur, fecundaturque virtutibus.

Has divinæ gratiæ dotes è Patribus non tam depromptas, quàm exscriptas si attentius considerasset juratus Ordinis nostri inimicus Petrus à Valle-Clausæ, non scripsisset Joannem Vincen-
tium gratiæ venustate inebriatum in pangendis illius laudibus excessisse. Sed illud in primis advertere debuit, ebrietatem illam, quam ei per ludibrium improperat, à Patribus commendari, subindeque authorem illum, quem carpere voluit, à nesciente quid diceret Petro fuisse celebratum. *Quandiu sumus in corpore*, inquit August. lib. de agone Christiano, cap. 9. *gustemus saltem quàm suavis est Dominus, qui dedit nobis pignus spiritum, in quo sentiamus ejus dulcedinem, & desideremus ipsum vitam fenssem, ubi sobria ebrietate inundemur.*

REFLEXIO.

Hæc cum ita sint, ad illam suspiremus gratiam, quæ (ut tract. de Baptismo, Catechismus Romanus post Tridentinum docet) divina qualitas est in anima inhaerens, ac veluti splendor quidam, ac lux, quæ animarum nostrarum maculas omnes delet, ipsasque animas pulchrior-
res

res & splendidiore redditis. Tam grande, tamque pretiosum bonum, quo ipsam Dei pulchritudinem induimus, peccati sordibus anteponamus. Respondeamus generi, qui genus habemus à Deo; vivamus cœlo cœlesti munere decorati, patris similitudinem moribus referamus, cujus naturam exprimimus; neque perdamus vitiis, quod sumus per gratiam consequuti. Cùm ergo te caro sollicitat, cùm te mundus pertentat, cùm te dæmon invadit, responde: Filius Dei sum, æterno regno natus, paradisi candidatus, & à præcellis filiorum Dei cogitationibus, sanctoque ambitu noli degenerare. Justificatus acceptam gratiam serva, peccator ad illam totis viribus enitere, lachrymis suspira, precibus contende: *Profluens enim largitor Spiritus*, ait Cyprianus epist. 2. *nullis finibus premitur, nec coercentibus claustris intra certa murorum spatia frænatur: manat jugiter, exuberat abundanter; nostrum tantùm sitiât pectus, & pateat; quantum illic fidei capacis asserimus, tantùm gratia inundantis haurimus.*

CAPUT II.

De merito Sanctorum.

GRatia non secus ac charitas magna operatur si est, illius naturam exprimit qui est actus purus, unde otii impatiens vires exerit, ut fructus ferat honoris & honestatis. Potissimus autem gratiæ foetus meritum est præmii supernaturalis

naturalis. Si enim omne naturalis ordinis opus honestum præmium aliquod promeretur, dicente D.Thoma 1. 2. q. 21. art. 3. meritum esse proprietatem ab actu humano indivulsam, procul dubio opus sanctum à gratia Dei proficiens, & imperio charitatis in Deum amore casto relatum, non potest non esse dignum quod præmio supernaturali muneretur. Hanc nobis mercedem promisit ipse Salvator, eamque non denegaturum se vel exiguum aquæ frigida calicem danti, cum juramento spondit, cujus verba cælo etiam, terraque transeuntibus non præteribunt. *Gaudete*, inquit Veritas Matth. 5. & *exultate, quia merces vestra copiosa est in cælo*. Et cap. 10. *Quicumque potum dederit uni ex minimis istis calicem aqua frigida, amen dico vobis, non perdet mercedem suam*. Ne autem credas præmium illud esse aliquid temporale, vel intra naturalis ordinis ambitum inclusum, audi magnificam illam Abrahamo, & unâ justis omnibus factam promissionem. Ego, inquit Genescos 17. *protektor tuus sum, & merces tua magna nimis*. Infra se nihil habet Deus, quo sanctum opus digna mercede muneretur: solus ipse præmium meriti, qui est author merendi. O rem admiratione maiorem! Bonorum nostrorum non indiget Deus noster. *Si justè egeris, quid donabis ei*, ut dicitur Job. 35. *aut quid de manu tua accipiet?* Nihil Deo damus, qui totum à Deo accepimus; nihil illi compendii procreamus, qui sibi sufficientissimus est, & omne bonum; & tamen sancti operis honestate vulnerari se sinit; apponit erga hominem cor suum, & quos elegit sine meritis, dat unde oriantur ex meritis. Quod incepit misericordia,

perficit

perficit iustitia ; & quos clementia invenit indignos se dum sanctificat , invenit eos dignos se iustitia dum coronat. *Misericordia*, inquit Spiritus sanctus Eccles. 16. *facit unicuique locum secundum meritum operum suorum*. Ut igitur christianè possimus operari, ut Deum ipsum de-mereri valeamus, juxta illud Apostoli Hebr. 13. *Beneficentia, & communionis nolite oblivisci; talibus enim hostiis promeretur Deus*: conditiones ad bonum christiani operis meritum explicabimus primùm , deinde quid bonis operibus consequamur, exponemus.

Sciò modernos hujus temporis hæreticos meriti nomen execrari errore quidem satis consequenti ; cùm enim ipsi gratiam sanctificantem evacuent, cùm eam ad denominationem extrinsecam, ad titulum sine re, ad ens rationis, hoc est ad nihilum redigant ; quid mirum si omnem meritum è medio tollant , qui principium meriti, gratiam scilicet Salvatoris, eliminarunt ? Neque hæc nostra , Catholicaque sententia meritis Christi injuria est, ut garriunt Novatores , sed honorifica magis , & gloriosa. Sicut enim in naturalibus nihil de primæ causæ virtute detrahimus, dum participatam, & Deo subordinatam agendi virtutem causis secundis asserimus : ita meritorum Christi infinitudo magis magisque clarescit, si hominibus vim merendi ipsa diffundat, ipsa ex plenitudine sua impertiat. Sanè vis, potestasque Salvatoris eo præclariùs eminet , quo justis communicat non solùm ut justi sint, sed etiam ut justè agant. Sed in hæresi per se absurda confutanda satis jam , & plus quàm satis morati sumus, eam alibi, si res tulerit , operosius confutaturi ; sed quæ polliciti sumus,

exequamur. Tu, Lector, æquo adalto animo, teque oratum volo, tibi ut suadeas, iis quæ hoc capite è D.Thoma, Patribus, & Scripturis dicturi sumus, nihil in tota fermè Theologia vel ad componendos mores utilius, vel ad erudiendos populos salutaris inveniri: & quia eum esse maximum quæstum in animum induxi, quàm maximè servire tuis spiritualibus commodis; ideò pauca selegimus, quibus & eruditioni tuæ pro virili consulerem, & pietati.

SPECULATIO I.

Septem ad Christiani operis meritum conditiones desiderantur, & sigillatim explicantur.

Quia nihil est bono opere pretiosius, nihil mirum si plures ad illud rectè efficiendum conditiones desiderantur.

Prima & secunda conditio: libertas operantis, & operis rectitudo.

Primò igitur ad meritum desideratur agentis libertas. Unde dicitur 1. Cor. 9. *Si enim volens hoc ago, mercedem habeo.* Et Ecclesiasticus cap. 31. docet, Deum ei collaturum bona sua, qui liberè mandata servarit: *Qui potuit transgredi, & non est transgressus; facere mala, & non fecit: ideò stabili sunt bona illius in Domino.* Hinc Patres inculcant, quod ubi necessitas, nec coro-

na, nec damnatio est; nec meritum invenitur, ubi libertas non est. Vide suprà in appendice de quinque propositionibus, ubi hanc veritatem multimodis confirmavimus. Porro cum dicimus, ad meritum requiri libertatem, intelligimus de libertate non solum habituali, sed actuali motu voluntatis expressa. Unde declinando à malo nullus meretur, nisi per actum directum fugere malum, resistere malo, repudiare malum sincera voluntate proponat. Unde Patres spirituales tam crebrò, tam seriò, & juxta tam solide hortantur, ut cuncta quæ agimus, & damna quæ patimur, & mala quæ cavemus, Deo singulis diebus actibus explicitis offeramus.

Secundò ad meritum requiritur rectitudo operis; dicitur enim Rom. 2. *Qui reddet unicuique secundum opera ejus, iis quidem qui secundum patientiam, boni operis gloriam.* Et Gal. 6. *Qua semina verit homo, hæc & metet; quoniam qui seminat in carne sua, de carne & metet corruptionem; qui autem seminat in spiritu, de spiritu metet vitam æternam.* Et 2. Cor. 5. *Omnes nos manifestari oportet ante tribunal Christi, ut referat unusquisque in suo corpore prout gessit, sive bonum, sive malum.* Et ratio est aperta; meritum enim est proprietas honestatis, quæ convenit omni, & soli, & semper: ergo ubi deest operis honestas, desit meritum necesse est. Denique opus meritorium debet esse Deo gratum; non enim munerabit, sed puniet opus exosum, & invisum sibi. Unde 1. Ioan. 2. dicitur: *Fiduciam habeamus ad Deum, quoniam mandata ejus custodimus, & ea quæ sunt placita coram Deo, facimus.* Ubi significat Apostolus, se eatenus fiduciâ obtinendæ salutis concipere, quatenus per gra-

tiam Christi, quæ sunt coram Deo placita, se confidit operari. Manifestum est autem, opus quod non est bonum, nullatenus posse esse Deo gratum; *mundi enim sunt oculi ejus, & ad malum respicere non potest*, ut dicitur *Habacuc 2.* Ergo ut opus sit meritorium, bonum sit necessum est.

Et hoc ita verum est, ut si quando in sacris literis plures homines apud Deum actibus vitiis meruisse reperiuntur, ut patet in Nabuchodonosore, & in obstetricibus Judæorum, quod etiam de Romanis docet Augustinus; attamen in illis non perversam remuneravit Deus voluntatem, sed radium aliquem bonitatis actus pravitati permixtum, ut alibi fusè dum de mixtura boni & mali disputabamus, monstratū est. Unde D. Thomas *q. 114. art. 10.* docet, *quod illa retributiones dicuntur esse divinitus factæ secundum comparationem ad divinam motionem, non autem secundum respectum ad malitiam voluntatis.* Id est, quia in operibus illis aliquid boni malitiæ admixtum fuit, quod à divina motione proficiscebatur; ideo propter illud bonitatis tantillum, aliquid temporalis mercedis receperunt.

Tertia conditio : Status viatoris.

Tertiò requiritur ad meritum, ut homo sit in statu viæ, juxta illud Ecclesiastis 9. *Mortui non habent ultrà mercedem.* Et illud Ecclesiast. 11. *Vbi ceciderit lignum, ibi manebit.* Quibus significatur, nullum post hujus viæ & vitæ statum superesse merito locum. Unde Scriptura & Patres tantopere monent, ut *dum tempus habemus*

bemus operemur bonum ad omnes. Gal. 6. Et Ecclesiastes cap. 9. Quodcumque, inquit, facere potest manus tua, instanter operare, quia nec opus, nec ratio, nec sapientia, nec scientia erunt apud inferos, quò tu properas. Et Veritas Joan. 9. Venit nox, ait, quando nemo potest operari. Frustrà enim sibi homo post hoc corpus promittit, quod in hoc corpore comparare neglexit, inquit August. sentent. 172. apud Prosperum. Et serm. 102. de temp. O homo quare differs de di in diem, sortè habiturus hodie ultimum diem? Et serm. 164. Liceat mihi loqui, & dicere: Corrigan se qui tales sunt, dum vivunt, ne postea velint, & non possint.

Et ratio est, quia meritum tendit ad præmium sicut ad terminum; omnis enim qui meretur, in agone est: ergo adepto præmio cessat meritum, sicut via assequuto termino finitur, & labor cessat obtentâ quiete, & pugna desinit reportatâ victoriâ. Hac de causa nec animæ justæ piacularibus flammis purgatæ, nec Sancti in cælo apud Deum quidquam merentur: impetrare quidem aliquid à Deo orando possunt, mereri certè non possunt.

Quid autem dicendum sit de Enoch & Elia in Paradiso terrestri degentibus, & Antichristum, quem debellaturi, & extincturi sunt, præstolantibus, utrum mereantur, necne, vix ac ne vix quidem, nisi divinando definiri potest. Quis enim scit, vel scire potest, num singulis ætibus habitum gratiæ & charitatis intendant? Num conditionibus mortalitatis exuti, pugnarumque expertes, extra merendi etiam aleam positi sint? Num divinam essentiam identidem videant? Num continua ecstasi à sensibus alieni

electione & indifferentia ad meritum necessaria
careant? Ne velimus esse apertum, quod Deus
statuit esse occultum.

*Quarta conditio : Bonum opus in obse-
quium munerantis cedat ne-
cesse est.*

Hanc conditionem frequenter inculcat Veritas, dum monet, nullius valoris esse opera quàmlibet ardua, si in Dei obsequium minimè relata cupiditati serviant, vel auræ populari. Sic operantes recepisse mercedem suam, *Matth. 6.* attestatur, eosque ibidem tristes hypocritas appellat, quia mœrore simulato religiosum vultum populorum oculis mentiuntur. Væ miseris illis inani sese labore fatigantibus, captantibus ventum, jejunantibus ut videantur, ad ærumnas sempiternas temporali ærumna sternentibus viam, & specie pietatis geminantibus iniquitatem; simulata enim pietas duplex est iniquitas. Næ illi mali mercatores sunt, qui pro futile sanctitatis imagine, quam sectantur, fructum omnem promissionis divinæ leves obsequii sui ostentatores amittunt.

Ratio hujus conditionis est, quia qui meretur, respicit, expectatque à munerante præmium; ideoque studet illius benevolentiam de-mereri: sed nullus alterius animum sibi devincit, in seque propensum & liberalem reddit, nisi operibus in obsequium illius relatis, cujus promereri favorem ambit. Ergo nullus à Deo præmium expectare ullatenus potest, nisi bona quæ agit, in illius honorem & obsequium referantur,

rantur, à quo bona cuncta procedunt. Non vult enim disciplina coelestis magister irreligiosè agi, quod fieri pro religione praecipitur; nec patitur invocantium se laborem, quibus aeternam parat mercedem, infructuosa jactantia vitio deperire, inquit S. Maximus homil. in die Cin.

Dices: Meritum est proprietas honestatis: ergo actus est eo ipso meritorius, quo honestus: sed actus non desinit esse honestus, tametsi in alterius obsequium non cedat: ergo ad meritum operis honesti non exigitur, ut in alterius cedat obsequium, vel honorem.

Respondeo meritum esse proprietatem actus humani, non absolutam, sed relativam; quia cum respiciat primum ab alio conferendum, muneratori servire debet, à quo retributionem expectat; neque enim datur à Domino merces nisi laborantibus in vinea ipsius; nec merces jure exigitur, sed mera gratia petitur, nisi munerator quadantenus astringatur: at quâ lege, quâve æquitate ad ea opera muneranda astringi potest, quæ in alterius obsequium operans devovit, nec remuneranti consecravit? Absit, absurdum est, iniquum est. Quare opera quæque in Dei obsequium non cedentia, vacua sunt, sterilia sunt, inania sunt. *Inane est enim, & vanum*, ait Prælaudatus S. Maximus, *quidquid nullius ponderis, aut virtutis firmitate consistit. Inane est quod cum saeculo prætereunte deficiens, ad vitam non transit aeternam.*

Quinta conditio : Operantis sanctitas.

Quintò nullum opus meritorium apud Deum esse potest, nisi ab homine sancto, id est per gratiam, & charitatem justificato proficiatur. Hanc conditionem apertissimè tradit Apostolus 1. Cor. 13. *Si linguis hominum loquar, & Angelorum, charitatem autem non habeam, factus sum velut assonans, aut cymbalum tinniens. Et si habuero prophetiam, & noverim mysteria omnia, & omnem scientiam, & si habuero omnem fidem, ita ut montes transferam, charitatem autem non habuero, nihil sum. Et si distribuero in cibos pauperum omnes facultates meas, & si tradidero corpus meum, ita ut ardeam, charitatem autem non habuero, nihil mihi prodest.* Vides si-
ne charitate posse quidem esse fidem, aliaque opera per se laudabilia, sed non prodesse. Quid enim suo genere speciosius operibus misericordiæ? quid fide montes transferente illustrius? quid morte patienter tolerata gloriosius? Et tamen si desit sanctitas à charitate parva, si desit recta, bonaque voluntas Dei gloriam quærens, Deo frui avens propter Deum, nihil præclara illa officia conferunt ad salutem. *Ecce venit ad passionem, inquit August. serm. 50. de verb. Dom. cap. 2. Ecce venit & ad sanguinis effusionem, venit & ad corporum incensionem; & tamen nihil prodest, quia charitas deest. Adde charitatem, prosunt omnia; detrahe charitatem nihil prosunt cetera.*

Ratio ad hanc formam sic reducitur : Impos-
sibile

sibile est id quod est mortuum, elicere opera vitæ, quandiu mortuum manet; impossibile est arborem malam bonos fructus edere, & corruptam radicem plantas germinate salutare, vel fontem venenosum puras scaturire aquas, cum nemo det quod non habet; impossibile est personam Deo invisam, hominemque Deo inimicum opera illi accepta, & grata efficere; cum prius respiciat Deus offerentem quàm oblata; prius cor inspiciat, deinde manus, *Respexit ad Abel*, inquit sacer textus Genes. cap. 4. & *ad munera ejus*: ad Cain verò & ad munera illius non respexit. Impossibile est addictum supplicii sempiternis æternam beatitudinem sibi comparare, & carentem principio supernaturali præmium sibi supernaturale à Deo promereri, cum inter causam & effectum, inter viam & terminum, inter medium & finem, inter dispositionem & formam, inter meritum & coronam proportionem esse necesse sit. Atqui homo gratiâ orbis, & in peccato mortali constitutus, spiritaliter mortuus est; qui enim non diligit, manet in morte, nec Deo vivit, qui sibi, qui mundo, qui carni vivit; est etiam arbor mala peccati malitiâ corrupta; est radix venenosa nedum in peccatis concepta, in sordibus nutrita, sed peccato etiam actuali infecta, & omnia inficiens, dum grandi perversitate peccator derelicto fonte aquæ vitæ, & fossis sibi cisternis dissipatis, judicium pervertit, affectus depravat, fruendis utitur, utendis fruitur, nec aliam agnoscit, quàm vitiatæ concupiscentiæ legem; est pariter Deo exosus, utpote qui contra omnipotentem bellare, Regem Regum è solio deturbare, & in ejus locum dæmonem capitalem divini

numinis hostem sufficere molitus est; est denique addictus ignibus æternis, diabolo & Angelis ejus paratis, caretque omni principio supernaturali, gratiâ nimirum, quæ est fons aquæ salientis in vitam æternam. Ergo quandiu in misero illo deget statu, tandiu opera mortua, opera tenebrarum, opera ab omni merendi vi deserta eliciet. Unde quâmlibet splendida ex objecto officia, quâmlibet ardua, & in speciem honesta, decora, composita, ornata fundat exteriùs, meritò tamen vacua, inania, & fumo plena sunt, illis Sodomæ, & Gomorrhæ pomis haud dissimilia, quæ splendenti cortice solos cineres contegunt succo destitutos.

Dices: Ergo frustra peccator operibus ex objecto honestis operam navat, frustra eleemosynas erogat, preces fundit, jejunia frequentat, parentes colit & patriam, aliaque id genus agit, in eisque multiplicandis insudat, quæ nihil conferunt ad salutem.

Respondeo, peccatorem etiam in peccati lethalis statu misero permanentem, non debere ab operibus bonis desinere, ab ipsisque frequentandis cessare. Tum quia Deo bonorum operum praxim præcipienti in omni tenetur statu morem gerere. Tum quia piorum operum exercitio, & iteratorum actuum frequentiam facilitatem sibi asciscit, quâ retentâ si justificari deinceps peccatorem contigerit, alacriùs remotis impedimentis viam mandatorum Dei curret. Tum quia licet his operibus nequeat se peccator ad gratiam præparare, vel eam infallibiliter advocare, & multò minùs eam quavis ratione promereri, illi tamen minora objectacula ponit; unde sit recipiendo divino sese effundenti
lumi

luminis fin aptior, certè minùs ineptus. Et fortassis à misericordia Dei ea impetrabit, quæ nunquam fuisset peccatis peccata addenti concessura. Denique bona illa peccatoris opera licèt plerumque vitiosa sint, utpote à radice cupiditatis & amoris sui, absente charitate profecta; attamen bonitatis ille radius ex objecto per se bono in actus derivatus, Deo non gratus esse non potest, cui omne bonum placet. Præsertim quia bonis operibus potest peccator fidelis ex fide, & auxilio gratiæ finem bonum præstitueret, & tunc illa opera, tametsi non à perfecta charitate profecta, quandam apud Deum merendi vim obtinent; nam misericordes misericordiam consequuntur, ut Veritas *Matth. 8.* promisit, & de superbo Divite ait August. *epist. 89.* quod si qui induebatur bysso & purpura pauperis ulcerosi misertus fuisset, mereretur & ipse misericordiam, id est impetrasset misericordiam, & magnam, quæ est justificatio; & parvam, scilicet bona temporalia, quæ saltem bonis operibus à peccatore factis Deus non denegat, qui nullum linquit sine mercede bonum.

R E F L E X I O.

Si status viatoris unus sit ad merendum idoneus, quid tempus terimus tam pretiosum congregandis cœlestibus thesauris opportunum? Quid virtutibus comparandis non insudamus, quæ solæ sunt ambiendæ divitiæ, & reverà pretiosus census animæ; ut Cassiodorus *lib. de anima, cap. 11.* scripsit? Quid de gratia, quid de merito, quid de virtutibus tam multa dicimus, quæ sanctis operibus assequi, quàm laudibus prosequi

sequi satius foret? Sed magna est, inquit, in virtutis exercitatione difficultas, arcta est via, quâ ad ipsam aditur, confragosum iter & sentibus obsitum. At enim, sodes, nonne ubivis labor necessarius? Quid quæso in humanis sine labore paratur, cum ipsi impii fatigatos se in via iniquitatis minimè diffiteantur? Considera agricolas victum quacumque ratione noctu, & interdiu quæritantes. Cerne mercatores semper & ubique manibus, pedibusque pro virili laborantes, & congregandis divitiis immorientes. Quos labores non suscipit mortalium pectora cogens auri sacra fames? Scrutatur intima, viscera terræ sulcat, venas aperit duras, & refractarias. Numnam fortassis laborat vanitas fastum pro numine colens, dum profunda maris penetrat, quæsitura unionum & lapillorum genera varia, vel saxi latentibus adnata, vel in ostreis recondita? Nunquid laborant milites mundanæ litantes gloriæ? Nemo eorum algores, sudores, vigilias, dietas, plagas enumerare sufficiat. At fortè à labore immunes sunt voluptarii in libidinum cœno volutantes? Minimè gentium. Illi quidem tendunt ad gaudium, sed unde stabile consequantur ignorant. Quid eorum enumerem curas, sollicitudines, timores, & vitii individuum comitem animi mœrorem? Si ergo nihil sine labore, & cura fit, ecqua in re meliùs impensum collocatumque, quàm in virtute comparanda laborem censebimus? Nobisne solis, quibus miranda vitæ æternæ præmia promittuntur, sine cura vivendum, unusque otio & somno indulgendum? Absit. Certè plano non aditur excelsum; non assequitur disciplinam bellicam, nisi quotidie exercitatus armis,

quoti

quotidiano usu palæstræ durans inembra, nutriendi patientiam, laborem assuescens. *Iubet avaritia*, inquit August. in Psal. 118. *ut mare transeas, & obtemperas*: jubeo ego, ait Dominus, *ut ante ostium tuum ex eo quod habes, des pauperi, & piger es ad faciendum antea te opus bonum*. Quid gravaris pati nunc ex remedio, quod non gravaris pati pro vitio; & ut Tertullianus loquitur, quid nausceas ad antidotum, qui hiaisti ad venenum.

Si viatoris duntaxat tempus est ad merendum idoneum, fac dies pleni inveniantur in te; ne sis temporis prodigus, cujus unius avaritia honesta est; si pecuniam tuam ægrè aliis divides, si prædia tua à nullo occupari pateris, tempus quod solum nostrum est, ne profundas; quod bonum est, sine mora, incunctanter, cum omni festinatione age, qui nihil pulchrius facere possis, quàm quod honorat Deum sine dilatione. Memento merendi tempus, quod otiosus consumpseris, redditurum nunquam tibi. Memento temporis meliora prætervolare, deteriora succedere: quemadmodum, inquit Seneca *epi* 9. 108. ex amphora primum quod est sincerissimum, effluit, gravissimum quodque, turbidumque succedit; sic in ætate nostra, quod est optimum, primum est. Id exhaustiri ab aliis negotiis ne patiamur, ut nobis faciem reserveamus. Ergo dum tempus habemus, persuadeamus nobis necesse est, nusquam nobis figendum esse pedem, ne ut Augustinus dixit, ubi dixerimus *sufficit*, ibi hæreamus; ibique, ut ait Magnus Leo, incidamus in deficiendi periculum, ubi proficiendi deposuerimus appetitum. Ergo *nunc tempus acceptabile*, inquit Bernardus, & *aptum*

aptum ad quarendum, in quo planè qui quarit, invenit; si tamen sicut oportet, quarit. Mirum est, mirum de te, homo miser, quod ad mala sis totus avidus, totus sapiens, totus sollicitus; ad bona autem totus durus, totus piger, totus tepidus.

SPECULATIO II.

Prosequutio ejusdem materiei: expendantur duæ momentosæ ad meritum conditiones, promissio Dei, & influxus charitatis.

NE præcedentis speculationis prolixitas foret onerosa, duas reliquas, easque potissimas ad meritum conditiones in hanc rejecimus, quas ordine exponemus.

Sexta conditio: Pactum & promissio Dei ordinantis opus bonum ad præmium.

Sextò præter gratiam sanctificantem dicimus desiderari insuper promissionem Dei paciscentis, & opus in præmium ordinantis, atque acceptantis; nec sufficere voluntatem dandi gratiam, quæ est principium meriti. Ita luculenter tradunt Scripturæ, Concilia, & Patres. *Math.* enim 20. non datur denarius diurnus (quo præmium beatitudinis bonis operibus promissum)

promissum significari Patres passim docent, nisi *conventionem factam cum operariis*. Hinc Patres infra referendi, & sacra Concilia opera justorum ex divina promissione sortiri rationem meriti asseverant, sine qua nullum potest meritum præmio comparari, vel æquari, ut videre est in Trident. *sess. 6. cap. 16.* & in Moguntino *cap. 8. confessionis fidei*. Patres sequitur S. Thomas: *Meritum hominis apud Deum esse non potest*, inquit *art. 1. hujus quæst. nisi secundum præsuppositionem divina ordinationis*. Et ad 3. *Deus non efficitur simpliciter debitor nobis, sed sibi ipsi, in quantum debitum est ut sua ordinatio impleatur*.

Ratio est: Quantumcunque homo gratia habituali coretur, ex eaque eliciat fructus honoris & honestatis, id est opera pietatis & virtutis; nunquam tamen ad ea opera muneranda obligari potest. Deus, nisi sua semetipsum promissione obliget: tum quia obligatio stricta oriri nequit, nisi ex datis & acceptis; nemo enim tenetur reddere qui nihil accipit: Deus autem à nullo accipit; nam ut dicitur Rom. 10. *Quis prior dedit illi, & retribuetur ei*. Et Job 35. *Si justè egeris, quid donabis ei, aut quid de manu tua recipiet?* Vnde August. *serm. 16. de verb. Apost. Debitor factus est, non aliquid à nobis accipiendo; sed quod placuerit promittendo*. Tum quia obligatio inferioris est & dependentis; qui enim obligatur, utique debet; porro qui debet, non est à creditore independens: dependentia autem, vel ipsa dependentiæ obumbratio procul à Deo est, qui cum sit sua lex, suæque regula, nullâ potest obligatione astringi, quæ non à propria voluntate proficiscatur.

Tum

Tum quia , ut optimè ait D.Thomas in 4. dist.
 46.q.1. art.1. q. 1. *Beneficia Dei semper excedunt meritum creatura* ; unde nisi præsupponatur divina promissio , non poterit unquam homo divina beneficia promereri. Hinc Apostolus Rom.8. *Existimo, inquit, quod non sunt condigne passionis huius temporis ad futuram gloriam, qua revelabitur in nobis.* Et August. in Psal.93. *Ecce quantum pretium damus, quodammodo unam siliquam ad accipiendos thesauros sempiternos.* Hac de causa vita æterna gratia ab Apostolo Rom.6. nominatur : *Quia, ut optimè ait S.Fulgent. lib.1. ad Monimum, cap. 10. non solum donis suis Deus sua dona reddit, sed quia tantum etiam ibi gratia divine retributionis exuberat, ut incomparabiliter, atque ineffabiliter omne meritum, quantumvis bona, & ex Deo data humane voluntatis, atque operationis excedat.* Et Tridentinum sess.6.cap. 16. *Iustificatis hominibus, & benè operantibus proponenda est vita aterna tanquam gratia misericorditer promissa, & tanquam merces ex ipsius Dei promissione bonis ipsorum operibus & meritis fideliter reddenda.* Tum quia opera quæcumque bona innumeris Deo titulis debita sunt, eaque potest Deus variis nominibus exigere, quia Creator, quia supremus Dominus, quia ultimus omnium finis : ergo ad ea Deus remuneranda minimè tenetur, nec per ea jus sibi facit homo ad præmium, nisi divina promissio accedat. Ergo nulla sunt sine prævia Dei promissione merita. Cujus etiam signum est, quod ideo opera iustorum in purgatorio existentium, & liberi Beatorum actus, quantumvis à charitate profecti ; nihil tamen apud Deum merentur, quia

quia licet interno valore non careant, ea tamen ad præmium supremus Dominus non ordinavit.

Dices primò cum Vasque existimante quodlibet bonum opus à gratia proficiens, & charitate informatum, esse eo ipso absque ulla Dei paciscentis conventionem, vel sponsione æternæ vitæ meritorium: Meritum est proprietas honestatis, sicut demeritum proprietas iniquitatis: ergo actum bonum honestate supernaturali indivulsè comitatur meritum præmii supernaturalis, sicut malitiam peccati demeritum sequitur, seu meritum pœnæ, quæ peccanti absque ulla Dei paciscentis ordinatione debetur.

Respondeo meritum, ut suprà dicebamus, esse honesti proprietatem, non absolutam, sed relativam, quæ non nisi positis omnibus conditionibus resultat, quæve una deficiente desinit; quia bonum ex integra causa, malum ex quocumque defectu. Una autem ex potissimis conditionibus ad merendum desideratis, est Dei paciscentis ordinatione, sine qua nec Deus attrahitur, nec immenso gloriæ ponderi, beatæque vitæ, in qua cum Deo, & de Deo vivimus, ulla prorsus bona opera comparantur. An autem ad demeritum, vel potius ad meritum pœnæ Dei statuentis ordinatione desideretur, problema est; quia ex una parte peccata à damnatis quotidie patrata augmentum pœnæ non merentur, ut tradit D. Thomas 2. 2. q. 13. art. 4. ad 2. non defectu malitiæ, quæ in inferis consummata est; sed defectu divinæ ordinationis, quæ nullum damnatorum sceleribus supplicium præfinivit. Ex alia verò parte, cum peccator hono

honorem alterius peccando lædat, dum suo rāmīram ingenio indulget, offendentis multæ per se supponitur, donec violatum honorem resarciverit. Quod verò de quotidianis damnatorum peccatis pœnas Deus non sumat, nihil inde contra hoc efficitur; tum quia excessu bonitatis, non toto rigore cum illis agit, qui sicut ultra condignum munerare solet, ita citra condignum castigare. Tum quia non videtur sufficiens ad demerendum in damnatis libertas, qui à gratia deserti, & pœnarum gravitate oppressi, non tam peccatum eligunt, quàm extorquente desperati animi calamitate feruntur, & quâ datâ portâ ruunt. Vnde huic secundæ sententiæ subscribimus.

Dices secundò cum Marco Serra & Baptista Goneto existimantibus Dei ordinantis pactum vel promissionem extrinsecam non esse ad completam meriti rationem necessariam, sed sufficere intrinsecam Dei ordinationem in collatione gratiæ per modum principii meriti inclusam, & veluti imbibitam. Deus hoc ipso quod dat gratiam ut principium meriti, sufficienter ad bona nostra opera muneranda tenetur obligatione, quâ sibi fit debitor; quia enim gratiam liberè largitus est, liberè perseverantiam donat: aliunde verò non ita gratiam diffundit, quin onerosam laborandi, patiendique conditionem imponat. Ergo ad meritum non est absolutè necessaria extrinseca Dei pacificæ promissio; sed sicut motus, & via sponte sua ad terminum tendunt, sicut medium per se ad finem manuducit; ita bonum opus à gratia proficiscens ex principiis intrinsecis, & absque ulla ordinatione gloriam per modum præmii & respi

respicit, & meretur. Et ita docere videtur D. Thomas *art. 1.* dum ait: *Meritum hominis apud Deum esse non potest, nisi secundum præsuppositionem divinæ ordinationis; ita scilicet, ut id homo consequatur à Deo per suam operationem quasi mercedem, ad quod Deus ei virtutem operandi deputavit.* Quibus verbis, ut Gonetius interpretatur, non aliam ad meritum ordinationem S. Doctor requirit, quàm quæ in collatione gratiæ, quæ est virtus supernaturaliter operandi, includitur.

Respondeo hanc sententiam à Vasquesii confutata assertione non nisi verbo tenus differre; nec aliis argumentis fulcitur, quàm quibus per æquè Vasquesii præfata doctrina stabilitur, ut considerandi per se patet. Nam vel adversarii per intrinsecam ordinationem in voluntate conferendæ gratiæ per modum principii meriti inclusæ, intelligunt promissionem præmii in collatione gratiæ in actu exercitro semper includi, nec ab ea posse divelli; quia qui confert principium meriti, quæ gratia est, tacitè etiam, & implicite præmium spondet omnibus operibus à principio illo profectis; vel intelligunt Deum conferendo gratiam iusto, simul in actu signato, explicitè, & expressè decernere gratiam ut principium meriti conferre, operibusque ab ea profectis se obligare præmium iusta distributione impartiri. Si primum dicant, in meram Vasquis sententiam prolabuntur, affirmantis in voluntate conferendæ gratiæ non posse non includi promissionem præmii; quia qui vult dare merendi principium, sese ad opera ex illo principio procedentia muneranda alligat, fitque sibi debitor obligatione è propria & libera voluntate,

tate, quâ gratiam gratis dedit, enata. Si secundum astruant, nostram sententiam confirmant, quæ meritum in nuda, & extrinseca Dei ordinatione nequaquam constituit, ut censuere Nominales solis titulis, solis nominibus, solis denominationibus extrinsecis contenti; sed utrumque exigit, & internam operis à gratia proficiscentis dignitatem, & externam Dei opus illud ad gloriam promerendam acceptantis sponsonem. Quia, ut sæpè diximus, non tenetur Deus opus illud munerare, quod sibi sexcentis alioquin titulis debitum est; nec ullum ei potest à creaturis obligationis jugum imponi, qui suâ solùm voluntate moveretur, suâ solùm bonitate cietur, suâ solùm promissione astringitur, qui fidelis est in omnibus verbis suis, & sanctus in omnibus operibus suis, quive negare seipsum non potest.

Ad argumenta facta penè responsum manet. In collatione quippe gratiæ non essentialiter includitur voluntas opera munerandi, quæ à gratia prodeunt; nam nec opera iustorum piaculibus ignibus purgatorum, nec Beatorum actus quidquam apud Deum merentur, tametsi à gratia, & à charitate efficiantur. Ergo præter opera, quâmlibet laboriosa, præter passionem amore Dei toleratas, Dei requiritur pactum, sine quo nulum merendi jus nanciscimur, sed juxta Salvatoris mandatum *Luc. 17.* indictum, cum fecerimus omnia, quæ præcepta sunt nobis, humiliter, & verè dicimus: Servi inutiles sumus. Exempla autem viæ, & mediæ magis favent Vasquesio quàm adversariis; unde dicendum, illis non assimilari gratiam in ordine ad meritum, nisi supposita Dei ordinatione.

Ad authoritatem S. Thomæ respondeo, idem excidere, qua ratione illâ possint uti adversum nos adversarii, cum tam significanter eò loci dicat S. Doctor: *Meritum hominis ad Deum esse non potest, nisi secundum præsuppositionem divinæ ordinationis.* Unde cum subdit S. Thomas, hominem eam consequi mercedem, ad quam Deus ei virtutem operandi deputavit, verissimum est; sed præsuppositâ semper divinâ ordinatione. Nec obest, si instes cum eodem Goneto, S. Præceptorem post verba relata subjungere: *Sicut res naturalis hoc consequitur per suos proprios motus & operationes, ad quod à Deo est ordinata.* Unde sicut res naturales moventur ad suos fines per collationem virtutum activarum absque ulla extrinseca ordinatione: ita justus per gratiam movetur ad finem supernaturalem, & per bona opera illum meretur. Non obest, inquam, tum quia nimis probat hæc instantia; si quid enim efficit, suadet nullam prorsus exigi Dei promittentis conventionem; & sententiam Vasquis, quam rejicit Gonetius, astruit. Dicendum itaque, velle solum D. Thomam, quod sicut Deus rebus omnibus virtutes indit, quibus in finem moveantur, ad eumque tandem perveniant; ita etiam creaturis rationalibus gratiam infundit, quibus ad Deum ferantur, ad ejusque fruitionem aspirent, & ad hoc duntaxat significandum eam comparisonem adhibuit: ut verò illam mereantur, requiritur insuper divina promissio, sine qua propensionem quidem ad beatitudinem habent, sed jus nullum habent, quia ut ad 3. ejusdem articuli ait idem S. Thomas: *Deus non efficitur simpliciter debitor nobis, sed sibi ipsi, in quantum debi-*

tum

tum est, ut sua ordinatio impleatur. Iustus igitur per bona opera in Deum tendit, quia gratia est fons aquæ salientis in vitam æternam; sed eam non meretur nisi Deus promittat retributionem, quia meritum jus includit; jus autem homo non habet, nisi Deus præmium reddere teneatur; non tenetur autem Deus seclusâ promissione illud munerare, quod innumeris titulis quirit exigere.

Quæri hîc assoler, utrum Deus præmia meritis retribuatur ex stricta justitia commutativa, aut distributiva; an verò ex fidelitate, & gratitudine. Verùm huic quæstioni satis, superque satisfactum manet ex iis, quæ primo Theologiæ libro de divina justitia dicta sunt, ubi fusè satis monstratum est, justitiam commutativam, utporè ab imperfectione inseparabilem, repugnare Deo, secus verò justitiam distributivam: unde ne tradita repetamus, ad hunc telocum, Lector, remittimus, ut pernoscas quid in hacce controversia dicendum sit; piget enim cocta recoquere, versata revertere, ut aliqua pars laboris & tædii minuatur mihi & tibi. Nonnulla tamen annotare operæpretium visum est, quibus nisi fallit me animus, haud parum lucis his, quæ olim dicta sunt, accesserit.

Observato ergo primùm, Deum merita Sanctorum ex justitia munerare; ita enim confidebat divinus Apostolus 2. Timoth. 4. *Reposita est mihi, inquit, corona justitiæ, quam reddet mihi Dominus in illa die iustus iudex.* Non foret autem corona justitiæ, nisi Deus ex justitia redderet præmium, qui purâ misericordiâ largitus est gratiam. Quanvis enim supremus Dominus nulli sit debitor, nulli obligatus, suâ
tamen

tamen promissione astringitur, jusque nobis dat apud se, non aliquid à nobis accepturus, sed quod promiserit, impleturus. *Ido ergo modo* inquit August. *serm. 16. de verb. Apost. possumus exigere Dominum nostrum, ut dicamus: Redde quod promissisti, quia fecimus quod jussisti.* Grandis planè, & prorsus suavis servi in lege Dei ambulantis fiducia, & incredibile solatium, sibi debitum flagitare posse præmium, & jam debitum exigere quod merita excedit, & vota: *Ut antè susciperet gratiam, ait idem August. tract. 3. in Ioan.* præfata Pauli verba ponderans, *miseri- cordem Patrem opus habebat; ut præmium gratiæ, justum judicem.* Gratis quidem nos Deus prævenit in benedictionibus dulcedinis; præven- tos gratis adjuvat, ut bene agant; adjutos gra- tis firmat, ut ne deficient: post certamen tamen, cursumque coronam justitiæ reponit, quia ut ait Concilium Arausicanum II. cap. 18. *Debetur merces bonis operibus, si fiant; sed gratia qua non debetur, præcedit ut fiant.* Dicitur unicuique gratia sine merito, addit S. Prosper lib. 2. de vocat. gent. cap. 2. *unde tendat ad meritum; & datur ante ullum laborem, unde quisque mer- cedem accipiat secundum suum laborem.* Nec propterea hæc justitia gratiam evacuat, quia ea- tenus Deus ex justitia munerat, quatenus ipse sibi sua promissione opera bona munerandi de- bitum imposuit: unde *Deus non efficitur simpli- citer debitor nobis, inquit S. Thomas art. 1. ad 3. sed sibi ipsi, in quantum debitum est, ut sua or- dinario impleatur.* Atque adèò vera semper est Augustini maxima: *Deus dum coronat merita nostra, coronat & dona sua.* Vera itidem Tri- dentini sess. 6. cap. 16. sententia: *Tanta est erga*

erga omnes homines bonitas Dei, ut eorum velit esse merita. quæ sunt ipsius bona.

Observato rursum, quod cum Deus strictæ obligationis sit incapax, non potest præmia ex justitia commutativa retribuere, ut alibi demonstravimus: restat igitur, ut ex justitia distributiva præmia largiatur. Decet enim supremum gubernatorem Deum unicuique juxta meritorum proportionem ex ordinatione suæ sapientiæ, fidelitate promissionis, abundantia bonitatis præmia dispensare. Nec propterea fit nobis debitor, sed sibi, quatenus debitum est, ut suam ipse ordinationem impleat, qui eam liberrimè præstavit.

Septima conditio: Influxus sin actualis, certè virtualis charitatis.

Hanc conditionem inficiantur Vasques & Suares: ille solâ habitus charitatis concomitantiam contentus vult opus quodcumque bonum & à quavis virtute etiam acquisita elicitum, esse vitæ æternæ meritorium, modò opus ab eo, qui est in gratia, fiat, etsi non ab ipsa gratia procedat; iste verò licet actibus virtutum acquisitionum vim promerendi vitam æternam absque influxu aliquo charitatis non concedat, totis tamen viribus contendit actus virtutum infusarum ab homine grato elicitos præmium supernaturale beatitudinis essentialis absque ullo sive actuali, sive virtuali charitatis influxu de condigno promereri. Nostram tamen sententiam Scriptura, Patres, & post illos S. Thomas non tam docent quàm supponunt, utpote ipsis
commu

communissimis christianæ pietatis notionibus
prorsus consentaneam.

Etenim quid in Scripturis inculcatius, quàm
ut omnia propter Deum, omnia in nomine Do-
mini, omnia propter gloriam Dei operemur,
ut seridò nimirum moneamur uni amorì, vel
certè operibus ex amore Dei elicitis meritum
convenire, & præmium respondere. Hinc Apo-
stolus 1. Cor. 10. *Sive manducatis, sive bibitis,*
sive aliud quid facitis, omnia in gloriam Dei fa-
cite. Observat etiam doctus Estius, quod cum
Apostolus, 1. Cor. 13. dicit, nihil prodesse homi-
ni, si charitatis expers omnia distribuat in pau-
peres, & corpus flammis tradat; loquitur de eo
qui opera illa non ex amore Dei facit: quod
ex eo patet, quod Apostolus ea charitatis enco-
mia profert, ut Corinthios factionibus scissos
ad Dei, & mutui amoris officia cohortetur; nec
charitatem commendat ex eo quod faciat filios
Dei, & hæredes regni; sed quia benigna & pa-
tiens omnia suffert, omnia credit, &c. ubi lo-
quitur planè de charitate actuali.

Hinc Veritas oculi simplicitatem, id est puri
cordis Deum purè quærentis sinceram, & ca-
stam intentionem desiderat, Matth. 6. & Luc. 11.
Lucerna corporis tui est oculus tuus; si oculus
tuus fuerit simplex, totum corpus lucidum erit;
si autem oculus fuerit nequam, totum corpus tuum
tenebrosus erit. Ergo sicut sine casti cordis
dilectione nihil prodest; ita diligenti, & pro-
pter Deum quodcumque, quàmlibet specie exile
& leve operanti, nihil non prodest, quia etiam
quisquis potum dederit calicem aqua in nomine
meo, non perdet mercedem suam, ut dicitur Mar-
ci 9. Hinc dilectioni, vel actionibus, aut pas-

sionibus ex amore proficiscentibus respondere præmium essentiale testantur Paulus & Jacobus. Ille 1. Cor. 2. *Oculus non vidit, nec auris audivit, nec in cor nominis ascendit, quæ præparavit Deus iis, qui diligunt illum.* Iste verò cap. 1. suæ epistolæ Catholicæ: *Beatus vir qui suffert tentationem, quoniam cum probatus fuerit, accipiet coronam vitæ, quam repromisit Deus diligentibus se.*

Id ipsum docent Patres. *Mandatum*, inquit Augustinus lib. de spiritu & lit. cap. 14. *servari non potest, nisi fiat ex amore justitiae: non enim fructus est bonus qui de charitatis radice non surgit.* Ad quod firmandum illud Apostoli Galat. 5. profert: *In Christo Iesu neque circumcisio aliquid valet, neque præputium, sed fides quæ per charitatem operatur.* Hac de causa mensuram christianæ justitiæ unam esse charitatem tradit idem Doctor sanctissimus lib. 1. de nat. & grat. cap. 42. & cap. ultimo, his verbis: *Charitas est verissima, lenissima, perfectissimaque justitia. Charitas inchoata, inchoata justitia est; charitas profecta, profecta justitia est; charitas perfecta, perfecta justitia est.* Sanè sicut nullum est, vel esse potest sine justitia meritum, nullum erit sine charitate opus præmii essentialis meritatorium, cum christiana justitia tota ex charitate pendeat, & à charitate ipsa christianæ justitiæ rationem sortiatur. Succinit Bernardus serm. 27. in Cant. *Quantitas cujuscumque animæ aestimetur de mensura charitatis, quam habet, ut verbi gratiâ quæ multum habet charitatis, magna sit; quæ parum, parva; quæ verò nihil, nihil: dicente Apostolo, si charitatem non habuero, nihil sum.* Si nihil æstimandum est, nisi de
mensu

mensura charitatis, quid erit oculus quàmlibet conspicuum à charitate nec formaliter, nec virtualiter impetratum? Nihil profectò erit, quia nihil de charitate habebit. Hinc Magnus Leo *serm. 7. Quadragesima*, expendens illud Veritatis Oraculum *Matth. 25.* *relatum: Quandiu fecistis uni ex his fratribus meis minimis, mihi fecistis*, sic habet: *Quid hoc opere fructuosum? Quid hac humanitate felicius? qua utique laude sua fraudanda non esset, si propter ipsam natura communicationem iuvando homini ab homine praberetur: sed quia quod non ex fidei procedit fonte, ad pramia aeterna non pervenit, alia est conditio operum cœlestium, alia terrenorum.* Ubi S. Pontifex ad opus cœleste, id est prœmii cœlestis meritorium, exigat ut de fidei fonte procedat; fidei, inquam, non informis, & mortuæ, sed vivæ & per dilectionem operantis; nam ut ait idem S. Pater *serm. 5. de jejuniis 7. mensis, cap. 3.* *Duo amores sunt, ex quibus due prodeunt voluntates, ita diversi qualitatibus, sicut dividuntur authoribus. Rationalis enim animus, qui sine dilectione esse non potest, aut Dei amator est, aut mundi: in dilectione Dei nulla nimia; in amore mundi cuncta sunt noxia: & ideo aeternis bonis insipara ille ter inharendum, temporalibus verò transeunter utendum est; ut peregrinantibus nobis, & ad patriam redire properantibus, quidquid de prosperitatibus mundi hujus occurrerit, viaticum sit itineris, non illecebra mansionis.*

Ratio fundamentalis hujus veritatis ex his quæ circa quartam conditionem dicta sunt, liquidò consequitur. Fatentur omnes, opus nequaquam esse posse meritorium, nisi in obsec-

quum munerantis cedat; neque enim ab aliquo præmium operis exigere jure, sed ne quidem honestè possumus cui factum opus non servit; nec ei saltem in eo efficiendo placere concupivimus. Quo, v. g. ne dicam jure, sed qua fronte servus à domino stipendium peteret & mercedem, qui nec domino laboravit, nec laborare unquam conatus est, nec conari voluit, aut cogitavit? Atqui non fit in obsequium Dei, quod in Deum non refertur; nec in Deum quidquam refertur sine imperio formali vel virtuali charitatis, quæ sola Deum quærit, sola Deo placere appetit, sola Deo nos unit, sola ultimum humani cordis finem respicit. Et sanè quomodo potest dici opus in obsequium Dei cedere, quod propter Deum factum non est? quomodo verò propter Deum fieri quidquam sine charitate valet? Ergo sine influxu vel formali, vel certè virtuali charitatis, nullum opus potest esse meritorium præmii essentialis, nec Deus inveniet unquam dignos se, qui non operantur propter se. *Vita aterna in Dei fruitione consistit; motus autem humanae mentis ad fruitionem divini boni est proprius actus charitatis, per quem omnes actus aliarum virtutum ordinantur in hunc finem, secundum quod aliae virtutes impetrantur à charitate. Et ideo meritum vite aeternae primario pertinet ad charitatē, ad alias autem virtutes secundario, secundum quod earum actus à charitate impetrantur*, inquit D. Thomas q. 114. art. 4. Et ut significaret S. Doctor se non modò de actibus virtutum acquisitarum, sed etiam de actibus virtutum infusarum sermonem habere, subjungit responsione ad 3. *Fidei actus non est meritorius, nisi fides per dilectionem operetur*

retur, ut dicitur ad Galat. 5. Similiter etiam actus patientia & fortitudinis non est meritorius, nisi aliquis ex charitate hac operetur, secundum illud 1. Cor. 13. Si tradidero corpus meum, ita ut ardeam, charitatem autem non habuero, nihil mihi prodest.

Idem docet, variisque rationibus illustrat S. Doctor sexcentis aliis loci, brevitatis ergo prætermittendis, in quibus etiam observat, quod ut aliquod opus referatur in Deum, non sufficit ordinatio habitualis, seu concomitantia operis cum habitu charitatis; tum quia ex hoc, quod est in habitu, nullus meretur; sed ex eo quod est, vel fuit in actu: tum quia alioquin venialia hominis iusti peccata essent meritoria, utpote cum habitu charitatis sociata. Sicut autem ad meritum non sufficit ordinatio habitualis, ita non semper exigitur actualis, quæ non solum huius vitæ excedit facultatem, sed operi elaborando impedimento foret, ut patet in exemplo, quod Avicenna ponit de artifice, qui si dum opus suum exercet, semper de regula artis cogitaret, multum in opere impediretur, inquit D. Thomas in 2. dist. 38. q. 1. art. 1. ad 4. Sufficit ergo, & requiritur ordinatio & influxus virtualis, qui virtute præcedentis intentionis perseverat. Et ad hoc oportet, inquit ibidem D. Thomas, quod prius fuerit cogitatio de fine, & quod ratio actiones sequentes in hunc finem ordinaverit; ita quod rectitudo illius ordinationis in actionibus salvetur.

Omnes objectiones absque negotio occupabis, depellesque, si præ oculis habeas, nihil esse Deo, qui est præmium nostrum, dignum, nisi quod sit propter Deum. Etsi enim Scripturæ &

Patres bonorum operum fructus à nobis exigant, et si ad pios actus frequentandos hortentur, illisve præmia polliceantur magna nimis; et si, ut monet Tridentinum sess. 6. cap. 16. *justificatis hominibus proponenda sint Apostoli verba: Abundate in omni opere bono, scientes quod labor vester non est inanis in Domino*; et si denique quibuslibet bonis operibus in sacris literis usque adeò tribuatur, ut etiam qui uni ex minimis suis potum aquæ frigidæ dederit, promittat Christus cum non esse sua mercede cariturum; attamen nisi opera in Deo fiant, nisi virtutes Deo serviant in hominibus, nisi mandata servantur ex amore justitiæ, dormient somnum suum viri divitiarum, nihilque invenient in manibus suis, quia Deus non quantum attendit, sed ex quanto; nec tam censum æstimat, quam affectum, nec pretium dati, sed affectus dantium facit opus dignum mercede. Subauditur ergo semper illa conditio, dum bona opéra inculcantur, præcipiuntur, commendantur; quia reapse nec bona sunt, nisi respiciant summum, & æternum bonum.

Advertendum rursus, quod quia homo justus ex præcepto charitatis in actus amoris Dei identidem prorumpere tenetur & solet, quia ut alibi ex S. Thoma dictum est, præcepta non de habitibus, sed de actibus tradita sunt; ideo per iterationes illos sinceri cordis affectus sanctificantur virtutum acquisitarum actus, quia officia per se honesta virtute in Deum refert, qui se Deo frequentatis amoris ardoribus, & ut loquitur Augustinus, sagittis acutis totum, & ex toto corde devovit. Hac de causa veridicè scripsit S. Doctor quæst. 2. de malo, art. 5. ad 7. *Habentibus chari*

*charitatem omnis actus est meritorius, vel demeritorius; quia si vitiosus est, vel alicujus circumstantiæ pravitate sordens, utique demeritorius est; si verò per se honestus sit, virtute præcedentis & repetitiæ identidem intentionis ad Deum fertur, qui aliunde suapte naturâ in Deum ferri natus est, & sponte proclivis, expectatque charitatis imperium, non secus ac paralyticus motum Angeli, & hominis impulsus in piscinam, Ioan. 5. præstolabatur. Videsis quæ superiùs de præcepto charitatis, dum de gratiæ ad singulos actus necessitate disputabamus, disseruimus, huic, ni me meus fallat animus, instituto non parum opportuna. Accedit, non dixisse D. Thomam, omnem actum in justo esse meritorium, vel demeritorium; meritorium, inquam, præmii essentialis: sufficit enim ex propria ratione actus virtutis infusæ, ut sit meritorius præmii accidentalis; præmium enim essentialiale soli charitati per se respondet, aliis verò quatenus duntaxat ex charitatis radice formaliter, vel virtualiter surgunt. Neque enim numerositas operum, ut alicubi ex S. Augustino aiebat B. Vincentius Ferrerius, nec diuturnitas temporum, sed major charitas, majorque voluntas auget præmium, nimirum essentialiale. Idem docet Hieronymus exponens parabolam talentorum: *Et illum, inquit, qui de quinque talentis decem fecerat, & qui de duobus quatuor, simili Dominus recepit gaudio, non considerans lucri magnitudinem, sed studii voluntatem.* Quod brevius expressit Salvianus lib. 1. ad Ecclesiam Catholicam: *Oblata Deo, non retio, sed affectu placent.* Relege olim dicta de commendatiane vitæ interioris, necnon quæ*

de charitate, ejusque augmento fusè tradidimus.

REFLEXIO.

Si soli amori respondet præmium, quia convenit meritum, quid nunc agis, Lector? quid tempus teris, quod in amando Deo non impendis? Cedò, num Deus meretur amari, numcubi Dei benignitatem sensisti in te claudi? Nunquid non te prior dilexit tantus & tantum, & gratis tantillum & talem? Ergo qui tenes Deum tuum vitæ tuæ non solum gratuitum largitorem, largissimum administratorem, pium consolatorem, sollicitum gubernatorem, sed insuper etiam copiosissimum Redemptorem, æternum conservatorem, ditatorem, glorificatorem, ob hæc beneficia abs te contemnitur, & huc nunc denique redeunt facta tua: Deus excluditur, mundus recipitur, præponitur creatura Creatori.

Si Deum non diligis merito suo, cur non diligis commodo tuo? Non enim sine præmio diligitur Deus, si tamen absque præmii intuitu castissimè diligatur. Charitas enim etsi, quia non quærit quæ sua sunt, mercenaria non sit, mercedis tamen vacua esse non potest, cui uni respondet tota merces, & eo major merces, quo citra mercedis spem diligimus. Itaque ad amorem illum suspiremus, qui per se sufficit, per se placet & propter se; ipse meritum, ipse præmium sibi est amor; præter se non requirit causam, non fructum; fructus ejus usus ejus: amat quia amat; amat ut amet. Quàm mellitè Bernardus serm. 53. in Cant. *Suspectus est mihi amor,*

amor, cui aliud quid adipiscendi spes suffragari videtur. Inirmus est, qui fortè spe subtracta aut exinguitur, aut minuitur. Impurus est, qui & aliud cupit. Iustus amor mercenarius non est. Iustus amor de spe vires non sumit, nec tamen diffidentia damna sentit. Est quod honor Regis iudicium diligit, sed sponsi amor, imò sponsus amor solam amaris vicem requirit, & fidem. Liceat proinde redamare dilectam. Quidni amet sponsa, & sponsa amoris? Quidni ametur amor? Merito cunctis renuntians affectionibus aliis, soli & tota incumbit amor, qua ipsi respondere amor habet in redhitendo amore. Nam & cum se totam effuderit in amorem, quantum est hoc ad illius fontis perenne profuvium?

Hæc cum ita sint, cum mundo præsens fac mente absens ut sis, à Deo ne absis; & si impuri Poëtæ verbis purè uti licet, dies, noctesque ames Deum, Deum desideres, Deum somnies, Deum expectes, de Deo cogites, Deum speres, Deo te oblectes, cum Deo totus sis; Dei fac sis postremo animus & cor, quando tu es Dei; illiusque amoris amore vive, qui amore amoris tui dignatus est mori.

SPECULATIO III.

*Iusti de condigno vitam aeternam
promerentur : hinc ea quæ sub
meritum cadunt, vel cadere pos-
sunt, ordine derivantur & re-
censentur.*

SUPPONENDA est vulgaris, trique distinctio
meriti; aliud namque dicitur meritum de
condigno, quod cum præmio coaptationem per
se habet, illudque jure exigit, nec potest cum
justitia denegari; justitia, inquam, vel stricta
& commutativa, ut contingit in humanis; vel
distributiva, quæ Deo citra obligationis onus
convenit, uni Dei promissioni, uni ejusdem fide-
litati innixa. Alterum appellatur meritum de
cōgruo, quod nullam habet cum præmio æqua-
litate, nullum mercedis exigendæ jus, sed
convenientem duntaxat congruentiam & de-
centiam. Sic, ut alibi dicemus, veteres Patres
jugibus precibus, suspiriis, & lacrymis incarna-
ti Verbi immensum donum, & omnibus meritis
justorum & votis immensum antecellens de
condigno utique non merebantur; tot tamen,
tamque fervidis orationum instantiis flecti
Deum misericordiarum congruebat, quia ami-
cum exorari ab amico decorum est, & Deo præ-
sertim fonti bonitatis convenientissimum. Hoc
prælibato, quid actibus meritoriis consequi pos-
simus, sigillatim sequentibus documentis ex-
ponemus.

Certum

Certum est itaque primò, hominem justum actibus christianis spiritu charitatis elicitis verè mereri augmentum gratiæ, vitam æternam, & ipsius vitæ æternæ, si tamen in gratia decesserit, consequutionem, uti definivit sacra Tridentina Synodus *sess. 6. can. 32*. Et si enim opera justî, ut à libero arbitrio procedunt, præmii immensitatem non exæquent, eadem tamen opera, prout per Dei gratiam & meritum JESU-CHRISTI, cujus justus vivum membrum est, fiunt, digna sunt quæ præmium à Deo promissum de condigno, id est servata proportionem, & æqualitate consequantur. Hoc enim ipso, quod à gratia & Spiritus sancti permoventis impulsu procedunt, per se ducunt ad gloriam, cujus gratia semen est, habens proinde cum fructu virtutis & proportionis æqualitatem. Nam quæ quis seminat, hæc & metet. *Gratia Spiritus sancti, quam in presenti habemus*, inquit S. Thomas quæst. 114. art. 3. ad 3. *Et si non sit aqualis gloria in actu, est tamen aqualis in virtute, sicut semen arborum, in quo est virtus ad totam arborem*. Hac de causa gratia dicitur Joan. 4. *Fons aqua salientis in vitam æternam*. Salit autem per bona opera, quibus in Deum jugiter fertur. Appellatur etiam *pignus hereditatis nostræ*, quia non minùs valet in ratione meriti, quàm hæreditas in ratione præmii, cum utraque sit ordinis supernaturalis; una sit motus, altera quies; prima viæ, secunda terminus; illa medium, ista finis, non consumptionis, sed consummationis.

Dices cum Scoto affirmante, nullum actum bonum ex propriis, sibi que intrinsicis vitam æternam de condigno promereri. Ad meritum requiritur gratuita Dei acceptatio, & liberalis divi

divinæ voluntatis ordinatio ; unde ut suprà dicebamus , eatenus Deus ex iustitia præmium retribuiri , quatenus æquum est , ut sua promissio impleatur. Ergo nulla est interna in operibus sanctis præmii essentialis condignitas , nullus valor æqualis , & ut loquitur Apostolus Rom. 8. *Non sunt condigna passionibus huius temporis ad futuram gloriam , qua revelabitur in nobis.*

Respondéo , ad meritum quidem quodcumque necessariò desiderari Dei ordinantis pactum , promissionem , & acceptationem ; ceterum æterna promissio internum supponit obsequii valorem , sicut pœnæ comminatio facinoris supplicio digni iniquitatem præsupponit. Itaque neque opera sine Dei acceptatione quidquam merentur , neque Deus nisi quæ digna sunt , opera acceptat , & supposita ordinatione non acceptare nequit , qui seipsum negare non potest. Et sic semper verum est , Deum nos *coronare in misericordia & miserationibus* , ut dicitur Psal. 102. Verum itidem , Deum dare *gratiam pro gratia* , ut dicitur Ioan. 1. & *Gratiam Dei esse vitam æternam* , ut habetur Rom. 6. Quia quod præmium Deus sponderit , quod nobiscum pacisci dignatus sit , quod seipsum nostrum voluerit constituere debitorem , dignatio est dignationum , quam ut loquitur Bernardus , expressit amor dignitatis nescius , dignatione dives , de Deoque triumphans. Veridicè ergo scripsit Apostolus , non esse condignas passionibus temporis ad futuram gloriam ; tum quia gloria immensum superat opera , prout à libero arbitrio nudè sumpto procedunt ; sicut filius Regis primogenitus ex ignobili muliere in uxorem Regis

Regis assumpta natus, sceptrō & corona prout à matre oriundus proflus indignus est; quatenus tamen à regia stirpe natus, dignissimus est qui ad fastigium regale provehatur. Tum etiam, quia non comparat Apostolus merita gratiæ cum præmio, sed tempus passionis cum æternitate felicitatis, ut certantes fideles soletur, quasi dicat: quantaquanta sit tribulatio, quâ premimur, conferri tamen cum æternitate solatii quod speramus nequaquam potest; pœna enim, quæ guttatim per minutias transiens bibitur, sin nihil, certè parum est torrenti voluptatis æternæ, fontis vitæ, fluminis impetui, fluvio pacis, mari lætitiæ sempiternæ comparata. *Quod momentaneum est, & leve tribulationis nostræ, æternum gloria pondus operatur in nobis. 2. Cor. 4.*

Instabis: Illud non meremur de condigno, quod potest Deus sine iustitia denegare; denegare enim dignis id quo digni sunt, æquitas non sinit. Atqui Deus iustis potest gloriam æternam sine iniustitia denegare; illud namque sine alicujus injuria denegatur, quod merâ misericordiâ donatur; Sancti autem cum Propheeta Regio misericordias Domini in æternum cantabunt, dicetque unusquisque: *Salvum me fecit, quoniam voluit me.* Ergo iusti operibus sanctis vitam æternam de condigno non merentur.

Respondeo, Deum absolutè posse præmium bonis operibus denegare, qui ea poterat auctoritate supremi Domini jure exigere; sed supposito pacto nobiscum inito, præmium ex iustitia largitur, quia ut ait Augustinus lib. 3. cont. Iul. cap. 3. *Deus ipse, quod absit, non erit iustus, si ad ejus regnum verus non admittitur iustus.* Idque

Idque indigitat Apost.Hebr.6.*Non est injustus Deus, ut obliviscatur operis vestri.* Unde vita æterna Sanctis collata opus est misericordiæ, & unà effectus justitiæ; opus quidem misericordiæ, quia ex gratuita prædestinatione proficiscitur, & quia gratia sanctificans, quæ vitæ æternæ semen est, misericorditer datur. Est etiam effectus justitiæ, quia condignis pietatis operibus ex Dei promissione tribuitur; & ideo Patribus invenitur quandoque dictum, bonis operibus regnum cælorum emi, paradisum venalem esse, cum labore requiem, cum paupertate regnum, cum dolore gaudium, cum utilitate gloriam, cum morte vitam commutari. Hinc Basil. lib. de Spirit. sancto, cap.24. *Omnes qui viam Evangelicam incedimus, mercatores sumus, per opera mandatorum nobis possessionem cælestium comparantes.* Itaque sicut in aliis operibus, ita in glorificatione Sanctorum verum esse probatur illud Psalmographi Psal. 24. *Vniuersa via Domini misericordia & veritas.* Illud etiam S.Leonis serm.1.de jejun.10. mensis: *In operibus Dei atque iudicii nihil vacat à veritate iustitia; nihil à miseratione clementia.*

Insistes: Nihil pervulgatius, quàm Deum ultra condignum justorum operibus præmia re-
pendere, & è contra iniquorum flagitia citra condignum castigare: Sed præmium, quod est ultra condignum, non cadit sub meritum de condigno: Ergo iusti non merentur præmium cæleste de condigno.

Respondeo Deum ultra condignum duplici ratione munerare, tum quia ultra dignitatem actus seorsum spectati, ut à voluntate procedit,
præmia

præmia largitur; tum quia probabilissimum est Deum Beatis gradum aliquem gloriæ gradus charitatis viæ excedentem pro sua infinita liberalitate impertiri, idque indicat Salvator Luc. 6. *Mensuram bonam, & confertam, & coagitatam, & superfluentem dabunt in sinum vestrum.* Id ipsum indigitat Hieronymus lib. 2. super Ezechielem. *In sanctis Deus excedit modum clementia.* Sed cum his stat justos gradus gloriæ gradibus gratiæ correspondentes de condigno promereri.

An verò Deus peccatores citra condignum puniat, inficiantur nonnulli, quos sequitur Sylvius: tum quia Apocal. 18. dicitur: *Quantum glorificavit se, & in deliciis fuit, tantum date illi tormentum, & luctum.* Tum quia Matth. 5. reus in carcerem mittitur, ibi puniendus, nec inde exiturus, donec reddat novissimum quadrantem. Tum quia Jacobi 2. dicitur, *judicium sine misericordia illi qui non fecit misericordiam*; id est, ita Deum immisericors, corde durus, & mente occallens in judicio sentiet severum, ut quemadmodum nullam ipse misericordiam in proximum fudit, ita nullam à Deo claudente viscera sua experietur. Tum quia non remittitur pœna, nisi tollatur & culpa: in inferis autem, ubi nulla remissio, nihil prorsus de pœna tollitur; nihil ergo de pœna donatur. Tum denique, quia omnis remissio pœnæ fit per meritum Christi; meritum autem Christi in damnatos nequaquam protenditur, ut in materia de incarnatione ostendi solet. Ergo nullam pœnam damnatis Deus remittit.

Oppositum tamen docet S. Thomas 1. p. q. 22. art. 4. ad 1. his verbis: *In damnatione reprobo-*

rum apparet misericordia, non quidem totaliter relaxans, sed aliquammodo allevians, dum punit citra condignum. Et certè id videtur exigere circumstantia illa generalis, omnia Dei opera concomitans, justitiæ scilicet, & misericordiæ indivisa & indivulsa manifestatio. Dicitur etiam Psalm. 76. & Psal. 144. *Deum non continere in ira sua misericordias suas: Suavem esse Dominum universis, & miserationes ejus super omnia opera ejus.* Et sanè non videtur peccatum de condigno posse puniri; malitia enim ejus infinita, nullâ quit pœnâ finitâ condignè plecti.

Ad auctoritates oppositas dicendum in primis, loca Scripturæ juxta præfinitam à Deo pœnam intelligenda fore, quæ tanta infligeretur, quantum in deliciis peccator fuit, quia luxuriæ fluxui, & intensiori determinata Deus tormenta præscripsit, sed absolutè citra condignum; præscriptam tamen pœnam usque ad ultimum quadrantem, & sine misericordia luent, qui nulla misericordia in proximum permoti sunt.

Ad rationum momenta subjuncta dico, nullam in inferis contingere remissionem, quia præscriptam sine remissione pœnam subeunt, qui suppliciiis illis addicti sunt. Quod autem in præscribenda pœna Deus misericors citra condignum punire non decreverit, non probat argumentum primum à ratione petatum: nec etiam secundum, quia cùm fateamur nullam pœnæ remissionem damnatis contingere, sed præfinitam sine remissione subire, non meritis Christi citra condignum puniuntur, qui à semel imposita pœna nunquam liberantur, sed unâ clementiâ Creatoris, in cujus omnibus & singulis operibus misericordia & veritas ob-

viave

viaverunt sibi ; iustitia , & pax se osculatae sunt.

Perfistes adhuc : Si ideo actus iusti gloriam de condigno merentur , quia sunt ejusdem ordinis , & intensiōnis cum gloria , dici etiam poterit , actus charitatis & pœnitentiæ justificationem prioritate naturæ præcedentes primam gratiam sanctificantem promereri ; actus enim illi , & verè supernaturales sunt , ad justificationis formam physicè disponentes , & à Spiritu sancto vero meritorum authore procedunt , & proportionem habent cum gratia , cujus quantitas eorum fervori respondet. Atqui his non obstantibus , actus illi quàmvis sancti & fervidi , primam gratiam non merentur , saltem de condigno , ut cum D. Thoma *quæst. 114. art. 5.* docent omnes Theologi. Ergo iusti operibus sanctis gloriam de condigno non merentur.

Respondeo constantissimum esse , hominem quibuscumque operibus primam gratiam , sive actualem , sive habitualem non posse mereri ; non quidem actualem , ut contra Pelagianos toties definitum est , & declarat Tridentinum *sess. 6. c. 5.* ubi docet , *justificationis exordium in adultis à Deo per Christum Iesum præveniente gratia sumendum esse , hoc est , ab ejus vocatione , quâ nullis eorum existentibus meritis vocantur.* Non possunt etiam iusti primam gratiam habitualem promereri , quia gratia habitualis una est meriti origo , quia sola personam reddit acceptam , & Deo gratam : principium autem meriti non potest cadere sub meritum , quia effectus causam efficientem antevertere non potest : ergo totus ille , & tam præclarus dispositionum apparatus gratiam justificantem promereri nullo modo

do potest. Unde Sancti dicuntur ad Rom. 5. *Justificati gratis per gratiam ipsius. Quia, ut interpretatur Tridentinum sess. 6. cap. ... Apostolica illa verba ponderans, nihil eorum, quae justificationem præcedunt, siue fides, siue opera, ipsam justificationis gratiam promeretur.* Hac de causa nihil apud Patres inculcatius, quàm dari unicuique sine merito unde tendat ad meritum; & nullo præcedente bono merito hominem accipere donum, quo medio acquirat & meritum. Sufficiat hoc unum & alterum Augustini, & Magni Gregorii testimonium. Ille enim *libro de grat. & lib. arb. cap. 6.* sic habet: *Cui redderet coronam justus Iudex, si non donasset gratiam misericors Pater?* Iste verò *lib. 18. Moral. cap. 22.* ait: *Homini meritum divina gratia non ut veniat invenit, sed postquam venerit, facit; atque ad indignam mentem veniens Deus, dignam sibi exhibet veniendo, & facit in ea meritum quod remuneret.*

Ad argumentum ergo dicendum, dispositiones ad justificationem præparantes esse quidem supernaturales, esse item ex impulsu Spiritus sancti, sed non procedere à persona grata. Sanctitatem porrò personæ ad meritum exigi, suprà monstravimus, quia prius ad Abel respicit Deus, & deinde ad munera ejus, ut loquitur Scriptura. Unde in illo priori naturæ, quo dispositiones gratiam antevertere intelliguntur, nondum quidquam merentur, sed ad gratiam, unde oritur meritum, per se præparant, ex cuius deinde societate & concomitantia meritum ipsæ hauriunt: non ergo ante illam, sed per illam, & cum illa quidpiam apud Deum merentur.

Obſiſtes præterea : Diſpoſitiones ad gratiam præparantes merentur primam gloriam, id eſt gradum gloriæ gratiæ habituali primùm infuſæ correfpondentem ; cùm enim adultis non conferatur gloria, niſi propter actus meritorios, gloriæ gradus primæ gratiæ correfpondens ſupponit aliquem actum ; nullus autem actus eſt, quem poſſit ſupponere, niſi pios illos motus juſtificationem præparantes, & comitantes : ſed quod meretur gloriam eſſentialem, poteſt mereri gratiam : ergo actus juſtificationem antevertentes gratiam promerentur ; vel ſi gratiam non merentur, gloriam de condigno mereri nequaquam poſſunt.

Reſpondeo actus ad juſtificationem præparantes mereri gloriam, non ut ſunt diſpoſitiones ad gratiam, ſed prout gratiâ, ad quam diſponunt, in eodem inſtanti reali informantur. Vnde non ſequitur, quod gratiam mereantur, ſed quod à gratia vim merendi hauriant, à qua totam mutuantur dignitatem. Quare piis illis motibus, eorumque fervori reſpondet gradus gloriæ, non prout gratiam juſtificationis præcedunt, ſed prout ab eadem gratia eodem momento perficiuntur. Vnde perperam colligitur, vel gratiam cadere ſub meritum, vel gloriam non poſſe cadere ſub meritum de condigno. *Præparatio hominis ad gratiam habendam inquit D. Thomas quæ eſt. 1. 2. art. 2. ad 1. eſt ſimul cum infuſione gratiæ ; & talis operatio eſt quidem meritoria, ſed non gratia quæ jam habetur, ſed gloria quæ nondum habetur.* Hinc inferitur, probabilius eſſe diſpoſitiones præfatas gratiam ſanctificantem de congruo non mereri, quia meritum congrui amicitiam ſupponit, eique inniti

innititur ; motus autem illi ab amico non proficiuntur, quia in nostra sententia superius stabilita, non à gratia habituali, sed ab auxilio Dei moventis procedunt. Lato tamen modo dici potest, dispositiones prædictas gratiam sanctificantem congruè mereri, quia eam exigunt, ad eam per se ducunt, eamque impetrant. Vnde D.Thomas *in 2.dist.27.q.1.art 4* docet hominem actibus illis *quodammodo ex congruo gratiam mereri*. Et indicat August.epist.105. *Neque ipsa remissio peccatorum sine aliquo merito est, si fides hanc impetrat; neque enim nullum est meritum fidei.*

Insurges demùm : Justus operibus quàmlibet sanctis non potest de condigno mereri perseverantiam, ut expressè docet D.Thomas *q.114.art.9*. Ergo nec gloriam de condigno mereri potest. Probatur consequentia ; tum quia gloria non habetur sine perseverantia ; tum quia gloria essentialis perseverantiâ longè nobilior est, & præstantior : quomodo autem merebîtur majus qui minus mereri non potest ?

Respondeo certissimum esse, justum non posse perseverantiam quibuslibet operibus promereri, cum justis sæpe denegetur, & quibuscumque datur, misericorditer detur ; quibus autem non datur, ex justitia non detur, quandoque patente, quandoque latente. Vnde aliunde haberi non potest, ut sacra Tridentina Synodus docet, nisi ab eo, qui potens est eum qui stat, statuere ut perseveranter stet ; & eum qui cadit, restituere. Sed de dono perseverantiæ fusè satis disputavimus.

Ad argumentum ergo dicendum, grande in-
teresse discrimen gloriam inter, & perseveran-
tiæ

tix donum ; quia ut profundè ait loco in objectione laudato S.Doctor , in merito præ oculis semper habendum est id , quod se habet ex parte principii , & id quod se habet ex parte termini. Porro quod se tenet ex parte termini, utique sub meritum cadere potest, cùm sit bravium ad quod meritum tendit ; & scopus in quem collineat laborantis spes & labor : at verò quod se tenet ex parte principii , sub meritum cadere minimè potest , quia est causa meriti , & causa effectum antecedit necesse est. Gloria autem meritorum te minus est, unde eam meritis consequi possumus, imò ad eam primò & per se feruntur opera meritoria ; unde ea sub meritum cadit. Et eadem est ratio de augmento gratiæ, quia ut ait D.Thomas, motio moventis, & meritum merentis non solum ad ultimum motus terminum , sed etiam ad totum progressum in motu se extendunt. Ergo & gloriam, & augmentum gratiæ justificantis per se merentur opera sanctitatis. Cæterùm auxilia divina, & donum proinde perseverantiæ ex parte principii omninò se tenent ; tum quia voluntatem principium sanctorum operum movent ; tum quia, uti benè Caietanus observat, donum perseverantiæ importat concursum auxiliorum & protectionis divini, quo gratia sanctificans primùm infusa conservatur : sicut ergo prima productio gratiæ non potest cadere sub meritum , ita nec ejusdem conservatio, quæ non novam actionem, sed primitivæ actionis perennitatem importat, nec cum prima gratia, quæ est omnis meriti fons, in numero ponit.

Quinque brevissima confectaria derivantur.

Ex hæcenus dictis elicere potes primò, justum operibus sanctis verè, propriè & strictè mereri de condigno vitam æternam, actibus veidò intensis gratiæ & gloriæ augmentum promereri. Quia ut diximus, hæc ex parte termini se tenent, ad quem tota meritorum sanctimonia, supposito Dei pacto, contendit.

Elicitur secundò, justum nec primam gratiam, nec auxilia ad non peccandum, nec perlevèrantiam in bono posse mereri. Quia hæc omnia, ut expositum est, ex parte principii meriti, quod cadere nequit sub meritum, se tenent.

Elicitur tertid, purum hominem non posse alteri primam gratiam de condigno promereri: tum quia justus operibus suis non habet jus in alios, vel pro aliis; gratia enim sanctificans ad proprii duntaxat subjecti perfectionem ordinatur. Tum quia Deus nullibi id spondidisse invenitur. Tum quia eximium Christi privilegium est, & pro peccatis alienis copiosa redemptione satisfacere, & in alios ex meritorum plenitudine gratiarum fluenta corrivare. Quia justi membra sunt, Christus caput; illi accipiunt coronas, iste dat; de fortitudine illorum nascuntur exempla patientiæ, de fortitudine istius profluunt dona justitiæ; illorum mors pretiosa, istius occisio redemptio mundi. Impetrant quidem quandoque justi peccantibus gratiam, quia ut ait Jacobus cap. i. *Orate pro invicem, ut salvemini; multum enim valet deprecatio iusti*

justi assidua. Exorant interdum, flectuntque divinam clementiam orationes, gemitusque Sanctorum. Nam & altantium fide permotus paralytico remissionem peccatorum Christus spon-
dit, *Matth. 9. & Luc. 5.* & Stephani orationi Paulum Deus largitus est, & filius lacrymarum S. Monicæ Augustinus perire non potuit, juxta Ambrosii vaticinium. Et in hoc etiam sensu prædestinationem meritis Sanctorum posse juvari, alibi dictum est.

Elicitur quartò, Justum non posse sibi reparationem post lapsum futurum promereri; tum quia, ut dictum est, auxilia divina non cadunt sub meritum humanum; tum quia sicut peccato mortali gratia extinguatur; ita merita penitus impediuntur; tum quia longè difficilius est lapsum resurgere, quàm stantem non cadere: si ergo justus non meruit ne laberetur, quomodo merebitur, ut lapsus resurgat? Tum quia lapsus non solum nihil meretur, sed omni prorsus gratiâ indignus est, qui gratiam floccifecit.

Dices: Sancti piè orant, & precibus humillimis à Deo postulant, ut si pro infirmitate sua cadant, Dei misericordiâ reparentur: *Cùm defecerit virtus mea,* inquebat David Psalm. 70. *ne derelinquas me.* Sed inanis foret hæc oratio, nisi reparationem post lapsum mereretur. Ergo eam potest justus sanctis operibus promereri.

Respondeo, id petere quidem Sanctos, & interdum à Dei misericordia impetrare; sed mereri non posse, quia etsi dum id Deum rogant, amici sint; mereri tamen non possunt, nisi quod amicitia aliquo jure deberur: amico autem nullo

rum Christi magis ad subjecti perfectionem, quàm ad aliorum sanctificationem proclivis sit, magisque propriis, quàm alienis utilitatibus serviat?

Respondeo esse toto cœlo disparitatem, quia justus dum pro peccatore supplicat, utique Deo acceptus est; & cum Dei impleat voluntatem, *congruum est secundum amicitia proportionem, ut Deus impleat hominis voluntatem in salvatione alterius*, inquit D. Thomas *art. 6.* Exigunt enim leges amicitia, ut amicus amicum orantem exaudiat, nisi justis alioquin causis exorari non possit, vel fortè non deceat, aut expediat. Amicitia enim non imponit amico exaudiendi necessitatem, si justæ subsint repellendæ petitionis rationes: servitus quippe foret, non amicitia, si nunquam orans deberet pati repulsam; unde ita amicus orat, ita suam vult impleri voluntatem, ut amico qui rogatur, plenam relinquat libertatem; quia amici magis studet beneplacito obsequi, quàm eorum, pro quibus orat, utilitatibus inservire. Hinc observat August. *tract. 101. in Ioan.* exaudiri quidem Sanctos dum orant pro seipsis, aliis tamen sæpe non impetrare quod petunt, quia orationis Sanctorum peccatis impediunt efficaciam. *Exaudiuntur*, inquit, *omnes Sancti pro seipsis, non autem pro omnibus exaudiuntur, vel pro amicis, vel inimicis suis, vel quibuslibet aliis; quia non utcumque dictum est, dabit; sed dabit vobis.* At verò justus, qui pro se reparationem lapsus futuri orat, peccando amicitia fœdera dissolvit, in eumque præceptum statum ruit, in quo indignus est qui recipiat quod petivit. Unde si Deus præteritarum recordari precum dignetur, nul-

lis meritis , sed unâ suâ misericordiâ permovetur.

Elicitur quintò, bona temporalia per se non cadere sub meritum ; opera enim gratiæ , quæ est fons aquæ salientis in vitam æternam , quæ sursum sunt quærunt , quæ sursum sunt sapient , non quæ super terram : & sicut quo ex altiori loco aqua defluit, eo altiùs ascendere nititur ; sic gratia, quæ aqua est illa cœlestis à Christo Samaritanam alloquente tantopere commendata, à cœlo profluens corda in cœlum evehit unde manavit. Unde temporalia bona non appetit , quæ arbitratur ut stercorea ; mundana non quærunt, quæ æquè eveniunt justo & impio, ut dicitur *Ecclesiast. 9. cœlestia duntaxat , & supernaturalia concupiscit, morem gerens mandato Salvatoris: Quærite primùm regnum Dei, & justitiam ejus, & hæc omnia adjicientur vobis.*

Observat tamen S. Doctor *art. 10. quæst. 114. quod temporalia bona , prout sunt utilia ad opera virtutum, quibus perducimur ad vitam æternam, directe & simpliciter cadunt sub merito, sicut & augmentum gratiæ, & omnia alia, quibus homo ordinatur ad perveniendū in beatitudinem.* Hinc fit interdū Sanctos misericorditer non audiri , dum pro hujus necessitatibus vitæ supplicant ; tum quia quid sit utilius infirmo, magis novit medicus, quàm ægrotus ; tum quia non promittitur justo precum exitus optatus, nisi cū petit in nomine Christi: non autem petitur in nomine Salvatoris , inquit August. *tract. 102. in Joan. quidquid petitur contra rationem salutis.* Ergo si exaudiri velimus, si Deū exorare ayeamus , si nullam cupimus pati repulsam

pulsam, cœlestia petamus, divina quæramus, pro æternis impetrandis pulsemus. Quia videlicet regnum cœlorum, ut Venerabilis Beda prosequitur, non otiosis & vacantibus, sed petentibus, quærentibus, & pulsantibus dandum, invenientium, & aperiendum Veritas esse testatur. *Petenda est ergo, inquit, janua regni orando, querenda rectè vivendo, pulsanda perseverando. :: Vnde necesse est, ut seduli sine intermissione oremus. Quæramus Dominum, & confirmemur; quæramus faciem ejus semper, pulsemus infatigabili desiderio æternæ beatitudinis, nec deficiamus priusquam illo aperiante, de carcere mundi hujus eripiamur ac portam mereamur patria cœlestis ingredi.*

De certitudine gratiæ, de signis sanctitatis, & perversitatis, & reprobationis agere prætermisimus, ne voluminis istius moles plus justo excreceret: illa igitur in finem Theologiæ si opportuniùs, certè commodiùs rejicimus.

R E F L E X I O.

*Quid hîc statis tota die otiosi? Cur vel nihil agitis, vel malè agitis, vel aliud agitis æternitatis candidari, regni cœlestis hæredes, hæc melsuri quæ seminastis? An nescitis regnum cœlorum simile esse negotiatori? Nunquid illud veritatis oraculum ponderasti: *Negotiamini, dum venio*? Næ vos mali mercatores estis, qui noctem illam expectatis, in qua nemo poterit operari. Si sapitis, si lumen oculorum vestrorum vobiscum est, si non defecit virtus vestra, cernite mercedem copiosam in cœlis, cernite repositam coronam justitiæ, cernite constitutam ab Imperatore nostro legem: *Quanto plus homo**

laborat, tanto plus mercedem acquirit. Audite Apostolum 2. Cor. 6. affirmantem, relaturum unumquemque prout gessit in corpore, siue bonum, siue malum. Audite Ecclesiasticis cap. 9. oraculum: Mortui nihil noverunt amplius, nec habent ultra mercedem. Audite & Hieronymi commentarium: Mortui nihil valent ad id adijcere, quod semel secum tulere de vita.


Hæc cum ita sint, dum tempus habemus, operemur bonum, super fundamentum gratiæ Christi superædificemus aurum, argentum, lapides pretiosos, quia ut docet Apostolus 1. Cor. 3. *Si cujus opus manserit, quod superædificavit, mercedem accipiet: si cujus opus arserit, detrimentum patietur.* Ne frangamur laboribus, in pressuris, in persecutionibus, in virtutum praxi, in arcta salutis via animum ne despondeamus, quia totis licet corporis, & animi conatibus desudemus, innumeris licet tribulationum casibus exerceamur, momentaneum, & leve censendum est, quo æternitatem lucratur beatitatis. *Transit hora, transit & pœna,* inquit Bern. serm. 1. *de diversis; non sic merces ipsa laboris: nescit finem, manet tanta simul, & manet in æternum. Latet gloria, fratres mei, addit serm. 17. in Psal. Qui habitat: abscondita nobis est in tribulatione, in momentaneo hoc latet æternitas, in hoc levi pondus sublime, & supra modum.*

Ne fingamus laborem in præcepto, quia ut optime ait Chrysost. hom. 2. *de Zach.* in nobis est, ut possimus; quia in nobis est, ut velimus. Accusemus voluntatem, non legem: immensam mercedem, si volumus, obtinemus. *Pro modica præbenda,* inquit vir ille divinus omnium manibus tendens Th. à Kempis, *magna curritur via, pro vi-*

et aeterna vox pes à terra levatur. Per mare, per terras, per infinitas difficultates mercator currit ad aurum, ambitiosus ad honorum fastigia, nec darum pervenire. Regnum cœlorum uno amore quærimus, uno amore meremur, uno amore consequimur; & quia amare Deum tædet, difficultates in ipsa amandi suavitate commiscimus? Quam veridicè Potentianus apud Augustinum lib. 8. Confessionum! *Quid querimus? Cujus gratiâ militamus? Majorne esse poterit spes nostra in palatio, quàm ut amici Imperatoris simus? Et per quot pericula pervenitur ad grandius periculum? Et quandiu istud erit? Amicus autem Dei (hæres regni, cœlestis negotiator, mercator thesaurorum divinatorum) si voluero, ecce nunc sum.*

Macte ergo animo, Lector, qui infudit gratiam, ipse gloriam largietur; qui incepit, ipse perficiet; qui fudit sanguinem, divini non denegabit pretium cruoris; qui prævenit in benedictionibus dulcedinis, ipse comitabitur, ipse sequetur, ipse coronabit. Quid adhuc trepidas, quid hæres, quid fluctuas, quid vacillas? Tristem solabitur, infirmo medebitur, fatigatum reficiet, cadenti manum supponet. *Fidelis quisque, inquit August. serm. 3. de Ascensione, cum jam tanta perceperit; per ea quæ cognoscit præterita, discat sperare promissa; ac Dei sui præteritam, præsentemque bonitatem quasi futurorum teneat cautionem.* Jam metendi tempus adest, calviam occasionem nanciscamur. Si deterrent certamina cum jubentur, delectent præmia quæ promittuntur; quia si dura jubet, magna promittit; si arcta præcipit, ineffabili victricis delectationis unctione observantiam

condit. Et sicut nulla est tam facilis res, quin
 difficilis sit, quam invitus facias; sic nulla tam
 difficilis, quin facilis sit, quam lubens operere.
 Non est hîc impendium, non est hîc nisi in
 imaginatione labor; amare sat est, & in eo
 quod amatur, non laboratur; aut si laboratur,
 & labor amatur. Quàm piè B. Eucherius sua
 ad Valerianum epistola! *Amantes vitam hor-*
tamur ad vitam (ambientibus gloriam divinos
 offerimus honores, quærentibus delicias sempi-
 terna gaudia præmonstramus.) *Viva ratio est*
persuadendi, cum id poscitur ut impetremus à vo-
bis quod concupiscitis. Pro vita quam concupisci-
tis legatione apud vos fungimur; & sanè quam
omnes exigam amatis, insinhamus in amanda
aternali.



DISSERTATIO V.

Defensio Innocentii X. Constitutionis adversus quinque propositiones lata. Vbi easdem propositiones à Sanctis Augustino & Aquinate dudum fuisse prædamnatas demonstratur.

INGENITA Dominicanis omnibus in Sanctam Sedem Apostolicam pietas & observantia, à parente suo B. Dominico filiis infeminata, à Sancto Thoma Doctore Angelico discipulis suis inspirata, à Summis Pontificibus innumeris beneficiis, quibus sibi familiam Prædicatoriam devinxerunt, acta; ab infinitis hujus Ordinis alumnis verbo, scriptis, & fuso cruore propugnata; hæc, inquam, & alia præjudicia à Patrum nostrorum institutione & moribus vetant me esse degenerem, sed ultrò alioquin properantem calcaria addunt, compelluntque, ut specimen aliquod præ me feram sinceri illius & perpetui cultus, qui est veluti Dominicani Ordinis character. Ut igitur domesticâ disciplinâ institutum me pro-

bem, Innocentii X. constitutionem, & quinque propositionum censuram, quam tanquam de cœlo allatam totus Ordo cœ, quâ par est, reverentiâ excepit, defendendam aggredior; non quòd defensione egeat definitio à dignitate infra Deum summa promanans; sed ut omnibus clareat, quàm æquum fuerit Apostolicæ Sedis in hac causa iudicium; tum ut materia de gratia, quæ in eisdem propositionibus continetur, amplius illustretur. Nec propterea præcepta ejusdem Sedis, tractationem de auxiliis publicis. Scriptoribus interdicentia violamus; tum quia de auxiliis divinis, vel de eorum efficacia non disputabimus; tum potissimè, quia ipsemet Innocentius de iisdem propositionibus differendi facultatem in sua constitutione impartitus est. Sic enim §. 5. Bullæ Innocentianæ anno 1653. editæ habetur: *Mandamus igitur omnibus Christi fidelibus utriusque sexus, ne de prædictis propositionibus sentire, docere, prædicare aliter præsumant, quàm in hac præsentis nostræ declaratione & definitione continetur.* Ergo è contra licitum est de prædictis propositionibus sentire, docere, prædicare secundum quod in illa declaratione & definitione continetur. At enim ita sentiemus, ita docebimus, ita Deo bene vertente prædicabimus.

Censuræ porro Pontificiæ tenor ejusmodi
 „ est. Nos quibus inter multiplices curas, quæ
 „ animum nostrum assiduè pulsant, illa in primis
 „ cordi est, ut Ecclesia Dei nobis ex alto com-
 „ missa, purgatis pravarum opinionum erroribus
 „ tutò militare, & tanquam navis in tranquillo
 „ mari, sedatis omnium tempestatum fluctibus
 „ ac procellis, securè navigare, & ad optatum
 „ salutis

„ salutis portum pervenire possit : pro rei gravi-
„ tate coram aliquibus S.R.E. Cardinalibus ad
„ id specialiter sæpiùs congregatis à pluribus in
„ Theologia Magistris easdem quinque propo-
„ sitiones ut supra nobis oblatas fecimus singil-
„ latim diligenter examinari, eorumque suffra-
„ gia tum voce, tum scripto relata maturè con-
„ sideravimus, eisdemque Magistros variis co-
„ ram nobis actis Congregationibus, prolixè
„ super eisdem, ac super earum qualibet disse-
„ rentes audivimus.

„ Cùm autem ab initio hujuscemodi discus-
„ sionis ad divinum implorandum auxilium
„ multorum Christi fidelium preces, tum priva-
„ tim, tum publicè indixissemus, postmodùm
„ iteratis eisdem ferventiùs, ac per nos sollicitè
„ imploratâ Sancti Spiritus assistentiâ, tandem
„ divino numine favente ad infrascriptam deve-
„ nimus declarationem & definitionem.

„ Primam prædictarum propositionum : Ali-
„ qua Dei præcepta hominibus justis volentibus
„ & continentibus secundùm præsentem, quas ha-
„ bent vires sunt impossibilia ; deest quoque
„ illis gratia, qua possibilia fiant : Temerariam,
„ impiam, blasphemam, anathemate damnatam
„ & hæreticam declaramus, & uti talem damna-
„ mus.

„ Secundam : Interiori gratiæ in statu naturæ
„ lapsæ nunquam resistitur : Hæreticam decla-
„ ramus, & uti talem damnamus.

„ Tertiam : Ad merendum & demerendum in
„ statu naturæ lapsæ, non requiritur in homine
„ libertas à necessitate, sed sufficit libertas à co-
„ actione : Hæreticam declaramus, & uti talem
„ damnamus.

„ Quartam : Semipelagiani admittebant
 „ prævenientis gratiæ interioris necessitatem
 „ ad singulos actus , etiam ad initium fidei ; &
 „ in hoc erant hæretici , quod vellent eam gra-
 „ tiam talem esse , cui posset humana voluntas
 „ resistere , vel obtemperare : Falsam & hære-
 „ ticam declaramus , & uti talem damna-
 „ mus.

„ Quintam : Semipelagianum est dicere,
 „ Christum pro omnibus omninò hominibus
 „ mortuum esse , aut sanguinem fudisse : Fal-
 „ sam, temerariam, scandalosam, & intellectam
 „ eo sensu, ut Christus pro salute duntaxat Præ-
 „ destinatorum mortuus sit , impiam , blasphemam ,
 „ contumeliosam , divinæ pietati derogantem , & hæreticam declaramus , & uti ta-
 „ lem damnamus.

§. I.

*Prima propositio ab Innocentio
 Summo Antistite damnata, ab
 Augustino & Aquinate prædam-
 nata fuit.*

NON debuit, nec potuit Sancta Sedes in
 censura Jansenianarum propositionum ab
 Augustino recedere , cujus doctrinam , ut infrà
 patebit, tot Sanctissimorum Pontificum oracula
 consecrarant. Declarant insuper tum Innocen-
 tius X. tum successor Alexander VII. se suis
 diplomatis nullum SS. Augustini & Thomæ de
 gratia

præstia sensibus præjudicium inferre velle. Unde in Brevi ad Lovanienses ultima dissertatione referendo, utriusque sacri Doctoris dogmata tutissima & inconcussa esse Alexander declaravit. In altero etiam Brevi Romæ die 29. Julii anni 1663. ad Episcopos Galliarum directo, doctrinam gratiæ per se efficacis approbavit. Quin & gratulatus est, quod Gallorum Episcoporum operâ & studiis ii qui quinque propositiones in suo naturali sensu docere accusabantur, eas sincero corde & scriptis detestati, solum gratiæ per se efficacis sensum in quibusdam articulis ad Sedem Apostolicam per Illustrissimum Gilbertum Convenarum Episcopum transmissis expressum retinerent. *Is fuit, inquit, egregius sanè laborum vestrorum fructus, majoris scilicet & potioris partis, ut multi, iique cæterorum nomine primarii, exemplo vestro, consilio, & opera ad saniorē doctrinam inducti, eā quā par est, ut credimus, animi demissione sese paratissimos exhibuerint ad illa omnia præstanda quæ ipsis ab Apostolica Sede præscribentur.* Ipse etiam P. Annatus assertorum scientiæ mediæ hujus sæculi caput, & in rebus Theologicis acutè nitidèque scribendis nulli Societatis sine controversia secundus, quive Romæ Jansenianæ causæ interfuit, libro suo *de cavillis*, apertè, ingenuèque testatur, Innocentium nunquam Thomisticam de gratia efficaci doctrinam attentasse, sed eam rectam sartamque voluisse, his verbis: *Id in quo convenimus, sancivit Pontifex; id in quo dissidemus, (Thomistæ & Jesuitæ) disputationi nostra reliquit.* Sed est, inquis, necessaria consequentia à positione illorum principiorum ad negationem gratiæ prædeterminantis. Respondeo hoc ipsum inter

nos disputari, an scilicet necessaria sit illa consequentia; nobis videtur necessaria, illis non videtur. Vtri melius sentiant, nonnum definitum est. Vicerint illi qui suam sententiam melius probaverint, meliusque defenderint. Atque hoc est Pontificem attingere noluisse controversiam inter nos & Thomistas disputatam de gratia per seipsam effici. Hoc præmissio,

Probatur primam propositionem ab Innocentio X. damnatam, fuisse ab Augustino prædamnatam. In primis præcepta Dei non esse impossibilia docet Augustinus lib. de nat. & grat. cap. 43. celebribus illis verbis, quæ sacra Tridentina Synodus sess. 6. cap. 11. exscripsit; Deus impossibilia non jubet, sed jubendo monet & facere quod possis, & petere quod non possis. Et libro de actis cum Felice Manichæo, cap. 17. Qui servare legem non vult, in potestate ejus est, si velit; non enim dixit, non potuerunt, sed noluerunt: hoc certe quod nolunt servare legem, sua voluntate nclunt. Expressum etiam est illud ex sermone 191. de tempore: Execramur blasphemiam eorum, qui dicunt impossibile aliquid homini à Deo esse præceptum, & mandata Dei à non singulis, sed ab omnibus in commune posse servari. Et lib. de fide contra Manich. Quis non clamet, inquit, stultum esse præcepta dare ei, cui liberum non est quod præcipitur facere; & iniquum esse eum damnare, cui non fuit potestas iussa complere?

Quod autem gratia non desit justis, quâ præcepta possibilia fiant, vix probatione eget; cum enim justi hoc ipso, quod justi sunt, gratiâ & virtutibus infusis instructi sint, quæ virtutes supernaturales, non uti naturales habitus, facilius dumtaxat posse, sed simpliciter posse concedunt

dunt; manifestè relinquitur, justis non deesse gratiam, quâ præceptâ possibilia reddantur. Non deesse porro gratiam ad implenda Dei mandata, nisi ex prævia hominum culpa, docet generatim Augustinus *lib. de grat. & lib. arbit. cap. 4.* his verbis: *Homo ergo gratiâ juvatur, ne sine causa voluntari ejus iubeatur.* Et tract. 38. in Joan. *Deus tuus ubique totus est; si non ab illo facias casum, nunquam à te ipse facit occasum.* Et serm. 88. de tempore: *Fideliter ac firmiter credat dilectio vestra, quia nunquam Deus prius deserit hominem, nisi prius ab homine deseratur.*

Augustinum sequutus est de more S. Thomas. Nam in 2. *dist. 28. art. 3.* in primo argumento *Sed contrà*, illud à Hieronymo dictum laudat: *Qui Deum dicit præcipere impossibilia, anathema sit.* Et in secundo argumento sic discurret: *Deus non est magis crudelis quàm homo: sed homini imputatur ad crudelitatem, si obliget aliquem per præceptum ad id, quod implere non potest: ergo hoc de Deo nullo modo est æstimandum.* Verùm quia ut versati in lectione S. Thomæ satis norunt, argumentum *sed contrà*, S. Doctoris genuinam mentem non exprimit, quia ei aliquando respondet, ideo producenda in medium sunt luculenta testimonia, quibus propriam sententiam Angelicus Doctor ob oculos ponit.

Videatur ergo 1. 2. *q. 100. art. 10.* ubi sic scribit: *Non est impossibile hoc præceptum observare, quod est de actu charitatis; quia homo potest se disponere ad charitatem habendam, & quando habuerit eam, potest eâ uti.* Porro quod ait S. Doctor, posse hominem se disponere ad charitatem,

tem, intelligendum est cum auxilio divinæ gratiæ: nec propterea præcepta impossibilia censenda sunt, quia ut idem Sæctus 1. 2. q. 109. art. 4. ait: *Quod possumus cum auxilio divino, non est nobis omnino impossibile; & quod cum amicis possumus, id posse censemur; amicus enim amico, nisi per istum steterit, auxilia necessaria non denegat.* Idem apertius tradit quodlibeto 1. art. 6. *Nullus, inquit, tenetur ad hoc, quod est supra vires suas, nisi per modum quo sit sibi possibile.* Et q. 24. de verit. art. 14. ad 1. sic habet: *Illud quod precipit Deus, non est impossibile homini ad servandum.* Et in responsione ad secundum argumentum: *Recte homo corripitur, inquit, qui præcepta non implet; quia ex ejus negligentia est quod gratiam non habet, per quam potest servare mandata.*

Quod verò justis non desit gratia, quia præcepta possibilia fiant, docet apertè 1. 2. q. 106. art. 2. ad 2. his verbis: *Lex nova (quæ utique est gratia sanctificans, scripta in cordibus nostris, ut alibi diximus) quantum est de se, auxilium dat ad non peccandum.* Et 1. p. q. 49. art. 2. *Deus non deficit ab agendo quod est necessarium ad salutem.* Quod ipsum inculcat q. 14. de verit. art. 11. ad 1. *Hoc ad divinam providentiam pertinet, ut cuilibet provideat de necessariis ad salutem, dummodo ex ejus parte non imediatur.* Illa ergo propositio absolutè prolata, & in sensu suo naturali intellecta, *Iusto deest gratia, quâ præcepta possibilia fiant*, luculentis S. Thomæ testimoniis adversatur. Constat ergo veridicè, & sanctis illis Doctoribus consonè pronuntiasse Pontificem, mandata Dei non esse justis impossibilia. Imò nulli reverà impossibilia sunt, quia
ut

ut dicitur Deut. 30. *Mandatum, quod ego tibi precipio hodie, non supra te est.* Et teste Apostolo 1. Cor. 10. *Fidelis Deus, qui non patitur vos tentari supra id quod potestis.* Ubi D. Thomas: *Non videretur fidelis Deus, si nos vocaret ad societatem filii Dei, & notis denegaret, quantum in ipso est, ea per qua ad eum pervenire possumus.*

§. II.

Gratie interiori posse resisti, ante Innocentium X. docuerant SS. Augustinus & Thomas.

Quanvis gratiæ efficaci nunquam de facto resistatur, hoc ipso enim, quod efficax est, semper cum effectu conjungitur; & bonam voluntatem, bonumque opus indeclinabiliter operatur; unde de illa dicit Augustinus lib. de Prædest. Sanct. cap. 8. *Hac itaque gratia, qua cordibus hominum divinâ largitate tribuitur, à nullo duro corde respuitur; ideo quippe tribuitur, ut duritia cordis trimitus auferatur.* Attamen dari gratiam aliquam interiorem, cui aliquando resistamus, probat Augustinus ex illo Apostoli: *Hi clamur vos, ne in vacuum gratiam Dei recipiatis;* unde infert, acceptâ illâ gratiâ inesse homini resistendi potestatem: *Hoc enim liberum hominis arbitrium exhortatur,* inquit lib. de grat. & lib. arb. cap. 5. *& in aliis, quibus dicit, Rogo vos, ne in vacuum gratiam Dei recipiatis: ut quid enim eos rogat, si gratiam Dei sic susceperint*

perint, ut propriam perderent voluntatem. Hac de causa in Psal. 63. comparat gratiam illam inefficacem pluvix, quæ in agrum spinosum decedit, nec fructum ullum affert. Quod pluit, inquit, in agrum uberem dulce est, & quod pluit in agrum spinosum dulce est: nunquid pluviam accusas, quod spinas generet? Nonne erit pluvia illa testis in iudicio Dei, & dicet: Ego dulcis super omnia veni? Tu ergo quid proferas, vide; profers frumentum, spera horreum; profers spinas, ignem spera. Hinc lib. 83. quæst. q. 61. infert, eos qui Deo vocanti non obediunt, sibi debere tribuere quod non veniant; quia quod Deo vocanti resistent, quodve non veniant, à propria voluntate proficiscitur. Ad illam cœnam in Evangelio preparatam, inquit, nec omnes qui vocati sunt, venire voluerunt; nec illi qui venerunt, venire possent, nisi vocarentur. Itaque neque illi debent tribuere sibi qui venerunt, neque illi qui venire noluerunt, debent alteri tribuere, sed tantum sibi, quoniam ut venirent, in eorum erat potestate.

Succinit S. Thomas 1. 2. q. 106. art. 2. ad 2. Et ideo si quis post acceptam gratiam novi Testamenti peccaverit, majori pœna est dignus, tanquam majoribus beneficiis ingratus, & auxilio sibi dato non utens. Et quia per illud auxilium datum posset intelligi gratia habitualis, quæstio autem est, utrum interiori gratiæ actuali pios motus excitanti resistatur; ideo videndus est S. Doctor lect. 2. in cap. 1. prioris ad Thesalon. ubi sic loquitur: *Aliquis dicitur extinguere Spiritum in se, vel alio, cum alius aliquid boni ex fervore Spiritus sancti vult facere, vel etiam cum aliquis bonus motus in ipso surgit, &*
ipse

ipse impedit. Act. 7. Vos semper Spiritui sancto resististis. Et lect. 1. in cap. 12. prioris ad Corinth. Dicendum, inquit, quod quantum est ex Spiritu Dei homo non facit peccatum, sed magis retrahitur à peccato: potest tamen peccatum facere ex defectu voluntatis humanae, quae Spiritui Sancto resistit, secundum illud Act. 7. Vos autem semper Spiritui sancto resististis. Non enim per Spiritum sanctum inhabitantem collitur facultas peccandi à libero arbitrio totaliter in vita praesenti.

Neque huic veritati adversatur Chrysostomus homil. 72. in Ioan. ubi ait Petro iusto contigisse casum superni auxilii derelictum, ex eo quod Deus ipsum deseruerit, ut addit hom. 51. in epist. ad Hebr. Non, inquam, adversatur, quia Petrum iustum Deus iustus non nisi ob praecedentem Petri praesumptionem, teste eodem Chrysostomo expendente illud, *animum meum pro te ponam*, deseruit, vel dereliquit. Quid dicis, Petre? Te posse dicis: (verba sunt ejus) *experientiam tuam cognosces nihil esse dilectionem tuam sine gratia divina*. Praesumptio ergo erat in Petro, quod suis viribus moriturum se jactabat, meritoque postea desertus est à Deo urgente tentatione. Unde universim hom. 16. in cap. 9. pist. ad Hebr. sic concludit: Non licet dicere, Non possum; hoc enim est accusare Creatorem: si enim nos fecit impotentes, ac postea praecipiat, ipse accusandus esset. Quomodo ergo multi non possunt? Quia nolunt. Quomodo ergo multi nolunt? Praesidia; nam si volunt, possunt.

§. III.

Ad merendum & demerendum in statu naturæ lapsæ, non solam à coactione, sed etiam à necessitate libertatem SS. Augustinus & Thomas desiderarunt.

ANtequam stabiliatur hæc propositio, quædam necessariò, ut veritas clareat, omninò præmittenda sunt, quæ observentur dignissima. Advertendum igitur primò, certissimum esse, liberum arbitrium etiam post lapsum superesse in natura humana; sacræ enim litteræ homini post lapsum diversarum rerum electionem tribuunt. Num. 30. *In arbitrio viri erit, siue faciat, siue non faciat.* Josué 24. *Optio vobis datur, eligite hodie quod vobis placet.* Imò universa Scriptura libertatem arbitrij prædicat, ut docet August. *lib. de grat. & lib. arb. cap. 2.* Cùm enim omnium canonicorum Scriptorum scopus eò collimet, ut ad prosecutionem boni, fugamque mali præceptis, consiliis, cohortationibus homines stimulentur, ubique supponunt, inesse homini & boni suscipiendi, & mali fugiendi libertatem. Adducunt etiam Theologi illud Eccl. 15. *Deus reliquit hominem in manu consilii sui, adjecit mandata & præcepta; si volueris mandata servare, conservabunt te. Apposuit tibi ignem & aquam, ad quod volueris, porriges manum tuam. Ante hominem vita &*

mors,

mors bonum & malum ; quod placuerit ei, dabitur illi. Sed quia Patres, & præcipuè Augustinus locum illum de homine pro eo tempore, quo in paradiso ante peccatum versabatur, intelligunt; ideo in illo vim non facio.

Eandem veritatem nedum inculcant, sed & probant SS. Patres, quos diffusè refert Cardinalis Bellarminus lib. 3. & 4. de grat. & libero arb. Sufficiunt hæc selectiora testimonia. *Non possumus*, inquit Cyrillus libr. 4. in Joan. capite 7. *secundum Ecclesia, veritati, que dogmata liberam potestatem hominis, quod liberum arbitrium appellatur, nullo modo negare. Vnicuique nostrum*, inquit S. Hilarius in Psal. 2. *libertatem vite, sensumque permisit, non necessitatem in alterutrum affigens.* Frustra blasphemias, verba sunt Hieronymi in epist. ad Ctesiphontem, & ignorantium auribus ingeris, nos liberum arbitrium condemnare. *Damnetur ille qui damnat.* Ab aliorum Patrum locis passim obviis referendis prudens superfedeo.

De mente porrò Augustini dubitari nequaquam potest, cum plures de hoc argumento libros hujus veritatis astruendæ gratiâ ediderit. Et quia nullam calumniam passus est gravio-rem, quàm quod sub gratiæ obtentu liberum arbitrium de medio tolleret, & probrosissimum Manichæorum errorem renovaret, ut illam à se, & à Catholicorum, quam tuebatur, causa depelleret, iteratâ scripsit confessione, se non liberi esse arbitrii inficiatorem, sed gratiæ tantummodo defensore. *Non est ita ut loqueris*, inquit lib. 2. de nupt. *quicumque ista dixisti ; non est ita. Non liberum negamus arbitrium, sed si vos Filius liberaverit, ait Veritas, verè liberi eritis.* Et lib. 1.

lib. 1. ad Bonif. cap. 2. *Quis nostrum dicat, quod primi hominis peccato perierit liberum arbitrium de humano genere?*

Hanc catholicam veritatem probant Hieronymus lib. 2. *advers. Iovinian. cap. 2.* & Eusebius lib. *de preparatione Evangelica, cap. 5.*

Quia ubi necessitas est, abestque libertas, nec damnatio, nec corona est. Unde jaceret omnis Philosophia, nulla esset virtutis laus, nullus laborum fructus, nulla justa improbis infligenda pœna, nulla studiosis asserenda merces, si non libera voluntate, & nostra sponte susceptis laboribus, sed fatorum impellentium necessitate omnia fierent. Eandem verò probat D. Thomas, quia talis est appetendi modus, qualis & cognoscendi, cum in ignotum non feratur voluntas, & ductum, modumque rationis in omnibus sequatur: sed homo cognoscit contingentia esse ad finem suum adipiscendum indifferentia, unde de illis consulere solet: ergo ea liberè, & sine necessitate appetit.

Omnia testimonia Augustini, quæ moderni hæretici obijciunt, in quibusque ait nos liberum arbitrium primi peccati granditate amisisse, & libero arbitrio malè utentem hominem & se perdidisse, & ipsum; hæc, inquam, testimonia interpretatur ipsemet Augustinus de libero arbitrio, quo homo in statu innocentiae vegeto illo & integro præditus erat. *Peccato Adæ, inquit lib. 2. contra duas ep. Pelagianorum, c. 15. liberum arbitrium de natura hominum periisse non dicimus, sed ad peccandum valere in hominibus subditis diabolo; ad bonè autem, pièque vivendum non valere, nisi voluntas hominis Dei gratiâ fuerit liberata, & ad omne bonum actionis, cognitio*

cognitionis , sermonis adjuncta. Et cap.2. Liber: ac quidem perit per peccatum, sed illa quæ in Paradiso fuit.

Advertendum 2. libertatem voluntatis esse vim electivam mediorum , servato ordine finis. Est enim libertas voluntatis capacitas quædam, & amplitudo , quæ potest in diversa ferri, facere hoc , & non facere , facere hoc, & oppositum ejus. Quæ capacitas universalitati naturæ intellectualis innixa est , cum enim natura spiritualis intelligendo omnia fieri possit, omnia apprehendere , potest etiam de illis omnibus judicare , quædamque ut prosequenda, alia ut fugienda proponere voluntati , cui propterea convenit universalitas in appetendo, quia mediis cum indifferentia judicii sibi propositis arctari nequit , sed ad libitum eligere quit , vel repudiare. Sed hac de re dum de libertate Dei primo tomo disputavimus , tum inter agendum de libertate Christi , operosior instituetur tractatio.

Porro hanc libertatem excludentem necessitatem , ad meritum exigî, manifestum videtur in Philosophia , quia meritum & demeritum sunt proprietates actus humani ; actus autem necessarius non est humanus , cum ille solum à S. Thoma 1.2. q.1. art. 1. & universo Doctorum choro dicatur humanus , qui ex voluntate deliberata procedit, id est qui ex deliberatione , & consilio rationis , ac electione voluntatis proficiscitur. Certè cum inter merentem, & munerantem quidam contractus incatur , vi cujus merens obsequium exhibet , munerans promissum præmium largitur, ad utrumque requiritur libertas à necessitate immunis , ille ut det , iste
ut

ut retribuat : quia nec verè dare censetur qui dominium ejus quod dat , non habet : non habet porrò dominium voluntas necessitate arctata , sed unius ratione indifferentiæ domina est , dare potens , vel non dare , unumque præ alio eligere valens. Denique actus ille nequaquam humanus vel moralis , subindeque merendi capax dicendus est , qui regulis morum subjici nequit ; sicut opus nullâ potest ratione artificiale dici , quod nullis regulis artis factum est , nullis subjici potest. Actus autem necessarii , quâlibet spontanei , non diriguntur , nec dirigi quidem possunt regulis morum ; regulæ quippe morum actum in extremum vergentem reducunt ad medium , illi finem præstituunt , modum componunt , circumstantias præscribunt , ad quas utique regulas exigi nequit actus necessarius , frustra namque adhibetur amissis actui inviolabili , & ad unum determinato.

Dices : In Christo Domino fuit meritum : at in Christo non fuit indifferentia , sed benè agendi necessitas , & peccandi impossibilitas : ergo libertas à necessitate non est ad meritum requisita.

Respondeo , quanvis verum esset totum quod in argumento assumitur , nihil tamen adversus Pontificiam constitutionem effici. Definit enim duntaxat Christi Vicarius , ad merendum , vel demerendum in statu naturæ lapsæ non sufficere libertatem à coactione , sed etiam libertatem à necessitate desiderari. Christus autem non fuit in statu naturæ lapsæ , cum in eo nec originale , nec actuale peccatum unquam extiterit , vel esse potuerit. Adde hoc in argumento unum ex difficillimis
universæ

universæ Theologiæ nodis tangi, quem aliquando rerum, Deo benè vertente dissolvemus. Interim veluti in antecessum adverte cum D. Thoma *quest. 22. de veritate, art. 6.* quod cum voluntas eatenus libera sit, quatenus necessitatem non habet, libertas voluntatis trifariam considerari potest, & debet: primò in ordine ad actum, in quantum potest velle, vel non velle; secundò in ordine ad objectum, in quantum potest velle hoc, vel illud: tertiò in ordine ad finem, in quantum potest velle bonum & malum. Prima libertas dicitur contradictionis, quia circa agere & non agere versatur, opponiturque necessitati exercitii, quæ non finit potentiam suspendere actum, qualis est in igne necessitas ad comburendum. Secunda libertas dicitur contrarietatis, quia facere unum, facere & oppositum potest, opponiturque necessitati specificationis, quæ licet potentiam continenter agere non compellat, ad unum tamen modum agendi eam arctat, supposito quod agat: sicut voluntas non continuo in beatitudinem motu cietur; si tamen circa illam negotiari velit, non potest non amore illam prosequi, cujus desiderium naturâ insitum est. Tertia libertas dicitur imperfectionis, quia posse velle malum, facultasque peccandi, non libertas est, sed libertinitas; non ornamentum voluntatis, sed probrum; non pars vel perfectio libertatis, sed vitium & miseria creaturæ. Qua de re alibi non semel sermonem habuimus. Itaque in Christo non fuit hæc tertia libertas, qui fuit labis omnis purus, nec est de essentia libertatis, quæ ut dixi, est vis electiva mediorum, servato ordine finis: dum autem peccat voluntas, non
ordi

ordinem ad finem servat, sed à vero fine recedit, quem turpiter quærit in mediis. Prima ergo, & secunda libertas in Christo fuit: poterat v. g. & velle mortem, & actum voluntatis illius suspendere; poterat velle mortem, & velle vitam, sed in omnibus retento ordine ad finem, ut suo loco, mutuata à S. Thoma majoris lucis abundantia elucidabimus.

Illud tamen adhuc observabimus, quod quia libertas in sua amplissima quam latè patet acceptione, opponitur ligamini & coarctationi facultatis, tot possumus distinguere libertatis species vel gradus, quot sunt à diversis ligaminibus immunitates. Per ligamina autem illa voluntatem arctantia non intendimus violentiam ullam voluntati posse inferri, id enim apertè implicat; cum enim coactio & violentia sit contra inclinationem, non potest actus voluntatis esse violentus, cum sit ipsa volentis inclinatio: sed volumus duntaxat tunc ligari voluntatem, quando ea suppositum agere, vel pati vi fortioris agentis compellitur, quæ displicent voluntati; unde homo à lubentibus & placentibus ad invita quandoque restringitur nexibus inimicis: sic miseri remiges in triemibus, rei in carcere, furiosi in lecto inviti vinciuntur. Secundum ligamen est, cum voluntas ipsa id facit quidem quod simpliciter vult, oppositum tamen lubentius vellet. Sic mercator ingruente impendentis mortis periculo, mavult quidem tempestate urgente merces projicere, quam vitam discrimini committere; ægrè tamen projicit, quod impellente metu non potest retinere. Tertium ligamen sunt concupiscentiæ & passionum æstus voluntatem ad objecta sensibilia facile

facile pertrahentes , & gravi , sed malè suavi pondere inclinantes. Sic præmitur , sic ligatur peccator, teste & experto Augustino, non ferro alieno , sed ferrea voluntate , quia pravæ dum consuetudini non resistitur , fit necessitas premendo blandiens , blandiendo premens , sibi que compedes injicit voluntas à seipsa captiva, quos frangere non potest , quia non vult ; seseque ut non velit , obfirmavit. Quartum ligamen est ignorantia, vel inconsideratio, vel spiritalis luminis tenuitas & angustia : sicut enim ex plenitudine luminis extenditur quodammodo capacitas appetitus , plura namque appetere quit qui plura novit ; minusve dependet à mediis qui eorum insufficientiam , & contingentiam clariùs perspicit , profundius penetrat , & accuratius appendit : ita qui veritatem vel ignorat, vel non attendit, vel præjudiciis occupatus strictè considerat, in media velut impetu fertur, & qua data porta ruit. Sic peccatores comparati jumentis insipientibus , & similes facti illis , agenda non recogitantes corde , nec perpendentes quid liceat , quid deceat , quid expediat, in ea quæ magis arident , brutorum more se præcipientes agunt. Sic universum omnes homines in propriis negotiis , propriis philantropiæ vinculis impediti cæcutiunt , & ut alicubi scripsit Terentius , ita comparata est hominum natura omnium , aliena meliùs ut videant & judicent , quàm sua ; quia in re nostra aut gaudio sumus præcediti nimio , aut ægitudine ; unde aliis sæpè plus sapimus , quàm nosmet nobis. In Christo nullum hujuscemodi ligamen reperire est ; nulla ei vis ab hominibus inferebatur , qui hostes verbo uno prosternebat ;

Patre, cui eadem erant consilia, eadem consiliorum rationes. Nullo etiam metu vel casu arctabatur voluntas, cui omnis erat in cœlo & in terra donata potestas. Nullus in eo antecedens concupiscentiæ motus, in quo non erant passionēs, sed propassiones, ut alibi exponemus, rationis iudiciū non ducentes, sed sequentes; non dominæ, sed ancillæ. Nulla demum in eo ignorantia, inconsiderationis, vel obscurati luminis vel tenuissima nubecula, in quo omnes erant sapientiæ & scientiæ Dei thesauri absconditi, quive splendidissimis scientiæ beatæ, inditæ, & acquisitæ radiis omnia novebat, omniumque rationes penitissimè pervadebat. Ergo ad nulla mediā arctabatur independens à rebus Christi voluntas, sed in quacumque liberè, expeditè, indifferenterque ferebatur, atque uni Deo adhærebat, cui servire regnare est, cui obsequi libertas est, à quo non posse divelli, felicitas est.

Probatur ex SS. Augustino, & Aquinate Pontificia censura.

His præmissis, ad stabiliendam tertiæ propositionis censuram, eamque SS. Augustini & Thomæ auctoritatum momentis muniendam transcamus. Et quidem in hoc statu superesse libertatem à necessitate, perspicuè tradit Augustinus lib. de lib. arb. cap. 17. *Quis peccat, inquit, in eo quod nullo modo caveri potest? Peccatur autem: caveri igitur potest.* Necessarium vcrò utique caveri non potest, ne non sit necessarium, sed contingens: nulla ergo est in homine
ad

ad peccandum necessitas libertatis inimica. *Voluntatis arbitrium dicitur*, pergit August. lib. de peccat. merit. & remiss. cap. 18. *quod huc, atque illuc flectitur. Dicimus potestatem, ubi voluntati adjacet facultas faciendi*, addit idem Pater lib. de Spiritu & liter. cap. 30. *Vnde hoc quisque in potestate habere dicitur, quod si vult, facit; si non vult, non facit.* Et lib. de nat. & grat. cap. 66. *Quacumque est ista causa voluntatis, ait, si non potest ei resisti, sine peccato creditur; si autem potest, non ei credatur, & non peccabitur? An fortè fallit incautum? Ergo caveat ne fallatur. An tanta fallacia est, ut cavere omninò non possit? Si ita est, nulla ergo peccata sunt. Quis enim peccat in eo, quod cavere nullo modo potest? Peccatur autem, cavere igitur potest.* Ergo nullo quàmlibet gravi concupiscētiæ deorsum trahentis pondere, nullâ quantumvis inescantium illecebrarum tentatione ad peccatū necessitatur voluntas. Idem repetit Doctor Sanctissimus lib. de duabus animabus, c. 22. *Quamobrem, inquit, illa anima quidquid faciunt, si naturâ, non voluntate faciunt, id est si libero ad faciendum, & ad non faciendum motu animi carent, si denique iis abstinendi ab opere suo potestas nulla conceditur, peccato eorum teneri non possunt. Quid certius, quàm neminem vituperatione, suppliciove dignum esse, qui id non faciat, quod facere non potest. Nonne ista cantant & in montibus pastores, & in theatris Poëta. Quod autem hæc à necessitate residua in nobis libertas sit ad merendum necessaria, expressit Augustinus tum lib. cont. Fortunatum, tum lib. de vera Religione, his verbis: Anima rationali, quæ est in homine, dedit Deus*

liberum arbitrium; sic enim posset habere meritum, si voluntate, non necessitate boni essemus. Cum ergo oporteat voluntate, non necessitate bonum esse, oportebat ut Deus daret homini liberum arbitrium. Tales servos suos Deus meliores judicavit, si ei servirent liberaliter; quod nullo modo fieri posset, si non voluntate, sed necessitate servirent.

Astipulatur Doctor Angelicus: Respondeo dicendum, inquit quæst. 6. de malo, quod quidam posuerunt, quod voluntas hominis ex necessitate movetur ad aliquid eligendum, nec tamen ponebant, quod voluntas cogeretur; non enim omne necessarium est violentum. Hac autem positio est hæretica; tollit enim rationem meriti & demeriti in humanis actibus; non enim videtur esse meritorium, vel demeritorium, quod aliquis sic ex necessitate agit, quod vitare non possit. Est etiam annumeranda inter extraneas Philosophia opiniones; quia non solum contrariatur fidei, sed subvertit omnia principia Philosophia moralis.

Eandem veritatem non solum docet, sed validè confirmat idem S. Doctor 1. 2. q. 13. art. 6. Dicendum, inquit, quod homo non ex necessitate eligit; & hoc ideo, quia quod possibile est non esse, non necesse est esse: quod autem possibile sit non eligere, vel eligere, hujus ratio ex duplici hominis potestate accipi potest; potest enim homo velle, & non velle, potest etiam velle hoc, aut illud. Et ideo homo non ex necessitate, sed liberè eligit. Cujus veritatis radicem tradit 1. p. q. 85. art. 1. quia homo agit judicio, quatenus per vim cognoscitivam judicat aliquid esse fugiendum vel prosequendum; & quia judicium rationis non est in operabilibus

rabilibus ex naturæ instinctu, sed quadam collatione procedit, ideo agit homo libero iudicio, potestque in diversa ferri. Unde *q. 24. de verit. art. 12.* sic concludit : *Homo non erit liberi arbitrii, si vel ad bonum, vel ad malum ex necessitate impellitur. Quod esse inconveniens, & experimento, & Philosophorum doctrinis, & divinis auctoritatibus probatur.*

Quomodo autem cum his stet gratiæ efficacis indeclinabilis, & ut loquitur Augustinus, omnipotentissima potestas, ex dictis tomo primo de concordia divinorum decretorum cum humana libertate, liquidò patet, nec propter debitam Romanis legibus observantiam tractatione de auxiliis interdicentibus, aliquid addam. Illud solum præ oculis habendum, gratiam liberum arbitrium, quod ad Deum convertit, non auferre, sed transferre, non inferendo necessitatem, sed inspirando Dei dilectionem. *Inclinatio gratia*, ait S. Thomas 1. p. q. 62. art. 3. *ad 2. non imponit necessitatem, sed habens gratiam potest eam non uti, & peccare.* Quia nimirum gratia, quæ per Christi merita tribuitur, non solum dat hominibus posse si velint, sed velle quod possunt; illi dissentire valent, quanvis ut non dissentire velint, eodem illo gratiæ dono perficitur. Quod aureis verbis expressit S. Coelestinus Papa epist. ad Episc. Galliæ : *Quo utique auxilio & munere Dei non auferitur liberum arbitrium, sed liberatur; ut de tenebroso lucidum, de pravo rectum, de languido sanum, de imprudente sit providum.*

Dubia incidentia.

Occasione hujus propositionis quæri hîc nonnulla possunt, quæ quia alibi prætermisimus, paucis expeditimus.

Quæres primò, utrum voluntas possit saltem per absolutam Dei potentiam necessitari?

Respondeo, absolutè necessitatem voluntati non repugnare; cum enim voluntas sit natura quædam, non ei repugnant naturales motus ab intimis naturalis propensionis visceribus proficiscentes. Hac de causa & motus indeliberati sæpiùs insurgunt, & in beatitudinem, quam non amare non potest, naturali impetu voluntas fertur. Beati etiam Deum clarè visum omnibus amabilitatis illecebris vestitum non solum non diligere non possunt, sed nec ab eo diligendo abstinere valent; quia voluntas infinito bono plena non habet ultrà quod quærat, nec potest in eo redamando amaritudinem sentire, vel tædium, cujus natura bonitas est universalis, quæ est objectum voluntatis. Sed de his alibi ex professo disputavimus.

Hoc nihilominus stante, dicendum est, voluntatem in hoc statu, quandiu objectum sibi cum indifferentia ab intellectu proponitur, non posse à Deo necessitari ullâ motionis ullius efficaciam. Quia cum voluntas sit potentia cæca, in nullum ferri objectum potest, quod à ratione non proponatur; nec alio modo potest, quàm quo ab intellectu exhibetur. Ergo quandiu intellectus objectum aliquod indifferenter proponet, id est quandiu illud vel ut prosequendum, vel ut fugiendum exhibebit, quandiu motiva
amoris

amoris & fugæ sollicitâ collatione exponet, nunquam ab illo rapietur necessariò voluntas, quæ solo summo bono impletur, semperque manebit amplitudo appetitus rationalis, visque electiva mediorum, quandiu non deerit expedita & collativa agendorum consideratio.

Quæres secundò, utrum voluntas, vel creatura aliqua ullam possit à Deo pati violentiam?

Respondeo, nullam à Deo ut authore generali agente voluntati, vel ulli naturæ creatæ violentiam posse inferri. Quia ut *q. 22. de verit.* & alibi discurrit S. Doctor, quotiescumque supremus rerum moderator naturas creatas immutat vel movet, non earum inclinationibus renititur, sed facit ut præcedenti inclinationi nova succedat, primâque ablatâ, secunda permaneat. Quod hoc exemplo illustrat. Lapidem ratione suæ gravitatis inest inclinatio ad locum deorsum; hac inclinatione manente, si sursum projiciatur, erit violentia: si autem Deus auferat à lapide inclinationem gravitatis, & det ei inclinationem levitatis, tunc ferri sursum non erit ei violentum. Sic igitur supremus provisor nulli creaturæ vim infert, quia semper inclinationum & propensionum infusione cum eis agit: nec potest bellum illud dici violentum, in quo non nisi propensionibus & suavitatibus pugnatur. *Deus creator, & conditor omnium creaturarum nihil contra naturam facit; id enim est cuique naturale, quod ille facit, à quo est omnis numerus, motus & ordinatio,* inquit August. libro 26. *cont. Faustum.* An autem à Deo ut authore speciali inferri possit violentia voluntati, vel aliis creaturis, diversi diversa sentiunt. Affirmativa tamen sententia mihi semper arrisit, &

magis principiis S.Thomæ consentanea visa est. Ideo namque juxta D.Thomam & omnes alicujus notæ Theologos, Deus ut author rerum universalis nullam naturis rerum infert vim, quia dum ad aliquid eas movet, simul indit inclinationem ad illud, nec eas immutat, nisi *faciendo ut precedenti inclinationi succedat alia inclinatio, ita quod prima auferatur, & secunda remaneat*, ut ait D.Thomas superiùs laudatus: Ergo si talem inclinationem Deus non inferat, ut non inferit quando agit ut causa particularis, proculdubio homini vim inferet, si aliquid ei contra inclinationem voluntatis infligat; vim quoque creaturis cæteris injiciet, si iisdem inclinationibus manentibus motus eis imprimat repugnantes. *Sicut lapidi*, verba sunt S.Thomæ, *ratione sue gravitatis inest inclinatio ad locum deorsum; hac autem inclinatione manente, si sursum projiciatur, erit violentia: si autem Deus auferat à lapide inclinationem gravitatis, & det ei inclinationem levitatis, tunc ferri sursum non erit ei violentum*. Quo exemplo nihil nec ad mentem S.Thomæ indagandam, nec ad nostram sententiam explicandam planius, vel luculentius esse potest.

Confirmatur, & occupantur omnes Salmanticensium & Gonetii oppositum sentientium objectiones. Licet libenter fatear cum SS. Augustino & Thoma, inesse rebus omnibus universalem inclinationem ad faciendum, recipiendumve quidquid in eis Author naturæ voluerit operari: attamen inclinatio illa non est activa, sed passiva, cum sit ipsa potentia obedientialis, ut expressissimè docet idem Angelicus Magister q.1. *de potent. art.2. ad 1.* his verbis, *Om-*

nes creatura quasi pro naturali habent quod à Deo in eis fit, & propter hoc in eis distinguitur potentia duplex, una naturalis ad proprias operationes & motus; alia quæ obedientia dicitur, ad ea quæ à Deo recipiunt. At potentia obedientialis non est activa, sed passiva, ut omnes omninò Thomistæ contra Suarem uno ore affirmant. Ergo eatenus habent creaturæ inclinationem ad faciendum vel patiendum quidquid per eas & in eis voluerit Deus operari, quatenus possunt recipere virtutem superadditam, quæ ad aliquid præternaturale, vel supernaturale inclinatur; in hoc enim potentia obedientiæ sita est. Sic natura intellectualis habet ad Deum super omnia amore casto diligendum, ad eundemque intuitivè videndum potentiam obedientialem, quia virtutes supernaturales gratiæ & luminis gloriæ recipere potest, quibus hujusmodi operationes vires naturæ excedentes elicere potest. Sic fluxus & refluxus maris (quod exemplo à S. Thoma adhibito abuti videntur adversarii) tametsi naturali aquæ motui contrarius, violentus tamen non est, quia fit ex impressione corporis cœlestis, quod dum aquam ad motum illum insolitum ciet, ei unà indit inclinationem in illum, quâ non minùs suaviter ab oceano refluxit, quàm in ipsum naturalis propensionis pondere fluxerat. Sic magnes occultas in ferrum qualitates influit, quibus in eo receptis, ultrò sequitur. Sic in periculo vacui gravia ascendere, levia descendere cernimus, quia causæ superiores, vel in earum defectu causa prima, qualitatem vel permanentem, si opus est, vel transseunter impertit, quâ ad motus illos alioquin repugnantes fortiter & juxtà suavitè inclinan-

tur. Qua de causa idem S.Doctor 2. 2. q.2.art. 3. creaturas motibus illis præternaturalibus actas non solum non pati vim, sed speciali quadam ratione perfici & adornari docet. Dicendum, inquit, quod in omnibus naturis ordinatis invenitur quod ad perfectionem natura inferioris duo concurrunt: unum quidem quod est secundum proprium motum; aliud autem, quod est secundum motum superioris natura: sicut aqua secundum motum proprium movetur ad centrum, secundum autem motum luna movetur circa centrum, secundum fluxum & refluxum.

Denique in hoc potissimum sita est creaturæ intellectualis pœna sempiterna, quod ejus inclinationibus inflexibili Deus renisu oblectetur; eique igne instrumentato ea imprimat, quibus æternum resistit. Conantur miseri suppliciiis æternis addicti exire de loco & centro tormentorum; ad felicitatem totis viribus anhelant qui non possunt perdere beatitudinis voluntatem, & quo magis nituntur, eo magis sibi obistere sentiunt inflexibilis Judicis æquitatem. Tunc autem eos violentiam pati res ipsa indicat, & his elegantibus verbis declarat Bernardus lib. 5. de consid. cap. 12. *Quid iniquis voluntatibus tam contrarium & adversum, quam semper conari, impingere semper, & frustra? Va universo quod obvium fortè offenderit cedere nescia rectitudo. Quid tam pœnale quam semper velle quod nunquam erit, & semper nolle quod nunquam non erit? In æternum non obtinebit quod vult, & quod non vult in æternum nihilominus sustinebit. Quis hoc facit? Rectus Dominus Deus noster.*

§. IV.

Non poterunt Semipelagiani esse heretici, quòd vellent gratiam ad singulos actus necessariam esse talem, cui posset humana voluntas resistere, vel obtemperare.

QUarta propositio ab Innocentio damnata, complexa est: priori parte ait Semipelagianos admisisse prævenientis gratiæ interioris necessitatem ad singulos actus, etiam ad initium fidei; posteriori parte in hoc eorum hæresi constituit, quod voluerint gratiæ interiori posse voluntatem resistere, vel obtemperare. De prima, quæ est quæstio facti, & merè historica, nihil impræsentiarum agemus; tum quia de hæresi Semipelagiana superius *dissert.* 3. satis superque edisseruimus, & Pontificiæ censuræ veritatem astruximus; tum quia ad propositionis complexæ & absolutè damnatæ falsitatem sufficit alterutrum membrum à veritate esse alienum. In summa illud unum dicam, tantum abesse, ut Semipelagiani gratiam internam illam, qualem Augustinus desiderabat, ad singulos actus, & ad initium fidei admiserint, ut ad eam illis persuadendam integros de prædestinatione Sanctorum, & de bono perseverantiæ libros scripserit. Quare posteriorem duntaxat partem
modò

Patre, cui eadem erant consilia, eadem consiliorum rationes. Nullo etiam metu vel casu arctabatur voluntas, cui omnis erat in cœlo & in terra donata potestas. Nullas in eo antecedens concupiscentiæ motus, in quo non erant passionēs, sed propassiones, ut alibi exponemus, rationis iudiciū non ducentes, sed sequentes; non dominæ, sed ancillæ. Nulla demum in eo ignorantia, inconsiderationis, vel obscurati luminis vel tenuissima nubecula, in quo omnes erant sapientiæ & scientiæ Dei thesauri absconditi, quæve splendidissimæ scientiæ beatæ, inditæ, & acquisitæ radiis omnia noverat, omniumque rationes penitissimè pervadebat. Ergo ad nulla media arctabatur independens à rebus Christi voluntas, sed in quacumque liberè, expeditè, indifferenterque ferebatur, atque uni Deo adhærebat, cui servire regnare est, cui obsequi libertas est, à quo non posse divelli, felicitas est.

Probatur ex SS. Augustino, & Aquinate Pontificia censura.

His præmissis, ad stabiliendam tertiæ propositionis censuram, eamque SS. Augustini & Thomæ auctoritatem momentis muniendam transcamus. Et quidem in hoc statu superesse libertatem à necessitate, perspicuè tradit Augustinus lib. de lib. arb. cap. 17. *Quis peccat, inquit, in eo quod nullo modo caveri potest? Peccatur autem: caveri igitur potest.* Necessarium verò utique caveri non potest, ne non sit necessarium, sed contingens: nulla ergo est in homine
ad

ad peccandum necessitas libertatis inimica. *Voluntatis arbitrium dicitur*, pergit August. lib. de peccat. merit. & remiss. cap. 18. *quod huc, atque illuc flectitur. Dicimus potestatem, ubi voluntati adjacet facultas faciendi*, addit idem Pater lib. de Spiritu & liter. cap. 30. *Vnde hoc quisque in potestate habere dicitur, quod si vult, facit; si non vult, non facit.* Et lib. de nat. & grat. cap. 66. *Quacumque est ista causa voluntatis, ait, si non potest ei resisti, sine peccato creditur; si autem potest, non ei credatur, & non peccabitur? An fortè fallit incautum? Ergo caveat ne fallatur. An tanta fallacia est, ut cavere omninò non possit? Si ita est, nulla ergo peccata sunt. Quis enim peccat in eo, quod cavere nullo modo potest? Peccatur autem, cavere igitur potest. Ergo nullo quàmlibet gravi concupiscētiæ deorsum trahentis pondere, nullâ quantumvis inescantium illecebrarum tentatione ad peccatū necessitatur voluntas.* Idem repetit Doctor Sanctissimus lib. de duabus animabus, c. 22. *Quamobrem, inquit, illa anima quidquid faciunt, si naturâ, non voluntate faciunt, id est si libero ad faciendum, & ad non faciendum motu animi carent, si denique iis abstinendi ab opere suo potestas nulla conceditur, peccato earum teneri non possunt. Quid certius, quàm neminem vituperatione, suppliciove dignum esse, qui id non faciat, quod facere non potest. Nonne ista cantant & in montibus pastores, & in theatris Poëta. Quod autem hæc à necessitate residua in nobis libertas sit ad merendum necessaria, expressit Augustinus tum lib. cont. Fortunatum, tum lib. de vera Religione, his verbis: Anima rationali, qua est in homine, dedit Deus*

liberum arbitrium; sic enim posset habere meritum, si voluntate, non necessitate boni essemus. Cum ergo oporteat voluntate, non necessitate bonum esse, oportebat ut Deus daret homini liberum arbitrium. Tales servos suos Deus meliores judicavit, si ei servirent liberaliter; quod nullo modo fieri posset, si non voluntate, sed necessitate servirent.

Astipulatur Doctor Angelicus: Respondeo dicendum, inquit quæst. 6. de malo, quod quidam posuerunt, quod voluntas hominis ex necessitate movetur ad aliquid eligendum, nec tamen ponebant, quod voluntas cogeretur; non enim omne necessarium est violentum. Hac autem positio est hæretica; tollit enim rationem meriti & demeriti in humanis actibus; non enim videtur esse meritorium, vel demeritorium, quod aliquis sic ex necessitate agit, quod vitare non possit. Est etiam annumeranda inter extraneas Philosophia opiniones; quia non solum contrariatur fidei, sed subvertit omnia principia Philosophia moralis.

Eandem veritatem non solum docet, sed validè confirmat idem S. Doctor 1. 2. q. 13. art. 6. Dicendum, inquit, quod homo non ex necessitate eligit; & hoc ideo, quia quod possibile est non esse, non necesse est esse: quod autem possibile sit non eligere, vel eligere, hujus ratio ex duplici hominis potestate accipi potest; potest enim homo velle, & non velle, potest etiam velle hoc, aut illud. Et ideo homo non ex necessitate, sed liberè eligit. Cujus veritatis radicem tradit 1. p. q. 85. art. 1. quia homo agit judicio, quatenus per vim cognoscitivam judicat aliquid esse fugiendum vel prosequendum; & quia judicium rationis non est in operabilibus

rabilibus ex naturæ instinctu, sed quadam collatione procedit, ideo agit homo libero iudicio, potestque in diversa ferri. Unde *q. 24. de verit. art. 12.* sic concludit : *Homo non erit liberi arbitrii, si vel ad bonum, vel ad malum ex necessitate impellitur. Quod esse inconueniens, & experimento, & Philosophorum doctrinis, & divinis auctoritatibus probatur.*

Quomodo autem cum his stet gratiæ efficacis indeclinabilis, & ut loquitur Augustinus, omnipotentissima potestas, ex dictis tomo primo de concordia divinorum decretorum cum humana libertate, liquidò patet, nec propter debitam Romanis legibus observantiam tractatione de auxiliis interdicens, aliquid addam. Illud solum præ oculis habendum, gratiam liberum arbitrium, quod ad Deum convertit, non auferre, sed transferre, non inferendo necessitatem, sed inspirando Dei dilectionem. *Inclinatio gratiæ*, ait S. Thomas *1. p. q. 62. art. 3. ad 2. non imponit necessitatem, sed habens gratiam potest eam non uti, & peccare.* Quia nimirum gratia, quæ per Christi merita tribuitur, non solum dat hominibus posse si velint, sed velle quod possunt; illi dissentire valent, quanvis ut non dissentire velint, eodem illo gratiæ dono perficitur. Quod aureis verbis expressit S. Coelestinus Papa epist. ad Episc. Galliæ : *Quo utique auxilio & munere Dei non auferitur liberum arbitrium, sed liberatur; ut de tenebroso lucidum, de pravo rectum, de languido sanum, de imprudente sit providum.*

Dubia incidentia.

Occasione hujus propositionis quæri hîc nonnulla possunt, quæ quia alibi prætermisimus, paucis expeditus.

Quæres primò, utrum voluntas possit saltem per absolutam Dei potentiam necessitari?

Respondeo, absolutè necessitatem voluntati non repugnare; cum enim voluntas sit natura quædam, non ei repugnant naturales motus ab intimis naturalis propensionis visceribus proficiscentes. Hac de causa & motus indeliberati sæpiùs insurgunt, & in beatitudinem, quam non amare non potest, naturali impetu voluntas fertur. Beati etiam Deum clarè vîsum omnibus amabilitatis illecebris vestitum non solum non diligere non possunt, sed nec ab eo diligendo abstinere valent; quia voluntas infinito bono plena non habet ultrà quod quærat, nec potest in eo redamando amaritudinem sentire, vel tædium, cujus natura bonitas est universalis, quæ est objectum voluntatis. Sed de his alibi ex professo disputavimus.

Hoc nihilominus stante, dicendum est, voluntatem in hoc statu, quandiu objectum sibi cum indifferentia ab intellectu proponitur, non posse à Deo necessitari ullâ motionis ullius efficacîâ. Quia cum voluntas sit potentia cæca, in nullum ferri objectum potest, quod à ratione non proponatur; nec alio modo potest, quàm quo ab intellectu exhibetur. Ergo quandiu intellectus objectum aliquod indifferenter proponet, id est quandiu illud vel ut prosequendum, vel ut fugiendum exhibebit, quandiu motiva
amoris

amoris & fugæ sollicitâ collatione exponet, nunquam ab illo rapietur necessariò voluntas, quæ solo summo bono impletur, semperque manebit amplitudo appetitus rationalis, visque electiva mediorum, quandiu non decrit expedita & collativa agendorum consideratio.

Quæres secundò, utrum voluntas, vel creatura aliqua ullam possit à Deo pati violentiam?

Respondeo, nullam à Deo ut authore generali agente voluntati, vel ulli naturæ creatæ violentiam posse inferri. Quia ut *q. 22. de verit.* & alibi discurrit S. Doctor, quotiescumque supremus rerum moderator naturas creatas immutat vel movet, non earum inclinationibus renititur, sed facit ut præcedenti inclinationi nova succedat, primâque ablatâ, secunda permaneat. Quod hoc exemplo illustrat. Lapidis ratione suæ gravitatis inest inclinatio ad locum deorsum; hac inclinatione manente, si sursum projiciatur, erit violentia: si autem Deus auferat à lapide inclinationem gravitatis, & det ei inclinationem levitatis, tunc ferri sursum non erit ei violentum. Sic igitur supremus provisor nulli creaturæ vim infert, quia semper inclinationum & propensionum infusione cum eis agit: nec potest bellum illud dici violentum, in quo non nisi propensionibus & suavitatibus pugnatur. *Deus creator, & conditor omnium creaturarum nihil contra naturam facit; id enim est cuique naturale, quod ille facit, à quo est omnis numerus, motus & ordinatio,* inquit August. libro 26. cont. Faustum. An autem à Deo ut authore speciali inferri possit violentia voluntati, vel aliis creaturis, diversi diversa sentiunt. Affirmativa tamen sententia mihi semper arrisit, &

magis principiis S.Thomæ consentanea visa est. Ideo namque juxta D.Thomam & omnes alicujus notæ Theologos, Deus ut author rerum universalis nullam naturis rerum infert vim, quia dum ad aliquid eas movet, simul indit inclinationem ad illud, nec eas immutat, nisi *faciendo ut precedenti inclinationi succedat alia inclinatio, ita quod prima auferatur, & secunda remaneat*, ut ait D.Thomas superius laudatus: Ergo si talem inclinationem Deus non inferat, ut non inferit quando agit ut causa particularis, proculdubio homini vim inferet, si aliquid ei contra inclinationem voluntatis infligat; vim quoque creaturis cæteris injiciet, si iisdem inclinationibus manentibus motus eis imprimat repugnantes. *Sicut lapidi, verba sunt S. Thomæ, ratione sue gravitatis inest inclinatio ad locum deorsum; hac autem inclinatione manente, si sursum projiciatur, erit violentia: si autem Deus auferat à lapide inclinationem gravitatis, & det ei inclinationem levitatis, tunc ferri sursum non erit ei violentum.* Quo exemplo nihil nec ad mentem S.Thomæ indagandam, nec ad nostram sententiam explicandam planius, vel luculentius esse potest.

Confirmatur, & occupantur omnes Salmanticensium & Gonetii oppositum sentientium objectiones. Licet libenter fatear cum SS. Augustino & Thoma, inesse rebus omnibus universalem inclinationem ad faciendum, recipiendumve quidquid in eis Author naturæ voluerit operari: attamen inclinatio illa non est activa, sed passiva, cum sit ipsa potentia obedientialis, ut expressissimè docet idem Angelicus Magister *q.1. de potent. art.2. ad 1.* his verbis, *Omnes*

nes creatura quasi pro naturali habent quod à Deo in eis fit, & propter hoc in eis distinguitur potentia duplex, una naturalis ad proprias operationes & motus; alia quæ obedientia dicitur, ad ea quæ à Deo recipiunt. At potentia obedientialis non est activa, sed passiva, ut omnes omninò Thomistæ contra Suarem uno ore affirmant. Ergo eatenus habent creaturæ inclinationem ad faciendum vel pariendum quidquid per eas & in eis voluerit Deus operari, quatenus possunt recipere virtutem superadditam, quæ ad aliquid præternaturale, vel supernaturale inclinatur; in hoc enim potentia obedientiæ sita est. Sic natura intellectualis habet ad Deum super omnia amore casto diligendum, ad eundemque intuitivè videndum potentiam obedientialem, quia virtutes supernaturales gratiæ & luminis gloriæ recipere potest, quibus hujusmodi operationes vires naturæ excedentes elicere potest. Sic fluxus & refluxus maris (quo exemplo à S. Thoma adhibito abuti videntur adversarii) tametsi naturali aquæ motui contrarius, violentus tamen non est, quia fit ex impressione corporis cœlestis, quod dum aquam ad motum illum insolitum ciet, ei unà indit inclinationem in illum, quâ non minùs suaviter ab oceano refluit, quàm in ipsum naturalis propensionis pondere fluxerat. Sic magnes occultas in ferrum qualitates influit, quibus in eo receptis, ultrò sequitur. Sic in periculo vacui gravia ascendere, levia descendere cernimus, quia causæ superiores, vel in earum defectu causa prima, qualitatem vel permanentem, si opus est, vel transiunt impertit, quâ ad motus illos alioquin repugnantes fortiter & juxta suavitè inclinam-

§. IV.

Non potuerunt Semipelagiani esse heretici, quòd vellent gratiam ad singulos actus necessariam esse talem, cui posset humana voluntas resistere, vel obtemperare.

QUarta propositio ab Innocentio damnata, complexa est: priori parte ait Semipelagianos admisisse prævenientis gratiæ interioris necessitatem ad singulos actus, etiam ad initium fidei; posteriori parte in hoc eorum hæresim constituit, quod voluerint gratiæ interiori posse voluntatem resistere, vel obtemperare. De prima, quæ est quæstio facti, & merè historica, nihil impræsentiarum agemus; tum quia de hæresi Semipelagiana superiùs *dissert.* 3. satis superque edisseruimus, & Pontificiæ censuræ veritatem astruximus; tum quia ad propositionis complexæ & absolutè damnatæ falsitatem sufficit alterutrum membrum à veritate esse alienum. In summa illud unum dicam, tantum abesse, ut Semipelagiani gratiam interiorem illam, qualem Augustinus desiderabat, ad singulos actus, & ad initium fidei admiserint, ut ad eam illis persuadendam integros de prædestinatione Sanctorum, & de bono perseverantiæ libros scripserit. Quare posteriorem duntaxat partem
modò

modò confirmabimus, ostendemusque non solum Semipelagianos ideò non errasse, quòd dixerint voluntatem posse interiori gratiæ resistere vel obtemperare, ut potius hæreticum sit asserere hominem non posse cuicumque gratiæ resistere vel obtemperare. Licet enim gratia efficax indeclinabiliter & inseparabiliter voluntatem ad agendum determinet, atque adeo voluntas nunquam illi actu dissentiat; illa tamen non tollit, sed potius perficit sibi dissentiendi potestatem. Unde cum quacumque gratia in statu etiam lapsò semper remanet activa indifferentia voluntatis, & proxima & expedita dissentiendi resistendique facultas, tamen si nunquam illi voluntas dissentiat vel resistat, quia nunquam resistere vult quandiu in ea affectione permanet, quam ei cœlestis gratia insemnavit.

Probatum primum ex Augustino lib. de bono pers. c. 1. *Credere, vel non credere positum est in arbitrio voluntatis humanae.* Quod certè intelligendum est supposita gratia, sine qua credere non possumus nisi valde remotè. Si ergo supposita gratia credere, vel non credere positum est in arbitrio voluntatis humanæ, proculdubio gratiæ inspiranti fidem possumus resistere, vel obtemperare. Et in Enchir. cap. 95. *Non se liberabunt qui dicturi sunt, Non accepimus perseverantiam; quoniam potest dici, O homo, in eo quod acceperas & tenueras, in eo perseverares si velles.* Sanè qui gratiâ semel acceptâ perseverat, si vult, utrique expeditam habet gratiæ resistendi vel obtemperandi potestatem. Hinc tam sæpè asserit Augustinus, voluntatem non libertate gratiam, sed gratiâ consequi libertatem, quia per gratiam non tollitur libera resi-

stendi

scendi facultas, uti fides Augustini discipulus Prosper lib. 2. de v. cat. Gent. cap. 28. exponit: *Deus*, inquit, ad obediendum sibi ipsum velle sic donat, ut etiam à perseveraturo ipsam mutabilitatem, qua potest nolle, non auferat. Videfis tomo 1. dicta dum de decretis. Ea etiam quæ superioribus paragraphis ex Augustino retulimus, ad præsens omninò faciunt institutum.

Probatur id ipsum ex S. Thoma, & omissis innumeris testimoniis sufficienti hæc duo evidentissima, quia sole sunt clariora. Primum habet quodl. 1. art. 1. ad 1. *Deus*, inquit, movet omnia secundum modum eorum; & ideo d. vna motio à quibusdam participatur cum necessitate, à natura rationali cum libertate, propter hoc quod virtus rationalis se habet ad opposita; & ideo sic *Deus* movet mentem humanam ad bonum, quod potest huic motioni resistere. Et 1. 2. q. 10. art. 4. sic eandem veritatem docet, & probat: *Quia voluntas est activum principium non determinatum ad unum, sed indifferenter se habens ad multa, sic Deus ipsam movet, quod non ex necessitate ad unum determinet, sed remanet motus ejus contingens.*

§. V.

Christum pro omnibus omninò hominibus , & non pro salute duntaxat predestinatorum mortuum esse , veridicè post SS. Augustinum & Thomam Summus Pontifex pronuntiavit.

Hanc veritatem ex professo, *tomo primo, dissert. 9. cap. 1. pag. 385. & sequentibus*, confirmavimus, & rationum & authoritatum momentis, argumentisque in contrarium fecimus satis. Quamobrem selecta duntaxat hîc SS. August. & Thomæ testimonia proferemus. Sed prius observatu necessarium est, quod stante doctrinâ gratuitæ prædestinationis, quæ maximam jure merito apud omnes Scholas Catholicas authoritatem obtinet, Deus solis electis salutem æternam absoluta voluntate dare decreverit, ex qua voluntate proficiscitur illa gratiarum & beneficiorum series, quibus certissimè liberantur quicumque liberantur, quorum utique potissimum est finalis perseverantiæ donum. Hinc fit, Christum Dominum paternæ voluntati sibi notæ semper conformem, hoc decretum nec precibus, nec morte sua mutare voluisse: unde sequitur, Christum solis electis absolutè & efficaciter salutem æternam, & perseverantiæ donum promereri voluisse, quos sibi à Patre datos

&c

& de manu sua à nemine raptum iri in Evangelio dixit. Veruntamen quia Deus voluntate antecedente omnium sincerè salutem vult, ex qua voluntate media omnibus offert, quibus possunt ad salutem pervenire; ideo Christus, cujus voluntas omni paternæ voluntati consona extitit, omnium etiam reproborum salutem sincerè voluit, & pro illis obtinendis mediis ad salutem sufficientibus mortem obivit, pretiumque obtulit nedum sufficiens, sed superabundans.

Probatnr in primis ex Augustino hanc veritatem variis in locis luculentissimè exprimente. *Judicabit etiam terrarum in æquitate*, inquit in Psalm. 95. *Non partem, quia non partem emit: totum judicare habet, qui pro toto pretium dedit.* Si pro toto orbe terrarum, si pro omnibus quos judicaturus est, pretium Christus salvator omnium, maximè fidelium obtulit, profectò non pro salute duntaxat prædestinatorum, sed pro omnibus mortuus est. Unde ibidem ait: *Queritis quid emerit? Videte quid dederit, & invenite quid emerit. Sanguis Christi pretium est: tanti quid valet? Quid nisi totus orbis. Quid nisi omnes gentes? Valde ingrati sunt pretio suo, aut valde superbi sunt, qui dicunt aut illud tam parum esse, ut solos Afros emerit; aut se tam magnos esse, pro quibus solis illud sit datum.* Et ne dicatur eatenus duntaxat secundum Augustinum, Christum pretium illud pro toto orbe terrarum, pro omnibusque gentibus obtulisse, quatenus in toto orbe terrarum, in omnibusque gentibus electi sunt, pro quibus mortuus est: ne, inquam, id dicatur, audi Augustinum lib. 6. cont. *Julianum*, cap. 4. asserentem, pro illis omni-
bus

bus mortuum esse, qui peccato originali obstricti sunt; expendens namque illud Apostolicum, *Christus pro omnibus mortuus est*, ergo omnes mortui sunt, sic habet: *Ex hoc prebavit* (Apostolus) *omnes mortuos esse, quia pro omnibus mortuus est unus. Inculco, in ferocio recusanti, accipe, salubre est, nolo moriarius. Unus pro omnibus mortuus est: ergo omnes mortui sunt. Vide quia consequens esse voluit, ut intelligantur omnes mortui, si pro omnibus mortuus est. Ubi cum Apostolo probat, omnes esse mortuos, quia pro omnibus mortuus est Christus. Qui discursus Apostolicus & Augustinianus nullius prorsus momenti esset, nisi pro omnibus omninò mortuus sit Servator.*

Et ut omnis æquivocationi & effagiis via præcludatur, utque clareat pro reprobis sanguinem à Christo fustum fuisse, apertè tradit Augustinus, pro reprobis & Christum orasse, & pro illis sanguinem obtulisse. Orasse quidem pro eis docet *serm. 4. de Sanctis*, his verbis: *Quando Christus in cruce pendens orabat, videbat & prævidebat omnes inimicos; sed multos ex illis amicos futuros prævidebat, & ideo omnibus veniam postulabat. Illi sciebant, & ille orabat; illi dicebant Pilatò: Crucifige; ille clamabat: Pater ignosce. Obtulisse verò sanguinem pro eis, perspicuè tradit *lib. 2. de Symbolo ad cæcethænos, cap. 8.* ubi Christum crucifixoribus suis sic loquentem inducit: *Videtur vultu nero qua inflixistis; agnoscitis latus, quod pupugistis, quoniam & per vos, & propter vos apertum est, nec tamen intrare voluistis. Quod & docuit in Psalm. 58. his verbis: Ille (Christus) sic voluit mori, ut sanguine suo effusores ejusdem sanguinis redimeret.**

ret. Et de ipso Juda loquens in Psalm. 58. *Non agnovit, inquit, Judas pretium, quo ipse à Domino redemptus erat.* Denique secundum Augustinum pro illis omnibus mortuus est Christus, qui spem salutis concipere possunt: spem autem virtutem theologicam inesse multis reprobis, etiam post gratiæ & charitatis naufragium, apud omnes Catholicos in confesso est. Verba Augustini dulciora super mel & favum, & suavissimam inspirantia consolationem, sunt hæc: *Tales arras accepimus, tenemus mortem Christi, tenemus sanguinem Christi.* Erigat ergo se humana fragilitas; non desperet, non se collidat, non se avertat, non dicat: *Non ero beatus.* Quid tibi promisit Deus, o homo mortalis? *Quod victurus es in æternum.* Non credis? *Credo, crede: plus est jam quod fecit, quàm quod promisit.* Quid fecit? *Mortuus est pro te.* Quid promisit? *Quod vires cum illo.* Incredibilis est, quod mortuus sit æternus, quàm quod in æternum vivat mortalis. Iam quod incredibile est, tenemus. Si propter homines mortuus est Deus, non est victurus homo cum Deo? *Non est victurus mortalis in æternum, propter quem mortuus est qui vivit in æternum?* Hæc August. in Psalm. 148.

Astipulatur S. Thomas 3. p. q. 79. art. 7. ad 2. Dicendum, inquit, quod passio Christi prodest omnibus quantum ad sufficientiam. Si prodest omnibus quantum ad sufficientiam, profectò pro omnibus passio Servatoris oblata est. Et lect. 2. in cap. 2. prioris epist. ad Timoth. Christus, inquit, est propitiatio pro peccatis nostris, pro aliis quibus (electis nimirum) efficaciter, sed pro omnibus sufficienter; quia pretium sanguinis ejus est sufficiens ad salutem omnium. Idem dilucidè tradit

tradit in 3. dist. 20. q. 1. art. 1. q. 1. ad 2. his verbis: *Dicendum quod hoc quod omnes homines non reparantur, non est ex insufficientia medici, & reparantis, cum sit sufficiens quantum in se est ad reparandum omnes, qui naturam humanam habent, vel habere possunt; sed ex defectu eorum qui reparationis effectum in seipsis impediunt.*

Non potest autem dici, S. Doctorem velle Christum eatenus pro reprobis mortuum esse, non quod salutem eorum voluerit, sed quatenus illis auxilia quædam sufficientia promeruit, & publicos gratiarum fontes & canales in Sacramento aperuerit. Non potest, inquam, id dici. Hujusmodi etenim effugium occupavit S. Doctor in cap. 8. prioris epistola ad Corinth. ibi enim illud Apostoli exponens, peribit infirmus in tua scientia frater, pro quo Christus mortuus est; sic habet: *Peribit infirmus in tua scientia frater, propter quem salvandum Christus mortuus est.* Hac de causa sitim Salvatoris, quam in cruce passus est, de siti salutis omnium nascente de ardore dilectionis, de amoris fonte, de latitudine charitatis, interpretatur lect. 3. in cap. 19. Ioannis, his verbis: *Per hoc quod dicit, Sitio, ostenditur ejus ardens desiderium de salute generis humani.* 1. Tim. 2. *Vult omnes homines salvos fieri.* Luc. 19. *Venit filius hominis querere, & salvum facere quod perierat.* Vehemens autem desiderium consuevimus exprimere per sitim.

Verum contra hætenus dicta una se offert non dissimulanda, sed accuratè explicanda difficultas; quia Jansenius nunquam aliud in his quinque propositionibus intendit, nec intelligi voluit,

voluit, quàm doctrinam gratiæ per se efficaci-
cis, à Pontifice & Episcopis intactæ, & à Catho-
licis Doctoribus palam & intrepidè propugna-
tæ; unde cùm dixit, justis aliqua esse præcepta
impossibilia, non omnem possibilitatem exclu-
sit, sed illam quæ omnia ad piè agendum neces-
saria complectitur: & quia justi dum tentatio-
nibus succumbunt, in peccaque labuntur, gra-
tia illa victrici carent, qua præsentè nunquam
vincimur; idèò usitata Patribus loquutione di-
xit Jansenius, aliquando justos præcepta Dei
servare non posse, & deesse illis gratiam qui
possunt, quia nimirum ejusmodi potestatem non
habent, quæ complectatur omnia ad agendum
necessaria, cùm gratiam efficacem ad operan-
dum necessariam non habeant, & tunc solùm
perfectè posse dicantur, cùm uberioribus illis &
efficacibus auxiliis adjuvantur, sine quibus nun-
quam contingit, ut vel oremus sicut oportet, nisi
cùm operantur ut oremus, nobisque interpel-
landi & gemendi inspirant affectum; nec ut
Dei mandata servemus, nisi cùm faciunt ut in
ejus præceptis ambulemus; nec denique ut
dæmonis tentationes superemus, nisi cùm no-
bis victoriam largiuntur. Cæterùm impossibili-
tatem præceptorum à gratia habituali, & auxi-
lio sufficienti Thomistico, ultra quod requira-
tur aliud per se efficax, proficiscentem non ex-
cluit; cùm exertè protestetur, de hujusmodi
gratia sufficienti Thomistarum non esse suam
controversiam; quin & in propositione dam-
nata illam admittat, cùm justi volentis & co-
nantis, sed succumbentis motus sint illius gra-
tiæ effectus.

Eundem in aliis propositionibus sensum
unum

unum quæsiuit. Cùm enim dixit Jansenius gratiæ interiori nunquam resisti, de gratia per se efficaci loquutus est, cui nunquam ita resistitur, ut effectû illo privetur, ad quem permover voluntatem, juxta illud Isaïæ: *Verbum quod egreditur de ore meo, non revertetur ad me vacuum, sed faciet quacumque volui.* Illud itém Salvatoris: *Omnes qui audit, dicit veni.* Illud denique Augustini: *Hac itaque gratia, qua cordibus hominum divina largitate tribuitur, à nullo duro corde respuitur.* Similiter cùm dixit Jansenius, ad merendum, vel demerendum non requiri libertatem à necessitate, voluit duntaxat non requiri libertatem à necessitate infallibilitatis, quæ à gratia efficaci indivulsa est. Cùm enim illa effectum suum indeclinabiliter inferat, eo sensu necessitatem ab ea inferri docuit. Sicut ergo sine gratia efficaci non posse homines mandata servare dixit, quia tunc completissimè dicimur posse, quando voluntas sic præparatur per gratiam, ut velit: sic gratia illa præventos necessariò agere scripsit, quia omnibus necessariis instructi sunt, cum quibus semper actio conjuncta est.

Eodem modo cùm dixit Semipelagianos in hoc fuisse hæreticos, quòd dixerint posse homines gratiæ interiori resistere vel obtemperare, non intendit negare omnem resistendi vel obtemperandi potestatem, sed eam duntaxat, quæ cum effectû conjuncta est, id est, noluit gratiam efficacem esse talem, cum qua de facto dissensus componatur, & in hoc sensu dixit, non posse nos gratiæ resistere. Nam ceteroquin gratias inefficaces, & auxilia Thomistico sensu sufficientia non negavit. Nec obest, quod ea in negotio
concor

concordiæ libertatis humanæ & gratiæ diviniæ non adhibuerit : non obest , inquam ; tum quia nec ad eam recurrunt Silviuſ & Estiuſ , aut etiam Bellarminuſ , qui *lib. 6. de grat. & lib. arbit.* omnibus actu conferri auxilia ſufficientia inficiatur ; nec SS. Auguſtinuſ & Thomuſ (eſto illa admiſerint , de quo impræſentiarum non diſputamus) ad illa inter confutandos Pelagianorum errores confuſiſſe leguntur. Tum quia ſub ambiguo auxilii ſufficientis nomine non mediocriſ latitat æquivocatio ; alii enim per auxilium ſufficiens illud intelligunt , ultra quod nihil à Deo expectatur , ſed ſoluſ exigitur voluntatiſ determinantiſ , ipſumque applicantiſ uſuſ ; alii per auxilium ſufficiens illud interpretantur , quod reſpectu actuiſ principalis , ad quem tendit , inefficax quidem eſt ; nihilominuſ reſpectu actuiſ imperſecti , quem Deus operatur , ad quemve efficiendum decreto abſoluto diviniæ voluntatiſ proximè & immediatè deſtinatur , ſemper efficaciſ eſt ; alii per auxilium ſufficiens illud unum intelligunt , quod omnia ad agendum neceſſaria , ſubindeque gratiam per ſe efficaciſ ſine dubio ad pia opera neceſſariam complectitur. Ne ergo Janſeniuſ hiſ ſe nodiſ implicaret , auxilii ſufficientiſ non meminit.

Denique dum Janſeniuſ Chriſtum pro ſalute omnium mortuum eſſe inficiatur , pro ſoliſque prædeſtinatiſ ſanguinem fuſiſſe contendit , vult ſolùm non pro omnibuſ , ſed tantùm pro electiſ efficaciſ mortem obiviſſe Redemptorem ; quia hiſ ſolùm uberiora illa auxilia promeruit , promereriſque voluit , ſine quibuſ nemo etiam juſtuſ in accepta juſtitia perſeverat , cùm cæteroquin reprobis media ſufficientia obtinuerit.

rit. Ergo cum sensus gratiæ per se efficacis à Jansenio unice intentus, quemve pati possunt quinque propositiones memoratæ, sit orthodoxus, non potuit, nec debuit propter illas damnari.

Respondeo certissimum esse, gratiæ per se efficacis sensum esse catholicum & orthodoxum, nec illi constitutione sua præjudicium ullum inferre velle, vivo vocis oraculo Innocentius declaravit, confirmavit diplomatis suis Alexander VII. & ipse P. Annatus suprâ relatus, hujusque causæ præcipuus actor, ac totius negotii testis oculatus non diffitetur. An illum duntaxat intenderit Iansenius, vel alium, non declaravit Innocentius, sed quinque propositiones in suo naturali, quem præ se ferunt sensu à Galliarum Episcopis sibi oblatas, suoque judicio suppositas hæreticas declaravit. An reapse unum illum gratiæ per se efficacis sensum obtenderit, est quæstio facti, de qua nihil Innocentius, solius juris determinatione contentus. Ipse tamen Alexander declarat propositiones in ipso Jansenii sensu fuisse damnatas; quæ decisio omni qua par est reverentia excipienda est, quia prudenter illum fuisse Iansenii sensum Pontifex arbitratus est, quem verba ipsa in suo naturali sensu indicant, cum oratio sit mentis interpret, & interioris animi sensus manifestatio. Quin etsi ex alicujus authoris contextu, vel collatis prolixi operis sententiis possit alius sensus erui, non tenentur Pontifices, non tenetur Ecclesia illa omnia inquirere, quia solis sacris literis, solis Sanctorum Patrum dictis hanc debet reverentiam, ut obscura & difficilia eorum verba, inquisitis reconditis eorum sensibus explicet,

cet, piisque interpretamentis exponat: alia verò filiorum suorum, vel quorumvis authorum asserta, prout sonant, judicare, & si in naturali, & ultrò se ingerente sensu erronea sint, & à veritate aliena, ea sine cunctatione proscribere, sine distinctione damnare potest. Cùm ergo ille propositionum quinarium inveniatur regulis fidei adversus, & à Patribus & Conciliis prædamnatus, potuit & debuit ab Ecclesiæ Capitibus simpliciter censurâ inuri, & erroribus accenseri; nec tenebantur inquirere an in operis prolixi decursu solius gratiæ per se efficacis sensum author intenderit: quia quemcumque sensum alibi prætenderit, satis est ut damnetur, quòd ea simpliciter affirmet, quæ in connaturali, & aperto sensu inveniuntur à fide aliena. An autem Ecclesia in exprimendis, discernendisque authoris sensibus possit errare, idem dicendum est, quod de quæstionibus facti dici solet, nimirum non esse necesse, omne Pontificum & Conciliorum judicium de quacumque re, etiam ex informatione factorum, & circumstantiarum pendente, sine delectu defendere; quia hoc non est Ecclesiæ & Sedis Apostolicæ auctoritatem fovere, sed labefactare, & hæreticorum ludibrio & fannis exponere. Neque enim adulatione nostra eget Petrus, Petrique successor; & prima Sedes veris cumulata prærogativis, falsis non indiget, ut postea dicemus, & fusè, dum de summo Pontifice, dissertatione præambula tomi tertii, cap. 2. *specul.* 2. *coroll.* 2. & 3. diximus.

REFLEXIO.


Si sancta Sedes Apostolica ad incorruptam Sanctorum Augustini & Thomæ amussim suas definitiones exigendas judicavit, quis constantem his sacris Doctoribus adhærendi voluntatem, pecunium obsequium appellare cum Petro à Valle-Clausa præsumat? Certè si præscriptas ab utroque illo veritatis interprete metas Theologi religiosè custodiēt, non tot luxuriantium ingeniorum, quibus puerorum more, ut Chrysostomus in prologo super Matth. ait, picta magis quàm solida placent; quive magis amœnitate foliorum conspergi gaudent, quàm fructuū ubertate nutrirī, novitatibus sacra doctrina pateret. Quis nescit, nihil ad doctrinæ sanæ incorruptam firmitatem conferre magis, quàm si unus Magister eligatur, ab Ecclesia præsertim consecratus, à quo ne latum quidem unguem recedere liceat? Cùm teste Augustino *lib.2. de serm. Domini in monte, cap.2.* vehementer metuendum sit, ne studio altercandi, novaque invchendi quisque non videat quod à paucis videri potest. His temporibus, ut cum Tertulliano *lib. de anima, cap.2.* loquat, latè quærentur incerta, latiùs disputantur præsumpta: & quanta est probandi difficultas, tanta est operositas suadendi; cùm tamen Christianis paucis ad scientiam opus sit. *Nam & certa semper in paucis, & amplius illis quærere non licet, quàm quod invenire licet.* Observat Epiphanius *lib. de hæresibus, hæresi 64.* primitivæ Ecclesiæ puritatem illud conservasse illibatam, quòd paucos Authores, eosque probatos, concordēs, & uniformes
 sequi

ſequi daretur. Valde pauci, inquit, expoſitores erāt, cum hi qui tunc erant, cenarentur, non delectare, ſed juvare præſentes. Ex quo autem deinceps ad levitatem res devenit, ut omnibus liceat interpretari Scripturas, & omnes ad faciendum quidem bonum hibetati ſunt opinione reſerti, jactantes ſe velut qui omnia cognoscere poſſint. Si in naturalibus ſcientiis ſuum unaquæque Principem agnoſcit, à quo diſcedere nefas ſit; ſi Peripatetici Ariſtotelem, Academici Platonem, Rhetores Latini Tullium, Græci Demothe- nem; Aſtologi & Mathematici Ptolomeum & Euclidem, Medici Hippocratem & Galenum Duces ſequuntur & Magiſtros venerantur, quidni in ſacra Theologia, ubi de rebus graviffimis agitur, Doctores illis adhærebimus, quos ſibi in controverſiis duces & normas ipſi Pontifices, ipſa ſacra Concilia præſtituerunt? Quidni timebimus, ne unicuique noſtrum inſtabili proprii ingenii libertati relicto illud contingat, quod habetur Job 11. *Vir vanus in ſuperbiam erigitur, & quaſi pullum onagri ſe liberum natum putat?* Nemo ergo ægrè ferat, ſi D. Auguſtinum Theologiæ Principem, naturæ genium, gratiæ nutritium, Catholici orbis Magiſtrum, in quo pietas & ſcientia certant, & dubium quæ palmam ferat, cæteris omnibus anteponendum affir- memus; ejuſque diſcipulo Aquinati, quòd Auguſtini doctrinam tutatus ſit, eamque miro ordine expoſuerit, id obſequii præſtemus, omnem- que emergentem de dogmatibus ac moribus quæſtionem, ad illorum ſcripta exigamus. & ſi cum illis conſenſerint, retineamus, ſi minùs abjiciamus? Sanè ſi teſte Tertulliano, pluralitas numinum eſt nullitas numinum; ita quoque

neceſſe eſt multitudinem in doctrina Principum aut Ducum id efficere, ut nullus ſit Dux, Princeps nullus: ubi autem Princeps non eſt, ubi nullus regit Dux, contingat confuſio, contingat prorsus diſturbatio necelle eſt, quia regnum in ſeipſo diſiſum deſolabitur.

Post tot Apoſtolicæ Sedis iudicia infra referenda, quibus Magiſtri Auguſtini, & Diſcipuli Aquinatis doctrina conſecrata eſt, merito utriuſque ſacri Doctoris ſectator verè & intrepide uiſurpaverit, quod Hieronymus *epiſt. ad Damasum*, ſcripſit: *Si hac noſtra confeſſio Apoſtolatus tui iudicio comprobatur, quicumque me culpæ voluerit, ſe imperitum, vel male volum, vel etiam non catholicum, non me hæreticum comprobabit.* Abſit ergo, abſit prorsus, ut venerandam Auguſtinianæ doctrinæ canitrem novellis Authoribus, quibus una opinio dux & lux eſt, poſtponamus. Abſit ut in rebus fidei, vel doctrinæ liberum unicuique ſit habere pro voluntate ſermonem. Abſit ut ad verſus antiquos veritatis Magiſtros insolenter inſurgamus, & indiſciplinato opinandi pruritu prædicatoribus veritatis obſtrepamus. Sed potius ut in cauſa Auguſtini Cœleſtinus olim pronūciavit, deſinat novitas laceſſere vetuſtatem, deſinat Eccleſiarum quietem inquietudo turbare; quæ conatur ſæpe naufragio mergere, quos intra portum ſtantes ſtatio facit fida ſecuros. Stantes ſuper vias, juxta conſilium Jeremiæ *cap. 6.* interrogemus de ſemitis antiquis, quæ ſit via bona, & ambulemus in ea, & inveniemus requiem animabus noſtris. Sacrum depositum, jubente Apoſtolo *1. Timoth. 6.* cuſtodiamus, devitantes prophanas vocum novitates, & oppoſitiones falſi nominis ſcientiæ.

scientiæ. Illos suspectos habeamus, aut minus tutos, qui putant sibi gloriam non mediocrem comparasse, si quid contra antiquos sapiant, & aliquid novi, ut periti videantur, inveniant; scriptum est enim Ecclesiastici 8. *Non te praterat narratio seniorum; ipsi enim didicerunt à Patribus suis; quoniam ab ipsis discis intellectum, & in tempore necessitatis dare responsum.* Unitatem sectemur, quâ sine veritas nulla consistit, cum & omne quod est, ut Boëtius dixit, tandiu maneat, quandiu est unum; tuncque intereat, cum dissolutum unum esse desierit. *Manifestum est*, inquit D. Thomas in caput 4. Dionysii de divin. nom. *quod circa unum non contingit nisi uno modo verum dicere, sed multipliciter à veritate errare contingit; & ideo illi, qui cognoscunt veritatem, conveniunt in una sententia; sed illi qui ignorant, dividuntur per diversos errores.* Felix ergo necessitas, quæ in meliora compellit, dum tutis nos Augustini & Aquinatis dogmatis astringit. Non est turpe nobis Doctoribus illis supponi, eisque submittere fasces, quos Deus & Mater Ecclesia super omnes extulit. Non confundamur eorum esse discipulos, quos agnoscit Ecclesia Magistros.



DISSERTATIO VI.

Cæterarum coronis.

*Commendatio Sanctorum Augusti-
ni, & Thomæ Aquinatis Do-
ctoris Angelici.*



Hæc dissertatione gravissimas de gratia disputationes coronamus, unde exordiri debueramus. Cum enim SS Augustinus & Aquinas Doctores sint, quos nobis in materia de gratia Ecclesia duces præstituit, ab illorum elogiis videbantur sumenda primordia, à quorum auctoritate præcipua sententiarum scholæ nostræ munimenta deprompsimus. Verùm satius duximus doctrinam Augustino-Thomisticam in toto veluti splendore suo proponere, & eam tandem tantorum Doctorum nomine veluti sigillo ob-
signare.

Sed advertendum nobis prius est, ingentes illas de gratia difficultates, unde tot olim exorta, tot quotidie exoriuntur dissidia, non solum è rerum ipsarum profunditate, sed etiam è variis sacrarum Scripturarum locis in speciem pug-

nanti

nantibus enasci, quæ dum suo quisque sensu interpretatur, ad illam, quæ magis arridet, sententiam detorquere solet. Quâ ergo methodo tot interminabiles quæstiones finire, tot excitatos pugnantium animorum æstus sopire licebit? Certè inter illas veritatis latentis tenebras, juxta consuetum Catholicorum morem, ad Ecclesiæ Orthodoxæ, Catholicæ, & Romanæ auctoritatem confugiendum est, ad quam in omnibus de fidelibus verum Scripturæ sensum internoscere, & notum fidelibus aperire, apertumque credendum proponere & jubere spectat. Tunc porro legitimum Scripturarum sensum Ecclesiam inquirere, & docere certissimum est, quando enatæ alicujus hæreseos occasione serio & accurato examine testimonia illa ponderat, quibus & hæreticorum novitates prophanas retundat, & difficultatibus ex aliis objectis locis occurrat, & antiquæ suæ fidei possessionem, & super fundamentum Apostolorum & Prophetarum stabilitam præscriptionem confirmet. Id autem præstat Ecclesia eorum ore, vel calamo, quos sibi pro tempore Deo providente eligit, tum ad mentem suam explicandam, cum ad impiorum ora obturanda. Sic Ecclesia Athanasii ad confundendos Arianos nati, Leonis Magni divinæ Incarnationis œconomix vindicis, & aliorum suâ quaque ætate hæreticarum novitatum flagellorum sensus consecravit. Atqui testantibus Summis Ecclesiæ Capitibus infra referendis, Augustinum ad Pelagianos, Semipelagianosque profligandos, ad confutandos verò omnes omninò hæreticorum & infidelium errores Aquinatem elegit Deus ex omni carne, & ut phrasi Ecclesiastici utar, dedit illis coram

præcepta & legem vitæ & disciplinæ docere, Jacob Testamentum suum, & judicia sua Israël.

Hunc igitur utrumque sacrum Doctorem, tanquam Ecclesiæ vocem & oraculum simul conjungimus, quia inter utrumque non tam similitudo, quàm identitas, & spiritûs ac pietatis intima velut transformatio invenitur. Etenim quâlibet varia sit in operibus suis gratia naturæ fecunditate nihilo inferior; attamen in conformandis Sanctorum animis delectatur Deus, qui & eadem distinctis in vultibus lineamenta interdum describit. Omnibus quidem sæculis præstantes doctrina & pietate viros Ecclesiæ suæ providit Deus, qui sacrum Religionis depositum & fide sua custodierunt, & eruditione illustrarunt. Sed salvâ, quæ debetur, maximâ viris summis reverentiâ, id veridicè pronuntiaverim, præclara illa Ecclesiæ lumina, vel operum angustiis & brevitate, vel specialium sectatorum raritate & infrequentia quibusdam veluti limitibus circumscripta fuere. At in Augustinum & Thomam omnes universæ Theologiæ thesauros infudit Deus, quibus & arcanas Catholicæ fidei veritates elucidarunt, & mores omni castimoniam informarunt, & veræ Theologiæ Magisterium sibi justissimè compararunt.

Scio equidem nonnulla inter utrumque sacrum Doctorem interesse discrimina; nam & totius vitæ tenor, & scribendi modus prorsus distincti fuere. Fuerunt enim Augustini initia erroribus ac vitiis sordida; perpetuus autem S. Thomæ fidei & Sanctimoniam candor nullò fuit nævo infuscatus. Scribendi etiam Augustini ratio soluta, vehemens, ornata, & in exponendis
recondi

recōditionibus mysteriis Oratoris numeris omnibus absoluti munus implens, à stricta, simplici, & Scholastica S. Thomæ dictione immensum ferè discrepans. Sed hæc veluti accidentales differentię præcipuam, & quasi essentialem utriusque consensionem demonstrant. Nam in Augustino semel converso, & novâ post baptismum creaturâ idem fidei zelus, idem charitatis ardor, earundem virtutum amor enituit, qui in S. Thoma sine eclipsi claruerunt. Pro Ecclesia uterque adversus Gentes, Judæos, Hæreticos peræquè laboravit; uterque divini amoris flammæ peræquè expertus est; uterque orationi, contemplationi, sacrisque studiis peræquè vacavit; uterque humilitatis peræquè amans: Augustinus namque flens ad presbyteratum promotus, Aquinas non sine lacrymis Doctoris gradu initiatus; ille resistebat, ne fieret Episcopus; iste ita restitit, ut plures Episcopatus oblatos repudiaret; ille opera retractavit, iste plures suas sententias correxit. Sub diverso etiam dictionis cortice, & scribendi methodo idem de veritate sensus, eadem circa mores doctrinæ castimonia, eadem ubique sententiæ, eadem mentis capacitas, idem acumen, eadem iudicii acerrimi maturitas, eadem soliditas; iidem nervi, idem scriptoris semper sibi constantis ingenium. Denique sicut Augustini regulam in Dominicana familia Aquinas professus est, ut sanctos tantæ Patris mores exprimeret; sic ejusdem doctrinæ germanum sensum ita ebibit, ut totidem, & individuae Augustiniani ingenii dotes in Aquinatem transmigrasse videantur.

Eadem etiam fors utrique obtigit; ambo enim insensibilissimos doctrinæ hostes & obrecta-

tores, ambo doctrinæ sctæ intrepidus defensor, ambo Summos Pontifices protectores habuerunt. Non improbabit igitur æquus Lector, si utrumque Doctorem communi encomio celebrandum aggrediar, cui pietatis & doctrinæ spiritus non tam communis fuit, quàm idem. Id autem, ni fallor, solidè, nitideque præstabimus, si sacri Doctores tesseras & veros characteres utriusque Sancto eximios asseramus, & juxta præclaram methodum à doctissimo Magistro Dominico Gravina initam singulas eximie doctrinæ notas decurramus.

PRIMUM ELOGIUM.

*SS. Augustinus & Thomas antiquitatis,
universitatis, & consensionis
amantissimi.*

PRima præstantis Ecclesiæ Doctoris nota est amor antiquitatis, odium novitatis, juxta illud Apostolicum 1. Tim. 6. *O Timothee, depositum custodi, devitans prophanas vocum novitates.* Hoc est, ut tam sæpe ex Lirinensi inculcavimus, quod tibi creditum est, non quod excogitasti; rem non ingenii, sed doctrinæ; non usurpationis privatæ, sed publicæ traditionis; rem ad te perductam, non à te prolata; in qua non author debes esse, sed custos; non institutor, sed sectator; non ducens, sed sequens. Unde Magnus Greg. 20. *Moral. cap. 18.* omnes hæreticos vocat juvenes. *Omnes hæretici, inquit, ætati universalis Ecclesiæ comparati, juniores tempore congruè vocantur; quia ipsi ab ea, non ipsa autem, egressi*

egressa est ab illis; unde & per Ioannem dicitur, A nobis exierunt, & ex nobis non sunt. Hinc etiam Chrysologus omnes hæreses solâ suâ novitate explodi & revinci ait, loquens de Christi nativitate serm. 145. his verbis: Humana leges intra triginta annos litigiosus omnes interimunt quæstiones; & Christus citra quingentos annos (quanto minùs mille sexcentos) nativitatis suæ causas præstat, ortus sui lites præstat.

Atqui Augustinus, & Aquinas fuerunt antiquitatis studiosissimi. Ille quidem, nam omnes hæreticos & schismaticos ab Ecclesiæ Catholicæ non interrupta serie, & antiqua consuetudine confundebat; unde & Pontificum Romanorum sibi post Petrum perenniter succedentium catalogum texendo, argumentum à possessione adversùs Manichæns libro contra epistolam Fundamenti urgebat, ut alibi operosissimè prosequuti sumus. Hinc etiam licet antiquitatem errorum condemner, quia Christus non dixit, *Ego sum consuetudo*, sed *Ego sum veritas*, & manifestæ veritati cedere debeat consuetudo; attamen hoc perpetuum Novatorum effugium conterit S. Doctor variis locis, nominatim lib. 6. de Baptism. hæret. cap. 77. quia dum fatentur antiquitatem pro nobis stare, & sibi favere veritatem non demonstrant, manifesti sacrilegii & schismatici reos se produnt. Maximè, quia si erroribus tota Ecclesia corrupta est, de qua caverna isti sine originali veritate, & cum calumnia calliditate procedunt? Si verò recta fuerat consuetudo, quia hic accipiebantur hæretici, relinquunt furorē, fateantur errorem, veniant ad Ecclesiam, non ut retingantur sacramento Baptismatis, sed ut curentur à plaga concisionis. Itaque voluit sem-

per Augustinus consuetudinem quidem veritati innixam esse oportere, sed veritatem nunquam sine antiquitate consistere; à novitate abhorre-
re, & à vetustate inconcussam firmitudinem obtinere. *Hoc planè verum est, quia ratio & veritas consuetudini preponenda est, sed cum consuetudini veritas suffragatur, nihil oportet firmius retineri.*

Eiusdem etiam antiquitatis tenacissimus fuit. S. Thomas, qui licet ab infinitis dotibus celebra-
ri possit, à servata tamen in docendo antiquorum doctrina, & explosa humanarum adinventio-
num novitate, cæteris Scriptoribus antecellit. Ornavit ille quidem innumeris compendiis Theologiam, adjecit gratiam, splendorem, ordi-
nem, decorem, venustatem, gemmas sculpsit, suisque locis coaptavit; fidei depositum expo-
lavit, sed nihil mutavit, trita vetustatis vestigia semper infectatus. Quid enim aliud sunt Aquinatis libri, quàm antiquæ fidei propugnatio, veterum Patrum apologia, & traditionum Apostolicarum fidelis observantia? Nunquam Doctor ille ad dexteram vel sinistram declinans proprios sensus obtrusit? nunquam Scripturarum explicationem ex suo ingenio petiit, nunquam divinæ legis præceptis exceptiones apposuit pro arbitrio; sed antiquum Ecclesiæ Catholicæ sensum ad nos traditione propagatum semper retinuit, Sanctorum Patrum dicta velut inextinctas quasdam, semperque lucentes faces semper sequutus est, ad Conciliorum decreta, ad incorruptibiles Ecclesiæ regulas, ad tritam Sanctorum viam omnes suas resolutiones exegit.

Hinc eximii Theologi Franciscus Sylvius,
Gravina,

Gravina, & novissimè Vincentius Baronius S. Thomam Doctoris Communis illustri nomine decorarunt; quia illi veridicè illud accommo-
dare licet; quod de Episcopo Musonio Basilus
epist. 62. reliquit: *Custos fuit rituum paterno-
rum, inimicus novandarum rerum, nihil de suo,
nihil quod nova alicujus cogitationis inventum
reciperet, attulit hic vir; sed iuxta benedictio-
nem Moysis ex ipsis arcanis cordis sui, ac bonis
thesauris veterū, & quae ante faciem iuniorum
vetera essent, proferre novit.* Hac sanè ratione
in ipsis consortiū, & coequalium consiliis primo
honore potitus est, non propter aetatis prerogati-
vam, sed quoniam omnes sapientia vetustate
superabat. Prima ac penè una Sanctissimi Præ-
ceptoris cura fuit, quid Scriptura, quid consue-
tudo Ecclesiae in omnibus, ut ipsemet alicubi ait,
æmulanda; quid Patrum conspiratio de quaque
re docerent, ut immobili illi fundamento doctri-
nam suam cœlestem astrueret. Hinc, inquit Vin-
centius Baronius laudatus lib. 1. suo apologeti-
co, sect. 1. art. 2. §. 1. Doctoris Communis nomen af-
sequutus est, quia viam tritam Patrum calcavit
semper, & fugit averticula. Singularissimus qui-
dem est Doctor, & multa recondita, & superiori-
bus seculis ac Doctoribus occulta invenit: sed
hoc Doctoris Communis titulo nulla ratione ad-
versatur. Duo enim in quolibet Doctore distin-
guenda sunt, nempe sententia, & argumenta qui-
bus propugnatur. Communissimus est Thomas sen-
tentiis, quia viâ regiâ incedit, duce Verbo D. i
vestigia Patrum sequutus. Singularissimus est
inventionem argumentorum, à quibus nihil est pe-
riculi, si deficeret; plurimum est laudis, si effica-
cia sint. Antequam hos ille munus loqueretur,

adivit, & consuluit oracula Scripturæ, quibus exceptis mugire cœpit, habenas ingenio suo laxavit sine lapsus aut erroris periculo, quia securus erat via, quâ incedebat, trita Patrum, à qua ne latum quidem unguem permisit sibi recedere.

Et sanè omninò suis principiis consentaneus fuit Doctor Angel' cus, dum Patrum venerandæ antiquitati semper & indivulsè adhæsit. Etenim antiquitatis tesseram usque adeò veritati doctrinæ censuit necessariam, ut ipsi Evangelio etiam quando prædicari cœpit, non defuisse præclare observaverit, exponens illud Apostoli, *Evangelium Dei quod antè promiserat per Prophetas suos in Scripturis sanctis, de Filio suo, qui factus est ei de semine David, &c.* ubi ait: *Commendatur Evangelium ex antiquitate; quod fuit necessarium contra Paganos, qui Evangelio detrahebant, quasi post longa tempora subito ejus predicatio esset exorta. Et ad hoc exhibendum dicit: Quod antè promiserat per Prophetas suos. Quia licèt ex tempore certo predicari inceperit, antè tamen prænuntiatum fuit divinitus.*

Atque ex his sponte sua fluunt duæ aliæ hujus elogii partes, nimirum Augustinum & Aquinatem fuisse doctrinæ universitatis, & consensionis peramantes; antiquitatem enim veræ doctrinæ comitatur & locorum universitas, & Patrum conspirantium concordia. Hoc enim verè catholicum jure merito credimus, quod semper, quod ubique, quod à Patribus idem edocentibus in Ecclesia traditum est. Porro adeò fuit illius doctrinæ universitatis amans, ut nunquam fortiùs in Donatistas & Pelagianos argumentorum sagittas vibrarit, quàm

quàm dum illas ex illa pharetra, id est ex universitatis loco deprompsit; quia, inquit, quæcumque secta, quæ post propositum Evangelium in angulis sedet, concubina est, non matrona; & Catholica idcirco dicitur Ecclesia, quia ubique terrarum diffusa. *Quæritur quid emerit*, inquit in Psalm. 95. *Videte quid dederit, & invenite quid emerit.* Sanguis Christi pretium est. *Tanti quid valet? Quid nisi totus orbis? Quid nisi omnes gentes?* Valde ingrati sunt pretio suo, aut multum superbi sunt, qui dicunt, aut illud tam parvum esse, ut solos Africos emerit; aut se tam magnos esse, pro quibus solis illud sit datum. Et epist. 161. Sicut de Ecclesia prophetatum est, per orbem terrarum diffusam videmus: arbitramur nos non debere dubitare de tam evidentissima completionem sanctæ prophetiæ, quam Dominus in Evangelio confirmavit, & Apostoli, per quos eadem Ecclesia dilatata est, sicut & de illa prædictum erat. Nam & in capite sacrosancti Psalterij scriptum est de Filio Dei: *Postula à me, & dabo tibi gentes hereditatem tuam, & possessionem tuam terminos terræ.*

Hanc universitatem, cujus tantoperè amans fuit, doctrinæ suæ ascivit Augustinus, quia ut ait Cælestinus Papa, *benè de eo omnes in commune senserunt*, utpote qui ubique cunctis & amoris fuerit, & honori. Ejus doctrinam orbis Christianus amplexus est, literarius demiratus. Idem discipulo Aquinati contigit; unde Clemens IV. Universitatis Tolosanæ Magistris præcipit, ut ejus doctrinam tanquam catholicam & veridicam studeant ampliare.

Idem etiam de consensione Patrum perspicuum est, & potest sic breviter formari argumentum.

mentum. Consensionem Patrum sequimur, si in ipsa vetustate omnium, vel certè penè omnium Doctorum, & Episcoporum definitiones, sententiasque sectemur, ita ut quidquid vel omnes, vel certè plures uno, eodemque sensu, manifestè, frequenter, perseveranter, velut quodam consentiente, sibi Magistrorum consilio, accipiendo, tenendo, tradendo firmaverint, id pro indubitato, certo, ratoque habeatur. Hinc præclare Gregor. VII. *Videntes, inquit, ordinem Christiana Religionis multis iam labefactatū temporibus, & principales, ac proprias lucrandarum animarum causas diu prolapsas, & suadente diabolo conculcatas; concussi pericula, & manifesta perditione Dominici gregis, ad Sanctorum Patrum decreta, doctrinamque recurrimus, nihil novi, nihil ad inventionem nostra statuentes; sed primam, & unicam Ecclesiastica disciplina regulam, & tritam Sanctorum viam, relicto errore repetendam, & sectandam esse censuimus.*

Atqui SS. Augustinus & Thomas illius Patrum consensionis studiosissimi fuere; ille quidem, ut patet in libris contra Julianum, ubi hæreticum illum concordi Patrum sententia retundit. Eius lougè præclarissimas hac de re sententias præambulâ dissertatione secundi voluminis in variis ad Novatores nostros reflexionibus protulimus. Videatur etiam *lib. 3. de peccatorum meritis & remiss.* ubi enumeratis Patrum simul conspirantium vocibus, ait: *Hæc non idèò commemoravi, quasi disputatorum quorumlibet sententiis tanquam canonica autoritate nitamur, sed ut appareat, ab initio usque ad præsens tempus, quo ista novitas orta est, hanc de originali peccato*

Commend. SS. Aug. & Thome. 639
peccato Ecclesia fidem tantâ constantiâ custoditâ.

Sanctum verò Thomam in omni sententiarum suarum delectu Patrum consensionem statum fuisse, solus ille ignorat, qui opera ejus nec à limine salutavit; cum enim inter infinitos articulos nullus ferme sit, qui non alicujus Patris, Augustini præsertim, Patrum sine controversia facile Principis, auctoritate falcietur, meritò de illo dici quod de Angelo ad Danielelem misso scribitur Danielis 10. *Vox sermonum ejus, vox multitudinis.* Quid enim aliud est Angelica S. Thomæ doctrina, quam succus è sacris Doëtoribus eliquatus, Patrum & Conciliorum medulla, & totius antiquitatis doctrinæ quinta essentia, & sacrum elixir. Vnde eleganter Petrus Labbe canit in suis elogiis: *Mysteriorum compendium est Summa Thoma. Collegit in ea quidquid doceri potest, aut sciri. Inclusit Ambrosios, Hieronymos, Augustinos, Gregorios. Inclusit seipsum maior seipso, & minor. Epitomen fecit aliena sapientia, & summam sua. Dicit omnes qui Thomam intelligit; nec totum Thomam intelligit, qui omnes didicit.*

SECUNDUM ELOGIUM.

SS. Augustinus & Thomas ab Apostolica Sede comprobati.

Sedis Apostolicæ approbatio est lapis lydius adulterinam à pura & legitima doctrina discernens. Petro etenim & successoribus fratrum in fide confirmandorum potestatem Christus contulit; cum videamus & ipsum Doctorem Gentium magisterium Petri consuluisse, Ierosolymam

solymam venisse, apud eumque quindecim diebus mansisse, *ne forte*, ut ipse ait, *in vacuum cur-
reret, aut cucurrisset*; & Concilia œcumenica
Romani Pontificis approbationem postulasse;
& Augustinum, quæ in libris contra duas episto-
las Pelagianorum scripsit, ad suam dirigere San-
ctitatem, *non tam*, inquit, *discenda, quam exa-
minanda*; ubi si forte aliquid displiceat, *emen-
danda constitui*; & Hieronymum à Romanæ
Sedis fide se indivulsum prædicasse locis alibi
citatis; & S. Bernardum *epist. ad Lugdunens.*
eandem reverentiam profiteri: *Quæ dixi*, in-
quit, *absque præjudicio sanè dicta sunt sanius sa-
pientis*: Romana præsertim Ecclesia auctoritati
atque examini totum hoc, sicut & cætera, quæ
huiusmodi sunt, universa reservo; ipsius, si quid
aliter sapio, paratus iudicio emendare; & Petrum
Damianum hæc scribere: Nos si quid erravi-
mus, ad Petri Magisterium corrigendi libenter
accedimus, & retractationis opprobrium non ve-
remur. Hæc est enim illa officina fabrilis, cui ni-
mirum is, qui fabri filius dicebatur, filius præsidet:
ad cuius regulam omnis merito moneta reducit,ur,
ad cuius rectitudinis lineam quidquid uspiam de-
pravatum fuerit, reformatur; D. denique Tho-
mam, omiſſis aliis, in epistola Catenæ Aureæ
præfixa, & Urbano IV. dicata, sic habere: *Sus-
cipiat vestra Sanctitatis præsens opus vestro discu-
tiendum, corrigendumque iudicio, vestra sollicitu-
dinis obedientia mea fructum*; ut dum à vobis
emanavit præceptum, & vobis reservetur finalis
iudicium; ad locum enim unde exeunt flumina,
revertuntur.

Atqui Augustini, Aquinatisque doctrina à su-
premis Ecclesiæ Capitibus non tam approbata,
quàm

quàm consecrata fuit. Mirum enim est, quot & quantis cœlestem Augustini doctrinam Summi Pontifices præconiis celebrarint. Etenim S. Innocentius I. in responsione ad Synodum Carthaginensem atque Milevitanam, quarum Augustinus anima, & ingenium fuit, ait nihil ab illis Conciliis prætermisum, nihil suppressum; illorum Patrum relationem Scripturarum relationibus esse plenam, nec aliquid quod ad causam possit proficere, præterisse. Litteras etiam utriusque Concilii ab Augustino scriptas, plenas fidei appellat, totoque catholica religionis vigore firmatas. Cœlestinus etiam Papa in epist. ad Episcopos Gallie, sic Augustini scripta & doctrinam suâ approbatione firmat, his verbis: *Augustinum sancta recordationis virum pro vita sua atque meritis in nostra communione semper habuimus, nec unquam hunc sinistra suspitionis rumor aspersit, quem tantâ scientiâ olim fuisse meminimus, ut inter Magistros optimos etiam à meis prædecessoribus haberetur.* Benè ergo de eo omnes in communi senserunt, utpote qui omnibus ubique cunctis amoris fuerit & honori. Cui eximie Augustini commendationi nihil addi potest præter observationem S. Prosperi lib. contra Collat. cap. 43. *Librorum, inquit, qui errantibus displicebant, pietate laudatâ, quid oportet de eorum temeritate sentire, sancto manifestavit eloqui.* Contra istam clarissimam laudationis tubam, contra istam sacratissimi testimonii dignitatem audet quispiam maligna interpretationis murmur emittere, & perspicua, sincerissimaque sententia nubem obliquæ impietatis obtendere. Vnde infert Cœlestinum validissimè compressisse Augustini contradictores, qui

pissimo

pilissimo disputatori obviare præsument, & tanquam necessarium modum excesserit, obloqui non verentur.

Idem succedentes deinde Pontifices senserunt. Nam Hormisdas Papa epistola 70. ad Possessorem Africanum Episcopum ait, *de libero arbitrio & gratia Dei, quid Romana, hoc est Catholica sequatur & asseveret Ecclesia, in variis libris Beati Augustini, & maxime ad Hilarium & Prosperum posse cognosci.* Astipulatur Ioannes II. in epistola 3. ad quosdam Senatores: *Augustini doctrinam secundum predecessorum meorum statuta, Romana sequitur, & servat Ecclesia.*

Denique Clemens VIII. doctrinam Augustini dotem Ecclesiæ relictam esse dicebat, ad eamque velut ad amissum, exigendas esse de gratia controversias pronuntiabat. Unde in Congregationibus de Auxiliis, ita de Augustino loquutum fuisse refert Dominus le Bussy Doctor Parisiensis, & P. Gibiufus: *Quavis (verba sunt Clementis) nemini nisi Deo rationem reddere debeam mearum actionum, dicam tamen impræsentiarum rationes, propter quas astringere statui totam hanc disputationem ad normam S. Augustini de gratia. Prima est, quod si teste B. Prospero ferè initio libri contra Collatorem, viginti annorum spatio facies Ecclesiæ ita dimicavit pro gratia contra Pelagianos, ut tandem Augustino dūce vice-rit; oportet etiam ut in causa simili eundem ducem cognoscamus & sequamur. Secunda est, quod idem Sanctus nihil videatur prætermis-
eorum, quæ ad præsentem controversiam pertinent; quandoquidem si agitur de necessitate gratiæ, eam describit, dicens esse necesse, ut nos præveniat,*
comite

comitetur, & sequatur; si de vi, asserit vires efficacissimas præbere voluntati; si de effectu, testatur facere de non volente volentem; si de modo, asserit Deum id facere potentissimâ facilitate. Denique sic dissolvit objectiones, ut doceat liberum arbitrium non tantum bene cum illa gratia coherere, sed etiam fieri liberior, quando ab illa fuerit liberatum. Tertia tandem ratio est, quod cum multi Pontifices prædecessores nostri doctrina D. Augustini de gratia tam acres fuerint assertores ac vindicæ, ut eam quasi hæreditario jure in Ecclesia relinqui voluerint, æquum non est, ut patiar, illam hac quasi hæreditate privari.

Quantum verò Angelico Doctore S. Thomæ Summi Pontifices acclamarint, nullus enarrare sufficeret. Joannes XXII. in Bulla canonizationis expressè ait, illud in eo Psalmi impletum fuisse: *Rigans montes de superioribus suis, de fructu operum suorum satiabitur terra.* Nemo etiam illud ignorat ejusdem Pontificis vivæ vocis oraculum: *Aliis opus non est ad Thomæ apostolicum miraculis; tot enim Sanctus vir miracula edidit, quot articulos scripsit.*

Urbanus IV. in diplomate ad Tolosanum: Nos attendentes, inquit, quantâ à D. o scientiâ dotatus Ordinem Fratrum Predicatorum, & universalem Ecclesiam illustraverit, ac B. Augustini vestigia insequens Ecclesiam eandem doctrinis & scientiis quamplurimis ornaverit, &c. Volumus, & tenore presentium vobis injungimus, ut dicti B. Thomæ doctrinam tanquam catholicam & veridicam suscipiatis, eamque studeatis totis viribus ampliare. In qua approbatione illud ponderandum est, Pontificem ex eo capite Aquinatem

natem commendare, quòd Ecclesiam illustrarit; eatenus verò Ecclesiam illustrasse ait, quatenus Augustinum vèstigiis prosequutus est: unde consequens est, S. Thomam idèò consequutum esse Scholarum Magisterium, quia fidelis fuit Magni Augustini discipulus.

Non minora pànxit Angelico Præceptori encomia Innocentius V. I. in quodam sermone ab ipsis D. Thomæ adversariis recepto, ut apud Catharinum *lib. de Imm. Concept. pag. 51.* videre est. *Hujus Doctoris sapientia, inquit, præ cæteris (exceptâ canonicâ) habet proprietatem verborum, modum dicendorum, veritatem sententiarum; ita ut nunquam qui eum tenuit, inveniat a tramite veritatis deviasse; & qui eum impugnavit, semper fuit de veritate suspectus.*

Non minùs elegans est & luculenta B. Pii V. (novissimè in Beatorum numerum toto applaudente orbe Catholico relati,) laudatio. Sic enim habet in constitutione celeberrima anno 1567. edita, quâ, ringente licèt invidiâ, S. Thomam in oculis suis humilem, & Magisterium Parisiense, dum viveret, detrectantem, in Doctorem Ecclesiæ Catholicæ promovit. *Ex certissima Christiana regula doctrina Ecclesiam innum.ris confutatus erroribus illustravit: & Dei providenciâ factum est, ut Doctoris Angelici doctrinâ, ex eo tempore quò cælestibus civibus ascriptus fuit, multa deinceps exorta hæreses confusa, & contrita dissiperentur; quod & antè factum, & liquido nunc in S. Tridentini Concilii decretis apparuit. Vnde infert, quòd eius meritis vobis terrarum à pestiferis quotidie erroribus liberatur.*

Ex qua approbatione ab universa Ecclesia
Catho

Catholica, id est omnibus Episcopis, quos misit Spiritus sanctus regere Ecclesiam Dei, ab omnibus Universitatibus, à cunctis denique Ecclesiasticæ Hierarchiæ Ministris, nullo reclamante, sed universo Christiano orbe gratulante recepta effectum est, ut de S. Thoma tanquam de Ecclesiæ Doctore recitetur officium, & Missarum solennia celebrentur: nec potest absque temeritatis (ne aliquid gravius dicam) nota hujus Doctoris autoritas floccifieri, vel simpliciter, absque aliquo saltem reverentiæ interpretamento negari. Etenim non minoris autoritatis est in Ecclesia Pius V. quàm Bonifacius VIII. nam si Romana Sedes facit autoritatem, ut nemo Catholicus inficiatur, eadem fuit utriusque Pontificis facultas, eadem pascendi pabulo doctrinæ Fideles cura commissa, ac proinde eadem Ecclesiæ Doctoratum viris doctrinâ & pietate præstantibus asserendi potestas. Si pietas auctoritati pondus addit, Pii V. mores & sanctitatem, Bonifacii vivendi modo præstitisse nemo ignorat. Atqui post Bonifacii VIII. declarationem ab Ecclesia unanimi consensu receptam, quæ habetur *in cap. Gloriosus Deus, de reliquiis & veneratione Sanctorum*, ubi Doctoris Ecclesiæ titulum Augustino, Ambrosio, Hieronymo, & Magno Gregorio decernit, nullus Theologus citra immodestiæ & temeritatis dampnandæ notam, horum Doctorum auctoritatem floccifacere, eamque simpliciter reprobare ex professo, & datâ operâ omni nata & accepta occasione præsumeret: Ergo nullus pariter Catholicus Theologus S. Thomæ de Fide, & de Christianæ Ethicæ moribus sensus aspernari, confutare, & in confutando, ut quidam cum magnis digladiari

diari viris soliti, delectari, & triumphare potest, vel debet.

Sed Clemens VIII. qui tantus fuit Magistri venerator, non minori discipulum Aquinatem honore prosequutus est; sic enim habet in Bre-
vi ad Neapolitanos: Proinde piè, prudenterque cogitatis de novo Civitati Patrono adsciscendo civis vestro, divina voluntatis Angelico interprete, vita sanctitate & miraculis claro Thoma Aquinate. Hic siquidem honor ejus virtutibus cum admirabili doctrina conjunctis jure optimo debetur. Ac doctrina quidem testis est ingens librorum numerus, quos ille brevissimo tempore in omni ferè disciplinarum genere, singulari ordine, ac mira perspicuitate, sine ullo prorsus errore conscripsit. In quibus conscribendis interdum Sanctos Apostolos Petrum & Paulum alloquentes, locosque illi quoque Dei jussu enarrantes habuit, & quos deinde conscriptos expressâ Christi voce comprobatos audivit. Et in Brevi ad Proregem Neapolitanum: Divino eloquio, ac cœlesti doctrinâ, miraculisque illustris meritò apud remotissimas nationes summâ Christiani nominis cum laude, atque Ecclesiæ utilitate celebratur. Additque se eo ardientiori voluntate piis Neapolitanorum votis annuere, quo Nos ipsi Angelico huic Doctori, & nostro, & totius Christianæ Ecclesiæ nomine plurimum debemus. His amplissimis encomiis quid addi possit, non video. Postquam enim doctrina alicuius admirabilis, sine ullo prorsus errore scripta, à Principibus Apostolorum alloquentibus inspirata, expressâ Christi voce comprobata, divina, cœlestis, & cui Christiana Religio plurimum debeat, ab Ecclesiæ Catholice Hierarcha pronunciata est, progredi ulterius non

non possunt præconia, nisi aliquid queramus post omnia.

Quàm verò libenter hæc de S. Thoma testimonia perhibeant, testatur Paulus V. in Brevi 17. Decemb. anni 1607. edito, his verbis: *Splendidißimi Catholica fidei athleta B. Thoma Aquinatis, cuius scriptorum clypeo Militans Ecclesia hereticorum tela feliciter eludit, honorem & venerationem in dies magis, magisque augeri plurimum in Domino gaudemus.* Ad quam sanè Apostolici throni Antistitis è S. Thomæ gloria aucta lætitiæ attendere deberent recentiores quidam invidi, qui quidquid ad laudem S. Thomæ confert, nedum rident, sed & cavillis, fraude, sarcasmis, & omni atrociorum conviti-
orum genere arrodunt.

Denique novissimè diebus istis Sedes Apostolica, in Alexandro VII. nobis loquuta est, quæ multifariam, multisque modis olim loquuta fuerat in Joanne, Innocentio, Urbano, aliisque antecessoribus. Sic enim habet in celeberrimo Brevi die septima Augusti anni 1660. edito, & ad Doctores Lovanienses directo: *De reliquo non dubitamus, quin vos pro singulari scientia, pietatisque studio sanam & incorruptam, qualem tot Apostolica Sedis declarationes requirunt, doctrinam semper amplexuri, & adversus Orthodoxæ Religionis hostes defensuri sitis; necnon præclarissimorum Ecclesiæ Catholica Doctorem Augustini, & Thoma Aquinatis inconcussa, tutissimaque dogmata sequi semper, ut asseritis, ac impensè revereri velitis; quorum profectò Sanctissimorum virorum penes Catholicos universos ingenia, & omnem laudem supergressa nomina novi præconii commendatio*

mendatione planè non egente Quâ laudatione cætera prædecessorum præconia, quibus Augustinum & Aquinatem cælum usque evexerunt, Alexander coronavit.

Corollarium momentosum adversus nonnullos Augustini & Aquinatis obtrectatores.

Ex tam angustis Apostolicæ Sedis utriusque sacri Doctoris doctrinam consecrantis testimoniis colligere est, quid de quorundam novellorum Theologorum doctrina sentiendum sit, qui ut novas suas imaginationes liberius, faciliusque obtrudant, tot sigillis consignatas gemini hujus Doctoris sententias effræni prorsus licentiâ objicere non verentur. Quin eò quorundam pervenit impudentia, ut scriptitare non dubitarent, *Augustini vestigiis non esse insistendum, & miseram fore Ecclesiam, si Augustini placitis obstricta maneret.*

Quis ferat has Vasquesii 1. p. disp. 47. & 1. 2. disp. 132. cap. 3. & alibi prolatas voces: *Mihi, inquit, in hac parte non probatur D. Augustini doctrina, sed existimo aliter esse philosophandum. Vnde temerè affirmabimus auxilium aliquibus negari. Ab Augustino & aliis, qui id docuerunt, petere possumus, undenam hujus voluntatis Dei certiores fuerint effecti. Loca enim Scriptura nos faciliè declarabimus. Ibi- dem etiam satis insinuat, quod si ista D. Augustini sententia in Concilio Tridentino damnata non est, id ex sola Concilii modestia contigit. Id ipsum, acrius tamen, testatur Petavius à Vin-*
centio

centio Baronio memoratus lib. 1. apologetico, pag. mihi 366. Non pauca, inquit Petavius, neque contemnenda Augustini dogmata, vel Ecclesia uniuersa, vel Theologorum, aut omnium, aut multorum, nec infimi subsellii iudicio reprobare, & Concilium Tridentinum nonnullis necessariò additus fecisse catholica Augustini non pauca, qua nec Catholica sunt, nec haberi Synodus ulla œcumenica voluit. Sed omnes modestiæ limites transiit Mariana, dum lib. 3. de mort. cap. 8. hæc non tam verba, quàm monstra edere non erubuit: *Quæ à Cassiano dicta sunt omnia de gratia & libero arbitrio, à vris eruditis nostrâ ætate defendi quasi pietati consona, neque deflexa à fidei regula sancta. Benè consultum esset triadi Patrum, Augustino, Fulgentio, & Prospero, si perinde Catholici haberentur, ac Cassianus, Faustus, alii- que Massiliense.*

Dum hæc lego, & præclaris de Augustino sententiis à Pontificibus non minùs morum castimoniâ, quàm primæ Sedis dignitate sanctissimis latis confero, vix sum apud me præ dolore, vix continere possum sensum meum, fodicat mihi pectus, & lancinat animum tam horrendus Patres, & Patrum Patrem ac Solem carpendi pruritus. Si Petrus à Valle-Clausula Dominicanæ Instituti hostis juratus quid simile in Syriacorum libris inuenisset, quas tragedias excitasset? Quot diatribis læsam Sanctorum reuerentiam exaggerasset? Quid dixisset ad istam Molinæ modestiam, quam omnibus hominibus notam fecit in sua Concordia (unde tot discordiæ ortæ sunt) ad q. 23. ar. 4. & 5. disp. 1. membro 6. dum dixit, *Augustinum sub quadam caligine constitutum veritatem non vidisse, quam*

Theologi recentiores invenerunt, hincque esse quod Scripturas adeò durè exposuerit. Et membro ultimo inventa sua Augustino, ipsomet fatente, è diametro opposita venditans, sic habet: Quasi data, explanataque semper fuissent, forè neque Pelagiana hæresis fuisset exorta, neque Lutherani tam impudenter arbitrii nostri libertatem fuissent ausi negare, ostendentes cum divina gratia, præscientia & prædestinatione coherere non posse: neque ex Augustini opinione, concertationibusque cum Pelagianis tot fideles fuissent turbati, ad Pelagianosque defecissent; facileque reliquia illa Pelagianorum in Gallia, quorum in epistolis Prosteri & Hilarii fit mentio, fuissent extincta. Ubinam gentium sumus? Vbi, & à quibus, & adversus quem tales voces fusæ? Nolite annuntiare in Geth, neque in compitis Ascalonis. Verùm hæc convitia hominum in eximium gratiæ defensore adeò procaciter insurgentium, utpote per se horrorem incutientia relinquamus. & Romanorum Pontificum luculentissimis suffragiis tutiùs adhæreamus, fideliusque obsequamur; quia dum Romanum Apostolici throni cælum in favorem Augustini tonat, raras tacere necesse est. Eum ergo semper ducem & Magistrum sequamur, cujus doctrinam Romana sequitur & servat Ecclesia, ut superiùs laudati Hierarchæ definiverunt.

Si contra Augustinum tam liberè posuerunt os suum, & calamum stilumque acuerunt, ne mireris si discipulo Aquinati innumeri maledixerint, quia non est discipulus super Magistrum; & si Patrem familias Beelzebub dixerunt, quanto magis domesticos ejus? Verùm omnium, qui abhinc quatuor sæculis sacratissimā Aquinatis

antis memoriam dilacerare, & doctrinam perfundare moliti sunt, infensissimi, & juxta debilissimi adversarii fuere Petrus à Valle-Clausæ, & alter Petrus Alva; qui sicut cæteros omnes convitiandi libidine superarunt, ita uter utrum vincat, dubium reliquerunt. Prioris calumnias fortissimi Apologistæ contuderunt, & certè tæderet, quin & puderet tot nugarum, mendaciorum, falsationum, injuriarumque, quæ singulis libri sui de Syriacorum immunitate paginis, lineisque obtrudit. Pauca tamen alibi occasione librorum à Christo minimè scriptorum dicemus, eaque compendiosè refutabimus, quæ hîc sine cruce & fastidio Lectorum recensere vix, ac ne vix quidem possemus. Posteriores non alloquar, quem mortuum audio, sed ejus operum editioni præfectum & mercatorem paucis non tam confutatione libri paradoxorum, quorum horror ultrò se oculis ingerit, conveniam, quàm fraterna correctione monebo. Neque enim ejus exerrationes recensere operæpretium duxi, ne portentorum tam absurdorum recensione Ecclesiam & Sanctos impiorum risui subjiciam, nève Franciscanam familiam, cujus veneratione nihil mihi antiquius, filii degeneris lapsibus ante hæc tempora inauditis dehonestem.

Itane, ô Alvæ operum propalator, obstinatè operam das, ut mundum totum post D. Thomam abeuntem abstrahas? Itane illum infensus servas, ut nullum tibi satis esse videatur solidum gaudium, nisi virum illum divinum orbi sub cælo universo pervenerabilem inhonores? Quorsum eunt consilia tua, dum non tam odio, quàm furore in D. Thomam Ecclesiæ Doctorem, sanctitate autem solidissima non orbi mo-

dò Catholico, sed omnibus qui nomen ejus norunt, spectabilem actus, opera illius venditas, & contra Ecclesiæ mandatâ exponis, qui fermè Europam expensis Minoritæ paupertati minimè consentaneis peragravit, ut tanto viro totius mundi conciliare contemptum conaretur. Tantine apud illum fuit S. Thomam vilipendere, & floccifaciendum aliis, si posset, suadere, ut spreto vitæ regularis secessu, & solitudine pietatis matre, & eruditionis fomento; spretâ sanctissimi Instituti regula (quam alicubi de jure divino esse effutiit) minimi oboli dominio ac usu suis interdicente, & equitationem peccati mortalis pœna vetante, totam Europam erraticus, pecuniosus, & quasi esset veredariorum supremus præfectus, infinitis decursionibus inviseret. Post tot Magistri tui mentis tandiu in exteriora diffusæ divagationes revertere; revertere, quæso, revertere, ut tandem evacuatis tot in virum sanctum odiorum iniquissimorum præjudiciis, quibus exoculari animus, & extingui pietatis omnis sensus solet, cernere valeas quantum, & quàm vehementer erraveris; dum Doctori omnium modestissimo & de omnibus etiam infidelibus, quibuscum semper angelicâ modestiâ pugnavit, benemerito bellum atrocissimum indicens, vel supposititia esse quæ nomine ejus circumferuntur, vel falsata esse opera illi asserta mentiris; dum amplissima Hierarcharum Ecclesiæ testimonia ægrè ferens, ea à Dominicanis conficta, reclamantibus, & falsitatem tuam evidentissimè demonstrantibus ipsis Constitutionum Apostolicarum archetypis, totius orbis oculis revincendus impudoratè affirmas. Rogo quis est iste tam amarus infensi cordis tui dolor;

qui nec tempore , nec ratione , nec religione
nec peregrinationibus in Magistro curari po-
tuit ?

In te ergo reversus , in reformatum tui Or-
dinis monasterium (& sunt sanè innumera
apud RR. PP. Recollectos , & alios Stricteris
Observantiæ tenaces) concedens octo , vel sal-
tem decem dies piis exercitiis operam dans ,
conscientiam tuam excutiens , recogitans an-
nos tuos in amaritudine animæ tuæ , præteritæ
vitæ tuæ actus recognoscens , tot Doctoris tui
peregrinationum inanissimarum ab animo tuo
rationem seriò reposcens , atque totam vitæ
tuæ seriem ad Evangelium , ad regulam , quam
professus es , ad vota tua , quæ distinxerunt labia
tua exigens , vide quàm graviter , quàm crebrò
contra omnia hominis Christiani , & Religiosi
officia peccaveris . Apud quam enim nationem
tam feram , tam barbaram mortuorum cineres
& memoriam proscindere solenne fuit ? In quo
Evangelii capite , vel sacre Traditionis docu-
mento legisti unquam , Sanctos ab Ecclesiæ Ca-
pitibus , à Conciliis , ab Universitatibus & Pasto-
rum unanimi voce & applausu commendatos ,
tutò & licitè posse per summum ludibrium irri-
deri & traduci infrunitè ? Denique ad quam re-
gulæ amissum consilia tua aptare potuisti chari-
tatis everfiva , reverentiam in Sanctos , obser-
vantiam in tot primæ notæ cōmendatores con-
culcantia ? Sic Philosophus ullus docuit ? Sic
Christus præcepit ? Sic Franciscus instituit ? Sic
Bonaventura , sic Bernardinus , sic Antonius Pa-
duanus , sic Petrus de Alcantara , sic innumeri
sanctissimi Patres tui unquam conversati sunt ?
Attende ergo , ô Mercator , ad petram unde

excisus es, & cùm sis filius, fraterque Sanctorum, doleas in te obscuratum esse aurum, mutatum colorem optimum, & prima opera tua, ut Spiritus sanctus nonnulli in Apocalypsi improperabat, non facere, id est à primi tyrocinii, id est regularis novitiatus fervore jamdudum recessisse, est retrò aspexisse.

In hac spiritualium exercitiorum praxi (jam apud innumeros familiari, & saltem annua) sedebis solitarius in lecto; sedebis, inquam, juxta consilium Jeremiæ, & tacebis, levansque te supra te, majorem in solitudine, in lacrymis, in Scripturarum, Patrumque lectione experire voluptatem, quàm in tot peregrinationum spiritum Religionis extinguentium varietate, & vanitate Magister tuus perceperit. In illius peramandi, tibi que omnino necessarii secessus serenitate, affulgente divinæ gratiæ luce, & intercessionis suæ radios affundente Angelico Doctore in inimicos pœnitentes præ charitate in Patria consummata propensiore, tandem aliquando veluti in speculo juventutis tuæ delicta cernes, & flebis. Videbis nihil esse Christiano, & potissimum Franciscano indignius, quàm eas inhonorandi alicujus Sancti gratiâ pecunias in orbe peragrando, & hac illac circumcursando profundere, quæ ad alterius canonizationem, seu apotheosin sufficerent, & redundarent.

In hujus etiam beatæ solitudinis, & solius beatitudinis pellucidissima crytallo apertissimè agnosces, quod si juxta Apostoli mandatum vir militans Deo sæcularibus se implicare negotiis non debet; si juxta Bernardi monitum, *sit Monachus quasi Melchisedech, sine patre, sine matre, sine genealogia, nec patrem sibi vocet super*

per terram; imò sic se existimet, quasi ipse sit solus & Deus: si juxta Bonaventuram epist. ad Provinciales, inter causas cur spendor Ordinis obscuratur, Ordo exterius inficitur, & nitor conscientiarum interiùs defœdatur, occurrit multiplicatio familiaritatum: profectò periclitatur salus, periclitatur pietas, periclitatur fama tua, nisi Thomam à Kempis attentè perlegas in dialogo Novitiorum, quorum societatem juxta Patrum spiritualium consilia inibis, ut primævum Religionis spiritum tot excursionibus sin extinctum, certè dissipatum instaures: Euge, inquit cap. 4. tace, quiesce, abscondere, elongare, amare nesciri, discere mori. Luge præterita, sperne præsentia, meditare futura: hac brevis regula remaneat in memoria tua, & docebit te vincere omnia terrena. Si S. Thomæ nomen, quod fuit S. Bonaventuræ tuo tam sacrum, non forat tibi exosum, illud etiam præclarissimè ab Angelico Doctore scriptum opuscul. cont. impugn. Relig. cap. 2. tibi libenter exhiberem: Qui moritur alicui vitæ, ab illis operibus decidit, quæ tali vitæ congruunt: & qui vivere incipit aliquâ vitâ, illa opera tunc sunt illi maximè convenientia, quæ illi vitæ competunt. Vnde secundùm Dionysium, ante Baptismum, per quem homo divinam vitam accipit, non potest exercere divinas operationes, quia sicut ipse dicit, oportet primùm existere, deinde operari. Sed Religiosus per votum Religionis saculo moritur, Deo vivens: ergo per hoc, quod Religiosus est, interdiciuntur ei operationes seculares, & negotia secularia; non autem actiones divina, quæ scilicet hominem in Deo viventem requirunt.

Si ad illam te redigas, quæ Christianum & Religiosum decet, externam, internamque solitudinem; si aberrantes cogitationes colligas, si à tot occupationibus, quas etiam quantumvis specie utiles, Bernardus appellat maledictas, te subducas, ut in te tandem oculos retorqueas, dubio procul dicta Alvæ tui ejurabis, scripta revocabis, palinodiam canes, atque omnes librorum illius literas publicis lacrymis veluti lituris delebis. Si sacris his consiliis obsequare, non erit penitus deplorata, & extra omnem spem posita salus tua, graviter alioquin periclitatura, cum non dimittatur peccatum, nisi restituatur ablatum. Et si enim Angelici Doctoris famæ splendorem scriptiuncularum illarum nebulis minimè obscuraveris, quia nihil veritatem infringit mendacii impetus, sed illustrat potius; tibi tamen non defuit voluntas, sed facultas; & apud Deum, qui scrutatur renès & corda, mens mali studii & impii voti, etiamsi effectum non invenerit cœpti operis, habebit tamen punitiorem perversitatis.

Quanta, Deus bone, compendia! quot fructus charissime, ex illa corporis, animique solitarii quiete reportabis! Cernes te causam Immaculatæ Conceptionis alioquin argumentis probabilibus munitam, futilibus Alvæ ratiunculis prodidisse, labefactasse, & hæreticis ridendam præbuisse. Cernes nodos illos, quos indissolubiles pronuntiavit, nugas esse ineptissimas, & aranearum telas, quibus sententia per se splendida inumbratur. Cernes argumentum illud peti-
tum à comparatione conceptus ventris Mariæ, & conceptus mentis D. Thomæ, unde inferre debet illi immunitatem à culpa, sicut isti asseritur
à

à Thomistis immunitas ab errore; cernes, inquam, argumentum illud esse omnium præteritorum, præsentium, futurorum, & fortassis possibilem (saltem de potentia ordinaria) futilissimum; tum quia locus à comparatis, diversi præsertim generis & ordinis, teste Aristotele, infirmissimus est; tum quia immunitas ab errore contra fidem S. Thomæ asseritur, secus immunitas à culpa, saltem veniali, quæ toto cælo discrepant: tum quia D. Thomas immunitatem ab errore non nisi post exantlatos labores, post depulsam ignorantie caliginem, post plures retractationes, priorem utique ignorantiam supponentes, sibi comparavit. Ergo dum Marianum conceptum Sancti Thomæ intellectuâli conceptui confert, ut illi immunitatem à culpa vindicet, causam Immaculatæ Conceptionis prodit & planè prævaricatur; si enim valere hæc puerilis comparatio, Beatissima Virgo immunitatem à culpa non nisi adultâ ætate, & postremis vitæ annis consequuta fuisset, quod erroneum esse Catholici omnes consentient. Cernes quàm à communi sensu aliena sit hæc hyperbole, *plusquam septuaginta millia ingenia Sanctorum Patrum, Summorum Pontificum, Expositorum, atque Concionatorum desudasse & scripsisse eâ de re solâ* (Immaculata Conceptione) *plures libros, tractatus, opusculi, quàm literas & apices habeat S. Thomas in suis septemdecim, aut viginti tribus tomis.* Hos libros, quibus continendis nec Ptolomæi, nec ulla capacissima bibliotheca præ loci angustia minimè sufficerent, ut inviseret, orbem peragravit; sed post tot itinera videbis Alvam Hispanum adagium implevisse, *de luengas vias luengas mentiras.*

A Sacerdote seculari Theologo & Concionatore insigni non à multis annis auditione accepi, se ultrò, & ut aiunt, manibus pedibusque Immaculatæ Deiparæ Conceptionis sententiæ variis rationum momentis mihi pergratissimis subscribere; unum tamen, inquebat, mihi scrupulum, & de hac opinione dubitationem injicit, acerius nimirum falsitarum, mendaciorum, historiarum, fabellarum, visionum, quæ Alva, aliique id genus homines nobis liberalissimè venditarunt, quibus Ecclesiam suam propria sententia definitiones asserere, & immolari velint. Nam & maculas in S. Bernardo post mortem apparente, & epistolam ad Lugdunenses retractante comminiscuntur; & Dominicanos multifariam, multisque modis vexatos interfectosque veluti in theatro repræsentant; & miracula ab Ecclesia Romana, vel alia inferiore non probata spargunt. Quàm indignum Theologo rem per se piam, per se gravem & seriam his quisquiliarum nugamentis, his anicularum somniis confirmare, aliis longè probatoribus argumentis prætermiſſis, quibus controversiæ nondum definitæ adjiceretur lux & robur! Quid ab Ecclesiæ Romanæ sensibus abhorrentius, quàm falsa veris permiscere? Execratur Summus Pontifex, execratur prorsus malas artes; unde tanta illi, tam exquisita & accurata in quæstionibus definiendis, Sanctis canonizandis diligentia; quia non indiget mendacio veritas, non indiget Petrus, non indiget Petri Vicarius humanæ sapientiæ politicis inventis, sed Spiritus sancti infallibiliter assistentis auxilio, & immobilibus Christi promissis innititur Supremi Hierarchæ definitio. Si veritas Immaculatæ Conceptionis

nis sententiæ adsit, illam non infringet Thomisticarum impetus rationum, veritatis luce discutendarum & dispellendarum; si desit, illi eam non conciliabunt conjecturæ, & multò minùs historiæ Ecclesiæ Romanæ gravitati haud parum gratæ. Tutius ergo, & prudentius Romanæ Ecclesiæ judicium præstolemur, unam veritatem quæramus, controversias nostras hæreticorum sannis non exponamus, Ecclesiæ Spiritum æmulemur, qui violentiæ molimina in veritatis, quam quærit, gloriam vertit, illosque abominatur, quibus nullum, nisi in pudendis falsitatis remediis perfugium est. Quia petra super quam Ecclesia fundata est, Petrus est, fundamentum Petri Christus, Christus autem veritas est, quæ manet in æternum. Plura in sequentibus dicemus.

TERTIUM ELOGIUM.

Augustinus & Aquinas à sacris Conciliis approbati.

Quia Concilia, seu Episcoporum conventus in Spiritu S. congregari, accedente præsertim supremi Pastoris Romani Pontificis approbatione, irrefragibili authoritate pollent, non mediocris adjicietur utrique nostro Doctori commendatio, si eorum doctrinam ab Ecclesiæ Pastoribus & Proceribus in sacris Conciliis probatam fuisse demonstraverimus. Res autem ita se habet. In primis enim Augustino à duobus Africæ Conciliis, Carthaginensi nimirum, & Milevitano scribendi de gratia Dei provincia

demanda

demandata est, ut ipsemet S.Præsul ad populum Hipponensem his verbis testatur: *Curam Scripturarum mihi Fratres & Patres mei Coepiscopi duobus Conciliis, Numidia & Carthaginis, imponere dignati sunt.* Unde Prosper poemate de ingratis, cap. 3. affirmat, Augustinum fuisse eorum Concilio^{rum} ingenium, in quibus impietas Pelagiana prostrata est, ut his præclarissimis verbis describit:

*An alium in finem posset procedere Sanctum Concilium, cui dux Aurelius, ingeniumque Augustinus erat? Quem Christi gratia cor-
nu*

*Yberiore rigans, nostro lumen dedit avo
Accensum vero de lumine. Nam cibus illi,
Et requies Deus est; omnisque voluptas
Vnus amor Christi, unus Christi est honor il-
li.*

*Et dum nulla sibi tribuit bona, fit Deus il-
li*

*Omnia, & in Sancto regnat sapientia Tem-
plo.*

*Istius ergo inter cunctos, qui de grege san-
cto*

*Insanas pepulere feras, industria major,
Majus opus totum præstantes imbuunt or-
bem.*

*Nam quocumque gradum convertit callidus
hostis,*

*Quaque per ambages anceps iter egit oper-
tas,*

*Hujus ab occursum est præventus, mille via-
rum*

Insidiis aditum non reperientibus ullum.

*Cumque foris rabies avidorum exclusa lupo^{rum}
Frende*

Frangeret, inque omnes mendacia verteret ar-
tes,

Ne mentes ullarum ovium corrumpere posset,
Ne dubia obliquis turbaret corda quere-
lus,

Istius ore viri fecit Deus. Istius cre
Flumina librorum mundum effluxere per om-
nem,

Quæ mites, humilesque bibunt, campisque animo-
rum

Certant vitæ alis doctrina immittere rivos.

Hanc Augustino à Conciliis commissam cu-
ram totus orbis Christianus Doctorum omnium
Catholicorum hanc tanto viro causam creden-
tium silentio confirmavit. Et quanvis Hierony-
mus dialogos adversus Pelagium incepisset,
cùm tamen profunda & cœlestia Augustini de
gratia scripta perlegisset, sibi silentium impo-
suit, supersedendum arbitrans huic labori, quia sibi
nova, inquit dialogo 3. cont. Pelag. voluerimus
dicere, à clarissimo ingenio (Augustino scilicet)
occupata sunt meliora. Hinc etiam sanctæ me-
moriæ Bonifacius Papa, ut S. Prosper in fine li-
bri contra Collatorem narrat, cùm esset doctis-
simus, adversus libros tamen Pelagii B. Augu-
stini responsa poscebat.

Porro impositâ sibi curâ tam egregiè per-
functus est Augustinus, tam apertè in Sancto-
rum veritate & fide latentem veritatem expli-
cavit, tam dilucidè à tot, tantisque difficultati-
bus, quibus ante ipsum involuta erat, eam ex-
tricavit, ut posteriora deinde Concilia sua de
quæstionibus judicia, & potissimum de gratia
canones ex Sancti Doctoris sententiis ad ver-
bum formanda senserint. Nunc, inquit Con-
cilium.

cilium Florentinum sess. 7. *Sanctorum Doctorum auctoritates in medium asseramus, ac in primis Augustini illustrissimi Latinorum Doctoris, quem quinta Synodus consecravit.* Idem etiam in novissima Tridentina Synodo claruit, in qua Patres in Spiritu sancto congregati in definitionibus suis adornandis non modò sensum, sed & Augustini verba exscripserunt. Hinc Cardinalis Bellarminus *lib. 2. de grat. cap. 11.* veridicè pronuntiavit, Augustini de gratia sententias non esse privatas Doctoris aliqujus opiniones, sed *fidem Ecclesia Catholica dicidere.*

Quanti verò sacra Concilia Angelicam S. Thomæ doctrinam fecerint, testatur non solum B. Pius V. supra laudatus, sed in ipso etiam Concilio Tridentino omnium experimentis compertum fuit. Etenim ut prosequitur Orator sacri Concilii in concione coram augustissima Synodo habita: *Non potuit Doctor Sanctus Ecclesiasticis interesse Conciliis morte preventus: Verùm ecce superstes, atque in aeternum victurus nobis adest; bona spiritualis doctrina, thesauros hereditario jure vobis delegavit. Nulla proinde ab ejus felici transitu Concilia sine sacro Doctore celebrata sunt. Ut enim de cæteris sileam, quod audivimus, quod vidimus, quod manibus nostris contrectavimus, quidni apertâ voce ad ejus laudem testamur? Vestra comitia perpendiffe ex plurimo, eoque honorabili Doctorum cœtu, quotusquisque consultor accedit, qui D. Thomæ auctoritate veluti splendente gemma suam scientiam non exornet? At in consultiſſimo Patrum recessu Doctor hic sententiam rogatus frequentissimè censet, ad quem ut ad lydiū lapidē, si*
quid

quid ambiguitatis, aut controversia fuerit exortum, communibus votis referendum existimetis; in certam judiciorum aleam non sit adiurus, quin secundum eam sententia ferenda sit. Nihil hoc testimonio fortius esse omnibus sapiens convincetur, si hæc verba prolata fuisse consideret à teste oculato coram Patribus perorante, qui mendacii probrum in os iniecissent, nisi comperta narrasset. Unde Cardinalis Baronius suis in Martyrologium notis: *Vix*, inquit de S. Thoma, *quisquam enarrare sufficeret, quot vir sanctissimus, atque eruditissimus Theologorum præconiis celebretur, quantumque illius illibata doctrina à SS. Patribus in sacro Tridentino Concilio fuerit acclamatum.* Hæc cum ita sint, dicere liceat cum Gravina lib. 2. sui *Cherubin*: Ad illam scholam provoco, quæ fuit totius orbis florentissimum theatrum, Rerum-publicarum splendor, medulla Theologorum. Quot ibi Academici flores, quot linguæ, quot ingenia, quantus labor, quam infinita lectio, quot virtutum & studiorum divitiæ sacrarium illud veritatis impleverunt? At enim pelagus illud innatabile decidendarum quæstionum quo præsidio transvadarunt, nisi nautico Augustino-Thomisticæ doctrinæ instrumento, quæ syrtes scopulosque vitandos edocebat, & ad veritatis stationes impellebat? Si absque talibus naucleis navigare volebat tuta Concilii fides, certum timeant naufragium necesse est, qui spretis his ducibus pelago se committunt.

Tot præclarissimis, cogentibusque testimoniis, aliisque Pontificum oraculis nihil aliter responderet Alva, quam risu, convitiis, perpetua & obfirmata inficiatione; cum enim non scripserit

pferit nisi ut mordeat, cum honor & gloria D.
 Thomæ sit illi summum malum, aperta negare,
 propriis oculorum experimētis renuntiare, om-
 nibus testibus locupletibus fidem detrectare,
 mentiri sine pudore, calumniari etiam convin-
 cendum, videntur illi pia opera & sancta; &
 quia in S. Thoma inhonorando posuit ultimum
 finem suum, quæcumque sibi ad id opportuna
 arripit. Dum de se, de B. Francisco, de Con-
 ceptione Immaculata loquitur, conjecturis &
 fabulis, tanquam articulis fidei nos credere vult,
 relictis aliis longè probabilioribus ad piam sen-
 tentiam stabiliendam munimentis: dum de S.
 Thoma sermo est, ita in illum iniquus est, ut
 de indubitatis dubitare, perpetuâ traditione ac-
 cepta repudiare, libros unanimi consensu illi af-
 fertos ei eripere, Pontificum & Conciliorum
 elogia mendacii arguere, & Thomistas ejus
 discipulos & defensores, falsarios, temeratores,
 sacrilegos existimare, nullo teste, nullo argu-
 mento, summo sibi arrogato jure præcipiat.
 O Petre! itane tantus Doctor contemnitur abs
 te? aut itane tandem idoneus tibi videtur esse,
 quem tam infrunitè lacestas? Itane totus orbis
 literarius aptus tibi videtur esse, quem tam
 apertè fallas? Saltem accuratè & speciosè te ge-
 rere decebat, ut Deum timere, & Sanctos reve-
 reri certè videreris. Sed cum homine habente
 pondus & pondus, qui omnia suis affectibus
 consentanea avidissimè arripit, quæve evidentio-
 ra negare gloriatur, non est disputandum; fra-
 terna correptione, votis, & precibus nobis cum
 illo & similibus agendum duntaxat est. Faxit
 ergo Deus, ut omnipotentissimâ gratiæ potesta-
 te præventi, ô æmuli, qui in vobis perstrepunt
 affectus

affectus seponatis. Faxit, ut impoſterum laudes veſtras cum aliorum convitiis in operibus veſtris non connectatis; faxit, ut nec alienæ Sanctorum gloriæ impatientes, nec veſtræ avidi ſitis: faxit ut cauſam Immaculatæ Conceptionis ſanctiùs tractetis, fortiùs defendatis, modeſtiùs promoveatis: faxit ut non ita ulli veſtrum impoſterum inſanire liceat, ut ſcribatis, *doctrinam D. Petri aliqua ſui parte erroneam meritò ab Univerſitate Pariſienſi fuiſſe damnatam*, ut nòdorum ſuorum libro, fol. 16. Alva effuſit. Proh Deum immortalem, quid eſt ſi non hæc blaſphemia eſt? Hoccine eſt chriſtianum dictum, aut ineptum? hoccine officium Religioſi & Sacerdotis? Faxit, ut à nativa ſugillandi pruriginè, & libidine obloquendi de viris illuſtribus vobis temperantes, impoſterum evidentiffimè falſa non aſſeratis, apertiffimè vera non negetis, & D. Thomæ inhonorandi còſuetudinem in naturam inductam exſtirpetis, & pœnitentiâ plectatis ſalutari. Certè ut diſcurſu Hilarii lib. 6. *de Trinit.* utar: Si alia fides quàm Romana ſit vera, ſi inanis eſt obſignatio annuli piſcatoris, ſi alia claves Regni cœlorum ſunt, ſi alia Eccleſia eſt futura, adverſus quam portæ inferi non prævalebunt, reprobam tunc fatebor Auguſtini, Aquinatifque doctrinam. Atqui illud ſperare impium eſt: cedant ergo, & ſponte cedant tot Pontificum oraculis adverſarii, quia ut egregiè dixit Nazianzenus: *Satius eſt benè vinci, quàm reluctante ſpiritu vincere.*

QUARTUM ELOGIUM.

Augustinus & Aquinas à sanctis & doctis approbati.

Sicut uterque Sanctus Doctor antiquiores Patres summâ observantiâ veneratus est, ita posteriorum reverentiam justissimè promeruit: unde Augustinum fuisse toti orbi Christiano amoris & venerationi; S. verò Thomæ amorem & venerationem in dies magis, magisque augeri Summi Pontifices attestati sunt.

In primis quoad Augustinum attinet, illi Patres & Doctores quavis posteriores detulerunt, assurrexerunt semper, & primas dederunt, existimantes nulli illum esse eruditione secundum, cæterisque Doctoribus tantum antecellere, quàm Doctores aliis præstant. Hinc Paulinus epistola inter Augustinianas 13. Augustinum *salterra, & lucernam dignè super candelabrum Ecclesia positam, & os ejus fistulam aqua viva, & venam fontis aterni nominavit.* Epistola verò 35. & 36. verba ipsius dictata divinitus, & cœlestia nuncupavit. Epist. 58. dixit Domini tubā per ipsum intonare. Quod vult deus epist. 2. ait, *Dominum tribuisse Augustino divini fontis ubertatem.* Audax epist. 139. Augustini scripta flagitans, ipsum vocat *oraculum legis, sectatorem iuditiæ, dispensatorem salutis aternæ.* Nectarius epist. 253. eum appellat *divina legis præsidium.* Hieronymus epist. 25. *Macæ, inquit Augustino, virtute in orbe celebraris, Catholici te conditorem antiqua rursus fidei venerant*

rantur atque suspiciunt; & quod signum maioris gloria est, omnes hæretici detestantur. Consentius epist. 221. Augustinum appellat doctrina Christiana culmen, virum admirabilem, cui Deus serenissimo cordis obtutu cælorum machinam penetrare concessit. Vnde ait B. Augustini Episcopi sententiâ fluctuantem fidei cymbam fuisse stabilitam. Volusianus epist. 2. Augustinum appellat virum probitatis, iustitiæque documentum, & quod legi decet, quidquid Augustinum contigerit ignorare. Severus epist. 37. ait, ipsius viscera esse perfusa lumine veritatis, & refulgentia veritate. Macedonius epist. 51. ait opera Augustini tantum habere acuminis, scientiæ, sanctitatis, ut nihil supra sit. Beda lib. de sex ætatibus, illum præminentissimum Doctorem nominavit.

Superfluum esset, & prolixius verborum præconia referte, quibus alii Patres Augustinum omni superiore laude celebrarunt. Videri tamen potissimum debet acerrimus ejus defensor Aquitanix nostræ immortale decus, S. Prosper libro contra Collatorem, & ad capitula Gallorum, & in epistola ad Augustinum libro de prædestinatione Sanctorum præfixa, quâ ad Augustinum excubantem pro universis membris Christi adversus hæreticarum doctrinarum insidias veritatis virtute pugnante, tanquam ad specialem fidei patronum Massiliensium errores detulit. Quia, inquit, inter multa Dei dona, quibus illum abundantissime Spiritus veritatis implevit, habet etiam hanc scientiæ & sapientiæ ex Dei charitate virtutem, ut non solum hæresim Pelagianam adhuc in suis de truncationibus palpitantem, sed etiam multas prius hæreses in victo

in victo verbi gladio debellaret. Quantum verò S. Augustinus adversus Pelagianos inimicos gratiæ Christi, & ut ait, liberi arbitrii decomptores apostolicè pugnavit, narrat idem Prosper cap. 1. libri contra Collat. his verbis: Viginti amplius annis contra inimicos gratia Dei Catholica acies hujus viri ductu pugnat, & vincit: vincit dico, quia non patitur respirare quos vincit.

Non minora panxit Augustino elogio S. Fulgentius lib. 2. de verit. prædest. cap. 18. sic: *Beatus Augustinus, inquit, indutus virtute ex alto abundantius illis omnibus (id est Græcis & Latinis Patribus) laboravit, non autem ipse, sed gratia Dei cum illo. Ipsius ministerio Dominus uberiores hujus rei fidelibus suis instructionem præbuit. Non solum ipse de hoste victoriam referens triumphavit, quin etiam posteris certandi & vincendi ordinem, si quando pravitas residuo ausu nefandum caput erigere niteretur, ostendit. Hunc legat omnis qui salutem æternam adipisci desiderat.*

Sed jam à Magistro ad discipulum transeamus. Quis porro enarrare sufficiat Doctorem omnium, Universitatum, sacrarum Religionum, aliorumque omnium Ordinum præstantissimorum virorum suffragia, quibus Angelicam D. Thomæ doctrinam obsignarunt? Cum nullus ferè Theologorum sit, qui tanti Doctoris nomen revereri, ejusque vel sententias, vel methodum, & ordinem sectari non præ se ferat, ejusque discipulatum sin ambiat, certè simulet. Nemo vult esse apertè Antithomista; ipsos etiam Scotistas vidî ægro animo in S. Thomam armari, quia omne malum pudore natura perfudit.

Ipsi etiam vocant S. Thomam magistrum, qui nolunt ejus esse discipuli. De hac generali approbatione veridicè, & juxta eleganter Cardinalis Palavicinus in epistola ad Vincentium Pretum libro 7. de pœnitentiæ virtute & Sacramento præfixa, scripsit: *Divi Thomæ codices loquor, vis quo non tam Ordo tuus quàm Christi Ecclesia, ipsumque humani generis nomen merito gloriatur. Sentio equidem in me tanti scriptoris pretium unà cum ætate, sed longè supra ætatis incrementa crevisse. :: Praclarè mecum egit divina bonitas, quòd me vocavit ad eam religiosam cohortem, quæ jubetur Angelici Doctoris Theologiam sequi; eam namque sequerer vel injussus, inòd vix non sequerer vel prohibitus. :: Quamvis tanta sit D. Thomæ & sectatorum frequentia, & laudatorum approbatio, utramque tamen adèò infra merita mihi videri, ut inde communem humanæ perspicientia tenuitatem vel aspernari cogar, vel misereri.*

Tantus autem, & tam conspirans cordatorum omnium in S. Thomam amor, tanta doctrinæ ejus cum laude opinio ab illo proculdubio hominum cordibus inspiratur, qui facit concordiam in sublimibus. Et sanè æquissimum est, ut Doctor ille, qui omnibus retroactorum temporum Patribus, quin & Philosophis & doctis quibuslibet primas honoris causâ de cunctis benè meriturus concesserat, omnium etiam Doctorum laudes consequatur. Sicut ipse de suo nihil unquam docere voluit, suas juxta consilium Augustini in *Psal. 103.* inter medium montium pertransire aquas studens, id est doctrinæ aquas non suas habens & privatas, sed communes; medium enim commune est: ita omnium
odii

odii, livoris, & invidiæ præjudiciis non occupatorum suffragia promeruit, evasitque omnium Magister, qui omnium discipulum se esse perpetuò professus est. Quid justius, quàm ut illi idem honor deferatur, quàm aliis detulit, atque ut in sapientiæ convivio, in quo præ summa humilitate novissimum locum delegerat, à cœlesti Patrefamilias ad primos accubitus sublimetur? Ita planè hæc Angelicæ humilitati debita corona.

Nec mirum si omnes docti post D.Thomam eant, cum videant non solum Ecclesiæ capita, sed universam Christi Ecclesiam & ejus doctrinæ suffragari, & illius etiam amore teneri. Sæpe sæpius publicam Ecclesiæ orationem, quam ad Deum in die S.Thomæ sacro fundit, animo revolve, illudque potissimum mirandum occurrat & attentum rapit, quod Ecclesia sub cœlo tota S.Thomæ doctrinæ intellectum deposcit. *Da nobis, inquit, & qua docuit intellectu conspicere, & qua egit imitatione complere.* Orationes Ecclesiæ tanti fecit Augustinus, ut ex iis necessitatem orationis inferat, quia nefas est orationes Ecclesiæ credere perfunctorias. Ecclesia porro veritatem & charitatem in omnibus orationibus suis deposcit. Falsitatem Ecclesia vera à Deo vero postulare non potest. Vide ergo quanti ea doctrina facienda sit, pro qua intelligenda Deum solennibus suis in ritibus Ecclesia exorat. Nec dicas illud rogare Ecclesiam, ut verum in Aquinate discernat à falso: non, inquam, id dicas; nam idem posset Ecclesia de libris Gentilium postulare, in quorum stercorebus latere gēmas, & nonnullos veritatis radios, exprobris licet obscuratos, intermicare constans est.

est. Ergo dum Ecclesia pro Angelicæ doctrinæ intellectu deprecatur, vult doctos suos illi operam navare, ut intellectam populis tanquam spiritale pabulum ministrent; sentitque verum Scripturarum sensum, germanam orthodoxæ religionis fidem, & solidam catholicorum dogmatum defensionem ejus è libris securè hauriri, cujus intelligentiam enixè à Deo supplicat.

Verùm enimverò, quomodo Aquinatem de se tantoperè meritum filium sanctissimum non exaltaret mater Ecclesia, postquam à Christo, qui nec falli potest, nec fallere valet, ejus doctrina est commendata, & hac voce, *Benè scripsisti de me Thomæ*, semel & iterum inaugurata est. Nam ut scitè scripsit ingeniosus & amœnus Petrus Labbe Societatis Theologus insignis; *Probat scripturam hominis qui character est Patris. Silete linguæ, ubi Deus laudator est. Fallere non potest qui laudatur, dum qui laudat non fallitur. Appellent alii Thomam Angelum Theologia: dicant Pontifices Summam tot miraculis constare quot titulis. Plus dicit una vox, Benè. Christus est Verbum Patris, Thomas adverbium Filii.* Aliquid non omninò ab simile olim pangebam, dum tertiam partem interpretarer, his ferè verbis: Dum scriberet tertiam partem Aquinas, audivit; *Benè scripsisti de me Thomæ.* Probavit scripta Thomæ sapientia Dei. Perfectiones Patris exhaurit Verbum unum; & eloquia omnia exhausit Christus verbo uno. Verbum *Benè* omnes possibiles laudes complectitur. Omnia bona promittuntur, dum dicitur *Iusto, Quoniam benè*; & omnia præconia asseruntur Thomæ, dum dicitur ei, *scripsisti benè.* Propositio

tio indefinita æquivalet universali, & laus indefinita est infinita. Vidit Deus cuncta quæ fecerat, & erant valde bona. Vidit Christus quæ Thomas scripserat, & erant valde benè. Post approbationem Dei creaturas non damnat nisi manes; post approbationem Christi doctrinam Thomæ reprobans est ferè Manichæus. Vera est laus, quam non tacet Deus. Veritas est quæ probat: veridicus ergo est qui probatur. Thomam laudat Christus in cruce moriens: inde extollit Thomam, ubi peperit Ecclesiam. Crux morientis fuit cathedra docentis & inaugurantis Thomam. Septem verba protulit olim Christus in cruce: octavum proferre voluit in laudem Thomæ. Adulari non solent morientes, vel obscure loqui: & fallere, vel falli non potest Deus moriens, &c.

Certè dum Deus Moyfi naturæ suæ constitutum sciscitanti respondens, *Ego sum qui sum: & sic dices, Qui est, misit me ad vos*; omnes perfectiones possibiles hac voce, *qui est*, conclusit; quia ut olim ex Bernardo diximus, quidquid de Deo dici potest, in hoc verbo instauratur, quod est *Est*; & si centum talia addas, non recessisti ab esse; si ea dixeris, nihil addidisti; si non dixeris, nihil minuísti. Similiter bonorum omnium cumulus justo promittitur hoc Isaïæ cap. 3. oraculo: *Dicite justo, quoniam benè*; quia totum spondet, qui nihil distinguit. Ita proportionē servata, hoc verbo, *Scriptisti benè*, omnes boni Scriptoris dotes Servator complexus est; non enim benè scribit, qui non veridicè, qui non catholicè, qui non piè scribit. Neque enim indefinitum de operibus servi sui Aquinatis iudicium Dominus protulisset, si erroribus hic illic

illicque disseminatis sorderet. Intendit ergo hoc suo elogio à Summis Pontificibus probato, & ab Ecclesia recepto, utpote coram testibus locupletissimis distinctè prolato; intendit, inquam, angelicam Aquinatis doctrinam esse aliis anteponendam, ita ut in probabilibus sit probabilior, in philosophicis ad mysteria fidei defendenda aptior, in dubiis moralibus securior, in certis certior, in omnibus communior, ab erroris periculo remotior, sacris Scripturis, Ecclesiæ decretis, Patrum, Pontificumque oraculis consonantior. Sanè postquam Christus dixit Simoni, Lucæ 7. *Rectè judicasti*; & Samaritanæ, Joannis 4. *Benè dixisti*, nullus (ni fallor) Christianus tam petulans, tam effrons invenietur, qui nec illum rectè judicasse, nec istam benè dixisse affirmare præsumat. Ita illos pietatem cum fronte amisisse credendum, qui post iteratam Christi approbationem non solum errores in D. Thoma comminiscuntur, sed qui virum talem infamandum avent, & totis moliminibus conantur. Non me latet quantum ab illis exemplis in Evangelio relatis distet narratio Christi Thomam consecrantis & laudantis; sed illud etiam scio, quod sicut exempla in Scriptura sacra relata despicere atheum sapit, vel infidelem; ita Ecclesiastica exempla ab Ecclesia probata, ab Hierarchis summis multimodis firmata respuere, & sine ratione, solo explendi in D. Thomam odii & livoris motivo, cordis duri impietatem redolet, atque hæreticam pravitatem.

Quia Deus vidit cuncta quæ fecerat esse valde bona, & de unoquoque in speciali pronun-

tiavit, quod esset bonum, inferunt Theologum S. Thoma 1. p. q. 25. art. 6. ad 3. *Quod univ-
ersum suppositis istis rebus non potest esse melius,
propter decentissimum ordinem his rebus attribu-
tum à Deo, in quo bonum universi consistit; quo-
rum si unum aliquod esset melius, corrumpere-
tur proportio ordinis, sicut si una chorda plus de-
bito intendcretur, corrumpetur cithara melodia.*
Unde in responsione ad 1. docet S. Præceptor,
Deum posse facere aliquid melius, si *ly Melius*,
sit nomen; qualibet enim re potest facere me-
liorem; secus si *ly Melius*, sit adverbium, &
importet modum ex parte facientis; quia non
potest Deus ex majori sapientia & bonitate ope-
rari. Ita similiter postquam Veritas de S. Thoma
pronuntiavit, quod scripsit benè, potest qui-
dem absolutè ab homine scribi melius, sed non
de potentia ordinaria,

S. Augustinus expendens illud Davidicum,
Deus laudem meam ne tacearis, ait; Patet
veram esse laudem, quam non tacet Deus. Deus
enim verax, omnis autem homo mendax.
Quavis ergo tot humanis elogiis de Aquinate
tam magnificè prolatis falsum subesset, certè
postquam Dominus loquutus est, quis contra-
dicat, quis caput non inclinet? Ergo dum cœ-
lum tonat, ranae taceant. Certè si non sumus
sapientiores Patribus nostris, quanto minùs Sa-
pientiâ Ineficacè? Si in dubiis tutior pars est
eligenda, nunquid tutior illa doctrina, quam
divina firmat semel, iterum, & tertio senten-
tia? Dictabat quidam adulator, malle se cum
Platone errare, quàm cum aliis benè senti-
re, Quis igitur tam imprudens, ut malit cum
aliqui

aliquibus errare, quàm cum Christo benè sentire?

Illud etiam observandum, hanc suæ doctrinæ consecrationem excepisse S. Thomam ex imagine Christi morientis & crucifixi. Sicut enim in humanis testimonia morientium majorem, & ab omni falsi suspitione remotiorem fidem merentur, *cùm vera voces tunc demùm pectore ab imo ejiciuntur*, ut ait Poëta: ita ea quæ Christus vel circa mortis tempus, vel in ara crucis protulit, simpliciter, & sine metaphora intelligi voluit. Unde contra Sacramentarios inferunt Catholici, semovendas esse figurarum umbras ab illis verbis, *hoc est corpus meum*, quæ Veritas pridie quàm pateretur in ultimo testamento expressit. Non dissimili modo, ut Christus omnem interpretandi elogii sui licentiam & subterfugium amoveret, illud eo in statu & habitu præferre voluit, in quo plana sunt loquentium verba, nec glossatum interpretamentis obvia. Septem olim eructavit Christus in cruce verba bona, octavum præferre voluit, ut discipulū Thomæ doctrinam obsignaret. Doctoris lauream adeptus est Aquinas sub cruce, quæ ut ait Augustinus, cathedra est Magistri docentis. Fallere moriens homo non solet, Deus non potest. Ergo inimicos S. Thomæ falli, errare, & malè scribere necesse est.

Postquam Verbum Æternum loquutum est, nec Zoilos timet Doctor noster, nec adversantium imperus. Elimatiora & castigatiora sunt quæ docuit scripsitque, quàm ut morosorum obeliscos, vel asterismos extimescant. Hæc si advertisset Petrus à Valle. Clausa, spissum ca-

lumniarum senticetum in S Doctorem, quem objectum fatui amoris insulsiſſima fatuitate appellat, minimè ſtruxiſſet. Non tentaret verbis ampulloſis ſuis & obſoletis, affectatiſque quibuſdam vocum capediis, quas ſuis ructat diatribis, pondus addere maledicentiſſimis ſannis ſuis, & quaſi ſparſo pulvere tantum Solem infulcare. Heu quàm feliciùs, & chriſtianè magis illud temporis in his nœniis acervandis impenſi, utilioribus & ſaluti viciniſſimis dediſſet. Sed per me licet, hominis ad Dei iudiciũ jamdiu vocati oſſa quieſcant. Et certè miſeranda potiùs eſt quorundam hominum ſors, quibus audacia congenita eſt, ut errent; & furia, cùm damnantur errores.

Dices: Innumeri fuerunt, & adhuc ſunt, qui Auguſtino & Aquinati maledixerunt, & etiamnum maledicunt. Ergo non tam univerſalis eſt, qualem aſſerimus, utriuſque huius ſacri Doctōis approbatio.

Reſpondeo fatendo, apud nonnullos malos huius utriuſque Sancti doctrinam malè audire. Teſtatur enim S. Proſper in præfatione ad objectiones Gallorum, eodem Auguſtini mortis anno quibuſdam obtrectatoribus viſum eſſe, ut quæ in libris ejus damnabilia repeririſſe jactabant, brevium capitulorum indiculis publicarent, talique commento & deteſtationem ejus, quem impeterent, obtinerent; & ab his quæ infamaſſent, cuam exterriti lectoris averterent. Quod & repetit Proſper ad Ruſinum, ubi ait, adverſarios Auguſtini occultis, ſed non incognitis ſuſurrationibus obloqui; & prout ſibi noxiæ aliquorum aures, opportunaſque repererint,

sint, scripta ejus, quibus error Pelagianorum impugnatur; infamare. Idem S. Thomæ contigisse notissimum est; sicut enim par fuit Augustini, & Aquinatis causa, amor nimirum veritatis; ita par fuit conditio. Mortuo Augustino quædam muscæ calumniarum spicula in Ecclesiæ Magistrum intorserunt, eique erroris notam inusserunt, qui errorum caligine occæcati erant: sed accurrerunt statim ab initio intrepidi discipuli, qui grassantem maledicentiæ lucem scriptis suis veluti cauterii unctione cohibuerunt, tanti Magistri doctrinam eo clariorem efficientes, quo obscuriorem reddere malignitas & ignorantia sategerant. Theologiæ Solent Doctorem Angelicum, ejusque sese affundentem orbi splendorem ab ortu suo coruscantem ferre vespertilioes & noctuæ non poterunt. Extiterunt enim, & extant adhuc homines inimici, zizaniarum superfeminatores, qui totis viribus, incredibili conatu, vehementique studio laborarunt, & laborant, ut inveniant pilum in ovo, nodum in stupa, scopulos in plano, atomos in sole, maculas in cælo: sed planè sicut perverso impetu, ita misero irritoque successu. Mirum est, ut quo magis Ecclesiæ Capita in extollendo utroque hoc sacro Doctore certatim student, nonnulli sollicitâ diligentia omnia quæ ab illis scripta sunt, in examen severissimum vocent morosissimi ut fastidiant, mordacissimi ut carpant. Mirum quomodo in tantam tam illustrium Doctorum authoritatem se tam tetricæ frontis armarit audacia, ut mensuras sensuum, pondera loquutionum, nervos quæstionum, & ferè verborum, ac syllabarum insidiosè

superbissimi scrutatores eventilarint, magna lucrum reputantes, si Ecclesiæ Catholicæ luminibus in suo genere sine controversia maximis, nullique secundis nævorum maculas, aut errorum caliginem affingant.

Quàm deploranda invidorum hominum conditio, quæ privatorum commodorum præjudiciis occupata, & aliorum gloriâ dolens, conatur ut tantorum Doctorum gloriam, quam Ecclesia Christi promoveri votis omnibus concupiscit, elevet, minuat, & angustet! Proh cæcitatem livoris! hæc amplissima Apostolicæ Sedis, Conciliorum, Universitatumque elogia, quibus super omne quod dicitur doctum, attolluntur Augustinus & Aquinas, quibûsve ad tantorum virorum amorem & venerationem permoveri deberent, simultatem augent & cordis acerbiteriam; illi planè diviti epuloni non dissimiles, quem ut observat Chrysologus, magis Lazari torquebat felicitas, quàm propria calamitas divexabat: *Plus, inquit, cælo incenditur quàm gehenna; plus felicitas Lazari, quàm gehenna torquet incendium.*

O hominum studia inania! ô tempora! ô mores! Augustinum & Aquinatem ipsi infideles veritate coacti venerati sunt, utrumque formidarunt à fide extorres, & utrumque Catholici pessumdabunt, & infamatum ibunt? Nonne in pace amaritudo amarissima obvenit nobis, dum non à Paganis, sed à domesticis fidei; non ab extraneis, sed à filiis & falsis fratribus columnæ illæ geminæ, quæ portant orbem Christianum, arietantur. Si ad illam se redigerent hi osiores præjudiciorum vacuitatem, quæ corda-

tos decet, & magis Christianos, utique cerne-
rent, non Augustinum vel Aquinatem, sed Eccle-
siam exhibendam, irridendamque hæreticis se
præbere, quæ tot laudes effusissimè impendit &
superimpendit, quas illi ad nihilum redigunt.
Si enim nihil è tot encomiis eliciatur, quàm
utrumque hunc Doctorem nulla hæresi formali,
tamen multiplicitate scitentem errore, materiali
fordescere, quid speciale, vel singulare tot elo-
giorum apparatus effecit, quod de Scriptoribus
infimis, sed orthodoxis, de caloniis, de lixis,
& lanionibus dici non potuerit? Et sanè cùm
Ecclesia, cùm Pontifices doctrinam SS. Augustini
& Thomæ supergredi omnem laudem, ab omni
errore, & erroris ipsius suspitione immunem in-
culcant, vel apud se sunt, seu advertunt quæ se-
cum proloquuntur; vel quid dicant nesciunt,
incogitanter loquuti. Si primum dicas: ergo
Ecclesia, ergo Pontifices sunt magistri erroris,
cùm nobis doctrinam fermentatam, & erro-
ribus conspurcatam, tanquam immaculatam
proponant. Si hac consequutione perterritus,
secundum, seu Pontifices, Ecclesiæ Pastores &
supremos arbitros oscitanter, incuriosè, inco-
gitanter ea protulisse dicas, ut viris illis adula-
rentur, vide quò te abripiat impietas; nam non
solum Ecclesiam asylum ignorantiae esse effutis,
sed eam etiam adulationis, & acceptionis per-
sonarum ream peragis. Tantæne molis est
Sanctos Augustinum & Thomam infamari, ut
honor Ecclesiæ exponatur ludibrio, & sannis
inimicorum ejus? Ideòne Sanctorum istorum
depretiatio cordi esse debet, ut nihil non pertenden-
dum, faciendum, fingendum, invenien-

dum , efficiendum sit , ut ubique inhonorentur.

Sed quid moror , & in istis hæreo amaroribus abstergendis ? Horum Doctorum æmulos per eum , quo Ecclesiam prosequuntur , amorem obsecro ; quoniam Ecclesiæ approbantis suffragia impedire nequeunt , si id fieri quod vellent , non potest ; velint id , quod possit. Pluribus supra , & fortè quàm par est , duriùs cum Alva rem egi : hæsi fateor , & multa feci ut hoc ne facerem ; dumque in dubio fuit animus , paulò momento huc illuc impulsus est , impederuntque me cogitationum curæ multiplices , animum meum diversim trahentes. Sed dum Doctorum tantorum memoriam nobis commissam , & nostræ mandatam fidei lacerari ægrè ferrem , verba illa à me extorta sunt , cui cæterò quin placuit semper agendi ratio temperata : sed ad eone me ignavum putabunt Lectores , ad eone porrò ingratum , aut inhumanum , aut ferum , ut neque me gratitudo , nec in viros illos divinos amor , neque è tot injuriis enatus pudor commoveat , atque commoneat Augustino & Aquinati ut servem fidem. Unum hoc sciant adversarii , Thomistas & Augustini discipulos , non præ ignavia , sed præ modestia , & sæpè contemptu , Magistrorum suorum hostes aspernari. Hoc interim dico illis , ne temerè faciant ; ut quiescant moneo , & obtestor ; desinant quæso maledicere , malè facta , malèque scripta ne noscant sua , noscat & orbis. Uno avulso , non deficiet alter defensor interritus , quid quidvis , ubi vis & faciliùs passus fuerit , quàm in hac causa tacere. Ita caveant , illud sibi non prædictum dicant.

Sed

Sed tu, mi Theologe, tot in viros Sanctos convitiis ne moveare. An nescis Christum Dominum positum fuisse in ruinam, & in signum cui contradicetur? An ignoras viros sanctos, & eruditos assimilari insulis, quæ circumstrepentibus fluctibus tundi possunt, frangi non possunt; imago magisque frangunt fluctus venientes, quàm frangantur ab eis? Certò scias Augustino-Thomisticam doctrinam iis ipsiis, quibus attentatur, splendidiorem evasuram. Ne mirare; doctrina illa, ut aiebat Bellarminus suprâ laudatus, non privatorum opinio dici debet, sed fides Ecclesiæ: Ecclesia autem, ut alicubi scripsit Magnus Leo, non minuitur persecutionibus, sed augetur; & semper dominicus ager segete ditior vestitur, dum grana, quæ singula cadunt, multiplicata nascuntur. Doctrina Augustino-Thomistica, ubi præsertim de gratia agitur, est saccus à Pauli epistolis eliquatus. Paulus autem, ut observat Gregorius lib. 31. *Moral. cap. 15.* nullis persecutionis quàmlibet obfirmatæ objectaculis potuit à veritatis prædicatione removeri; & dum extractus à civitate reputatus est mortuus, ut legitur Actorum 24. alio die intra urbem illæsus prædicator invenitur. O quàm fortis huic viro inest infirmitas! inquit, ô quàm victrix pœna! ô quàm dominatrix patientia! ad arguendum repulsione provocatur; ad prædicandam salutem plagis erigitur; ad propellendam laboris lassitudinem pœnâ refovetur. Qua ergo hunc adversitas superet, quem pœna fovet? Idem de Paulo observat Chrysostomus hom. 4. de laud. Pauli, ubi ait, omnes gentes & potestates undi-

que invidiæ igne succensas in Apostolum infur-
 rexisse; qui tamen non modò obrutus non est,
 sed omnes etiam in partes transtulit veritatem.
 Cujus rationem affert proposito nostro per-
 opportunitatem. *Talis est conditio erroris, ut nul-
 lo etiam sibi obsistente consenescat ac defluat;
 talis autem est à diverso veritatis status, qui
 etiam multis impugnantibus suscitatur, &
 crescit.*

Q U I N T U M E L O G I U M.

*In Augustino & Aquinate sex Ca-
 tholici Doctoris dotes eminent,
 amor Ecclesiæ, zelus fidei, ora-
 tionis frequentia, humilitatis
 studium, sanctitas morum, dog-
 matum castimonia ab omni cor-
 ruptela & laxitate aliena.*

In Ecclesiam amor, & fidei zelus.

AMOR Ecclesiæ Doctoris Catholici tessera
 est: Ecclesiæ, inquam, quæ ut ait Augusti-
 nus, tabernaculum est, ad quod currendum est,
 dum diversæ hæreses, diversa schismata perso-
 nant; & linguæ multæ contradicunt veritati
 doctrinæ. Hanc autem Ecclesiam, addit idem
 Pater epist. 50. *qua non litigiosis opinionibus fin-
 gitur, sed divinis attestationibus comprobatur,*
 propter

propter quemlibet hominem relinquere debemus. Amore autem Ecclesiæ flagrasse Augustinum, flagrasse & Aquinatem, solus ambigat qui labores & opera eorum ignorat. Nonne ex amore Ecclesiæ profecta sunt opera illa eximia, & tot lucubrationibus elaborata, quibus Gentiles, Judæos, Hæreticos, Atheos exarmarunt, demonstraruntque neque in confusione Paganorum, neque in purgamentis hæreticorum, neque in languore schismaticorum, neque in cæcitæte Judæorum quærendam esse Religionem, ut libro de vera Religione, cap. 16. profecquitur Augustinus; sed apud eos solos, qui Christiani, Catholici, vel Orthodoxi nominantur, id est integritatis custodes, & recta sectantes? *Hæc enim Ecclesia Catholica per totum orbem valdè, latèque diffusa manibus errantibus utitur ad profectus suos, & ad eorum correctionem, cum vigilare voluerint. Utitur enim Gentibus ad materiam operationis suæ, hæreticis ad probationem doctrinæ suæ, schismaticis ad documentum stabilitatis suæ, Judæis ad comparationem pulchritudinis suæ.*

Sciunt hunc Augustini in Ecclesiam amorem Manichæi, Donatistæ, Pelagiani, cæterique, quorum ille blasphemias multis & magnis voluminum suorum molibus velut quibusdam fulminibus evertit. Splendent sanè omnes scriptoris eximii dotes in operibus Augustini; erat enim in omni literarum genere peritus, ingenio igneo, facili, copioso, facundo, suavi, & (quæ sermonis maxima est virtus) aperto, ut discernere nequeas utrum ornatior loquendo, an facilius explicando, an subtilior penetrando, an su-

blimior discurrendo, an potentior in persuadendo quisquam fuerit; unde à Leone IX. epist. I. ad Michaëlem Constantinopolit. Patriarcham, *Noster Chrysostomus appellatur.* Sed sicut affusum omnibus liquoribus oleum omnes vincit, omnibus supernatat; sic amor Ecclesiæ ita in operibus Augustini enitet, ut cætera quæque ornamenta exsuperet. Tantum enim Ecclesiæ detulit, ut Evangelio non credendum contendat, nisi Ecclesiæ commoneret auctoritas; asseratque vel ipso Ecclesiæ Catholicæ nomine hæreticos omnes confusos iri. Idem pro Ecclesiæ auctoritate ardor Aquinatem incessit, cum ipsam Ecclesiæ consuetudinem in omnibus æmulandam, & Doctorum quorumcunque auctoritati anteponendam disertissime doceat. Unde sicut vitæ origo & finis est à corde, quod omnium primum incipit, & ultimum desinit vivere: ita S. Thomæ scribenti Ecclesiæ amor & fides cordis instar fuit; pro ea enim defendenda studiis operam dedit, pro eâ item defendenda ad Concilium Lugdunense pergens mortuus est.

Ex amore Ecclesiæ ardens fidei retinendæ, propagandæque zelus enascebatur, quo succensit Augustinus, & Aquinas Philosophiam, & externas facultates in obsequium fidei, & Ecclesiæ gloriam captivarunt. De Augustino id observavit ipsemet S. Thomas 1. p. q. 84. art. 5. *Augustinus, inquit, qui doctrinis Platoniorum imbutus fuerat, si qua invenit fidei accommoda in eorum dictis, assumpsit; qua verò invenit fidei nostra adversa, in melius commutavit.* In quo etiam genere disputandi excelluit S. Thomas, unde

unde Philosophorum Apostolus dictus est, quia Philosophos ab antiquis Patribus tanquam hæreticorum Patriarchas odio habitos fidei servire coëgit, & Philosophiam, inanemque fallaciam, à qua ne fideles deciperentur, Apostolus admonerat; & Dialecticam artificem struendi, & destruendi, versipellem in sententiis, coactam in conjecturis, duram in argumentis, operariam contentionum, tanquam ancillam vocavit ad arcem, ut Theologiæ ministraret.

Scio quidem nonnullos inde carpendi S. Thomæ ansam nancisci, quòd argumentis è ratione petitis plus justo addictus esse, & Philosophis plus nimio indulgere videatur; quia, addunt, si credo quod traditum est, quid opus est operosâ disputatione? Si non credo, nullis humanis rationibus persuadebor. Verùm hanc calumniam dum de locis Theologicis agebamus, occupavimus. Ubi sicut eos, qui uni rationi fidunt Theologos, quive sive disputent, sive scribant, Scripturam sacram, Patrumque monumenta negligisse quidem videntur, irridendos, contemnendosque diximus; quoniam veræ Theologiæ solidam effigiem nullam tenent, umbris utuntur, & sese in sophistica arte diu torquentes non sacram doctrinam, sed fumum persequuntur; ita illorum non minùs morositatem reprehendimus, qui ad argumenta è ratione petita aures occludunt, cupiuntque discipulos suos ab omni disputandi ratione sevocare. Imprudentissimè illi quidem. Rationem quippe repellere homines nec debent, nec verè possunt, nisi rationales esse desierint. Jacebit profectò Theologia, evaderque sancta rusticitas, quæ ut

Hiero

Hieronymus scripsit, quantum prodest vitæ merito, tantum simplicitate nocet, si adversariis non resistat: quomodo autem resistet, nisi rerum & divinarum, & humanarum ordinem, ac connexionem ratione teneat, veritatum principia, causas, effecta, antecedentia, consequentia animo perlustret?

Nihil ergo D. Thomæ consiliis justius, nihil utilius, qui turpissimum quidem esse Theologo rebatur sine verbo Dei, sive scripto, sive Patrum traditione transmissio quidquam statuere; rationis tamen subsidia, & veluti auxiliares copias non despexit, sed fidei subjecit: & sicut gratia non tollit naturam, sed perficit; nec natura gratiam repellit, sed suscipit: ita post Augustinum D. Thomas omnes scientias advocavit, eas ut sententias deligeret, quæ essent ad fidei mysteria exponenda, propugnandaque aptiores. Vnde in utriusque Doctoris operibus tanta micant acumina, tanta ingenii amplissimi specimina, tantus rationum splendor & varietas, ut optima quæque, splendidissimaque ingenia, quamlibet acie mentis, & veri perspicientiâ polleant, semper puras, semper novas in illis lectitandis delicias experiri se verissimè fateantur.

Nec obest argumentum superius objectum, non egere nimirum fidelem operosâ disputatione, infidelem verò nullis humanis rationibus suaderi posse. Non obest, inquam, quia ut elegantissimè alicubi scripsit Theologorum sui sæculi sine controversia politissimus Melchior Canus, si non credo, ratione adducor; si credo, confirmor; si repugno, confundor; ratione, inquam, non dominâ, sed administrâ; syllogismo

non

non præfidente, sed subserviente. Non sunt argumenta theologica ab Augustino & Aquinate inventa arma Saülis, quæ pugilem Christi magis gravent, quàm juvent; sunt potiùs gladius Goliath, quem cum ipsi è manibus extorseris, suo illum gladio jugulas. Nunquid Christus in Evangelio, nunquid Apostoli in epistolis suis multa è naturali ratione assumpserunt, & discursu intulerunt? Ergo hunc differendi modum à Christo Domino profectum, ab Apostolis usurpatum, à sacris Doctoribus confirmatum solus respuat homo post hominum memoriam minùs homo Lutherus, qui rationem naturalem Christiano, Theologoque noxam pronuntiavit; conscius errores suos absurdissimos citò deprehensum iri, si ratione librentur. Hinc in principio hujus, si superis placet, Reformationis, in Germania primùm, deinde in Gallia regnante Calvino sutores & lanci, qui novum Testamentum memoriæ mandarant, magni & præclari Theologi habebantur; ipsæque mulierculæ, quibus docendi munere Apostolus tam disertè interdixit, quoniam nonnullas Paulinarum epistolarum lacinias memoriter recitabant, doctiores quosvis ad disputandum provocabant. Sed nihil mirum, si secta quæ omnium hæreticorum feces in unam fecit carinam confluere, quibus sectatores pasceret suos, bellum etiam rationi naturali indixerit, quam tantoperè impietati suæ noyerat adversari: inducturus enim Epicuri voluptates, & Mahumetis licentias effrænes Lutheranismus, debuit sicut illi, disciplinas & rationum momenta despiciere, quæ benè intelligebat perversitati suæ esse contraria. Hoc illis

illis defuisset iniquitatis complementum , si post ejuratam fidem non fuissent etiam à ratione & humanitate alieni : sed jam progredi ulterius nequit impietas , nisi aliquid quæramus post omnia.

Denique etsi S. Thomas philosophicis rationibus usus sit , modum tamen servavit & ordinem : Philosophiæ spatia pro ea , quâ pollebat , ingenii vi , brevissimo tempore decurrit , totum deinde tempus divinis studiis impertiens , quibus nos Christi religio consecravimus. Philosophos primoribus , ut aiunt , labris , degustavit , ut Ecclesiasticos postea libros diu , noctuque versaret. Philosophis non fruebatur , sed utebatur in augmentum fidei , & veritatis ornamentum , illud præ oculis habens à Clemente Alexandrino præclarissimè dictum : *Perspicuitas confert ad tradendam veritatem , & Dialecticæ ne prosternamur ab hæresibus. Et est quidem per se perfecta Servatoris doctrina , & nullius indiga , cum sit Dei virtus , & sapientia : accedens autem Philosophia non veritatem facit potentio rem , sed debilem adversus eam efficit sophisticam argumentationem : & propulsans dolosas adversus veritatem insidias , vinea est sepes & vallum. Et quæ est quidem ex fide veritas , tanquam panis necessaria est ad vivendum : quæ autem præcedit disciplina , est obsonio similis & bellariis. Desinente cœna , suavis est placentula.*

Orationis frequentia, & humilitatis studium in utroque Doctore splendentia.

Veridicè Magnus Gregorius lib. x. Moral. capite 32. dixit: *Nulla est scientia, si utilitatem pietatis non habet; valde inutilis est pietas, si scientia discretionem caret.* Porro ut scientia pietate condidatur, oratione opus est, quâ & divina gustamus, & quæ sursum sunt, sapimus, & æternis inhiamus, & gratiam cordis duritiem emollientem impetramus. Sine orationis praxi languet, tepescit, & tandem desinit charitas; scientia autem sine charitate vana est, obscura est, nec ædificat, sed inflat. Hinc Sancti diuturno silentio, instantibus supplicationibus, crebris gemitibus à Deo sapientiam postulant, qui dat omnibus affluenter; & ut Magnus Gregorius lib. 1. in 1. cap. Reg. ait: *Mens tua ferventibus desideriis interna desiderat, dum terrena lœtitia blandimentum respicit, instantibus gemitibus infundi sibi superna lucis amœnitatem exoptat.* Hanc divinam lucem Catholici potissimùm n. Doctores continentibus precibus flagitant, ut sit lucerna pedibus eorum verbum Dei, ut in lumine vultus Dei ambulent, ut cum Christo dicere queant: *Mea doctrina non est mea, sed ejus qui misit me.*

Hac veritate pleni Augustinus & Aquinas, orationi instabant, sine intermissione orabant, & continuæ meditationis intentione ad æterna suspirabant. Quia nimirum illud experientiâ

noverat Augustinus, quod *epist. 112.* scriptum reliquit: *Qui didicerunt à Christo esse mites & humiles, plus cogitando & orando proficiunt.* De sancto etiam Thoma scriptum est: *Nunquam se scriptioni, aut lectioni dedit, nisi post orationem.*

Sed quia oratio sine humilitate nihil efficit, solaque humiliantis se deprecatio nubes penetrat, ideò tantâ doctrinæ sacræ abundantia repleti sunt Augustinus & Thomas, quia humilitate præcellerunt. Germanus cœlestis doctrinæ character humilitas est, quia ut in *1. lib. Reg. Magnus Gregorius observat: Spiritus sanctus quo majori luce virtutum electorum corda irradiat, eo & abundantiore dono humilitatis ditat. Lumen intelligentia humilitas aperit* (addit lib. 25. *Moral. cap. 11.*) *superbia abscondit, nam secretum quoddam pietas est, & tanto minus ad illud animus pervenit, quanto magis intumescit; quia eo ipso foras repellitur, quo insanius inflatur. Humilitas* (inquit Chrysost. hom. 39. in *cap. 11. Matth.*) *virtus est, & sublimioris Philosophiæ mater, & origo. Propterea Christus Dominus, dum nobis divina traderet instituta, ab humilitate initium fecit. Discite à me, quia mitis sum, & humilis corde.*

Quàm profunda autem, quàm rara fuerit Augustini, & Aquinatis humilitas, nemo nescit. Illud autem admirationem rapit, viros illos tot dotibus ornatos, tantâ ingenii vi, tantâ doctrinæ copiâ instructos, tam altas humilitatis radices egisse, ut inferiùs descendere non possit. Quid illa iudicii humilitate modestius, quàm Doctorum aquila Augustinus sensibus ita diffidebat

Commend. SS. Aug. & Thoma. 691

bat suis, ut propriis opinionibus nolle alios unâ suâ authoritate permotos adhibere fidem sapè sit contestatus: *Vos qui me multùm diligitis, si talem me asseritis adversùs eos, quorum malitiâ, vel imperitiâ, vel negligentiam reprehendor, ut me nusquam scriptorum meorum errasse dicatis, frustra laboratis, non bonam causam suscepistis, faciliè in ea, me ipso iudice, superamini.* Sententias suas ita corrigebat, ut libros retractionum ediderit; regimen suum, ad quod vi raptus fuerat, ita verebatur, ut in multis liquidam veritatem non cernens, solitudinem suam Paulino suo his verbis explicarit epist. 250. *Quis vindicandi modus non solum pro quantitate, vel qualitate culparum, verùm etiam pro quibusdam viribus animorum? quàm profundum, & latetresum est? Ego in his quotidie peccare me fateor, & ignorare quando, quòve modo custodiam id, quod scriptum est: Peccantes coram omnibus argue, ut ceteri timorem habeant. Quis in his omnibus timer, mi Pauline, sancte homo Dei; quis tremor, quæ tenebra? Nonne putamus de his esse dictum: Timor, & tremor venerunt super me, & contexerunt me tenebra.*

Judicii modestiæ & demissioni adjiciebat humilitatem cordis, quâ an possit esse major, ægrè definiri potest. Amorem abjectionis & contemptus sui significantiùs testari non potuit, quàm dum delicta juventutis suæ, ignorantias, infirmitatesque suas publicâ confessione sæculis omnibus exposuit, & quidem libro elegantissimo, ut ad peccata sua frequentiùs legenda sermonis leporibus lectorum animos inescaret. Illud nimirum sanctissimo viro inerat alta mente

repositum, quod *lib. de sanct. virginis. cap. 3.* scriptum ipsemet reliquit: Sicut Demosthenes interrogatus, quid primum observari deberet in praeceptis eloquentia, quidve secundo, quid tertio, semper respondit, pronuntiationem: sic si interroges, & quoties interrogares de praeceptis christiana religionis, nihil me aliud respondere, nisi humilitatem libet.

Humilitas etiam Aquinatis non tam virtus, quam prodigium virtutis fuit. Quid enim eodemissus, qui sepulto propriae voluntatis arbitrio, totus est Superiorum nutu pendebat, qui quotidie à Deo postulare consueverat, ut regularis vitae humilitatem posset ad mortem usque servare; qui ab Urbano I V. Romam vocatus adduci non potuit, ut honores acciperet, & Archiepiscopatum Neapolitanum deferente Clemente I V. recusavit; qui perfusus lacrynis Parisiensis Doctoris gradu initiatus est; qui Fratri converso dura sibi infirmo & ignoto nomine Superioris praecipienti obtemperavit; qui correctori mensae accentum imperitè & intempestivè corrigenti obsequutus est, dignamque hanc Angelo vocem confratribus, caecam nimis obedientiam improperantibus protulit: *Quid interest, an syllaba corripiatur, an producat?* Obedientiae autem, & humilitatis pretium est infinitum, quibus perficitur omnis Religio. Denique pergens ad Concilium Lugdunense, ubi erat cum D. Bonaventura ad Purpuram certissime assumendus, mortem à Deo obtinuit, humilitatis statum, pro quo retinendo quotidie orabat, ne desereret, Christum imitatus qui ut ait Bernardus, ne perderet obedientiam & humilitatem.

militatem, perdidit vitam. Nec illum extollebat rara illa sapientiæ supellex, quâ instruebatur, quia eam è Crucifixi pedibus hauserat: non est autem noxia capiti, quæ fugitur è pedibus Salvatoris; nec scit esse superba, cujus objectum est Deus humiliatus.

Hanc tantorum Doctorum stamilitatem in multis hujus sæculi sciolis & semidoctis desideramus, qui alios nec sine pertinacia & supercilio arguunt, nec ipsi sine iracundia refelli possunt; in quorum verbis, scriptisque proditur, ut alicubi Gregorius Magnus annotavit, quod cum doceant, quasi in quodam sibi videntur sublimitatis culmine residere, eosque quos docent, ut longè infrà se positos, velut in imo respiciunt. Qui semper increpare appetunt, & plerumque increpando mentiuntur, ut sibi fingant hostes quos feriant. Quàm alienus ab hoc typo Aquinas Doctorum omnium modestissimus, & Augustino simillimus. Ad tantam utriusque Doctoris ingenerandam, fovendamque humilitatem non parum conferebat divinæ gratiæ, & victricis auxilii ad singulos actus necessarij confessio, & convictio; quomodo enim potest exaltari cor illius; quomodo altum sapere quit, qui omnia opera sua veretur, num à gratia proficiantur? qui nullum posse se bonum sine gratuiti adjutorii ope elicere certissimè credit? qui tentationem nullam Deo non adjuvante vincere posse convincitur; qui perseverantiæ donum nullis meritis obtineri, sed purâ Dei misericordiâ concedi, & animo censet, & corde sentit?

Hæc mirare, Lector, & imitare. Quod si te

Sanctorum exempla non permovent, exemplo
 saltem Christi moveare; postquam enim exina-
 nivit semetipsum Deus majestatis, quomodo ap-
 ponet homo se ultrà magnificare super terram?
Hæc medicina hominum, inquit August. lib. de
 agon. Christ. cap. 1. *tanta est, quanta non potest*
cogitari; nam quæ superbia sanari potest, si humi-
litate Filii Dei non sanatur. Sed huic potissimum
 virtuti operam dare Theologus debet, quia di-
 vinarum veritatum notitiam salutarem sicut ab-
 scondit Pater sapientibus & prudentibus, ita re-
 velat parvulis; nec requiescit spiritus Sapien-
 tiæ, nisi super humiles, & tremantes sermones
 Dei. Præclare & piè de more Magnus Gregorius
 lib. 23. Moral. cap. 10. *Obstaculum veritatis est*
tumor mentis; quia dum inflat, obnubilat; quia
quando scientiam videntur adipisci, quasi de quo-
dam rerum cortice, non de secreta dulcedinis me-
dulla pascuntur, micantibusque ingeniis sæpè ex-
teriora tantummodo attingunt, sed interni gustus
saporem ignorant, videlicet foris acuti, intus
cæci sunt: neque id de Deo sentiunt, quod dulce
interius sapiat, sed quod excussam exterius so-
net; qui etsi secreta quadam intelligendo perci-
piunt, eorum dulcedinem experiri non possunt; &
si noverunt quomodo sunt, ignorant quomodo sa-
piunt.

*Sanctitas morum Augustini, &
 Aquinatis.*

Sæpe sæpius monuimus, scientiæ morum san-
 ctimoniam non mediocriter opitulari; tum quia
 passio

passionum moderatio, & purgatorum affectuum
temperies nebulas removeret & tenebras, quibus
solet animus ex concupiscentiæ motibus infus-
cari. Vnde pulchrè dixit Joan. Major in prolo-
go lib. 4. Sentent. *Honos esse sibi ipsis, & aliis
perpendicularum vivendi & docendi.* Cui succi-
nit illud Altiſſiodorensis effatum: *Melior omni
arte certior.* Tum quia vitæ sanctimonia gra-
tiam advocat ad cognoscendas veritates sum-
moperè necessariam. Nam ut ait Augustinus
epist. 32. *Quadam acutissima, & excellentissima
ingenia tantò in majores errores ierunt, quantò
presidentius suis viribus cucurrerunt, nec simpli-
citer, ac veraciter Deum, ut viam sibi ostenderet,
petiverunt.* Nec potest dici, hanc gratiam ad
veritates duntaxat supernaturales, non humanas
& naturales esse necessariam. Non, inquam,
id potest dici, quia ut idem Augustinus epist.
155. observat: *Neceſſe est, ut aliter, quàm opor-
tet, humana æſtimet, qui divina contemnit; nec
hominem rectè diligere novit quisquis eum non di-
ligit, qui hominem fecit.* Divina autem rectè
æſtimare & diligere nemo sine gratia potest.
Vnde contingit, multos corruptâ semel con-
scientiâ, scientiâ deinde æquissimo Dei iudicio
orbari. *Vult hypocrita, inquit Magnus Gregor.
lib. 15. Moral. cap. 9. ſcire eloquia divina, nec ta-
men facere: vult doctè loqui, nec vivere. Pro eo
quod non agit quæ novit, etiam hoc quod novit,
amittit; ut quia ſcientia ſue puram operationem
non ſociat, contemptâ puritate boni operis, & ſcien-
tiam perdat.* Et lib. 11. cap. 9. ponderans illud Da-
vidicum, *& ne auferas de ore meo verbum verita-
tis uſquequaque, ſic habet; Perpendit namque,
quod*

quod omnipotens Deus veritatis verbum facientibus tribuit, & non facientibus tollit. Qui ergo de ore suo non auferri petiit, quid aliud quàm gratiam bonæ operationis quasi vit? Ac si apertè diceret, à bono opere errare non me sinas, ne dum amitto ordinem benè vivendi, rectitudinem perdam loquendi. Et plerumque Doctor qui docere audet quod negligit agere, cùm desierit benè loqui quæ operari contempsit, docere subiectos incipit prava quæ agit, ut justo Omnipotentis iudicio in bona causa nec linguam habeat, qui habere bonam vitam recusat; quatenus cùm mens ejus terrenarum rerum amore incenditur, de terrenis rebus semper loquatur.

Quodnam verò est, vel esse potest flumen ingenii, quæ tantà dicendi vis, tantaque copïa, quæ ab Augustino semel ad Deum converso sanctissimè gesta non dicam exornare, sed enarrare facillè possit? Quis exprimat lamenta pœnitentiæ, contemptum mundi præ dulcedine Dei, divini amoris æstus, vitæ communis studium, & omnium virtutum praxim, quæ in isto filio lacrymarum claruere? Nemo nescit, qui vitam ejus à Possidio adornatam, vel S. Doctoris confessiones legerit, cor viri sancti vulnerasse charitatem Christi, & gestasse verba ejus Augustinum in visceribus, quasi sagittas acutas, quibus suavissimè transfixus inhiabat ore cordis in superna fluentia fontis vitæ, vilescibatque mundus iste cum delectationibus suis. Nemo nescit, quo fervore familiam Canonicoꝝ instituerit, quibuscum victu communi, eodemque cultu utens, cœpit vivere secundùm regulam sub Sanctis Apostolis constitutam. Nemo nescit, quomodo Augustino vi facto Episcopo nihil humilior fuit,
nihil

nihil continentius; nam & lectum, vestitumque moderatum, vulgarem mensam sacra semper lectione, vel disputatione conditam, & à peste distractionis purgatam adhibebat; & bona sua ita effusè in pauperes erogabat, ut cum non alia suppeterent, sacra ad miserorum sublevandam inopiam vasa frangeret, & dispensaret; & à mulierum contubernio, familiaritateque abhorruit, & nullum divini verbi prædicandi finem fecit. Denique sanctitas Augustini gratiæ divinæ operæpretium est. Et sanè congruebat, ut ejus vita esset gratiæ miraculum. cujus doctrina fuit gratiæ firmamentum. Sanctitatem morum illius omnîpotenti virtute gratia formarat, ut propriis experimentis victricem delectationem percipiens, in se cerneret quid in aliis possit. Illum expedit, purum fecit, terrenisque cupidinibus veritatis lucem repellentibus liberavit, ut peccatorum vinculis exsolutus, uni Deo serviens, unum in animo Deum habens, in gratiæ tutelam manus armaret, cujus se beneficiis ita obstrictum, & penè obrutum sentiebat, ut illud sentire onus nec posset, nec deberet.

Sanctitatem porò, pietatem, animi, corporisque illibatam Angelici Doctôris candorem, virtutum omnium certatim micantium beatissimam copiam oculis tuis, Lector optime, non subjiciam, ne historiam texam. Eminentes ejus virtutes innumeri scriptores laudibus, tametî inferioribus extrulerunt. Illud unum ponderabo, unde cordis ejus mundities & castimonia evidentissimè constabit. Summè quidem commendatur Angelica S. Thomæ doctrina à Christi testimonio scripta ejus consecrante: sed non minus, ut mihi quidem videtur, cordis simplicitas,

& mentis innocentia Aquinatis ex ejus responsione dignoscitur. Petiit Christus quam pro tot vigiliis, & studiis, pro tot laboribus exantlatis optaret sibi rependi mercedem: *Non aliam*, inquit purissimus Aquinas, *nisi teipsum*. Quid causæ est, ô Thoma, cur omnem creatam mercedem refugias? Nonne fastidiosus es, aut delicatus nimis? Mercedem postulat Princeps Apostolorum, & post relicta omnia, id est retia, & ut Gregorius ait, *penè nihil*, sciscitatur: *Quid ergo erit nobis?* Mercedem etiam vir secundum cor Dei Propheta Regius deposcebat, & inclinasse cor suum ad faciendas justificationes Dei in æternum propter retributionem affirmabat. Cur ergo tu mercedem respuis, qui & longè plura quàm Petrus reliquisti, nec Davide minus ad faciendas justificationes Dei cor tuum inclinasti? O Aquinatis verè cor nobile, quod nulla deorsum humana traxit affectio! Datur quidem illi optio præmii, sed quid eligeret, nisi Deum, qui noverat pretium Dei, noverat & bonorum operum dignitatem? Dilanientur, inquit, quantum voluerint homines variarum diversitate cupiditatum: eligant alii divitias, alii gloriam, alii voluptates, & partes sibi faciant de rebus humanis; ego autem cum Propheta canam: *Pars mea Deus*, non ad tempus pars mea, sed *pars mea Deus in æternum*. Aurum etsi semper habeo, quid habeo? Deum si semper habeam, summum bonum possidebo. Postquam seipsum mihi Deus promisit mercedem futuram magnam nimis, quid aliud sperare mihi, quid postulare licet, aut decet? Cor castum à Deo accepi, acceptum servabo. Te ipsum quæro, mi Jesu, gratis te amo Deus cordis mei, nec

abs te præter te aliud præmium postulo; quia ut Augustinus in Psal. 71. scripsit: *Qui aliud præmium petit à Deo, & propterea vult servire Deo, carius facit quod vult accipere, quàm ipsum à quo vult accipere. Nullum præmium Dei, nullum præter ipsum. Præmium Dei ipse Deus est: hoc amat, hoc diligit; si aliud dilexerit, non erit castus amor.*

*Doctrina, & dogmatum castimonia ab
omni corruptela & laxitate aliena
gemini Doctoris tessera.*

Eloquia Domini eloquia casta, & lex Domini immaculata. Nihil comparandæ sacræ doctrinæ profana voluptate, & vitæ molliæ magis adversum. Unde illud ortum adagium: *Venus furatur intellectum.* Certè si Scripturis, uti tenemur, fidem adhibemus, non habitat sapientia in terra suaviter viventium, & soli mundo corde Deum videbunt. Hinc observant Patres, hæreticos omnes luxuriæ deditos esse & gulæ; virginitatem nemo apud eos amore Christi custodit, vexillum crucis, & prædicationis austeritatem, quibus idololatria destructa est, veneris & gutturis luxuria subvertere nuntur. *Nulla hæresis, nisi propter gulam, veneremque construitur,* inquit Hieronymus in cap. 3. Ierem. & in cap. 16. Ezechiel. dixit: *Nam asserunt nihil nocere luxuriam, & cibis omnibus indifferenter utendum, qui ad hoc facti sunt, ut sumantur.*

Id verum probant hujus temporis hæretici Lutherani & Calvinistæ, qui & cœlibatui bellè

indixerunt, & abstinencias, & jejunia perpetua traditione servata è medio sustulerunt: unde nihil mirum in tot eos errores abiisse, & tam miserè evanuisse in cogitationibus suis, qui obscuro libidinibus & mundanis delitiis insipiente eorum corde, incedem quam oportuit, erroribus suis in semetipsis recipere debuerunt. Quàm deformata, quàm turpis hæc reformatio, quæ uni concupiscentiæ astructa est! quàmve uni licentiæ immoliti sunt Epicurei Patriarchæ! Et sanè transfundi solent in natos vitia parentum: quî ergo puritatem spiraret secta illa, quî non laxaret vitiis habenas, quæ non tam ab hominibus, quàm porcis vel equis emissariis Luthero & Calvino profecta est, illo sacræ Deo virginis constupratore, isto ob præposteræ & infandæ Sodomæ libidinis scelus probroso stigmate inusto. Doleo viros ingenuos, & ad honestatem comparatos Calvinistas populares & Nostrates, quin & nonnullos secundum carnem mihi cognatos, è tam putidis capitibus ortum ducere. Doleo Christianos Crucifixi discipulos & cultores, inimicos crucis Christi duces sequi, quorum Deus venter fuit, & finis interitus, & gloria in confusione ipsorum. Doleo filios Sanctorum extra tutissimum Catholicæ fidei portum diversis hæresibus quati, & sese intra fidissimam stationem placidæ, ac bonæ matris nolle reduci, atque amaros illos, putidos illos, turbulentosque errorum cumulos nolle remove, ut possint deinceps vivæ & salientis aquæ fluentia potare. Dediscite non Christiani, sed apostatæ, dediscite tandem benè, quod didicistis tam perversè. Scite quod scitum est cunctis, quàm graviter, quàm severè, quàm

quàm vehementer in illos invehatur Beatus Apostolus, qui damnanda levitate nimium citò ab eo, qui eos vocaverat in gratiam Christi, translati fuerunt. An nescitis quàm vos seriò cōmoneat, & vestram apostasiam divino lumine prænoscens attestetur, futurum aliquando tempus (& nunc est) cùm sanam doctrinam non sustinentes ad sua desideria cōacervabunt sibi magistros prurientes auribus, Christo Domino non servientes, sed suo ventri, semper discentes, & ad scientiam veritatis nunquam pervenientes; qui bonam conscientiam repellentes, circa fidem naufragaverunt, & ut alicubi ait Vincentius Lirinensis, *errores circumferunt venalities*? Quo vocabulo alludit ad circumforaneos illos mercatores, qui quaquaversum merces suas vendunt; quorum hæretici falsorum dogmatum, spurcitiarum præsertim nundinatores, persimiles sunt, qui urbes, pagos, vicos, montana, & plana penetrantes, adulterinam doctrinam suam vendendam exponunt.

Ah Deus! quàm à talibus spurcitiis abhorret cœlestis Augustini, Aquinatisque doctrina! Proinde immaculata est Augustini doctrina, quæ non solum illicita, & æternæ legi contraria reprobatur, sed etiam officia per se licita unius creatæ voluptatis amore suscepta cōdemnat. Nonne propterea *lib. de nuptiis, & concupisc. cap. 4* scribit: *Malè utitur qui bestialiter utitur, ut sit ejus intentio in voluptate libidinis, non in voluntate propaginis.* Hac enim de causa *lib. 4. contra Iul. cap. 14.* distinguit inter sentiendi vivacitatem, utilitatem, necessitatem, libidinem. Vivacitas sentiendi est quâ magis alius, alius minùs in ipsis corporalibus rebus pro earum modo atque

natura, quod verum est percipit, atque id à falso magis, minusve discernit. Utilitas sentiendi est per quam corpori, vitæque, quam gerimus, ad aliquid approbandum, vel improbandum, sumendum, vel rejiciendum, appetendumve consulimus. Necessitas sentiendi est quando sensibus nostris etiam quæ nolumus ingeruntur. Libido autem sentiendi est, quæ nos ad sentiendum sive consentientes mente, sive repugnantes appetitu carnalis voluptatis impellit. *Hæc est contraria dilectionis sapientia, hæc virtutis inimica. Hoc malo benè utuntur nuptia, cum conjuges procreant liberos per illam, nihilque faciunt propter illam.* Quantum verò formidavit Augustinus irrepentes cibi voluptates, alias observavimus, & ex confessionibus ejus constat.

Angelicam etiam S. Thomæ doctrinæ puritatem agnoverunt Ecclesiæ Capita, à quibus pronuntiatum, cum sine ullo prorsus errore scripsisset. Nec mirum, tam puram fuisse mentis Aquinatis aciem, citò enim animam castam, & virgineo nitore splendidam radii penetrant Divinitatis. Nam ut ait Gregor. Magnus in libr. 5. Reg. cap. 14. *Quando mens hominis carnali delectatione deprimitur, ejus ita visus obtunditur, ut spiritualia bona cognoscere non mereatur, sed cum in suis carnalibus infirmari incipit, paulatim in spiritualibus convalescit, ut superna proficundo videantur, infima obliviscendo derelinquat.* Si mens, quæ carnalia paulatim domat, veritatis fulgore magis magisque perfunditur, quis, & qualis, quæso, erit mentis illius splendor, qui virginali corporis, animique munditie semper floruit? Talis porro fuit Aquinas, qui post reportatam illam celebrem de muliere ad labefactandam

dam ejus castitatem armata victoriam, post repudiatas meretricis circumornatæ ut similitudo templi illecebras, post superatum igne ignem, seu inflammata gehennali flamma puellam titione fugatam, singulari Dei dono libidinis deinde sensu omnino caruit. Si teste Ambrosio, errat mentis oculus, ubi errat affectus, & sæpe noxia despicere quàm perniciosa sint, non licet, quia judidium interpellat affectus, incredibilis sine dubio fuit Aquinatis mentis intelligentia, cujus affectus castissimus, & rectissimus semper fuit. Inde tanta in explicandis difficillimis perspicuitas, quam nec brevitās obscurat, nec varietas confundit. Inde quatuor inter se implacabiliter pugnantia, ut eruditè observat Sixtus Senensis, indissolubili pacis fœdere conjunxit: copiam, brevitatem, facilitatem, & securitatem, quas nulli unquam literarum Professori vel ante, vel post contigit simul potuisse connectere.

Hanc perpetuam doctrinæ Augustini & Aquinatis puritatem comitatur horror laxitatis, & eorum nefandorum dogmatum damnatio, quæ in quibusdam recentiorum Casuistarum opusculis non sine Catholici nominis dedecore passim leguntur. Quæ sanè doctrinæ flagitia, everso vagæ probabilitatis principio, præoccupatâ proscriptione sacri isti Doctores profligarunt. Vagam autem Modernorum opinandi licentiam & varia pro variis hominum moribus de moribus decreta reprobasse Augustinum, reprobasse & Aquinatem ex alijs dictis, dum de probabilitate, notissimum est. Unde Recentiores benè conscii vagam illam probabilitatem, unde omnia doctrinæ moralis flagitia fluxerunt, & majora, ni reprimatur, fluent, à Patribus, Augustino

præsertim & Aquinate, apertè damnari, & totius traditionis præfidiis deserui, in Patrum locum Recentiorum turbam suffecerunt. Hinc crebrò apud Casuistas non ex Patrum decretis, sed ex recentium Theologorum legibus esse vivendum. Quia licet quæ circa si-lem emergunt difficultates, è Patribus, utpotè traditioni & doctrinæ Apostolicæ vicinioribus, dissolvendæ sint, in dirimendis tamen moralibus controversiis potiorum Doctorum recentiorum rationem esse habendam. Hinc novi Ethici vix alios in scriptis suis laudant, quàm modernos, Patrumque non meminerunt, nisi fortè ad fastum, vel ad ornatum libris, non firmamentum. opinionibus suis concilia- lum. Quasi non minùs ei periculi insit, qui à Patrum de fide sensibus recedit, quàm qui contra legem æternam tutiore opinione relictâ, probabilitatis obreptu peccat; vel non æquè periculosè erret homo in agendis, atque in credendis. Quasi multa non possint circa mysteria citra noxam ignorari, ipsa verò juris naturalis ignorantia peccatum non sit. Quasi demùm Patres toti ad conformandos mores intenti, nihil de moribus immensis in voluminibus scriptum reliquerint. Scilicet?

Scio hanc meam de probabilitate doctrinam à Patribus, & D. Thoma evidentissimè expressam, inculcatam, & rationum etiam momentis firmatam, quam in calce tomi tertii operosè exposuimus, nonnullis displicuisse, quibus certè placere si vellem, servus Christi non essem. Illud porrò iniquum, id in me illos reprehendere, quod non solùm scholæ Thomasticæ primoribus Magistris probatum est, sed etiam quod ab eximjis sacre Societatis Jesu Theologis Bel-
larmi

Iarmino, Comitolo, & novissimè Michaële Elizarda, nitentissimis verbis traditum est. Hem tibi, Lector, aurea Cardinalis Bellarmini verba opusculo ad Episcopum Theanensem nepotem suum: *Si quis velit, inquit, in tuto salutem suam collocare, is omninò debet certam veritatem inquirere, & non respicere quid multi hoc tempore dicant, aut faciant: & si rei certitudo non possit ad liquidum apparere, debet omninò tutiorem partem sequi, & nulla ratione, nullius imperio, nullâ utilitate temporali propositâ ad minùs tutam partem declinare. Agitur enim de summa rei, cum de salute aeterna tractatur; & facillimum est conscientiam erroneam exemplo aliorum inducere, & eo modo conscientiam non remordente ad eum locum descendere, ubi vermis non moritur, & ignis non extinguitur.* Pauli porò Comitoli mentem nemo ignoraverit, cui quæstionem 15. lib. 5. resp. Moral. legere placuerit, ubi de tutiore opinione sequenda sententiam, Ethicæ Christianæ caput, ad reliquas Christiani officii tractandas, dijudicandasque controversias pernecessarium merito appellat. Additque oppositam sententiam esse scædam prolapsionem, quâ à ratione recedimus, veritatem contemnimus exploratam, saltem ejus agnoscendæ vias obstruimus, æternæ legi contumeliam imponimus, sceleratos illos judices imitamur, qui contrariis testibus auditis, eorum testimonium sequi vellent, quod minùs verisimile appareret; eorum etiam imprudentiam sequimur, qui quod verisimilius malum est, eligunt, bono securo prætermisso.

Hanc doctrinam illustrat eruditus Theologus tum Pontificum responsis, probabiliora semper, & saluti viciniora complexis; tum præclaro

Joannis Majoris dicto: *Teneatur*, inquit, *pro doctrina, tanquam esset celte in silice sculpta, quod in via morum modus certior est tenendus.* Tum ex Conrado exponente genera, numerumque causarum, quamobrem unius potiùs, quàm alterius sententiam eligamus. Si nimirum Authores sanctiores ac castioris vitæ laude floruerint, quos rectiùs collineare, & minùs errare suprà, & alibi ostendimus, docuitque Philosophus 10. Ethic. cap. 5. *Virtus*, inquit, *ac vir probus est uniuscujusque rei mensura.* Si Author in rebus certis ingenio non indulserit, si in veritate attingenda studiosiùs elaborauerit, si à studio partium alienus, unius veritatis cognoscendæ cupidine ductus ad disputandum descenderit. Meliùs enim ille judicat, ut Philosophus tradit, qui tanquam non adversarius omnes utrinque rationes oppositas audit. Idem docet S. Thomas lib. 12. *Metaph. lect. 9.* ubi ait in opinionibus eligendis extenda esse præjudicia: *In eligendis opinionibus, vel repudiandis* (verba sunt ejus) *non debet homo duci amore, vel odio introducentis opinionem, sed magis ex certitudine veritatis.* Ideo oportet amare utrosque, scilicet eos, quorum opinionem sequimur, & eos, quorum opinionem repudiamus: utrique enim studuerunt ad inquirendam veritatem; & nos in hoc adjuverunt. Sed tamen oportet nos suaderi à certioribus, id est sequi opinionem eorum, qui certius ad veritatem pervenerunt.

Pergit Comitulus, illam esse sententiam anteponendam, quam plures sectati sunt, nisi in paucioribus plura insint ingenii, pietatis, & doctrinæ lumina. Consiliorum namque maturitas, & digestio multitudini sæpè præponitur: *Neque enim honestas, aut justitia*, ut Pius II. ad Ludovicum

vicum Galliarum Regem scripsit, *multitudine facilè suadetur, quæ variis affectibus agitata ad peiora frequenter inclinatur.* Denique omiſſis aliis variis, quas recenset, causis, illi opinionem palmam esse contendit, quæ rationem consuetudini (sola universalis Ecclesiæ consuetudine excepta) præponit; quia consuetudo in aliqua orbis parte obstetricantibus quibusdam semidoctis Casuistis nata & educata, nisi se ratione & veritate defendat, abusus est, & vetustas erroris. Dixi sola Universalis, seu Romanæ Ecclesiæ consuetudine exceptâ, quia ut Augustinus *epist. 118.* docet: *Insanissima arrogantia est, existimare non rectè fieri, quod ab universa Ecclesia fit.*

Licet autem ratio sit peculiari consuetudini præferenda, cavendum tamen est, ne ratio distorta fuerit, atque concupiscentiæ nebulis infusca- ta. Tunc autem perversa, corruptaque ratio jure meritò censetur, cum sacris literis, œcumenicis Conciliis, Apostolicis traditionibus, Ecclesiæ Catholicæ consuetudini in omnibus æmulandæ, Romanorum Pontificum decretis, Sanctorum Patrum voci, Justorum praxi, Theologorum cœncordi conspirationi adversatur. Opus Patris Elizardi de recta morum doctrina hîc pro meritis laudare, ex eoque præclaras carpere gemmas non vacat, ne tractatum de gratia rebus moralibus impleam alibi differendis. Sed illud Deo benè favente, cum fusiùs, tum opportuniùs laudabimus suo loco.

Sed quid multis moror? Non erubescō Evangelium, nec in hac parte quidpiam mihi timendum reor, postquam supremus Ecclesiæ Pastor mentem suam tam apertè in Congregatione generali, feria quinta, die 24. Septembris anni

1665. propalavit. Tenorem decreti hujusmodi operæpretium duxi huc adducere: tum quia illud nostræ sententiæ apologiam meritò dixeris; tum quia purissimū Ecclesiæ Romanæ de moribus sensum verbis significantissimis declarat: tum quia cū de casibus conscientiæ in hac nostra Theologia, nisi rarò non egerimus, quid in moralibus vitandum sit, compendiosè veluti in tabella perspicies in hoc decreto, quod si antidotum, & flagellum laxitatum dixeris, à veritate minimè aberrabis. Tum demùm, quia illud in tractatu de probabilitate, ne prolixior esset dissertatio, omiseramus.

„ Sanctissimus Dominus Noster audivit non-
 „ sine magno animi sui mœrore, complures opi-
 „ niones Christianæ disciplinæ relaxativas, &
 „ animarum perniciem inferentes, partim anti-
 „ quatas iterum suscitari, partim noviter prodi-
 „ re; & summam illam luxuriantium ingenio-
 „ rum licentiam in dies magis exêscere; per
 „ quam in rebus ad conscientiam pertinentibus
 „ modus opinandi irrepsit alienus omninò ab
 „ evangelica simplicitate, Sanctorumque Pa-
 „ trum doctrina; & quem si pro recta regula
 „ fideles in praxi sequerentur, ingens erupturæ
 „ est christianæ vitæ corruptela. Quare ne ullo
 „ unquam tempore viam salutis, quàm supremam
 „ veritas Deus, cujus verba in æternum perma-
 „ nent, arctam esse definivit, in animarum perni-
 „ ciem dilatarî, seu veriùs perverti contingeret;
 „ idem Sanctissimus Dominus noster, ut oves
 „ sibi creditas ab ejusmodi spatiosa, lataque, per
 „ quam itur ad perditionem, via pro pastoralî
 „ sollicitudine in rectam semitam evocaret, ea-
 „ rumdem opinionum examen pluribus in sacra
 „ Theo

„ Theologia Magistris, & deinde Eminentiſſi-
„ mis, & Reverendiſſimis UD. Cardinalibus
„ contra hæreticam pravitatem generalibus In-
„ quſitoribus ſeriò commiſit. Qui tantum ne-
„ gotium ſtrenuè aggreſſi, eique ſedulò incum-
„ bentes, & maturè diſcuſſis uſque ad hanc diem
„ inſcriptis propoſitionibus, ſuper unaqua-
„ que ipſarum ſua ſuffragia Sanctitati ſuæ ſigil-
„ latim expoſuerunt.

„ 1. Homo nullo unquam vitæ ſuæ tempore
„ tenetur elicere actum fidei, ſpei, & charitatis,
„ ex vi præceptorum divinatorum ad has virtutes
„ pertinentium.

„ 2. Vir Equeſtris ad duellum provocatus,
„ poteſt illud acceptare, ne timiditatis notam
„ apud alios incurrat.

„ 3. Sententia aſſerens Bullam Cœnæ ſolùm
„ prohibere abſolutionem hæreſis, & aliorum
„ criminum, quando publica ſunt, & id non de-
„ rogare facultati Tridentini, in qua de occultis
„ criminibus ſermo eſt, anno 1629. 18. Julii in
„ Conſiſtorio ſacræ Congregationis Eminentiſ-
„ ſimorum Cardinalium viſa, & tolerata eſt.

„ 4. Prælati Regulares poſſunt in foro con-
„ ſcientiæ abſolvere quœcumque ſæculares ab
„ hæreſi occulta, & ab excommunicatione prop-
„ terea incurſa.

„ 5. Quamvis evidenter tibi conſtet, Petrum
„ eſſe hæreticum, non teneris denuntiare, ſi pro-
„ bare non poſſis.

„ 6. Confeſſarius, qui in ſacramentali Con-
„ feſſione tribuit pœnitenti chartam poſtea le-
„ gendam, in qua ad venerem incitat, non cen-
„ ſetur ſolicitaſſe in Confeſſione, ac proinde
„ non eſt denuntiandus.

„ 7. Mo

„ 7. Modus evadendi obligationem denun-
 „ tiandæ sollicitationis est, si sollicitatus confi-
 „ teatur cum sollicitante; hic potest ipsum ab-
 „ solvere absque onere denunciandi.

„ 8. Duplicatum stipendium potest Sacerdos
 „ pro eadem Missa licitè accipere applicando pe-
 „ tenti partem etiam specialissimam fructus ipsi-
 „ mer celebranti correspondentem; idque post
 „ decretum Urbani V I I I.

„ 9. Post decretum Urbani potest Sacerdos, cui
 „ Missæ celebrandæ traduntur, per alium satisfac-
 „ cere, collato illi minori stipendio, alia parte
 „ stipendii sibi retentâ.

„ 10. Non est contra justitiam pro pluribus
 „ sacrificiis idem stipendium accipere, & sacrifi-
 „ cium unum offerre. Neque est contra fidelita-
 „ tem, etiam si promittam promissione etiam ju-
 „ ramento firmata dandi stipendium, quod pro
 „ nullo alio offeram.

„ 11. Peccata in Confessione omissa, seu obli-
 „ ta ob instans periculum vitæ, aut ob aliam
 „ causam, non tenemur in sequenti Confessione
 „ exprimere.

„ 12. Mendicantes possunt absolvere à casu-
 „ bus Episcopo reservatis, non obtentâ ad id
 „ Episcoporum facultate.

„ 13. Satisfacit præcepto annuæ confessionis,
 „ qui confitetur Regulari Episcopo præsentato,
 „ sed ab eo injustè reprobato.

„ 14. Qui facit Confessionem voluntariè
 „ nullam, satisfacit præcepto Ecclesiæ.

„ 15. Pœnitens propriâ authoritate substi-
 „ tuere sibi alium potest, qui loco ipsius pœni-
 „ tentiam adimpleat.

„ 16. Qui beneficium curatum habent, pos-
 „ sunt

„ sunt sibi eligere Confessarium simplicem Sa-
„ cerdotem, non approbatum ab Ordinario.

„ 17. Est licitum Religioso, vel Clerico ca-
„ lumniatorem gravia crimina de se, vel de sua
„ Religione spargere minantem occidere, quan-
„ do alius modus defendendi non suppetit, ut
„ non suppetere videtur, si calumniator sit para-
„ tus vel ipsi Religioso, vel ejus Religioni pu-
„ blicè, & coram gravissimis viris prædicta im-
„ pingere, nisi occidatur.

„ 18. Licet interficere falsum accusatorem,
„ falsos testes, ac etiam Judicem, à quo iniqua
„ certò imminet sententia, si aliâ viâ non potest
„ innocens damnum evitare.

„ 19. Non peccat maritus occidens propriâ
„ autoritate uxorem in adulterio deprehen-
„ sam.

„ 20. Restitutio à Pio V. imposita beneficia-
„ tis non recitantibus; non debetur in conscien-
„ tia ante sententiam declaratoriam Judicis, co-
„ quòd sit pœna.

„ 21. Habens capellaniam collativam, aut
„ quodvis aliud beneficium, si studio literarum
„ vacet, satisfacit suæ obligationi, si per alium
„ recitet.

„ 22. Non est contra justitiam Beneficia Ec-
„ clesiastica non conferre gratis, quia collator
„ conferens illa Beneficia Ecclesiastica pecuniâ
„ interveniente, non exigit illam pro collatione
„ Beneficii, sed veluti pro emolumento tempo-
„ rali, quod tibi conferre non tenebatur.

„ 23. Frangens jejunium Ecclesiasticum, ad
„ quod tenetur, non peccat mortaliter, nisi ex
„ contemptu & inobedientia hoc faciat, patâ
„ quia non vult se subicere præcepto.

„ 24. Mollities, sodomia, & bestialitas sunt
 „ peccata ejusdem speciei infimæ, ideóque suf-
 „ ficit dicere in Confessione, se procurasse pol-
 „ lutionem.

„ 25. Qui habuit copulam cum soluta, satis-
 „ facit Confessionis præcepto, dicens: Commisi
 „ cum soluta grave peccatum contra castitatem,
 „ non explicando copulam.

„ 26. Quando litigantes habent pro se opi-
 „ niones æquæ probabiles, potest Judex pecu-
 „ niam accipere pro ferenda sententia in favo-
 „ rem unius præ alio.

„ 27. Si Liber sit alicujus junioris & moder-
 „ ni, debet opinio censeri probabilis, dum non
 „ constat rejectam esse à Sede Apostolica tan-
 „ quam improbabilem.

„ 28. Populus non peccat, etiamsi ab ulla
 „ causa non recipiat legem à Principe promul-
 „ gatam.

„ Quibus peractis, dum similium propositio-
 „ num examini cura & studium impenditur,
 „ interea idem Sanctissimus re maturè conside-
 „ ratâ statuit & decrevit prædictas propositio-
 „ nes, & unamquamque ipsarum, utminimùm
 „ tanquam scandalosas esse dampnandas, sicut
 „ eas damnat ac prohibet: itaut quicumque illas
 „ aut conjunctim, aut divisim docuerit, defen-
 „ derit, ediderit, aut de eis etiam disputativè
 „ publicè, aut privatim tractaverit, nisi forsan
 „ impugnando, ipso facto incidat in excommu-
 „ nicationem; à qua non possit (præterquam
 „ in articulo mortis) ab alio quacumque etiam
 „ dignitate fulgente, nisi à pro tempore existen-
 „ te Romano Pontifice absolvi.

„ Insuper districtè in virtute sanctæ obe-
 „ dictæ

„dientia, & interminatione divini judicii pro-
„hiber omnibus Christi fidelibus cujuscunque
„conditionis, dignitatis, ac status, etiam spe-
„ciali & specialissima notâ dignis, ne prædictas
„opiniones, necnon aliquam ipsarum ad præ-
„xim deducant.

In alia deinde Congregatione generali habita
18. Martii 1666. coram eodem Sanctissimo, &
Eminentissimis Cardinalibus in tota Republica
Christiana adversus hæreticam pravitatem ge-
neralibus Inquisitoribus à Sede Apostolica spe-
cialiter deputatis, editum est sequens decretum.

„Sanctissim D. N. post latum decretum
„die 24. Septembris proximè elapsi, quo vigin-
„tiocto propositiones damnatæ fuerunt, exami-
„natis sedulò & accuratè usque ad hanc diem
„infra scriptis aliis quadragesimum quintum
„numerus implentibus, per plures in sacra
„Theologia Magistros, ac per Eminentissimos
„ac Reverendissimos DD. Cardinales adversus
„hæreticam pravitatem Generales Inquisitores,
„eorum suffragia sigillatim super unaquaque
„ipsarum audivit.

„Propositio 29. In die jejunii, qui sæpiùs
„modicum quid comedit, etsi notabilem quan-
„tatem in fine comederit, non frangit jeju-
„nium.

„30. Omnes Officiales, qui in Republica cor-
„poraliter laborant, sunt excusati ab obligatio-
„ne jejunii, nec debent se certificare, ap labor
„sit compatibilis cum jejunio.

„31. Excusantur absolutè à præcepto jejunii
„omnes illi, qui iter agunt equitando, utcum-
„que iter agant; etiamsi iter necessarium non
„sit, & etiamsi iter unius diei conficiant.

„ 32. Non est evidens, quod consuetudo non
 „ comedendi ova & lacticia in Quadragesima
 „ obliget.

„ 33. Restitutio fructuum ob omissionem ho-
 „ rarum suppleri potest per quascumque elec-
 „ mosynas, quas antè Beneficiarius de fructibus
 „ sui beneficii fecerit.

„ 34. In die Palmarum recitans officium Pas-
 „ chale satisfacit præcepto.

„ 35. Unico officio potest quis satisfacere
 „ duplici præcepto, pro die præsentis & cra-
 „ stino.

„ 36. Regulares possunt in foro conscientiae
 „ uti privilegiis suis, quæ sunt expressè revo-
 „ cata per Concilium Tridentinum.

„ 37. Indulgentiæ concessæ Regularibus, &
 „ revocatæ à Paulo V. hodie sunt revalidatæ.

„ 38. Mandatum Tridentini factum Sacerdo-
 „ ti sacrificanti ex necessitate cum peccato mor-
 „ tali, confitendi quamprimùm, est consilium,
 „ non præceptum.

„ 39. Illa particula, *quamprimùm*, intelli-
 „ gitur, cùm Sacerdos suo tempore confitebi-
 „ tur.

„ 40. Est probabilis opinio quæ dicit, esse
 „ tantùm veniale osculum habitum ob delecta-
 „ tionem carnalem & sensibilem, quæ ex oscu-
 „ lo oritur, secluso periculo consensus ulterioris,
 „ & pollutionis.

„ 41. Non est obligandus concubinarium ad
 „ ejiciendam concubinam, si hæc nimis utilis
 „ esset ad oblectamentum concubinari, vulgò
 „ *regalo*, dum deficiente illo nimis ægrè ageret
 „ vitam, & aliæ curæ tædio magno concubina-
 „ rium afficerent, & alia famula nimis difficilè
 „ inveniretur.

„ 42. Licitum est mutuanti aliquid ultra sortem exigere, si se obliget ad non repetendam sortem usque ad certum tempus.

„ 43. Annuum legatum pro anima relictum non durat plus quam per decem annos.

„ 44. Quoad forum conscientiae, reo correcto, ejusque contumacia cessante, cessant censuræ.

„ 45. Libri prohibiti, donec expurgentur, possunt retineri usquedum adhibitâ diligentiam corrigantur.

„ Quibus maturè pensatis, idem Sanctissimus statuit, &c. (omnino ut suprâ.) Insuper districte in virtute, &c. (etiam ut suprâ.)

Ecce confectaria è vagæ probabilitatis fonte effluxa : ecce infelicem illam perversorum dogmatum segetem, quæ non paucis annitentibus modernis ad fidelium perniciem fruticarunt. Quando Parochi Rhotomagenses & Parisienses similes, aliasve propositiones ex libris Casuistarum excerptas, & syllabatim in eis inventas collegerunt, earumque damnationem ab Episcopis suis, quibus de fide, moribusque judicium jure divino concessum est, postularunt : quando easdem propositiones cum exemplaribus collatas Episcopi gravissimis decretis proscripserunt, continuò Probabilistæ propositionum quæstiores, collectores, & censores, vel falsidicos, vel præjudiciis suspectis occupatos esse dixerunt, aut certè Jansenismi impertinentissimè insimularunt. At post Apostolicæ Sedis oraculum, postquam Parochorum, Episcoporumque judiciis ipsius Summi Pontificis propositiones excerptas coram sacro Collegio tacti dolore cordis intrinsecus reprobantis autoritas accessit, ne mi-

renis

reris lector, si ad Augustini, & Aquinatis inconcussa & tutissima dogmata ab his corruptelis immensum aliena exigendas esse resolutiones morales contendamus.

Reflexio per modum orationis.

Sede age, ad Augustinum & Aquinatem revertatur oratio, unde paululum, rametsi meherclè non incommodè, digressa est. Tempus est, ut Sanctissimorum Doctorum elogio vix probè incepto, & omni nostro conatu superiori finem imponamus, non quòd ullus deberet esse laudum terminus, sed quia id arbitramur apprimè in elogiis esse utile, ut ne quid nimis. Ipsorum ergo patrocinia pro virili exoremus, quorum nomina omnem supergredi laudem fatendum est.

Hem itaque, Doctores sanctissimi, per eam, quâ ad Deum valetis, gratiam vos obtestor, ut Scholam illam solenni sacramento doctrinæ vestræ defendendæ obstrictam continuâ protectione dignemini. Facite ut doctrina vestra Thomistarum tutelæ concredita, Dominicanis defensoribus non careat, quæ defensoribus carere non potest. Ne abs vobis hanc familiam segregetis, neu deferatis, quæ vos in Parentum dilexit loco, quæve vos solos semper fecit maximi, seu vobis morigera fuit in dogmatibus omnibus, vosque agnovit amicos, tutores, & Patres. Eximius sanè, & incredibilis erga familiam & Scholam nostram vestri pectoris amor ita nos beneficiis hætenus affectit, ita ardentioris dilectionis nexibus in dies devincit, ut toti in conferendis beneficiis impensi esse videamini: sed reciprocus est

est, Sanctissimi Patres, in vos, cœlestemque doctrinam vestram verorum Thomistarum amor; non simulatus, non qualiscumque, non perfuntorius, sed intimus, sed visceribus infixus, utpotè hæreditarius, & ab uberibus suctus: quod enim S. Dominicus Augustini filius, quod S. Thomas Augustini discipulus lac dulciter biberant, nobis propinatum gustamus suaviter, medullitùs retinemus, ardentè prosequimur, intrepidè tutamur. Justum ergo est, Doctores incomparabiles, ut ingrata vobis non sit Schola illa, quæ non aliam gratiam spirat, quàm vestram. Justum est, ut si gratias vobis referre quantas debemus non possumus, habeamus tamen quantum maximas. A vobis totum, si quid in nobis est, hausimus; in vos totum grati refundimus, ut ad locum unde exeunt flumina, revertantur. Quod si tenemur colligere fragmenta, ne pereant, hoc est, ut exponit Bernardus, ne minima quidem beneficia oblivisci, quid à nobis perrentandum juberet gratitudo, qui à vobis totum possidemus, cogitari quidem fortassis, vel desiderari potest; dici verò, multò minus rependi, non potest.

Verum quia immaculata, labisque pura doctrina vestra immaculatos quærit animos, labisque puros, nec eam capit nisi mens munda, illam nobis à Deo exorate gratiam salutarem, quæ non solum expeditos animos avet, sed ipsa expedit, ac vilissimorum terræ commodorum amore liberat; puros noscit, & puros facit. Ita confore speramus. Sic vobis faventibus, intentatis ab adversariis nostris malis maturè occurremus; & defensæ doctrinæ

ſtrinæ vestræ gloriā nobis eximiam- æternūm
retinebimus, ut in ſancti Ordinis perpetuitate
perpetuos habeat custodes, prædicatores, & pro-
pagatores.

*Finis libri octavi Theologiæ
mentis & cordis.*







